



दरंनि रिफिनाय

(सेथि खोन्दो)



बर' थुनलाइ आफाद

BVP-1422
29/05/19

36/44

G-1998.

दरंनि रिफिनाय

(सेथि खोन्दो)

दरंनि रिफिनाय

(सेथि खोन्दो)



बड' पाब्लिकेसन बर्ड
बर' थुनलाइ आफाद

DARRANGNI RIFINAY (Part-I) : An Anthology of Bodo Selected Prose Edited by the compilation Board on behalf of the Udalguri District Bodo Sahitya Sabha and Published by Bodo Publication Board, Bodo Sahitya Sabha with the Financial assistance of Deptt. of Higher Education, Govt. of Assam.

दरंनि रिफिनाय

गाहाइ सुजुगिरि : बुद्धेश्वर बर'

सुजुगिरिफोर : कामेश्वर बर', बीरेन्द्र स्वर्गियारी, प्राणेश्वर बरनार्जी

दिहुनगिबि : 48थि बोसोरसालिया जथुम्मा
बर' थुनलाइ आफाद, दुधनै, ग'वालपारा
फेब्रुवारी 2009

© बर' थुनलाइ आफाद

बड' पाब्लिकेसन बर्ड

बर' थुनलाइ आफाद

मासिगिरि : मुझी ग'बिन्द बसुमतारि

हांखायगिरि : मुझी नब कुमार ब्रह्म

सोद्रोमा : मुझी गपीनाथ ब्रह्म

मुझी सीताराम बसुमतारि

मुझी उथ्रिसार खुंगुर बसुमतारि

मुझी आदाराम बसुमतारि

मुझी समर नार्जारि

मुझीमा रैरुब ब्रह्म

बेसेन : 130.00 रां

डि.टि.पि. : दुर्लभ भट्ट, टंला

सेबखांसालि : एन. एल. पाब्लिकेसनस
पानबजार, गुवाहाटी-1

रायफोरथाइ

जों मिथिगौ राव थुनलाइआ मोनसे रावगोनां हारिनि आयना महर। बर' आबो मोनसे रावगोनां हारि। बिहाबो राव थुनलाइ दड'। बे बिथिंनिफ्राय बर' राव थुनलाइआ बर' हारिनि आयना बादि। आयना महरनि राव थुनलाइयानो मोनसे हारिनि महर मुझीखौ गुबुननि खाथियाव बेरखांहोयो। बेखायनो मोनसे हारिनि राव थुनलाइआ जौगायोब्लासो बे हारिखौ जौगानाय हारि होन्नानै बुडे। गुबुन फार्सेथिं मोनसे राव थुनलाइआ जौगा नांगौबोला, बिहा थुनलाइनि मोनफ्रोम आयदा एबा बिथिंन आबुं जानांगोन अदेबानि थुनलाइनि मोनफ्रोमबो आयदा एबा बिथिंनि सोरजिनाय थुनलाइ थानांगोन। मोनसे राव थुनलाइनि जौगानाया बै रावनि लिरजानाय बिजाबनि अनजिमानि सायावल' सोनारा। सेबखांलानाय बिजाबनि अनजिमाजों सें स्रेडै बिजाबनि मानदान्दायाबो मोजां जानांगोन, जौगा थाखोनि गुबुन रावारि फरायग्राफोरनि गोसो बोखथाबनो हानाय जानांगोन। जौगासार राव थुनलाइ मोनसेनि आखुथाइफोरा जोंनि बर' रावाव सोरजिनाय थुनलाइफोराबो थानांगोन। बर' थुनलाइआव बे आखुथाइफोरा बेरखांजोबदोंना बेरखांजोबाखै बिजिरनायनि सम जाबाय। मोनसे जौगासारनाय राव थुनलाइनि फोथाराव खन्थाइ, रायथाइ, सुंद' सल', सल'-सल'मा, थुनफावथाइ दिन्थिगासे फावथाइ, जंखायनाय बिदैगोनां रनसाय, फेस्ला खन्थाइ, दाव बायनाय सल' (थुनलाइ), राव थुनलाइ जारिमिन, हारिनि राइजो जाबोनाय एबा बेंबोनाय जारिमिन, गथ' थुनलाइ, दोहोरोमारि बिजाब, धोरोमखान्थि आसारखान्थिनि बिजाब, जिउ सोलेरारि गियान आयदानि बिजाब सावसि बिगियान आयदानि बिजाब, राजखान्थिनि गियान होनो हाथाव राजखान्थि बिजाब, रांखान्थि आयदानि बिजाब, समाज खान्थि बिजाब बायदि बायदि मोनफ्रोम बिथिंनखौ आवथेनो हानाय बिजाब थायो। जोंनि बर' रावाव नाथाय दासिम गोजौवाव मख'बोनाय बादि गासैबो आयदाखौ बोनथुमनो हानाय थख'-थख' आयदा बिजाब गैजोबा। जायफोर आयदायाव बिजाब दड' बैफोरबो थोजासे अनजिमानि आरो थोजासे गियान होनो हाथाव जौगा माननि गैया। जोंनि बर' हारिआ भारताव थानाय ट्राइबेलफोरनि मादावनो बिजों गोनां आरो लिरनाय थुनलाइ गोनां दावगानाय हारि जाब्लाबो गुबुन गुबुन जौगासारनाय हारिनि राव थुनलाइजों फेर मारिनो हानाय जाथ'वाखै। बिखिनि बिथाथियाव सहैनोबोला जोंहा मावबावनांगौआ आरोबाव गोबां दंबावो।

बेखायनो बर' थुनलाइ आफादआ बर' राव थुनलाइ जौगा होनायनि थांखि जोंनो बोसोरफ्रा एफा हाबाफारिखौ फेहेरबोबाय थादों आरो थुनलाइनि बायदि बिथिंनखौ सुफुंनो हाथाव हाबाफारि लाबोदों। थांखिजोंनो माखासे थुनलाइगिरिनि आखइजों लिरनाय महराव थानाय बायदि आयदानि बेसेन गोसा बिजाबफोरखौ

बिख 'नानै आफादनि गोहोनि बेंख 'नाआव लाबोनानै सेबखांना दिहुनबोदों आरो गुबुन गुबुन लिरगिरिफोरआ लिरनाय बेसेनगोसा लिरबिदांफोरखौ बिख 'नानै एबा सायख 'नानै जथाय बिहुं महराव साफायना दिहुन बोदों आरो बिनि थाखाय आफादनि सिडववो बड' पाब्लिकेसन बर्डखौ दानानै लादों। आफादनि बिथोनलेखायैनो अदालगुरि जिलायाव सिगांनिफ्रायनो जिला बर' थुनलाइ आफादजों गायसनखानाय सुजु आफादनि नाजानायाव बुथुमखाना आरो डि.टि.पि. खालामखानानै दोननाय 'दरंनि रिफिनाय' मुंनि बिजाबखौ बिख 'नानै सेबखांना दिहुननाय जादों। बिजाबनि डि.टि.पि. आरो प्रुफ नायनायनि खामानिखौ मावखानानै सेबखांनायाव गोलेँ खालामनाहरनायनि थाखाय अदालगुरि जिला बर' थुनलाइ आफादनि गासै बिबानगिरि आरो सुजुगिरिफोरनिसिम साबायख 'र थाबाय। बिजाब दिहुननायनि हाबाफारिफोराव अराय नांगौ रोखोमनि गोसोआरि, राडारि मददजों लोगोसे सुबुरुन होबोनायनि थाखाय बर' थुनलाइ आफादनि फारियै आफादगिरि ड° कामेश्वर ब्रह्म, लेडइ आफादगिरि मुस्री बिश्वेश्वर बसुमतारि आरो मुस्री राजेन खाखलारी, गाहाइ नेहाथारि मुस्री कमलाकान्त मोसाहारि, नेहाथारिफोर मुस्री भजेन चन्द्र बर', मुस्री उपेन्द्र देउरी, मुस्री श'भाराम बसुमतारि आरो रांगिरि मुस्री महिलाल बसुमतारिनिसिम साबायख 'र थाबाय। लोगोसे फोसावग्रा दालाइ आफादनि मासिगिरि मुस्री ग'बिन्द बसुमतारि आरो सोद्रोमाफोरनिसिम फोसावनाय खामानियाव हेफाजाब होनायनि थाखाय आरो खम समनि गेजेरावनो बिजाबखौ साबना-हामना सेबखांना होनानै फरायगिरि राइजो राजानि आखाइयाव दिखांनाहोनो हाहोनायनि थाखाय एन. एल. पाब्लिकेसन फसंथाननि बिगुमा मुस्री अलक अधिकारीजों लोगोसे सेबखांनसालिनि गासै मावथिफारियानिसिम साबायख 'र जासिबाय।

जोबनायाव हाखु-दाखुनि गेजेराव दिहुननो गोनां जानायाव थालांनाय गेना-गोरोन्थिनि थाखाय निमाहा बिनानै, बिजाबखौ फरायगिरि गेदेमा नोंथांमोनआ अनसायोबोला, बर' थुनलाइ आफादनि नाजानाया जाफुंसारदों होन्नानै गोजोननाय मोनगोन।

बर' राव गेवलांथों।

बर' थुनलाइ जौगासारथों।


नोंथांमोननि फोथायजाथाव

मुस्री नब कुमार ब्रह्म

हांखायगिरि

बड' पाब्लिकेसन बर्ड

बर' थुनलाइ आफाद



अदालगुरि जिला बर' थुनलाइ आफादनि आफादगिरिनि रायफोरथि

अदालगुरि जिला बर' थुनलाइ आफादा 2004 मायथाइनिफ्रायनो जिलानि माखासे सायख'जानाय रायथाइ, खन्थाइ, फावथाइ, मेथाइ, सुंद'सल'फोरखौ जथायना बिजाब महरै दिहुननायनि हाबाफारि लाबोदों। बे बिथांखि बादियै 'दरंनि रिफिनाय' मुंनि बिजाबा सायख'जानाय माखासे रायथाइनि जथायनाय। बे बिजाबा 2006 मायथाइआवनो ओंखारनो गोनांमोनब्लाबो सेबखांनो हानायनि खाबुआ जायाखैमोन। नाथाय बर' थुनलाइ आफादनि बिबानगिरिफोरनि गोथार नाजानायाव देग्लायनो सेबखांजानायनि लामायाव फैबाय। साबायखर, बर' थुनलाइ आफाद आरो आफादनि गासै बिबानगिरि बिथां मोननिसिम। फरायग्राफोरआ बिजाबखौ अनसायोबोला जों नाजानायखौ जाफुंसारदों होननानै सानगोन।

रबिराम रामचियारी

आफादगिरि

अदालगुरि जिला बर' थुनलाइ आफाद

26 जानुवारी, 2009

सुजुगिरिनि फंनैसो

थानाय इं 2006 मायथाइनि बाथा। अदालगुरि जिला बर' थुनलाइ आफाद (2004-2007)आ जिला थुनलाइ आफादनि बायदि-बायदि थुनलाइयारि सोरजिनाय आरो बिजाब सेबखांनायनि हाबाफारि लायो। बेनिनो बाहागो हिसाबै जिलानि सिडव थानाय गोजाम आरो गोदान लिरगिरिमोननि रायथाइफोरखौ बुथुमना बिजाब महरै सेबखांनो आरो बेनि गाहाइ सुजुगिरि महरै आंनो बिबान होयो। बे हिसाबैनो थानाय 2006 मायथाइ अक्ट'बरनि 20, 21 आरो 22 आव भेरागाव आव "बर' रेबग्रा जथुम'नि जालांनाय सावराय मेलाव रायथाइ जथाइ बिजाब (Prose Anthology)खौ दिहुननो थि खालामो आरो रायथाइफोरखौ हानायखिनिखौ बुथुमना डि.टि.पि. खालामनाय जायो। नाथाय बै समाव रां-राहाखौ थि समाव अदालगुरि जिला बर' थुनलाइ आफादा (बै समाव दरं जिला बर' थुनलाइ आफाद) बुथुमनो हायैलाय ओंखारनाय लामा दरखंआव थानाबो नुजाथियाखैसै जोबोर दुखु नांथाव रोखोमै। बिब्दिनो नै बोसोर खावसे बारलांबाय।

इं 13 जानुवारी 2009 खालार मागो दमासिनि "उरुका" खालि अदालगुरि जिला बर' थुनलाइ आफादनि आफादगिरि मानिनां मुझी रबिराम रामचियारी बिथाड फ'नजों बे खामानिया मा हालोदाव दं खौरां लाहरो आरो फिन-फोरमायथिहरनो खावलाय हरो। लोगो-लोगो डि.टि.पि. अपारेटरजों सावरायो। बेबादिनो 21-01-2009 खालारखालि जिला थुनलाइ आफादनि आफादगिरि मुझी रबिराम रामचियारी बिथां, नेहाथारि मुझी नीलकान्त गयारी, बर' थुनलाइ आफादनि मानिनां नेहाथारि मुझी भजेन चन्द्र बर'जों आंबो बर' थुनलाइ आफादआ आसाम सरकारनि जौसिन सोलोंथाइ बिफाननि रांडारि अनसुंथाइजों साफायना दिहुननो गोनां बिजाबनि गेजेराव सेबखांनो लानाय सोमोन्दै सावरायलायो। आरो बर' थुनलाइ आफादनि 48थि दुधनै बोसोरारि जथुम्मायाव दिहुननो थि खालामो। जोबोर सुंथाब समनि गेजेराव मावफुंनायनि बिबान मोननानै, आंबादि सासे गुवार थुनलाइ मुलुगजों सोमोन्दो गैयि नेहाथ मेलेमनि बाउनांसाया सोर्गोनि "नन्दन-कानन"आव बिबार खाहैनो नायगिरनाय बादि सानना गिनाय आरो लाजिनाय मोनखाडे। होमब्लाबो, होनाय बिबानखौ रुजुननो थाखाय गोसोआव बोलोफोराना आंनि आंगो सुजुगिरिमोन आरो सानैसो थुनलाइ मावथि लोगो मोनखौ आथा-सिथा लोगोआव लाफाना मावनो लानायसै।

बोसोरनैसो सिगांहालागै दरं जिला आरो दा अदालगुरि मुडै मिथि जानाय

बि.टि.ए.डि. सिंनि बे जिलाया समनि लामा हान्थिबोनायाव महर सोलाय बोनो गोनां जाबोदों। बे जिलानिनो सिडव अराय सिबिनां, फुजिनां गोबां बर' फिसाफोरा उजिफैनायजों लोगोसे गावनि असे एबा आंगो हारिनि—राव, थुनलाइ, हारिमु, सोलोंथाइ, सोदोमसिखौ जौगा होनो नाजाथाबना जिउयै-माहामै गावखौ बाउसोमबाय आरो दाबो नांथाबना दं। बेफोरबादिनो, बर' थुनलाइ आफादिनि खामानि मावना, गोबां थुनलाइ मावथि बिथांमोना सोरबाबा गावनि जिउ बाउबाय, सोरबायाबा गावनि गोजोन जिउ दानो हानाय बिथा साखिखौबो ग'ले-ग'ले नागारनो गिबोआखैमोन, बिथांमोननि नाजानायावनो दरंजिला एबा दानि अदालगुरि जिलायाव थुनलाइ सोरजिनायनि बेगरखौ फोना होजेन्दोंमोन। बै बिथिडव, बे जिलानि थुनलाइ फोथारनि मावथि आगदारिमोननि मादाव 'सोरबां सुबुं' मुंख्लं बिहुराम बर', रुंसारि जीउराम बर', रुंसारि दलेश्वर बर' (आगु आफादगिरि, बर' थुनलाइ आफाद) रुंसारि ज'सेफ दैमारी, मुस्री धनेश्वर स्वर्गियारी आरो बिथां मोननि साया-सायखंफोर बादि थाफाबोनाय मुंख'जोबनो हायै थुनलाइ मावथि फोरखौ अराय गोसो खांनो नांगोन। बिथांमोननि नाजानायावनो गोबां थुनलाइ सोरजि जाबाय। बाथ्राया जाबाय, गुबुन-गुबुन समाव गुबुन-गुबुन रादाब बिलाइ; लाइसिफोराव सेबखांजानाय गोबां बेसेनबहा लिरबिदांफोरा बिजाब महरै बुथुमना सेबखां जायैआव गोमालांनो हमबाय आरो आनि-थानि जालांबाय। जोबोर जालानि गेजेरजों सोरजिजानाय स'नाबिदांफोर बादि बै लिरबिदांफोरखौ उनजोलैया बुथुमै-मानजियै गद महरहोना हारिनि थुनलाइ जौगाहोनाय बिथिडव खामानि मावलांनो हायो। बेनिनो फेरलेबसे महरै नैबे 'दरंनि रिफिनाय' बिजाबखौ सेबखांनो लानाय हाबाफारियाबो होनजायो।

नैबे 'दरंनि रिफिनाय' बिजाबखौ सुजुनो थाखाय लिरबिदांफोरखौ बायदि समाव ओंखारनाय बाइदि लाइसिनिफ्राय बुथुमनो लानाय समाव मोनसेल' खोथाखौ गोसो होनाय जादों बेनो जाबाय गोजामनिफ्राय लाना गोदानथारसिम गुबुन-गुबुन आयदानि बिथिंखौ नोजोर होना सायख'नो लानाय जादों। मानोना गोबां रोखोमनि लिरनाय लिरबिदां मोनो नाथाय बबेबा आयदा एबा बिथिडव मोननो थाड बिजाबखौ सुजुनाय समाव बुथुमखानाय गोबां जायगानि गोबां लिरगिरिनि लिरबिदांफोरखौ गोसो थासेयावबो सोफादेरनो हायाखिसै। बिनि थाखाय ओन्सोलनि गासै लिरगिरि बिथांमोननि खाथियाव खर' गंग्लाय-हरबाय। आसा खालामो, उनफोराव बिफोरबो गोसो गुदुं सुबुंनि आखायजों सुजुजागोन। फंसे बाथ्राखौ बुंखानो गोनां दि खायसे गोजाम लिरबिदांफोरखौ बै समाव लिरनाय रावनि महरखौ बेखौनो बे दोननाय जादों। गुबुन जेबो

फोसाबनाय जायाखै।

गिबिथिंजायनो फोरमायबोखानाय जादों दि बे बिजाबखौ बोसोरथामसोनि सिगांनो अंदालगुरि जिला बर' थुनलाइ आफादा रांनि आंखालाव दिहुननो हायाखैमोन। देग्लाय बर' थुनलाइ आफाद अदेबानि बड' पाब्लिकेसन बर्ड आ सेबखांनायनि बिबान लायामोनब्ला बिजाब महर मोननाय नंलामोन। बे बिबानखौ बड' साहित्य सभाया बानस'नायनि थाखाय अदालगुरि जिला बर' थुनलाइ आफादनि जानानै साबायखर बाउबाय।

सुजु आफादनो नांगौ बादि बोसोन, मदद आरो थुलुंगा होनायनि थाखाय बड' साहित्य सभानि मानाव गेदेर नेहाथारि मुस्त्री भजेन चन्द्र बर', अदालगुरि जिला बर' थुनलाइ आफादनि बोसोनगिरि मुस्त्री हरिचरण बर', आफादगिरि मुस्त्री रबिराम रामचियारी आरो नेहाथारि मुस्त्री नीलकान्त गयारी बिथांमोन बयनोबो सुजु आफादनिफ्राय साबायखर जासि हरबाय।

जोबनायाव आंखौ बिजाबखौ सुजुनायाव मदद खालामगिरि गासै सुजुगिरि आरो प्रुफ नायनायाव मदद खालामगिरि टंला ओन्सोलनि मेन कुमार बसुमतारी, प्रतुल कुमार बाग्लारी, सैलेन्द्र बर', देब' बर' आरो चण्डी राम बर' बिथांमोननो आंनि गोसो सिंनि गोथार अननाय आरो साबायखर जासिबाय। लोगोसे डि.टि.पि. अपारेटर दुर्लभ भट्टाचार्यआ गोख्रों आखाइनि बिलिरनाय आरो धैर्ज्यजों गोसो होसारनानै मावामोन बोला सानथांखिया जेब्लाबो जाफुंनाय नडामोन। साबायखर बाउबाय बिथांनोबो।

उनथाराव जालांनाय गासै गोरोन्थिनि निमाहा बिनानै बे बिजाबखौ बयनिबो अनसायनाय आरो बर' थुनलाइ मुलुगाव खना फारसेब्लाबो सुफुंनो हाथोंसै बेखौनो सुजु आफादनि जाना मिजिंथिबाय।

बुद्धेश्वर बर'

गाहाइ सुजुगिरि

27 जानुवारि, 2009

• नायखां बिलाइ •

• दरंनि सुंद' बर' जारिमिन	बिहुराम बर'	1
• बिमानि राव	मणिराम मछारी	10
• बोरलि दैमानि फारआव	जिउराम बर'	16
• फुथ्लि हाबा	धनेश्वर स्वर्गीयारी	24
• उदालगुरि	अमरेन्द्र स्वर्गीयारी	30
• हारि जौगानायाव सोलोंथाइ आरो थुनलाइनि गोहोम	जगत चन्द्र बसुमतारी	32
• बर'नि मुं दोननायनि आसार	दलेश्वर बर'	39
• भारतीय सावगारि महरनि सुंद' जारिमिन	रबि राम ब्रह्म	43
• आसामनि साहा आबादाव बड'-कसारिफोरनि भाव	प्रतुल कुमार भब्रा	47
• बर' सोदोबनि आखांल आरो सोदोबदा	ज'सेफ दैमारी	56
• बहुमाव बिमा लक्षीदेबीनि नुजाथिफैनाय	सुभाष चन्द्र बसुमतारी	59
• हरिसिडानि सिगां जारिमिन	रति कान्त बसुमतारी	64
• थुनलाइ आरो गावनि बेसेन मोन्दांथि	लहेश्वर बसुमतारी	68
• सेखार मौजायाव बर' थुनलाइनि दालाइ आफाद	इलिसन दैमारी	72
• मोननै दैमानि लामा सोलायनाय	मगेन्द्र नार्जारी	75
• जौ जुलि आरो शिक्षा	प्रेमनाथ बसुमतारी	80
• शिक्षानि थांखि, बर' फरायसा आरो बिमा-बिफानि जाल्ला	हलिराम बसुमतारी	90
• थांनाइ नैजिबा बोसोराव : बर' राव थुनलाइयाव रौतानि भाण्डारि	तीरेन बर'	99
• बेंक : बेसे गोजाम	महेश्वर बसुमतारी	107
• बर'फोरनि माहारि रंजानाय	डा: लीलाधर ब्रह्म	114
• 50 बोसोर आगानाव बर' थुनलाइ आरो सल'मा	नबीन मल्ल बर'	121
• दौरि गामि-देवरी गाँवनि सुंद' जारिमिन	महन्त कुमार ब्रह्म	133
• खन्थाइनि दाथाय	ग'पीनाथ ब्रह्म	137
• दरं जिला बड'-साहित्य सभानि सुंद' जारिमिन	हरि चरण बर'	163
• बर' खुगा मेथाइ बुथुमनाय आरो बेनि गोनांथि	नन्देश्वर दैमारी	172
• बिहुराम (बैसागु) बर' आरो रौता ओन्सोलाव बिथांनि मावखिन्थिनायनि गोहोम	रखेश्वर ब्रह्म	183

● बाला हामायाव थरथिंसे दै-बर' समाज फोसाबनायानि बागै	परेन दैमारी	186
● बर' माहारि दानायाव रबि चन्द्र कसारीनि बिहोमा	बिपुल बसुमतारी	189
● बर'नि गथ' बुरखायनाय मेथाइ	नगेन्द्र गयारी	193
● सिमां	गनेश चन्द्र मोसाहारी	198
● बर' राव थुनलाइ जौगानायाव खैराबारि दालाइ थुनलाइ आफाद मावबोनाय बिहोमा	लिउराम बर'	202
● आसामनि राजखान्थियारि अल'खद आरो बर'फोरनि खैफोद	गजेन हाज'वारी	208
● बर' खन्थाइ-मेथाइआव ख्रिष्टियान धोरोमनि बिहोमा	सिमसन दैमारी	216
● बर' सल'मा थुनलाइआव चित्तरन्जननि बिहोमा आरो नोजोर	चिनन नाजारि	235
● खारलुं आरो टाइपिकेल आखु	राजेन्द्र कुमार बसुमतारी	239
● गासै बिथिडव बर'फोरनि गेजेराव जांख्रिथाइनि गोनांथि	धीरेश्वर बर' नार्जि	245
● मुलुग जिउआरि आरो सुबुंनि दावगानाय बिथिंआव डारउइननि सानस्रि	बिनु दैमारी	251
● बर' समाजाव जौ: मोनसे नोजोर	बीरेन्द्र स्वर्गियारी	256
● थुनलाइनि महरसे	भबानि बाग्लारी	266
● टंलायाव बर' गायेन आरो थियेटारनि गोहोम	ग'पीन रामचियारी	269
● भारत उदांस्रि दावहायाव बर' जोहोलावफोर	लोमस्राउ दैमारी	272
● उइलियाम वर्दस्वर्थनि खन्थायाव मिथिंंगानि सावगारि	लक्षी कान्त रामचियारी	277
● मुलुगनांआरि सोमोन्दोआव थामथि मुलुग	चण्डी राम बर'	284
● बर' समाजनि हाबा	कमल कुमार बसुमतारी	289
● बर' थुनलाइ, बेनि जौगानाय आरो बर' फिसानि बिबान	भजेन चन्द्र बर'	296
● बिबुंथि : गा 36 बर' थुनलाइ आफादनि जोनोम सानाव बिहुराम बर'नि	गहिन चन्द्र बर'	302
● नबीन मल्ल बर'नि सुंद'सल'आव बर' समाजनि सावगारि	प्राणेश्वर बरनार्जि	316
● गथ'नि सोलौंथाइआव बिमा राव : बेसे गोनांथि	कामेश्वर बर'	320
● बोरैहाय सासे देरहासाद फरायसा जानो	बुद्धेश्वर बर'	328

दरंनि सुंद' बर' जारिमिन

—बिहुराम बर'



बिहुराम बर' (1941-1990) : बिथानि नआ रौता चारिआलिआव। दरंनि गोजाम खलबनि राफोद थुनलाइगिरि। जिल्ला आरो मिरु बर' थुनलाइ आफादनि गाहाइ नेहाथारि बिबानाव थाना हारि जौगानाय खामानि गोबां मावलांदों। बिथानि लिरनाय खन्थाइ बिजाब 'गिबि बिथाइ' आरो 'आसारबा' गानै बिजाबा बर' थुनलाइनि मुंख' जाथाव बिहोमा।

दरं मुड गिबिथार। जारिमिननि बिलाय फोराव बे मुड गोबाडै मख जादों। मुगानि गोदान दरं हाददा खोलाहा बुर्लुबुथुर, सोनाबहा बर-दैमा, साहा भुटान आरो अरुनासल आरो सानजाहा बुरि दैमानि गेजेराव। पन्डितफोरा दरं मुनि गुदिखौ संखानो नाजालांदों।

डः बानीकान्त काकतिया अस्ट्रिक 'दर' (दलं) गारावनिफ्राय दरं जादों होत्रा सान्दों (Assamese, its formation and development, 1941, pp-55) बिथानि बे सान्नाइया दरं हाददनि मिथिंगाजों गोरोबलाडे। मानोना बे हाददाव बुर्जामानि दैमा-दैसाफोर दडे। बे हाददनि सुबुंफोरा सानसे समाव बोइफोर दैमा दैसाफोरनि सायाव 'दर' (दलं) फोर होदोंमोनब्ला 'दर' निफ्राय दरं जानाया गोब्राब नड। नाथाय बाथाया जादों मबे हाददनि दैमा दैसाफोरनि सायाव गोदोनि मुगायाव होनाय गंसेबो 'दर' नुनो मोना। बेनि अनगायैबो बेवहाय अस्ट्रिक फोलेरनि मानसिफोर थानायनि जेबो जारिमिनारि फोरमान गैया। बेनिखाय 'दर' निफ्राय 'दरं' जादों होत्रायखौ थाबनो गनाइजाथावया।

“मंगलदैर बुरन्जि”नि लिरगिरि मुश्री दीनेश्वर शर्माया संस्कृत 'द्वारम' गारावनिफ्राय 'दरं' जादों होत्रा बुंदों। भुटान हाजो आरो दरं जिलानि गेजेराव थांलाय फैलायनि लामाफोर ('द्वारम') दंसोयोखाय बेनिफ्रायनो—दरं जादों होत्रा बिथांआ बुंदों। बेबो गनायजाथावया। दरंआव संस्कृत राव बुंग्रा आर्य सुबुं गैयामोन। आर्यहिन्दुफोरनि गाहाइ खुलि उत्तर प्रदेश, बिहार आरो पान्जाब निफ्राय दिब्वतसिम थांखा बुर्जा 'द्वारम' फोर दडे। थेवबो बोइ बोइ हाददनि

मुड 'दरं' जायाखैसे। संस्कृत रंथारै म्लेसफोरनि हाददनि मुडसो "द्वारम" निफ्राय दरं जादों होत्राइया संस्कृत नडै सोदोबखौ बोलोजों संस्कृत खालामनायनि फावल'सो।

डः प्रमोद सन्द्र भट्टासार्य बिथांआ "दै-गरं" निफ्राय दैरं जादों होत्रा सान्दों। 'दैगरं' माने गोजौ गरा गोनां दै (कामरूपा, 1973, बिः 45)। मुश्री भट्टासार्यनि सात्राइया दरं हाददनि मिथिंगाजों गोरबफैदों। नाथाय बिथांनि सात्रायजों दाजाबबावनो गुबुन गुबुन सानथायफोर दंबावयो।

'दैरां'आ मोनसे बर' सोदोब। रां सोदोबा बर'नि आगोमा सोदोब। रां माने थाखा, सोना, सोर्गो, गोथार, गोजान बायदि बायदि। गोदोनि सानाव माइ, दै, थाखा फैसा गोनां मानसिखौ रांसा एबा बियांसा होत्राय जादोंमोन। कामरुप जिलानि माइ दै बहरा मौजा मोनसेखौ बर'फोरा रामसा एबा रांसा बुडेमोन। बेनि मानसिफोरखौनो रामसियारी बुंनाय जायोमोन (The Kacharis, & Endle, 1911, pp-26)। बिसोरनिनो दोलोसेया उनाव त्रिपुराव थांनानै रियांसा मुं लाहैदों। बर'नि रामसियारी सोदोबानो उनाव Aryanised जानानै सोर्गोयारी जादों (मुश्री रूपनाथ बसुमतारी, बनजार, 20 जुन, 1973 इं)। बेब्दिब्ला नुनो मोनबाय दि बर'फोरनि 'रां' सोदोबा गोदो गोदायनि सानाव द्वामैना बाहायजायोमोन। थावनि हादद हाजो हाला आरो दैमा दैसाफोरनि मुंनि उनाव बर'फोरा गोथार सोदोब 'रां' दादेरना होयोमोन। गुवाहाटी खाथिनि माइरां मुंनि हाजो खोला गोवालपारानि दरंगिरि मुंनि थावनि, अरुनासलनि दिरां मुंनि दैसा, साहा गोवालपारानि गोरं मुंनि दैमा आरो बेफोरबायदि माखासे बिदिन्थायानो बे बाथ्राखौ फोरमान खालामो। बेदिब्ला दरं मुड दैरां एबा दिरांनिफ्राय जानायानो नोंगौ होनजायो।

दरं जिलायाव गोदो गोदायनिफ्रायनो बर'फोरा राइजो जाबोदों। जारिमिन मुगानि सिगांनि राजाफोरखोबो बर' राजा होत्रानैनो सात्रा लानाय जादों। बोइ समनि राजाफोरखौ पुरान बिजाबाव दिन्थिदों।

हिरन्यकशिपु
|
प्रह्लाद
|
बिरोसन
|
बलि
|
बान

बान राजानि फिसाजो उषाख्रौ श्रीकृष्णनि फिसौजोला अनिरुद्धआ द्वारकासिम हाबा खालामना लाडे। उषानि लोगोयाव बान राजाया माखासे बर' सिख्लाफोर हरफादोंमोन। बिसोरख्रौ द्वारकायावनो गारबोजोबनाय जायो। बै गारबोजानाय सिख्लाफोरा बर'नि मोसानायख्रौ द्वारकायाव फोसावो। दा बेख्रौनो गुजराटनि 'गारबा' मोसानाय होत्रा बुंनाय जायो बानराजानि राज 'उलाफादा' दानि तेजपुरनि साहा बागै थानाय अरुनाचल हाजो सेरनि भालुकपुडवमोन। भालुकपुंनि साहा अरुनासलाव दाबो बानराजानि राजउलाफादनि नेसानफोर दंसोयो। बेवहाय सिजुसि मुंनि दाबसे समायना रमायना थावनि दडे आरो बेनि सेरजोंनो बोहैख्खायबोदों दिक्रं दैसा। अरुनाचलनि सिजुसा, दिक्रं, रियां, दिरांजं, दिरां, टिराप बेफोर दैमा दैसा आरो थावनिफोरनि मुड बर' बान राजानि दिनाव बे दरं हाददनि मुड सानजा प्रागज्योतिषमोन जानो हागौ। मानोना पुरानफोराव प्रागज्योतिषपुरा मोत्रैमोन होत्रा बुंदों। नरकासुर आरो बान सानैबो बुब्बिसेनिमोन आरो बिसोरो लोगोथारमोन। दानि तेजपुर मुड 'आर्याकृत' मुं। बेनि गोदोनि मुड दिसपुरथारमोन। मानोना बोर्लि (भरलु) मुंनि दैसा फारफोराव बर' राजाफोरा दिसपुर मुंनि राजउलाफाद आरो कामाख्या मुंनि थानसालिफोर फसंदोंमोन। गुवाहाटी खाथिनि दिसपुर नोगोरा भरलु दैसा फाराव आरो बेवहायनो महीरंग दानब आरो नरकासुरनि राजउलाफादमोन। तेजपुराबो भरलु दैसा फारावमोन। नाथाय दा भरलु दैसाया थैबाय। थेवबो बेनि रेसफोरा दाबो दडे।

तेजपुरनि खाथियाव हारुपेश्वर। सिन्धु हावबारनि हरप्पा आरो दरंनि हारुपेश्वरनि गेजेराव माबाफोर सोमोन्दो थानो हानाय। सिन्धु हावबारनिफ्राय गुजरात खाथिनि लोथेलसिम इन्डो-मंगोलयड फोलेरनि लोथेलसिम इन्डो-मंगोलयड फोलेरनि मानसिफोरबो दडेमोन। आफगानिस्थाननि ब्राहुइफोरा सब हावबारनिफ्राय गावस्रालांनाय मानसि। आहोमफोरा आसामाव हाबनानैनो— बराहिफोरखो लोगो मोनदोंमोन। बे बराहि कसारी आरो सिन्धु हावबारनिफ्राय गावस्रालांनाय ब्राहुइफोरनि गेजेराव माबाफोर सोम्बोन्दो गैलायाब्ला डिमापुर आरो तेजपुरनि अन्थायनि आइजेंफोरा महेन्जुदार' आरो हरप्पानि आइजेंफोरजों गोरोबज्जायनाय नड नाथाय बेफोरनि मोनफा मोत्रैनि गेजेराव गोरोबज्जायनायनि नेसॉन मोन्दों। बेनिखायनो हरप्पा-हारुपेश्वर, ब्राहुइ-बराही बेफोरबायदि मुंनि गुदिफोर संखांबायनो हायाब्ला सिन्धु सोदोमश्री आरो आसामनि बर' सोदोमश्रीनि गेजेराव गोदान-सोमोन्दोनि रोदाबो मोनबायनो हागौ।

जारिमिन मुगायाव दरं हादरा बबेबा समाव हाबुं राज्यनि खोन्दोमोन आरो बबेबा समाव कमतापुर राज्यनि खोन्दोमोन। बेनि सिगांआव बे हादरा हालालि राज्यनि खावसेमोन। दानि बिहालियानो हालालि राज्यनि राज-उलाफादमोन। हालालि राज्यनि सोरबा सासे बर'या दानाय खफ्री गांसेखौ रासा भास्कर बर्मना लांनानै सिना गिदिझरि उवां-सुवांनो बान्था हैदोमोन। बेनो जारिमिननि मुंदांखा "हालालि" खफ्री। राजा भास्कर बर्मना उवां सुवांनो सोना-रूफानि बेसेनगोनां जिरादफोर बरायना होदोमोन। नाथाय बेफोरनि मुंसेबो लायाब्लानो—बियो बै "हालालि" मुंनि खफ्रीखौल' लांदोमोन। बेयो हालालि राइजोनि बर'फोरनि थाखाय इसेल' दुगानो गोनां बाथ्रा नड।

सिगां बुंबोनाय बायदिनो बान राजाया बर'मोन। बे बाथ्राखौ अध्यक्ष सदानन्द सलिहाया मानिनो लादों (शोनित अर्घ्य, 26 जानुवारी, 1968, तेजपुर, बुरन्जिर कासियलि रदत, बि-2)। बिथां सलिहाया मोनसे समाव दिक्रांनिफ्राय दिकरायसिम राइजो खुंनाय आरिमत्त खोबो बर' राजामोन होन्दों (शोनित अर्घ्य, 1968, बि-9)। जानो हागौ राजा आरिमत्तनि बिफाया बर' आरो बिमाया कार्बिमोन।

राजा भास्कर बर्मननि उनाव प्रागज्योतिषपुर राइजोयाव गुरलाइ गुरजाय जायो। बे समावनो बर' फोलेरनि राजा शालस्तम्भया तेजपुर खाथिनि हारुपेश्वराव गोदान राज-उलाफाद गायसननानै राइजो खुडे। बर'गामियाव मोन्नाय राजा रत्नपालनि गंधाम तामनि सिलेटाव शालस्तम्भखौ "गेदेमा म्लेस फोलेर'नि राजा होन्नाय जादों (ए हिस्टरी अब असम, 1933, पि.पि. 30)।

बे फोलेरनि राजाफोरनि मादाव हर्जर बर्मनानो (हाजोवारी बर्मन??) देरसिन आरो गोहो गोरसिनमोन। बै तामनि सिलेट गंधामाव हर्जर बर्मनखौ— "म्लेसाधिनाथ" होन्ना लिरनाय दं। दरं हादरनि मानसिफोरा बिथांखौ "कसारी राजा" होन्ना दाबो बुडे। तेजपुर नोगोर खाथिनि फख्री गेदेरखौ मानसिफोरा दाबो "हजरा फख्री" होन्ना बुडे। बे नोगोरनि बुर्लुबुथुर सेराव गेदेर अन्थाय थरसेयाव हर्जर बर्मना गावनि परिसयखौ लिरना गारलांदों। बेवहाय बिथांआ गावखौ "श्रीबराह" होन्ना सिमान लालांदों। बे अन्थाय हांखोखौ 1897 माइथायाव जारिमिनारि गेइट साहाबा नुनो मोनग्रोयो। बेव लिरनाय बायदिब्ला हर्जर बर्मना राइजो खुंनायनि माइथायया। 510 गुप्त अब्द तामहिनबा 829 ख्रीस्टाब्द। बे फोलेरनि आरो सासे गेदेमा राजाया जादों श्रीहर्ष। बिनि फिसाजो राज्यमतीखौ नेपालनि राजा जयदेबा (2) हाबा खालामना लांदोंमोन। जयदेब

फोलेरनि दिनाव लिरनाय नेपालनि अन्थाय हांखो मोनसेयाव राज्यमतीखौ—
 “भगदत्त राजकुलजा” होत्रा बुंदों। तामहिनबा, बराह बा बर’ फोलेरनि हर्जर
 बर्मन मोना भगदत्त बा नरकासुर राजानि साथाय सुथायमोन आरो राज्यमतीया
 भगदत्त फोलेरनि राजखुंगुरिमोन। बे फोलेरनि दासिम मोत्राय राजाफोरनि मुंखौ
 गाहायाव होनाय जाबाय।

राजानि मुं	माइथाय
शालस्तम्भ	655-675
बिजय	675-685
पालक	700-715
कुमार	685-700
बज्रदेब	715-730
श्रीहर्षदेब	730-750
बल बर्मन	750-765
सक्र-आराथि	765-800
प्रालम्भ	800-820
हर्जर बर्मन	820-835
बनमाल बर्मन	835-860
जयमाल बर्मन (बिरबाहु)	860-875
बल बर्मन 3थि	875-890
त्याग सिं	970-985

दासिम मोत्राय तामानि-हांखो, अन्थाय-हांखो अन्थाय हांखो आरो गुबुन
 गुबुन जारिमिननि रोदानिफ्राय मिथिना मोन्दों दि बे फोलेरनि सा नैजिसे राजाया
 राइजो खुंदोंमोन। नाथाय सा स्निनि मुंखौ दाबो बुरखांना मोनाखै (आर्लि हिस्टरि
 अब कामरुप, के. एल. बरुवा पि.पि. 84)। बे फोलेरनि त्याग सिङ्ग थैनायनि
 उनाव मोनसे गोदान राज फोलेरनि गेदेमा ब्रह्मपाला राजा जायो। ब्रह्मपालखौ
 खाइफाया आर्य क्षत्रिय होत्रो नागिरदों। नाथाय बे नङ्ग। बर’गामिनि तामानि
 हांखोयाव ब्रह्मपाला गावखौ भौम एबा नरकासुरनि फोलेरनि राजा होन्दों।
 नरकासुरा बर’मोन आरो बे बाध्राखौ आं “अन डि नेम प्रागज्योतिषपुर” मुंनि
 राइथायाव बिजिरना दिन्थिदों (खामरुप बिसोम्बि, 1977, पि-26-29)। बर’
 सुटीया राजफोरा ‘पाल’ लिरोमोन। “सुटीया रजासकलर नामर पासत ‘पाल’
 शब्दतो पोया जाय। एइबिलाक कारणत अनुमान करिब पारि जे जोगिनी तन्त्रत

उल्लेख करा 'प्लबक' बिलाकेइ सुटीयासकल'' (सुटीया, भूजा आरु मटक राज्य, श्रीसब्बानिन्द राजकुमार—1965, बि-14)

दरं जिलाव सुटीया बर'फोर द्दलामैनो दडेमोन-दाबो दड'. आहोम बुरन्जियाव मोत्राय सुटीया राजाफोरनि मुंसायाबो 'पाल'मोन। 1598 माइथायाव आहोम राजाया सुटीया राजाखौ दरं जिलानि रौता दैसा आरो धनश्री दैमानि गेजेराव सुटीया राजानि नाबालक फिसाजोला नारायन पालखौ राजा फसंना गारलाडे (देवधाइ आहोम बुरन्जि, बि-158)। बिदिब्ला आसामनि गोदोनि 'पाल' मुंसानि राजा फोराबो बर'सोमोन। नगेन्द्र नाथ बसुआ ब्रह्मपालनि फोलेरखौ'' "म्लेस-फोलेर" होत्रा रोखा रोखा बुंदों (डि स'सियेल हिस्टरि अब कामरूप, भलु.-1,1922, पिपि-177-78)। ब्रह्मपालनि फोलेरनि मुंफोरखौ गाहायाव होनाय जाबाय।

मुं	मायथाइ
ब्रह्मपाल	985-1000
रत्नपाल	1000-1030
पुरन्दरपाल
इन्द्रपाल	1030-1055
गोपाल	1055-1075
हर्षपाल	1075-1090
धर्मपाल	1090-1115
जयपाल	1115-1125

पाल फोलेरनि राजाफोरा जोबझांनायनि उनाव आसामाव आहोमफोरा हाबफैयो। बे समाव बर' फोलेरनि राजाफोरा सेरखाय बेरखाय जाहांबायमोन आरो गावबा-गावनि गेजेरावनो नांज्लाय खमज्लायफोराबो बाराद्राय जाबायमोन बेब्दियावनो जायगा दाब दाब-फिसा फिसा राइजो बेरखाडे आरो बेनि थाखायनो आहोमफोरा सानजा आसामनि बर'फोरखौ थाबनो फेजेननो हायो। बे समावनो सोनाब बागैनिफ्राय हारिया मेस फोलेरनि बर' राजाफोराबो दरं जिलायाव गोदान राइजो खुंफैयो। आहोम आरो मेस एरा कोस राजाफोरनि गेजेराव खनले खनले दावहा नांदोंमोन। आहोम आरो कोसफोरनि गेजेराव नांनाय बेफोर दावहानि सोमोन्दै दरं राज-उलाफादनि जारिमिनारि सासेया गोलावयै लिरथुमना गारलांदो। दरं राज बंसाबलनि बायदिब्ला महाराज नरनारायना खेबसे आहोमफोरनि

आखायाव गाञ्जियैनो जेननांदोंमोन। बै समावनो सिमांआव शिवा नुजाना बिखौ
गावनि फोलेरनि मोदाइखौ बावना गारनायनि थाखाय राइयो आरो गावनि हारिनि
धोरोम बाइदियै ईश्वरखौ बाउफिनोब्लानो दावहायाव देरहागोन होत्रा बुडे।

“प्रथम निशात देखा दिला सदाशिर।
बोले आपोनाब बीति एबिलिहि किय॥
कछाबीमते एभो कबिओ नाचन।
तोब जय हैबो कैलो स्वरूप बचन॥
एहि बुलि महादेवे अस्तर्कान भैला।
चेतन लभिया बजा सञ्चार छपाइला॥
सोनकाच नदीब तीबत थाना गाबि।
पातिला नाचन यत आनिया कछाबी॥
हंस, पाब, मद-भात, महिष, शुकर।
कुकुबा, छगल, उपहार निबन्धन॥
पातिला नाचन तथा मादल बज्जई।
सवारो माजत तुलिलस्त देओधई॥”

(दबरं बाजबंशाबली, वि-७३/७५)

बेनि उनावनो महाराज नरनारायना आहोम फोरखौ फेजेन्नो हायो। कोस
राजाफोरा बर' हारिनि धोरोम आसार आरो हारिमुखौ लाखिनो नाजादोंमोन।
बर' फोरनि थाखाय थानसालि फोरबो लुना होदोंमोन। बेफोर बाथ्राखौ—दरं
राजबंशाबलीनिफ्राय मिथिना मोनो।

“देरीब प्रतिमा थापि—कबि नमस्कार।
मठब दिलस्त नाम नलबे खामाब॥”

०००

“एघब कछाबी दिला ताहान देउब।
थुपि नृपतिक दिला प्रधान पूजाबी॥”

०००

“शपत खुराई बाजा बुलिना बचन।
शुनियो समस्त मोब वाक्य निबन्धन॥
गोहँई कमल आलि मध्ये सीमा कबि।
उत्तर फाले आछे यतेक कछाबी॥

सेहिफाले देरालय आछे यत यत।
 कोचे मेचे पूजिवेक मोहाब वाक्यत।।
 दक्षिणर फाले पूजा ब्रान्नाणे करिब।
 एहि निवक्तने सबे धर्म प्रवर्तिब।।”

(दब० बाजव०शाबली)

गोहाइकमल आलिखौ दरं जिला-खोन्दोयाव बर'फोरा “खुबेर आलि” बुडे। खुबेर आलिनि साहा बागै थानाय थानसालिफोरा गासैबो बर'नि जोबमोन। कोस राजाफ्रा दरंआव “इयान्डाबुनि गोरोबथा सिम राइजो खुंदोंमोन। नाथाय कोस आरो आहोम राजाफोरा थासेयावबो कुबेरआलिनि साहाबागै सिमसाफोरा सम सम राइजो खुंदोंमोन। हरिशिड्ड खाथिनि बड़िगामिनि साहाबागै सिमसा राजानि सोरबा सासे थान्दै दंमोन। बियो गावखौ सातराजा होत्रा लायोमोन। जारिमिनारि गेइटनिबायदिब्ला सातराजाया सिमसा राजामोन (ए हिस्टरि अब आसाम, 1933, पि-364)। नाथाय बर'फोरा सातराजाखौ बर'सोमोन होत्रा दाबो बुडे। अदालगुरिनि साहाबागै भैरबकुन्दयाव लाउथाय-गोरा आरो बांबुरगोरा मुंनि सानै गोहो-गोरा बर' बीर दंमोन। बिसोरो अदालगुरि खोन्दोयाव राइजो खुंदोंमोन। नाथाय बिसोरखौ सिमसाफोरा खैसारि खालामना बुथारो। बासिराम कसारीया सात-राजानि सेनापतिमोन। बिबो सिमसाफोरजों दावहा नांनो थाना थैयो। बासिराम बीरनि सल'खौ दरं जिलानि सेंग्रा सिख्ला बयबो मिथियो। दाबो बासिरामखौ लानानै खुगा मेथाय खनो बर'फोरा।

आदा बासिराम आदा बासिराम
 दावहायाव आंखौबो लांफा।
 आदा बासिराम आदा बासिराम
 गरायाव आंखौबो लांफा।

बीर बासिरामजों गरायाव गाखोफाना दावहायाव थांफानो—बर'फोरा दाबो हाबिला खालामो। बर'फोरनि असे बासिराम कसारीनि गुदि बिजौखौ दाबो संखानो हायाखै। बिनि सोम्बोन्दै बेखौनोल' मिथियोदि बि सोरबा सासे सात राजानि सेनापतिमोन। सिमसाफोरजों दावहा नांनो थानायाव बिखौ सासे फोथाय खेबस'नि हेफाजाबै सिमसाफोर बुथारो। बासिराम कसारीनि थुंग्रीया दाबो रौता खाथिनि दोउरिगामियाव दड'।

इं 1843 माइथायाव इंराजफोरा सात-राजानि राइजोखो सेख'ना लायो। बेनि सोलाइयै इंराजफोरा सिमसा राजानो मायथाइप्रोमबो रां 5,000.00

होयोमोन। बे रांखौ उदालगुरियाव होनाय जायोमोन (ए हिस्टिरि अब आसाम, गेइट, 1933, पिपि-364)

दरं जिलानि बर'फोरा उदांश्रीनि दावहायाव बइनिबो सिगां जादोंमोन। महात्मा गान्धीनि हांखाइनायाव बिसोरो जीउ मोदोम थै होदोंमोन। इं 1942 माइथायनि 20 सेप्टेम्बर खालि तेजपुर महकुमानि ठेकियाजुली थानायाव उदांश्रीनि फिरफिला दैखानो साथाम आगोमा बर'आ जीउ होदोंमोन। बिसोरो जादों (1) लैरेला कसारी, (2) रतन कसारी आरो (3) मणिराम बर'।

इं 1894 माइथायाव खाजाना बांहोनायनि थाखाय मंगलदैनि राइजोया इंराजफोरनि बेरेखायै सोमावसारदोंमोन। बै समनि दरं जिलानि बिगोमा एण्डार्सन साहाब आरो मंगलदै महकुमानि रेमसन साहाबमोना बे सोमावसारनायखौ गोख्रों आखायजों गादबो आरो पाथरि घाटाव बुर्जामानि मानसिखौ गावथारो। थैनायफोरनि गेजेराव बर'फोरबो दडोमोन। नाथाय उनाव जारिमिन लिरगिरिफोरा बिसोरनि मुंफोरखौ लिरखाडखैसै।

दोनै दरं हादबा उदां भारतनि आसाम राज्यनि मोनसे जिला। बे जिलायाव बर'फोरनि अन्जिमाया लाख 2 नि बारा नड। बे लाख 2 बर'नि खावसेया दा ख्रीष्टान धोरोम लाबाय, खावसेया ब्रह्म धोरोम लाबाय, खावसेया गोदोनि धोरोमावनो दड'। गोदान मुगानि बार मोन्दोंब्लाबो बे जिलानि बर'फोरा बारा दावगानो हायाखै। साख्रि-बाख्रिनि बेलायाव बे जिलानि बर'फोरा सुबिधाफोर मोनबांधाराखै। बेनिखायनो बे जिलायाव बेकार बर' सेंग्रानि अन्जिमाया एरगासेनो दड'। ■

बिमानि राव

—मनिराम मछारी



मनिराम मछारी (1926) : बेंबारिनि मेरबां चुबायाव बिथानि न'। आथिखालाव बिथानि नआ चिलंआव। बर' थुनलाइ आफादनि आफादगिरि (1993-1996) मासिखौ समायहोखांबाय।

मानसिया गोबां राहाजों गोसोनि सान्नायखो फोर्मायनो एबा नुजाहोनो हायो। बि गोसोनि सान्नायखौ फोर्मायनो हानाय राहाफ्रानो राव। राव पन्डित ओवेस्टार साहाबा “बोरैबा राहाजों गोसोनि सान्नायखौ फोर्मायनो हानायखौनो राव” होन्नानै बुंदों। आखाइ फायख्रबनानै लिंहरनायखौ, मेगन मोखेबनायजों गुबुन गुबुन सेव-फाव मिथिहोनायखौ, खर' हामजानाय एबा मानिनाय मिथिहोनायखौ, खर' हामजानाय एबा मानिनाय मिथिहोनायखौ, खर' साक्तिब्ला हामजायि मिथिहोनायखौ आरो मिनि खैरे मिनिबालाजों गोसोनि अन्नाय रंजानाय फोर्मायनायखौ गासै हारिनि मानसियानो मिथियो। बेफोर जादों मानसिनि 'गोदो-राव' (आदि भाषा) आरो बयबो मिथि मोन्नाय (Common Language) राव। मोसौ बिमाया अम' अम' गाबनाय आरो दाव बिमाया ख' ख' होन्नायजों फिसा लिंहरनायखौ जों नुनो मोनो। जुनारफोरनि बे गाबनाय आरो सेव बेवफ्राबो बिसोरनि (Common Language) राव। बिफां-लाइफां आरो बायदि जिराद महरफ्राबो राव होन्नानै बुंजायो। सेक्सपियारा मोनसे जायगायाव बुंदों। "There was a language in their very gesture".

नाथाय अब्लाबो गासै मानसियानो बेफोरखौ राव होन्नानै साना। राववा जादों गोसोनि सान्नायखौ फोर्मायनायनि बाहेरा महर जे महरनि मानसिफोरखौ मोनसे जायगानि एबा मोनसे हारिनि मानसिफ्रा जेब्लाबो समानै मिथिनो हायो। बिनिखायनो गुबुन गुबुन हादतनि राववा गुबुन एबा गुबुन गुबुन हारिहा गुबुन राव दं। मोनसे हारिनि रावखौ गुबुन हारिनि मानसिया सोलोडब्ला रोड एबा मिथिया। गाव आरो गाव हारिनि मानसिफोर मिथिनाय रावखौ मानसिया गावनि

राव एबा गाव हारि बिमानि राव होन्नानै सानो। हारिनि बि राव-महर गाबावनो जाखाडे लाइजाम-बिजाब, आरो हारिनि रावजाब (साहित्य)। मानसि जीउनि सान्नाय हनाय, दुखु-सुखु, दानाय-लुनाय (Art and Architecture), दान्नाय-देनाय (Sculpture), दामनाय-देनाय बायदिसिना फोरखौ फोर्मायनो थाखाय राव-महर गाब गानायावनो रावजाबनि सोमजिनाया। हारिनि राव महर गाब रावजाबा मोनसे आयना बादि जेराव नुनो मोनो बि हारिनि रोखा सायखं। बिनिखायनो हारिनि एबा बिमानि रावखौ मानसिया गावनिथार सानो। गोर्बोनि थै गोथां बादि गाव बिमा रावखौलाय सोरथो गावनिथार साना जासे थानो हायो ?

बिमा राव माखौ बुडे, मा जिराद, बेसे दाम गोसा, बे बिसयै बाबु सन्दीसरन बेनार्जीया 'बिद्या सागर' होन्नाय बिजाबाव बेबादि बुंदों "बिमानि गुरै गांखंआव आबु जायै जायै गथ'आ जे रावआव बयनिखुरै सिगां आइ होन्नानै लिंनो; सोलोडे; जायनि गुरै गोथाव सोदोबफोरखौ बुंनायाव (उच्चारण खालामनायाव) सालायनि दद्रा खद्राफ्रा बायो आरो फिदिं जायिया (जड़ता) खमजायो; बे उन्दै जीउनि दुखुफोरखौ खिन्थानो नागिरनायाव गथ'आ जे रावआव होखाव फारियो, खुसियाव थोर बोर जानानै सासे गथ'आ गुबुन सासेजों नांज्लाय खमज्लाय खालामनानै गावनि देरहानाय आरो मालाय जेन्नायनि खोथा बुडे; जे रावखौ गथ'आ गेलेनायाव, जानाय लोंनायाव, सेब्लाय-बोब्लाय खालामनायाव सोलोडे; मानसिया जे रावजों गाव गोसोनि दुखुफोरखौ खम खालामो; बिनो बि मानसिनि बिमानि राव।"

सयथियैनो बिमा रावआ बिमा बादिनो, गासै अन्जानायनि आरो सिबिजानायनि थानसालि। बिमा रावनि गोनां आरो दामखौ बिमा राव अनग्रा गासै हारियानो मिथिगौ। गाव बिमा रावखौ अत्रो सिबिनो रोडै मानसिया गावखौ, बिमाखौ अननो सिबिनौ रौडै फिसा बादि। बिमा राव गैजायि हारिया मावरीया गथ' बादि बिबादिब्ला हारिया गाव हारिनि सान्नाय-होनाय आरो हारिनि दामनाय-देनाय (Cultures) फोरखौबो-फोर्मायनो गोब्राब जायो। राव महर गैयाब्ला हारि जीउनि सान्नाय हनाय, दुखु-सुखु, आखल गियानफोरखौ माबोरैथो फोर्मायनो हानाय लाय? हारिनि रावखौ हारिनि गुबुन बोलोजों सुनायनो हाया। बिमा राव एबा हारिनि बोलोया हारिनि गासै गुन बोलोनि सायाव। राज-शक्तियाबो-बिनि सिंआव। राज-शक्तिया हारिनि दसेनिल' बोलो गोहो; बि गावनो बायफुजोबफिन्त्रो आरो थाफ्लाबाय थानो हाया। थानाय रावनि आमोला जोबनो गैयि। ग्रीक, संस्कृत, र'मान बायदिसिना रावफ्रा बे संसाराव

बेसेबा गोबावनि फ्रायनो दडे आरो बेसे गोबाव जे थागोन बिनिबो थेबो सिमना गैया। मोनसे हारिनि रावखौ गुबुन हारिनि राव एबा राज-शक्तियाबो फेजेत्रो हाया। थांनाथ नैथि गेदेर दावहायाव (द्वितीय महाजुद्धयाव) जापान आरो जार्मानि बे मोत्रै हादरआ मालायनि आखायाव जेनदों मोन। जेन्नानै बे मोत्रै हादरआ मालायजों सासोन खालाम जाग्रा हादर जादों मोन नाथाय बे मोत्रै देशनि राव आरो गुबुन गुबुन Culture-आ आग्लानि बादियैनो थाबाय थादों। बे मोत्रै हादरनि मानसिनि रावआव जेबो सोलाय सोल' जायाखै। जापानाव जापानि राव आरो जार्मानियाव जार्मानि रावआनो आग्लानि बादि गोम-गोमैनो सोलिबाय थादों। देरहानाय हारिनि रावआ जेन्नाय हारिनि रावखौ फेजेनहैनो हायाखै। हारिनि रावआ बेसे बोलोग्रा, हारिनि गासै जेनब्लाबो बियो जेन्ना। अब्ला हारिहा बिमा रावजों समान मा दं? एसे गोबाव नासों-नासा, गादामब्ला-गादामब्लि खालाम जाब्लाबो, आलाइ सिलाइ जाब्लाबो; बर' फिसाफ्रा हारि जीउनि लामा आन्दायनानै गोदावसोराव जाब्लाबो बर' रावआबो दिनै सिम थैयाखै। बर'-कसारिया मोनसे हारि बिखौ बर' रावआ गाव हारिनि मानसि फोरखौ सुंग्रि होगासेनो दं। नाथाय दुखुनि बाथ्रा बेबादि अनथाव थाव हारिनि बिमा रावथिडै बर'फा बाराद्राय नाडगोदै (अबहेला) खालाम बोदों। बिनिखायनो दाहालागै गाव बिमारावखौ दिखानो हायाखै आरो बिमा रावआव रावजाब दानो हायाखै। बुंनो लाजिथाव थाव हारिया अखाफोर दानखोमसियाव लामा आन्दायनाय बादि जानायाव खायफा बर'फा बिमा रावखौ बावबाय मोन; सोरबा सोरबाया दासिम बिमा रावखौ रायनो रोड आरो खायफाया बिमा रावखौ रायनो लाजियो। बे बर'फोरनि हारि जीउनि लामा आन्दायनायनि खोथा! मालायनि राव रायनायखाय गुबुनफ्रा सानो बर'फा गाव राव गैजायिखाय मालायनि रावखौनो सोलों नाडे आरो रायनाडे होन्नानै। नाथाय बर'फोरहा राव दडे। "असमीया सोदोबफोरनि 53 सोदोबाफ्रा बर' सोदोबफोरनि फ्राय लानाय।" श्रीबेनुधर शर्मा बिथांआ स्रायै बुडे। अब्लाबो बर'फ्रा गावखौ राव हावरीया सानो आरो बिमा रावआव ब'बा जानानै दं। राव थासेयावनो गुबुनफोरजों बर'हा राव गैया होन्नानै सान्जादों। बर'फ्रा दासिम जोंहा राव गैया आरो माबोरै रावजाब दानो हानो होन्नानै जिंगासिगासिनो दं आरो बिमा रावआव लाइजाम बिजाब दानो गुदु सान्नानै दं।

हासाफ्रा बर' रावखौ दोवान होन्नानै बुडे। जानो हागौ बिनिखायनो खायफा बर'फ्रा बर'राव रायनो लाजियो। नाथाय जों बेखौ मिथिगौ जे गासै रावआनो सिगांआव दोवान। गानिनि सिगांआव संस्कृत रावआबो-मोनसे

“रायथाय राव” (कथित भाषा) ल'मोन। (The child is the father of man). बिनिखाय बर'फोरहा जेबो लाजिनो गोनां गैया। खायफा बर'फ्रा बेखौबो सान्नो हागौ जे जों बर' बावबाय आरो रोंलिया होननानै। नाथाय बे अलनाखौ (Lame-excuse) बर'फ्रा होनो हाया। मानोना गावखौ, गावहारिखौ आरो गावबिमा रावखौ बावबाय होन्नानै सोर बुडे आरो सोर बुंनो हायो एबा बिनि थाखाय सोर मा अलना होनो हायो? बर'फ्रा गुबुन गुबुन रावफोरखौ सोलोंनो हादोंब्ला आरो हायोब्ला गाव हारिनि रावखौ सोलोंनो हायिनि जेबो हेंथा गैया। गाव हारिनि रावखौ बावनायनि थाखाय बर'फ्रा सोरखौ दुसिनो हागौ?

गुबुन हारिनि एबा गुबुन हादरनि रावफोरखौ जाय जेसे हायो सोलोडे। बर'फ्राबो गुबुन राव फोरखौ जेसे हायो सोलों नांगौ। गुबुन रावफोरखौ सोलोंनानै मानसिया गावनि रावखौ साबसिन फोसाबनो हास्थायो। रावजाब गैजायि मोनसे हारिया ओजाब गोनां रावफोरखौ सोलोडब्ला गाव रावआव रावजाब दानो गोब्राब। "A man who is ignorant of foreign language is ignorant of his own". होन्नानै गेटे साहाबा बुंदों। बर'फ्रा गाव-बिमा रावआव रावजाब दानायाव गुबुन रावफोरनि हेफाजाब लानांखागोन। नाथाय गुबुन राव सोलोंनानै गावनि रावखौ बावनो नाड। बर'फ्रा गुबुनि राव रोंब्ला गावनि रावखौ रोड जाथियो। मानो? अगियानखाय गुबुन हारिनि मानसिफ्रा मालाय हादरनाव हारिं हालायै थाहैब्लाबो गाव बिमा रावखौ थैजासे बाववा। जों नुनो मोनो जोंनि हादरयाव हारिं हालायै थाफैनाय गुबुन हादरनि मानसिया गावनि रावखौ बाववा। नाथाय गाव हादरनाव आरो गाव मानसिफोरनि गेजेराव थानायावनो खायफा बर'आ गाव हारिनि रावखौ रोड जाथिनानै दडे। बे मालायजों मिनि जानायनि बाथ्रा। सोरबा सोरबाया दासिम हाथाय बाथाय लामा-सामा, आरो टाउन सहरफ्राव गाव बिमा रावखौ रायनो लाजियो। खायफानियाव लाजिनायजों गिनायबो थादेरयो। बिसोरसो मिथिगौ, बिसोर माखौ लाजियो, बिसोर माखौ गियो। मा खालामनो! खोमसियाव लामा आन्दायनायफ्रा बिदिनो जायो। हारि जीउनि बद् (आत्मज्ञान) खोमानानै बर'फ्रा गावखौ फोथायनाय आरो गावखौ मान खालामनाय (आत्म-बिश्वास, आत्म-सन्मान) गैयि जानानै दं आरो लाजिनो गोनां हाबाफोरखौबो मावनो लाजियाखै। बर' हारिनि खोथा सानब्ला हांमा सुनाडे। बर'फ्रा सान्नो गाव हारिनि लाइ-लथरफोरखौ मालायनो गथायजोबनानै गाव मोनसे नेहाद हावरिया, लोर्बा थोर्बा, सेर्खाय-फेर्खाय मालायजों गादामब्ला जानाय माहारि गैयि हारि जानानै दं। बुंनो थाडेब्ला बर'फ्रा दासिम गावखौ बावनायाव (आत्म-बिस्मृतियाव) दं।

बर'आ मोनसे समाव देरहासार आरो राइजो गिरि हारिमोन बेखौ बयबो सिमान खालामो। आसाम-भारतनि बुरन्जि बेखेवनानै नायब्ला नुनो मोनो बर' हारिनि बोलो-गोहो, आखल-गियान देरहासार राइजो खुंनायनि खोथा। "The good qualities of Bodo in the past made rulers of Assam and if they worked in that spirit to-day they would be pillars of the society and building of the nation". (Shri Jairamdas doulatram former Governor of Assam) बिथांआ बर'फोरनि गोदोनि आखल-गियान, बोलो-गोहो, आरो देरहासार राइजो खुंनायनि खोथाखौ सुंग्रिनानै बाख्यायो। बाख्याय जानो गोनां गुन बर' हारिहा गैयामोनब्ला बे बादि बाख्याय जानाय नडामोन। बर'नि रावआबो मोनसे समाव देरहासार राव मोन बिखौ रावबो नड होत्रो हाया। बे आसाम हादरनि दैमा दैसा, हाजो-हाला आरो दुलाराय जायगाफोरनि मुंखौ दासिम बर' रावआव मोनो। बर' रावआ मोनसे समाव बे हादरनि राइजो-राव नडामोनब्ला बे रावआव मुंफ्रा बेबादि थानाय नडामोन।

बर'आ मोनसे गाव आबुर गोनां राव। सोदोबफोरनि थोत्रायाबो गोदै। बे रावनि लालि आरो हाबा सोदोबफोरहा सोदोब खावलि (खन्ड-शब्द modifying syllables) नि आफेत दंसोगारो। बि आफेत सोदोफ्रा रावखौ साबसिन आरो थावसिन खालामदों। 'गोसोम' बे मोनसे लालि सोदोब। आफेत सोदोबजों बेखौ बेबादि बाहायनो हायो। गोसोम : सोमज्रो, सोमज्रोज्रो; सोमखोर, सोमखोरखोर; सोमखेर, सोमखेरखेर; सोमखे, सोमखेखे; सोमश्रि सोमश्रिश्रि; सोमबा, सोमबाबा बायदिबिना! 'थु' बे मोनसे हाबा सोदोब। बे सोदोबखौ बेबादि बाहायनो हायो। थु: थुखे, थुखा, थुसे, थुसि, थुखब, थुखेब थुदाव, थुग्दिं, थुख्लं, थुख्लें, थुख्ल' थुद्लुन, थुद्ला, थुद्लाब बायदिसिमा जुथे आरो समायना सोदोबफोरखौ मोनो। बे रावनि सोदोबफोरनि बेरखांनायाबो मानि गोनां। जैरै—'खौरां' बे सोदोबनि मानिया खौगानिफ्राय बिखांनाय; 'सान्जा' बे सोदोबनि मानिया जे जोंनि फ्राय सान जायो-एबा अंखारो; 'बिबार'—बे सोदोबनि मानिया बारजों जाय गेवलाडे। बेबादिनो बर' सोदोबखौ सिफायनानै आरो बिजिरनानै नायब्ला बे रावनि गुबैखौ आरो दैनायखौ मोजाडै मोन्दांनो हायो आरो रावनि साबनाय आबुरखौबो नुनो मोनो। बर' रावखौ राव पन्डितफ्रा इनायनो बाख्यायो। धीरेन्द्र नारायन मुजुमदार एम.ए. बिथाड 'Welfare work in Hill Areas of Assam मुंनि लिरनायाव (प्रबन्धयाव) बुंदों "Languages of Bodo group are extremely nice

to learn; they have the extremely pliancy of agglutinative languages" बेबादिनो राव पन्डितफ्रा बर' रावखौ बेसेबां जे बाख्यायदों बिफोरखौ बेयाव बुंथिजोबनो हाया। बर' रावआ मोनसे बाख्याय जानो हानाय राव नडामोनब्ला, रावनि गुदै संनानै रावनि मोजां साबैखौ सायनो हाग्रा आरो रावनि गोदै रस सोंग्रा राव पन्डितफ्रा बर' रावखौ बेबादि बाख्यायनाय नडामोन। नंनायालाय नंगौ (अबश्ये) गोबाव दिन लिरनाय राव बाहायनाय गैयिखाय आरो बे रावआव लाइजाम बिजाब एबा रावजाब गैयिखाय बे रावनि बुर्जा थावनियाव मामोर हमबाय। बिनिखायनो बे रावखौ रायनायाव दद्रा-खद्रा मोनो आरो बारा गोथाव मोना। नाथाय बर' रावआ बेबादि जानायनि थाखाय जों सोरखौ दुसिनो? बे जोंनि हारि जीउनि बरादनि खोथा आरो बेखौ बर' साफ्रामबो मिथियो। बरादनि दोब्थिं जानायाव बेबादि दुखु-सुखुया बयहाबो दं।

बर'फ्रा गाव बिमा राव रायनानै गावखौ मान गोनां मोन्दांनांगौ। मालाया जोंनि रावखौ मुगैब्ला मुगैथों। बिनि थाखाय जोंहा लाजिनो गोनां जेबो गैया। जों जे रावनि गेजेरजों बे संसाराव बर' कसारी हारि बादियै नुजानो हादों बिनो जोंनि गोबानि धोन-बर' बिमानि राव। जोंनि गासै अन्नाय सिबिनाया बिमा रावनिनो जाथों। मालायनि मेगनाव बर' रावआ मुगै जाथावथावब्लाबो, बियो जोंजों अनजाथावथाव आरो सिबिजाथावथाव। मानोना जाय जायनि फ्राय अन्नाय, हेफाजाब बायदिसिना मोनो बियो बिखौ बाख्यायो आरो सिबियो। बर' रावआ थैहां थांहांनि गेजेरजो दिनैसिम थांनानै थायामोनब्ला माहारिनि मानसिजों गावखौनो मिथिहोनो हानाय नड मोन। बिमा रावनि बोरासो जोंखौ दिनैसिम संसाराव बर' कसारी हारि बादियै फोथांनानै दोन्दों। बेबादि बर' बिमानि रावआनो बर' बिसाफोरखो अनजाया जासे आरो सिबिजाया जासे थानो हायो होनलाय? गाव बिसाफोरनि नाड' गोदैयाव लाइजाम बिजाब गैयाब्लाबो बर' रावआ गाव लाय-लथराव दाबो गोरा। मानोना बे रावनि रायथाय राव (लौकिक साहित्य) आ बुर्लुबुथुर दै बादि दाबो दोहौ-दोहौ बोहैगासिनो दडे।

बोरलि दैमानि फारआव

—जिउराम बर'



जिउराम बर' (1938-2003) : दरंनि गोजाम खलबनि थुनलाइ मावथि। जिला बर' थुनलाइ आफाद (दरं)नि बारग' नेहाथारि। गोथौ सानमिनि रायथाइ लिरगिरि। बिथांनि नआ भक्तपारानि केहुतलि गामिआव।

मोनसे मानसि समाजनि मोनसे हारिमु सोद्रोमसिखो जाबोखां होनायआव बिसोरनि साखाथि फाखाथिआव थानाय दै-दैसा-दैमा, लैथो-लैथोमा, बार-नखा फोरनि गोबां गोहोम गोग्लैनाय नुयो। दैसा-दैमा, लैथो-लैथोमा फारआव एबा हायेनआव उजिना, बेवहाय दा जुनादफोरबादि जाना-लुंनाब्ला थायाखै। बिसोर आबाद खालामना, कल-कारखाना फजना, न'-बां लुना, नौ-नगर फाथिना, गोदान गोदान खौरां संना दिहुनना गावसोरनि समाजाव बिफोरखो बाहायनाय अनगाहैबो गुबुननि समाजावबो, बारदेर होयो। बेबादिनो दाब दाब जायगा हादराव थानाय गंसे गंसे दैमा-दैसानिफ्रायनो मोनसे मोनसे सोद्रोमसि रज 'खांबोदों।

भारतबर्षनि हिन्दु समाजनि बागै नायोब्ला नुयो भारत हादरनि दै-दैसा-दैमा फोरा भारतीयारी सानथाय दाहारआव आरो बिसोरनि हारिमु-सोद्रोमसिआव गोबांहै गोहोमा बाफबना दड। गुबुन गुबुन देशनि बायदिनो बे हादरनि माखासे जायगायावबो गोबां मानसिआ थानाय जायगा फोरावनो नौ-नगर, सहर, फोरा बे देशनि मुंदांखा दैसा-दैमा, लैथो-लैथोमानि फारआव जाखांदों। बेनि अनगाहैबो गोबां आरो गेदेर गेदेर मोदाइ थानशालि फोराबो दै फारफोराव थानादडे। भारत हादरनि सिन्धु, गंगा, जमुना, बुर्लुबुथुर दैमा फार फोराव गोबां मानसि थादों आरो बेफोर दैमा फोरनि मुंजोनो मुंदांखा आरो गोगोम-गोगोम हारिमु सोद्रोमसि जाफुंना फैदों। बिदिनो मिसराव नील, मेसोपटीयाव टाइग्रीस आरो इउफ्रेटिस, सिनाव हुवांहु आरो इयांसिकियाव सोद्रोमासिआ बहुमावनो मुंदांखा आरो बिफोर देशनि हारिमु सोदोमसि आव गोबां गोहोम होदों।

भारतीयारि मानसिनि गेजेराव तिब्बत मांगोलीय मानसिआ मिथिंगाखो मोजां मोननाय आरो बिसोरनो गोसोगोथौजों सिबिथि (भक्ति) होनाय नुयो। बिसोरनि मानआव हा-हाजौ, हाग्रा-हाग्रामा, दैमा-दैसा लैथो-लैथोमा, दफां-लाइफां, एम्फु-एनला जिबौ-जिबार, मसा-मुफुर, मै-मैदेर सैमा-अमा, मसौ-मैसो, नखा-बार, जोमै-मोब्लिब, हर-सान, अखां-अखाफोर, हाथरखि जायखलं बेफोर ईश्वरनि सोरजिथिब्ला नड ईश्वरनिनो मोनसे मोनसे महर-मुस्रि। बै अखां गोजौ नांहां नांहां गोजौ-गेदेर दंफांआ, सोम सोम लावसोम लनद्राय अन्थायआ, जिबौनि लानजाय बुस'लांनो हानाय गोसा दै दाहारआ, अखाफोर गोथै हरनि दोर हादरखौ सोमसिआ, मेगनखो मोदावखा लांजोबनो नायगिरनाय मोब्लिबनि मोब्लाबाआ, मोब्लिआ मोब्लिबनाय लोगो लोगो जिउ-जुनारनि बिखा बिबौ आरो बहुमखो खो खुमथि हाबहोनाय जोमैनि सेर सेर सोरखौबा होसोलांनाय सारखानि सोगोम नाया गमाहैनो सोरजि गिरि आनान गोसायआखो सोमजिखां होनायनि मोनसे मोनसे महर एबा फाव। बेफोर तिब्बत मांगोलीय हारिनि फोथायथि आरो बिफोर फोथायथिआ दुलाराय भारतीयारी मानसिनि गोसो-फोथायआवबो हाबसन्ना थाहैबाय। दिनि बिफोर मिथिंगा फोथायथि आरो सानथिआ भारतीयारी हिन्दु समाजनि मेलेमबाहाय बारसनना थाबाय; जायनि जाहोनाव बे समाजनि सानथाय दाहाराव दै दैसा-दैमाआ मोनसे जुदा मासि लादों। बिसोरबो मिथिंगानि महर मुश्रीआव गोमोहाबनाब्ला थायाखै बिसोर ईश्वरनि बागै थानाय फोथायथि आरो सिबिनायखो मिथिंगानि गेजेरजोंनो मांगोलीय मानसि फोर बादि होनाय नुयो।

दै दैसा-दैमा फोरा मिथिंगानिनो मोनसे गुबुन महर। बिमा सासेआ गावनि आहार दौना फिसाखो फेदेरनाय फोलावनाय बादि दै-दैसा-दैमाआरो मिथिंगानि महरजों बिमाबादि हाबा मावदों। मानसिआ दै-दैसा-दैमा फार एबा हायेनआव थाना बेवहाय आबाद खामना जादों; दै गांबा दै लोंदों दैआव दुगैयै दुलुबै गोसो मोदोमखो गोजोन होदों। बर'फोरनि मानाव दैसा-दैमाआ बिमा बादि। जायनि जाहोनाव बिसोर गावसोरखो दै बिमानि फिसा-डिमासा, दैन हारि=दैमारी होन्ना सिमान लादों। आर्य हारिनि मानसिफोराबो बिसोरो गाहायहै दैसा दैमानि फारआव थानाय नुना दैनिगथ'=दैम>दैत्य मुं होदों। बिसोरोबिमा मोदाय होन्नाबो सिबिदों खित्रे-खिमि, बुसाव-बुराव नायब्ला, लुमजाबा-खाजाबा दैआव फुजा हैयो। दैआव जेब्लाबो खिनो-आवखुनो मोना। दैआव-खिनाय-

आवखुनाय जेब्लाबो महापाप। भारत हादरनि हिन्दुमानसिफोरा माखासे तिथि-पर'बाव गंगा, जमुना, बुर्लुबुथुर दैमानि दैआव दुगैयोबा गावसोरनिआव बाफबना थानाय पाप फोरा सुम्रांजोबना रोंसारि जानो हायो होत्रा फोथायो। गावसोरनि थैलांना गोजोनाय मानसि फोरनि आसुमा फोरखो गोजोन होनो थाखाय दैसा-दैमा फारआव थांना खारहैयो। दैसा दैमानि दैखो गोथार खामना बेवहाय इश्वरखो लिंहरनाय रावफोर (मन्त्र) जों लिं हरना रायद बना बुडे—

अअ' गंगेस, जमुना सैबो गोदाबरी सरस्वती
नम्मदे, सिन्धु काबेरि, जहसम्मिन सन्नि धिंकुर

बर'फोराबो खेराय मोदायखो सिबिना दैखा-दैमाखौ राइदबना बुडे—

आयो, हाजौ खरानि दैमा दैसानि सान्थिफोर।

बोरली बोराली, बेनश्री-धनश्री आइ बिमाफोर

नोंसोर साहादै खोलाहा जिरि जिरि बोहैलां।

खोला हारिआ साहा बोहोहैना नोनिसखो गोजोनहोलां ...

बायदि सिना।

बेफोर बादिनो तिब्बत-मंगुलिय मानसिनि दैसा-दैमानि एबा मिथिंगानि सायाव थानाय फोथाय थिआनो भारतीयारी हिन्दुसमाज आवबो हाबसन हैनायाव भारतीयारी हारिमु सोदोमश्रीआ महर-मुस्रि जोमनायआव गोहोम होदों। डा: प्रमोद चन्द्र भट्टासार्यआ बुंदो हार्सा (असमीया) समाजाव खेति-बाति खामनाय हुदा, न-बां लुनाय खामना लाबोबायदि बायदि नेम, जानाय-लौनाय थानाय आबानाय सिकार खामनाय, फान्दो खानाय गाननाय-जोमनाय, गाय-गहना, सिरिदाय-बावनाय, जादु-मन्त्र, मय मोहिनी, सलोबाथा-खुगा मेथाय, शाव-शपनि होनाय बोर आशीर्बाद, सुबुं आसार बिसार, सुबुं उतसब परब सोदोमश्रीआव बेफोर हारिमु सोदोमस्रि तिब्बबर्मी—किरात एबा बर' फोरनिफ्राय गोहोम गोलैदों (1)। दैसा दैमा फार फोराव थानायखाय, दैसा दैमाजों सोमोन्दो थानाय माखासे जिबारनि मुं आरो आसार-बिसार बर' फोरनिफ्राय हार्सा फोरनियाव फैदों (2)।

दरं जिलाखो बुखावना खामनाय शोनित जिलानि गंसे दैमानि मुड जादों बोरली। बोरली मुंखो दा हार्सा रावजों भरेली एबा भरली मुं होदों आरो गोदोनि समयआव संस्कृत रावआव लिरनाय बिजाब कालिका पुराण बिजाबआव

भट्टारिका होत्रा सिमान होदों। बे दैमाखो दरं शोनितपुर जिलानि बर' फोरा खेराय मोदाय होब्ला रायदबना सिबिबोदों। बे दैमानि दैया इनाय बोदोर बाउली। जेब्लानो जि गोसो जायो बिखोना खालामो। दसेआवनो बोरानि फ्रायबो दैआ रौ-रौ, रा-रा, सौ-सौ सा-सा फायना, दोब्ली-दुब्ला, हाजो हाला लुमबो बियो दंफां लाइफां खुरखां-खुरसि खामो आरो दसे आवनो दलर थायो रानासाब गाबना गोबान जाना होयो। बेनि महिमाखो जेब्लाबो बुजिनो हाया, बुजि मोना। बोरली गमामा बाउली, फागली, बेनि दैआ बे बायदि बाउली खाइनो जाना हासो बर' फोरा बाउली दैमा होत्रा बुडे मोन। बाउलीनिफ्रायनो बाउली>बौली>बोली>बोरली, भरली जाबोदों। बाउलि दैआ जाते जेबो अपाय अमंगल खामा बिनिखाय बिमा होत्रा गाजिबदों आरो सिबिबोदों बेनि फारआव बोरली बिमानि थाखै हांखो-दाउ बोरमा-अमा हासना फुजा होदों मोन। जानोहागौ बेनि गोहोखो नुना बर'फोर बायदिनो गुबुन हारिनि मानसि आरो बे दैमाखो "भैरबी देवी शक्ति" महर जों सिबिदों मोन होत्रा कालिका पुरान बिजाब आव फोरमायदों। दरं जिलानि गेजेटी सेरय आवबो बे दैमाखो 'भैरबीआ शक्ति बिमानि महर मुखां (अवतारा), बिखो गोदोआव गुवारहै बे दिहिंआव सिबिदोंमोन (3)। सदानन्द सलिहा बिथांआ 'तेजपुर बुरन्जिर कासियालि र'दत" मुनि रायथाइ दोंसेआव लिरदों भरली दैमाखो केसाय खाइती (गोथां जाग्रा) मोदायजो महर है सात्राय जादों। भरलीआ थारहैनो बाउली (भैरबी), बियो दसेआवनो गोजोनो आरो दंसेआव खोंगोजों जोंखाडे। बेनिखायनो गोदोनि मानसि फोरा मानसि दानस'ना बे मोदायजोखो गोजोन होदों मोन। दाबो खालाहाथिं थानाय मानसि दानस'नाय हाजो आरो साहानि केसाय खाइती थानसालिआ बिनिनो साक्षी होदों (4)।

बे बोरली दैमाआ दैजों आबुं जाना बोहैलांगोन मा महर लायो आरो बेव मिथिंगानि मा महर बेरखाडे बेनि मोजां फोरमायथि मोनसे इं 1905 माइथायआव फोसावनाय दरं जिलानि गेजेटीयेरस मोनो। बे फोरमायथिआ एसेबां मोजां बेखो बर' राव आव दानस्लायबा नायनो मोजां बिबारखो बसना लाबोब्ला बिबारा रानज्रब लांनाय बादिसो जागोन सात्रा इंराजि रावखोनो दिखांना होनो लुबैबाय। It first flows east between two ranges of hills and then turns sharply to the south, and flows, a tortuous course to the Brahmaputra, which it joins about seven miles (about eleven kilometers) east of Tezpur town. The gorge through which the

river makes its way of great natural beauty. The hills covered with forest rise steeply from the waters edge, and the noble river hurries on over its rocky bed now dashing down a rapid foaming and boiling round a sunken rock and anon lingering in still deep pools where the mehsers love to lie (5) बेनि जाबाय मिथिंगानि फिसाजो बिमाजो बोरली बे दैमाआ अका हाजौनि (6) फ्राय अंखार जेनना हाजौ सेर सेर 193 कि.मि. आरो हायेनाव 56 कि.मि. बोहै बोना भालुकपुंआव बे जिलाव हाबफैदों। खौरां दडे बै दैमाया बानराजानि समाव दानि शोनितपुर जिलानि तेजपुर नोगोरनि जिंथिं बोहैलांदों आरो बानराजाआ भैरबी मन्दिरखो बे फारआवसो फजदोंमोन। इं 19 शतिकानि आगोल बाहागोआवसो लासै लासै सान्जाहा बोहैलांना सरासनम्रा 8 कि.मि. गोजानथिं बोहैलांखारबाय (7)। गोजौनि खौरांखो B.C. Allen महाशया लिरनाय समावबो 7 कि.मि. ब्लामोन आरो दा बियो 8 कि.मि. जाहैबाय। बे बिमा बेदिनो बियो सान्जाहाथिं दावखोगासिनो दडे। दाउखु दाउखु गाव 8 कि.मि. मोनहैबाय। बे बिमा बोरली दैमाआ बोदोर बाउलीहै दावखु गासेनो थांबाय थानायनि मोनसे मोजां आरो गोसोआव नांनाय खौरां दोंसे दडे।

शोनितपुर राइजोनि राजा गुरबांआ जे शिबनि इनाय सिबिसुला मोन बेनि माखासे खौरां दडे। बिथां गुरबांआ बान राजानि सोमाव शिबआनो बुहुमनि बिगोमा (बिश्वनाथ) मोन। बियो मोदाय फोरानि गुरु बिष्णु, कृष्ण ब्रह्मानि थाखै बान राजानिमानाव देरसिन। शिबआसो गोजोन होनो थाखाय बिफोर खामदोन रावबो मानसिआ बिदि खामना दिन्थि बुहुमनि जारिमिनाव गैया। खेबसे गुरबां राजाआ शिबजों नुजाजानो थाखाय भोमोरागुरिआव सिबिहाबना थायोब्ला स्वर्गनि राजा इन्द्रआ गुरबां राजानि सिबिनायआव सुसि जाना शिबआ बोर होबा बोर मोनना बोलोग्रा जाना उदखारि खामगोन होत्रा गिना गुरबां राजाआ शिबनि बाउनाइ फुजाखो चन्द्र आरो पुलमनि मुंनि सानै मोदायनो हगार हरो। चन्द्र आरो पुलमनिआ स्वर्गनि फ्राय फायना गुरबांआ शिबखो सिबिनाय सेफायनो थाखाय भोमोरागुरि सिम फैयो। नाथाय बिसोरो गुरबां राजानि महरखो नुनानै बिसोर गुरबांनि खाथियाव थानो हायासै। बिसोर गुरबां राजानि शिबखो सिबिनायखो सेफायनो नाजायै नाजायै इयुनाव गावसोरो समाजनि अनागारहै हाबा जायो। बेनिफ्राय चन्द्रनि जुलिआव आरो पुलमनि उदैयाव हिन्जावसा

गथ' सासे उजियो। बिसोरो स्वर्गनि मोदायफोरजों मुगै जानो गिना गथ'साखो भोमारागुरिनि हाग्राव गारना थाडे।

बिथिं गुरबां राजानि बे भोमारागुरि थानसालिआव सावन मुंनि सासे मानसि दडे मोन। बिनि मुंखो आर्यफोरनि बिजाबाव सावनामनि मुंहोदों। शावनाआ बनखननो थांना चन्द्र आरो पुलमनि गाबना थांनाय हिन्जावसा गथ'खो मोनो। एसेबां गथ'सा सासे आलाय-सिलाय हाग्रामाव गोग्लैना थानाय नुना गथसा खनना लाबोयो। सावनाआ बे गथ'साखो खनना मोननाय खाय गथ'सानि मुंखो खनश्री मुं होयो। बिखोनो आर्य फोरनि बिजाबाव कन्यका मुं होदों।

खनश्रीआ सावनानि नआव अखाफोर गावदां बादि लब लब देरो। सावनाआबो गुरबां राजा बादिनो शिबनि सिबिसुलामोन। खनश्रीआ सावना फिसिग्रा बिफानि फ्राय शिबआ सोर, बियो बा महर गाबनि, बिखौ सिबिबा मा जायो मा मोननो हायो बिखो मिथिनो मोनो। बेनि फ्राय खनश्रीआ शिबखौ सोर, मा बादि सिबिबा नुनो आरो मोननो हायो बिखौ बिनि फिसिनाय बिफा शावनानिफ्राय मिथिना लायो आरो शिबखो नुनो आरो मोननो थाखै गुरबां राजा बादि गोब्राबहै सिबिनो हमो। नाथाय, शिबआ मदाय जाना चन्द्र आरो पुलमनिआ समाजनि सान्थि गारना अनागार हिसाबयै हाबा जानायाव उजिनाय खनश्रीनि सिबिनायखो लानो आरो बिजों नुजानो मुगैयो। बेवहाय सावनाखो उजि होनाय बिमा बिफाखो नुनो मोनै मावरिआ खनश्रीआ बे खोरांआव इनाय दुखु मोनो। अब्लाबो खनश्रीआ गावनि गोसोखो सेफाआ ब्लावनो शिबखो फिन सिबिनो हमो। नाथाय मोदाय जानानै समाजनि अनागारि हाबा मावनायनि फिसानि बे फुजाखो गनायनो हामारा होन्ना बुंहरहरो। नाथाय गावनि बिसि पाबर्बतीखो सिबियो आरो ससि खामना हायोब्ला पाबर्बतीजों लोगोसे नुजानो हागोन होन्ना बुंडे। अब्ला दुखुथीयाआ शिबखो सिबिनो दोनथना पाबर्बतीखो सिबिनो थाखाय खनश्री हमो। गिलाधारी, डिपुता बुरीगां, गाबरु, बेलश्री, मानश्री आरो धनश्री बे स्नि बिब' बिननाव राइजोआ खरांआव दैनि गैयि जायोब्ला पाबर्बतीआ गाव जैरै गावनि होवा शिबनि थिनथिखो लाना भैरबी महर लाना हासिनो फ्राय दै लाबोना होनाय बि बादिनो खनश्रीआ गाव जेबो पाप गैया मोन ब्लाबो बिनि बिमा बिफा मोदाय जाना मावनायसमाजनि अनागारि हाबानिफ्राय उजिनाय महापापनि फ्राय गनोब्ला आरो बहुमनि बिगोमा बोइनिबो होथाय गिरिनि नुजाथायखो मोननोब्ला मेगननि मोदैजों दैमा बोहैहोनो मोदोमखो

गिलिहोना बुर्लुबुथुर दैमाआव बुरिगां दैमाआ लोगो नां नांनाय दैमा खख्ला (संगम) ओ बिसोर शिब आरो पाब्बतीआ उमा महर लाना जायगाव शिबनि हार्थेखो हमना शिबआखो सिबिनो हायोब्ला बिसोर नुजागोन होत्रा पाब्बतीआ बुडे।

अब्ला खनश्रीआ बोदोर बाउली (भैरबी महर लयो) जाखाडे आरो खेनाय खो हेगार खावना थिनजायनो हमो। मेगनानिफ्राय र' र' मोदै अखारनो हमो आरो मेगन मुदैआ र' र' गना दैमा महर लाना बोहैनो हमो। बेनो जाबाय बोरली दैमा। हार्सा रावजों भरली, संस्कृत रावजों भट्टारिका। बोरलीआ दावखुदों बिश्वनाथ सिम। बियो बिनि गोसोनि हाबिला दोहोन (धन)। गाव दडेमोन तेजपुर साथिआव दा बियो बिश्वनाथखु नायगिर नाइगिर दावखुना तेजपुरनि 8 कि.मि. सान्जाहा सफैबाय। नाथाय बिश्वनाथ दड तेजपुर सान्जाहा 26 मायल गोजान बुर्लुबुथुर दैमा फाराव जेराव बुरिगां दैमा लोगोनांदों। बेनि दै-खख्लाआव शिब आरो पाब्बतीआ उमा महर लाना दडे। बिसोरखो नाइगिरना खनश्रीआ भैरबी थानसालिआव थादोंमोन। बेनिफ्राय बियो दावखुना "रुद्रपथ" सिम थांना शिबनि हार्थेखो मोनोनामा होत्रा आशा खामना दांगोरोम हैयो। नाथाय बिश्वनाथआ दाबो बिनि गोजानआव दडे। मेगन मुदैआ बेनि मेगननिफ्राय ओंखारना बोहै गासेनो दडे। जायनि जाहानाव बियो जेबो नुवा। मेगन जों बियो नुवाब्लाबो सौगु सौगु सौथु बोदोर बाउलि जाना हाखायजों लामा दांगोरोम दांगोरोम दावखु गासेनो दडे। बियो बिनि लुबैनायखो मोनथार नांगोन। बिनि सिमांआ मुगथांआव नुजा थारनांगोन। दुखुथिआ मावरिआ खनश्री मोदोम सैलेर साथिं बार लखा-अनथाय सारखा गासैबो थांदों सानदोंआ खामफ्लेदों। नुयि मेगनजों थाबायना सौगु सौगु हार्थेनि हासिफोरा गुबुरुना गाराय जाबोबाय। दावखुनाय लामायाव बेसेबां दंफां लायफां, बोन्दों बेनला हाग्रा-हाग्रामा एमफु-एनला, जीउ-जुनार लोगो मोनदों। जीउनि लोगा (सारथि) जादों हाथाय थुंग्री गंसे दाहाल गांसे। दांगोरोमना जिखो मोनदों बेखोनो एवग्रां एवसि, दानस्रां दानसि दावखुलांदों। एम्फु-एनला, जीउ-जुनार बिखोनो मोनहादों बिखोनो हासना-दानसना गोथां थै लुंलांदो। बिनि मोदोमा मेंबाबो मेडखै गोसो बायाखै; बाया; बिनि जीउ हाबिला जोबलांनोबो हागो। अब्लाबो दुखुथिया खनश्रीआ दावखुदों दावखु गासेनो दडे, दागुखुबाय थागोन। बिनि मोदोमा जोबलांनो बिनि गोसोआ जोबनो गैया। सिमां नुनायखो बि मोकथांआव बियोआय

पाब्बतीनि थिनथि बादिहै शिबखो बुर्लुबुथुरनि फारआव बुरिगां दैमानि खख्लाव मोनथार गाथोन-नुथारगोन।

आइ फिसा बर' फोरनि दौदिनि बादि गोहोबोलो लाना नों दावखुबायथा-बिश्वनाथसिम। नों गोसो सेफायआबा नों मोननो लुबैनाय-नुनो लोबैनाय बाथौ शिबखो मोनथार-नुथारगोन। ■

-
1. डः सत्यन्दर नारायन गोस्वामी सम्पादित असमीया साहित्य-संस्कृतिर समीक्षा (डः प्रमोद सन्द्र भट्टासार्य—असमीया भाषा संस्कृतिर बर' उपादान) पृ: 26, इं 1971
 2. डः बिरिन्सि कुमार बरुवा : असमीया भाषा आरु संस्कृति, पृ: 13, इं 1985
 3. N. C. Dutta, Gazette of India, Darrang, Page 18, 1978.
 4. सम्पादना, सदानन्द सलिहा, हीरेन बरुवा, प्रफुल्ल बरा 'शोनित ज्योति', पृ: 4, इं 1968 सन
 5. B.C. Allen, Assam District Gazatteers, Vol. V, Darrang Allahabad, 1905
 6. In a monograph of the P.W.D. Govt. of Assam on (Jia) Bharali Bridge.
 7. N.C. Dutta, Gazatteers of India, Assam, Darrang Dist., Page 19, 1978

फुथ्लि हाबा

—धनेश्वर स्वर्गीयारी



धनेश्वर स्वर्गीयारी (1936) : दरंनि गोजाम खलबनि खन्थाइगिरि आरो बर' लाइसि सुजुगिरि। बिथांनि आगोमा खन्थाइ बिजाबा 'जोमैनि हरै'। आथिखालाव बिथांआ खन्थाइजों लोगोसे रायथाइबो लिरो। बिथांनि नआ टंलानि नाग्रासारा गामिआव। बिथांआ 'जिला बर' थुनलाइ आफाद' (मंगलदै)नि बारग' आफादगिरि।

फुथ्लि हाबा एबा जालि फुथ्लि एबा मोदाइ आबौ-आबै फुजा खेराइनाया बर' समाजाव सुबुं फोथायनाया मोनसे गोनां मोदाइ फुजिनाय। बैसागो दानाव बे फुजाखौ होयो। गोदान बोसोरनि गोदान दैजों दैमा-दैसा दैबोलो राहां जानाय समाव जालि-फुथ्लि भेलाखौ फोजाव हरो। बर'नि बाथौ फुजा खेरायनाया गाहाइ फुजा खेरायनाय। बेखायनो बाथौखौ फुजिग्रोनांगौ। बाथौ खेराइ खानाय उनाव बेखौ फुजियो। माखासे जाबदेरजानाय मोदाइफोर बर'नि गेजेराव सोनारनानै दड'। बिफोरनिनो मोनसे फुथ्लि हाबा खेरायनाय। जायगा लानानै बियो फुथ्लि हाबा खेरायनाय बबेबा जायगायाव बिखौनो जालि-फुथ्लि खेरायनाय बुडे। नाथाय बे मोदाइखौ रायनाय-फुजिनाय, गोसो होसारनानै खुलुमनाय-खेरायनाय समाव आबौ-आबै होननानै गाबजिनाय (हांखाइनाय) जायो। बेखाइ बिखौ मोदाइ आबौ-आबै फुजा खेराइनायबो होनजायो।

थोरि गोराननि मुसुखा खालामनानै मानसि महरै आथिं-आखाइ महर दायो आरो खर'खौ लाहाजों दानाय जायो। ज'रासे हौवा-हिनजावनि मुसुखा। गोजा, गोसोम आरो गुफुर गाबनि खुन्दुंजों फानफब जानाय मुसुखा। गामिनि रायजोआ सायख'नानै लानाय दाबसे जायगायाव-जेराव फुजिनाय जायगा एबा सोरबा नख'रनि सेख्ला, बियावहाइ हौवानि मुसुखाखौ दोनो। दोननाय सिगां जायगाखौ सिबस्रां, लिरस्रां, थुलुंसि दै गोथार सारस्रांनानै मोदाइखौ थाफियो। हिनजाव मुसुखाखौ गामिनिनो नख'रसेयाव दोनहैयो। दानिया हौवा मुसुखाया बर' (होवा गोदान) आरो हिनजाव मुसुखाया खैना (हिनजाव गोदान)।

बर' हाबानि नेम-खान्थि बादियै राइजोफोरानो खैना सोहैयो। न'खर बिगोमायानो खैनानि बिफा जाथयो। खैना बिफाया खैना होगोन होआयैनो उनाव होनायानो जायो। खाम-सिफुं-जथा दामै दामै मोसागलां मुसुरगलां खैना बरायनो थाडे। जौनि दाबखा ज'रा, एन्दा-फिथाइनि गय, फाखि बिलाइनि फाथै, देगाव-देखंनि रां-रुपा खालामनानै गादोन दौनो थाडे। राइजोफ्रा न'खर बिगोमाखौ खैनानि बिफा गनायप्लानानै खुलुम हैयो। खैना बिफाया गादोन रां बियो; राइजोनि सासेया देखं देगावनि रां-रुफा साननानै होयो। बिनि उनाव बयबो बिदाय लालायो। बिदिनो बरननानै लाबोयो आरो लामा थारैनो खाम-सिफुं-जथा दामै दामै रोजाबै मोसायै बरायो आरो मुसुखा बर थानाय सेख्तायाव दोनफैयो। लामायाव रोजाबनायफ्रा एरैबादि—

हाबा मेथाइ—

खुसिया लानजाइ थिलौ थिफौ
 मा बिलोहाइ बियो
 मा बिलोहाइ बियो
 हुर हाइ हुर
 सिला फाखोरी
 सिला फाखोरी
 सानाइखा सुनाइखा
 सिला गेन्देरि।
 हाइ हाइ सिला गेन्देरि।

गामि थानसालिनि दौरियानो बे फुजानि दौरि जायो। दौरिया राइजो लानानै फस्लानि भेला बानायो। फस्ला भेला होननाया थालिरफां सुंनि भेला। फुटथामसो गोलाउ आरो आराइ फुटसो गुवार। बिनि सायाव फस्लाखंनि नुखुम आरो फस्लानिनो बेन्दा। सिडव मुसुखा मोननैखौ दोनजायो। बेनि उनाव'हाथासुनि (हाथा खुरनाय) नेमखौ खालामो। बि समनिफ्राइनो बिखौ मोदाइ महराव लायो आरो बिनो राइजोनि बइनिबो मोदाइ-आबौ-आबै।

फुथिल हाबा एबा जालि फुथिल मोदाइ खेरानायाव नोजोर बोनाय आसारा नैबेनोदि—सानै गिदालि थायो; बुरै एबा बुरैहां बैसोनि (जोबथा गथ' खांखांनाय)। गिदालि सानैआ नडब्ला फुजिनाया जाया। फुजिनाय सम जागाय जेननाइनिफ्राइ फुजा खेराइनाय जोबनायसिम गिदालि सानैया खनज्राइ खनज्राइ रोजाबबाय थायो। बिसोरनि सोरबा सासेया मेंगिलबाथाइ सोरबा सासेया बदल

होथारनांगौ। गिदालि सानैया रोजाबनाय जुरिजेननाय आर'जआ एरै बादि

ऐ आहाहाइ ऐ आहाहाइ

ऐ आबौ आबै

ऐ आबै आबै।

इसोरानो संसार सोरजि जेननाय, इसोरानो मिथिंगानि जेबो जेबो सोरजिनाया आराद जिराद, जीब-जुनाद सोरजिनानै बिसोरनि जानानै थाना थानायनि थाखाय फिथाइ सामथाइ सोरजिबाय, नाथाय बिफोर माब्लाबा समाव मेगन मोब्लिब सेयावनो जोबस्रां लाडे, गोमास्रां लाडे—नोंसोरनो खालामो। नाथाय बिबदि दाखालामा नोंसोर होयोब्ला जिब-संसारा "मुक्ति मोनगोन मोनगोन" गिदालि सानैनि रोजाबनायाव बे फेल्लेबसे खन्थाइ खान्दाया गले गले रिखांबाय थायो।

फुथ्लि हाबा दाउदाबखौ साहा फसडे आरो खोलाहाथिं लुबा राजा दाउदाब थायो। जालि फुथ्लि मोदाइनि मुडै फारेव ज'रासे हगारो; हांसो बिदै ज'रासे, गय-फाथै ज'रा-ज'रा आलारि बाथि आरो धुप-सिन्दुर फोरखौबो बाहायो। खोलाहानि लुबा राजा मोदाया दाउला मासे जायो। दाउला दाउखौ दानथारो, थै फसरनानै होयो; हाफ्रुनानै बिबौ, आमाइथुखल', बिखा बिफोरखौल' होनांगौ। बेयावबो गय-फाथै ज'रा ज'रा, आलारि बाथि, धुप-सिन्दुर बाहायनाय जायो।

सान हाबनाय समनिफ्राइ हरसेया थानानैबो अखानायैनि सानसेयाबो रंजानाय, खेराइनाय, फुजिनाय सोलिगासिनो सानजौफु समहा लागै थायो। बिफोर मोदाइ फोरखौ बोगारनायनि गोसो होसारनाय रोजाबनाय, मोसानाय जायो।

बेखिनि समावनो बोर बिनाय बोर लानाय समा गामिनि बयबो जाउरि जाउरि फैनानै खुलुम फैयो। हाबा जागोदान हौवा हिनजाव सोर फैखो सोर फैयाखै नाइखोमाबाय थायो राइजोआनो। लाजिनानै हाबसो खोमानाइ खैना गोदानखौ एम्ब्रा एम्ब्रायैनो हमनानै लाबोयो आरो खामपलाइ एबा लथा बाहोनानै मोसाहोयो। खामपलाइ बाना मोसायोब्ला फिसा हिनजाव मोनो एबा लथा बाना मोसायोब्ला फिसा हौवा मोनो होनानै फोथायनाय दड।

लुबा राजा मोदाइखौनो बोगारग्रो जेननाय जायो। बि मोदाइखौ बोगारनो सासे आखा-फाखा जोहोलाउ नांगौ। बिखौ देउदा होनो। देउदाया लुबाराजा

मोदाइनि मुडव दाननाय दाउला थैखौ लायाव फोनद्ला-फोनसि खालामनानै
बिखौ गावनि आन्थु ज'रा गेजेराव खेबथेना लानानै बाद्ल' बाद्ल' मोसानांगौ।
इसेयावनो राइजोफोरा खाम-सिफुं ज'था दामै-दामै रोजाबो आरो मोसाफायो।
बिसोर रोजाबो एरै—

गोमोन गोमोन जालांबाय
गोथां गोथां थालांबाय
सैथि महरा सैथि महरा।

मोसाबाय थानायावनो देउदानि आन्थु गेजेराव लानाय दाउथै बिलाया
हायाव गोग्लैयोब्ला गामियाव दुखु खैफोद जायो होननानै फोथायनाय दड।
बेखाइनो देउदाखौ रोंगौथि गोनां नायनानै साइख'नाय जायो।

मोसाखांनाय उनाव दौरिया मोदाइ लाइजामखौ देउदानि आखायाव
दैखानानै होयो। देउदाया आखाइ आजावनानै लामारैनो गोखै बि जायगानिफ्राइ
खारन लाडे। देउदाया खारलांबाइ थानायावनो उनथिंनिफ्राइ गोसाइ अफ्रि आरो
हाबु खुबैखां खुबैखां देउदाखौ होहरो। देउदाया गामिनि खोलाहाथिंजाइ
लांखारनानै गारहैयो आरो दैयाव गोजोम जासे गोजोमनानै फैफिनो।

फुथ्लि हाबा फेलाखौ इसेयावनो फोजाव हरनो सम जायो। गामिनि बयबो
फैनानै खुलुमो, बोर बियो आरो माइ आबाद मावनायफ्रा मोजां जाथों, हालुवाफ्रा
बेराम जाया जासे गाहामै थाथों होननानै आर'ज गाबो। दौरिया थुलुंसि दै गोथार
सारना होयो। राइजोआ गावबा-गाव लाबोनाय रां-खाउरि बिबार बायदिसिना
सारहरो। दौरिया राइसंनानै गामिनि गाहाम थासारिनि थाखाय बोर बियो। सानै
सेंग्रा ख'र' सायाव लासै लासै भेलाखौ थिखांना होयो आरो दौरिया लथायाव
दै गोथार, थुलुंसी, गांसे लाइजौ लानानै भेलाखौ लांबाइ थानाय सिगां सिगां
सिबलां बाय थायो। गिदालि सानैया उन उन रोजाब लांबाइ थायो। खाम
सिफुं दामनाय रोजाबनायबो जायो।

दैमा-दैसा, एबा बोहैबाय थानाय दै-गोथौ थानांगौ-जाहाथे भेलाखौ दै
दाहाराव बुखार लांनो हायो; बिबादि दैयाव फोजाव हरो। फोजाव हरखांनानै
बयबो दैयाव थब्ल'स्रां दुगैस्रां फैफिनो जोबथायाव दौरिखौ राइजोफ्रा खुलुमै
खुलुमै मान होयो। बयबो गोथार गोसो लानानै बोथिसे भज जास्रां लोंस्रां
फुथ्लि हाबा उसबखौ फोजोबो।

फुथ्लि हाबा खेराइनाया बोरैहाइ बर'फोरनि गेजेराव सोनारनानै थायो एबा
माबे समनिफ्राइ बर'फोरा फुजिनो लाखो बिनि मोनबो जारिमिन मोनहायाब्लाबो

जों दा बेखौनो बुंनंगोन दि मोनसे समाव बर' सभ्यथाया इसोरनि सोरजिखौ गोसो सिडव दांनाइनानै मोनहां मिथिहां जानाय समनि दाखोन। हाग्रामा, हाजो-हायेन बेंखननानै सेरावनो राइजो जानाय, राइजो फालिबोनाय बर' समाजाव सम लारियै बिसोरनि गेजेराव राजखान्थि समाज खान्थि फोरनि मिथिरोंनाय (अभिज्ञता) सोमजि खांनायाबो नुगुबै। समजों लोगो लोगो बिफोर बर' समाज गेजेराव थांनानै थानायनि लामायाव सिरिखारि खैफोद आफोदफोरजों मोगा मोगि जानांगौ जानायाव सानसुमारि फारसे साननाय हनाय जाखां फैयो आरो बिफोरनिफ्राय बारग'नो थाखाय लामा नागिरो। इसेयाव हाबा-हुखा मावनांगौ समनि सिगाडववनो सोरनिबा बोलो लाफानाइ, बोर मोननो लुबैनाय गोसोआव जाखां फैयो। बिदिनो सासे राजानि दावहायाव जेन्नाय, आबादारिया दुखु जाल्ला सैनानै मावनाय दांनायावबो आबाद-बेसाद मोनै जानाय, लोमजा साजा जानानै न'खर बेंगोन फेलें जानाय; बिफोरनि मादाव 'सोरनिबा एबा सोरजिगिरिनि आखाइ थायो साननाय—बाइदि बाइदि। बिदिनो मुगा मोनफा सोरजिगिरिनि मावनायखौ सानखो हागाफा, गियान गोसारगाफा, गोलाउ मुगा बारग'लांगाफा, समाजारि आदबफोरा बांलांगाफा जाबोयो। फुथ्लि हाबा फुजा खेराइनाया बिदिनो मोनसे समाज फोथायनायाव सोमजियो।

मिथिंगा बिखायावनो बर' समाजा जिउ फोजावबोनायखा। बेखायनो मिथिंगानि बोहैथि दाहाराव रजबप्रावनाय बाइहाजार खबाम-मेथाइ, बिदिन्था दाहाराव उराइ लांनाय दाउसा दाउमानि गोदै रैसोमाली रोजाबनाय मोसानाय, सानसे जिउवा उसाव-बादाव रोजाब गोदाउना रंजा बायो। बिसोरनि जिउमाया गोजोन-गोथार जायो। बेखायनो जालि फुथ्लि फुजा हागौमानि रंजा, मोसानाय, दामनाय देनाय हान्जा-हान्जा। बेनोथ' बर' हारिनि जिउलामा, समाइना गोरोबहाबनाय हारिमु बइनिखुरै बोलोगोरा। बे फुजाया बेखायनो बर' समाजखौ हमथाग्रा।

ड० कामेस्वर ब्रह्मनि बादिब्ला—मुसुखा मोत्रैया सिबि बोराइ आरो सिबि बुरैनि एबा राउना आरो राउनिनि। बियो बार आरो अखा। फुथ्लि हाबा खेराइनानै आर'ज खालाम्बा सोरगोनिफ्राइ बिसोर बारदै-सिख्लाखौ थिनहरो। बारदै सिख्लाया बार अखा लाबोनानै बहुमखौ फिसिग्लाबो, हाया गुरै-हासार गोनां जायो। राउना आरो राउनिया गोजोनोब्ला फिसा गैजारोडैआबो फिसा मोनो।

मणिपुराव मेइतेइ मुडै सिनाय जानाय मोनसे हारिसा दड'। बिसोर 'लाइ हारावबा' होननाय मोनसे फोरबो फालियो। बैसागु दानाव मेइतेइ फोरनि असे

आसार सिनायथि गोनां मोसानाय, दामनाय-देनाय गेजेरजों रंगिना संगिना गाननाय जोमनाय समायसारनाय खालामनानै फालियो। बाउनाय बराय नायाव मेइबा (दौरि) आरो मेइबि (हिन्जाव दौरि एबा दौदिनि) आरो पेना (काम?) दामग्रानि गेजेरजों आर'ज गाबनाय जायो। बि मोदाइनि बिदिन्थाया जाबाय—गोमालांनाय (थैलांनाय) सुबुंफ्रा सोरगो सानिफ्राय बार-दै-अखा जानानै हायाव गोग्लै फैयो; हाया अब्ला गुरै—हासार गोनां जायो। आबाद मावनायफ्रा गाहाम जायो। बिदिन्थाया एरै—बार-अखाया बिफा आरो हाया बिमा। अखा बिफाया हा बिमायाव गोग्लैफैयो। जाहोनाव बंफां लाइफांफ्रा थानानै थायो आरो आबाद मावनायफ्रा मोजां जायो—होननानै फोथायनाय दड।

गोदान मुगानि मेइतेइफ्रा लाइ हाराउबा फुजिनायखौ गोदान नोजोरजों लायो। बारग'लांनाय सुबुं सोलेर फोथायनायनि अनगायैबो लाइ हाराउबाया मेइतेइ फोरनि समाजखौ खौसेथियाव लाखिनाय आरो आसार-हारिमु फोरखौबो रैखाथि होयो।

बर'फोरनि फुथ्लि हाबा एबा जालि फुथ्लि फुजिनायाबो फोसाबनो लानाय नोजोरजों लायोब्ला बर'फोरनि समाजारि आसार खान्थि, हारिमुफोरनि रैखाथि होनो हानाय फोरबो मोनसे जानानै दड। ■

उदालगुरि

—अमरेन्द्र स्वर्गीयारी



अमरेन्द्र स्वर्गीयारी (1951) : दरंनि गोजाम थुनलाइ मावथि। जिला बर' थुनलाइ आफादनि बारग' नेहाथारि बिथांनि नआ दैफां नोलोबारिआव।

“मैदेरा गाबो 'उदाल' गुदियाव।
मानषिया गाबो आफा ईश्वरनियाव ॥”

जारिमिना मोनहास'हायै बबेबा मुगायाव सोरबा बर'नि खुगानिफ्राय बेरनदोंमोन बे दोनै आरज मेथाया—जेराव दड' उदाल बंफांनि बाथ्रा मैदेरा दुखुयाव गोलैब्ला उदाल बंफां गुदियाव गाबोना गाबा जों गोदान मुगानि बर' फोरा मिथिलिया। थेवबो सल' बाथा बायदि आबौ-आबैनि खुगानिफ्राय खोनायोमोन दि गोदो गोदाय उदालगुरिनि सोरगिदिं' उदाल बंफांनि जाहार दंसोयोमोन। बेफोराव सानावनो मैदेफोर नुजाना गाबखावबायोमोनो। बेफोर उदाल बंफांनिफ्राइनो बे थावनिनि मुड़ा 'उदालगुरि' जादों होत्रा दाबो बइबो बुडे। उदालगुरि थावनिया गोदोनिफ्राइनो मुंदांखामोन। उदालगुरि आरो दुलाराय दरं जिलानि बर' फोरा साहा बागैनि हाज'यारि फोरखौ "सिमसा" होनो। ग्रीयारसन साहाबा "सिमसा" सोदोबखौ बिजिरना दिन्थिलांदों। बिथांनि बाइदिब्ला "सिमसा" माने सिननि फिसा='समसा'। ग्रियारसन साहाबा बोरै सिननि फिसा मोनखो बुंसो हालिया। नाथाय आगोलनि बर' बोराइ-बुरैफोरनि सल' बादिब्ला 'सिमसा' सिनायस'हायि फिसा 'सिमसा'। सानसे समाव शिंग्रारोनि दाव सेरेंग राजा आरो बिनि फंबाइआ रकम्पा राइजो गाग्लोब हैदोंमोन। दाव सेरेंगा राजानि सान्त्रीफोरनो हाजोयारि फिसा हाबा खालामना फैफिनाबासिनो थानो लाबाय। बबेबा समनि इयुनाव गावनि बायबाहागिफोरखौ लोगो हमलायनो फैनायाव सिनाय लायियाव 'सिमसा' मुं दोनजाबाय हायेनारि बर' फोरजों दा सानजारि 'सिमसा' होनब्ला दानि कामें जिलानि बर' राव रायनो

गोरों मन्पा, टोवाम्पा, लामा बायदि बायदि फोलेरखौनो बुडे। बे सिमसा फोरजों बर' फोरहा माब्लाबा गाहाम आरो माब्लाबा गाञ्जि सोमोन्दो बेरखांदोंमोन। बेफोर बाश्राखौ जारिमिन फरायग्राफोरा मिथिखाजोबो। गोदोनिफ्रायनो बे सा-सानजा भारतनि सिमनापुरि (Border town) मोन। सा-सनजा भारतनि बायदि फोलेरनि राजाफोरा गावबा गावनो राइजो खुंनयनि खुलि खालामदोंमोन। उदालगुरि खाथि खालायाव गोदो गोदायनि राजाफोरनि राज-उलाफादफोर दड' मोन। रौता, बड़िगामि, नलखामरा, राउनागड़, हरिशिड, भैरबकुन्ड, शिंग्रारि बेफोर गोदोनि राजाफोरनि खुलिमोन। बड़िगामि खाथियाव 'सातराजानि राजउलाफादमोन सातराजाखौ जारिमिनारि गेइट साहबा सिमसा राजा होत्रा बुलांदों (A History of Assam, 1933, P-364) बर'फोरा नाथाय सातराजाखौ बर' राजा होत्रासो बुडे। गोदो हिन्जाव गोदान हाबा खालामना लांनाइ समाव बैराथिफोरा लामायाव मेथाइ खन्नानै सातराजानी बय्त्रा दिहुन्ना खैना गाबगाहोनो नाजायोमोन।

“दागाबसै खैना दागाबसै
नोंसाय गोदाना
सातराजानि फरिया।”

खैना गोदाननि हौवा गोदाना सातराजानि फारिया। नंखायनो बिहा जिंगा सिनांगौ जेबा गैया।

रेभारेन्ड सिदनी एन्डेल साहाबा उदालगुरिनि खोलाहा थानाइ राउनागड़ खौनो बर'नि सल' राउना-राउनिनि जाथायखुलि होत्रा सान्दों (The Kachari-Riv. Sidney Endle, 1911, p-70) दोनैबो राउनागड़ा गोदोनि बाइदिनो दड'।

बे उदालगुरियावनो इंराज सरकारा 1947 माइथायनि 15 आगस्तनि सिगां सिमहालागै सिमसा राजानो खाजोना होयोमोन। जारिमिना मोनहासयै साननिफ्रायनो उदालगुरियाव बर' आरो सिमसाफोरा गोजां बोथोर सफैब्लानो मेला फज'नानै जिराद सोलाय-सोल' खालामो मोन (Barter trade)। दोनै गोदोनि उदालगुरिया गैलिया। बेवहाइ महकुमा मोनसे दानायनि राहा खलामबाय। बेनिफ्राय माइलजिबा गोजानाव भैरा बोरायनि थानसालि भैरबकुन्डयाव नैजिबा कौटि रांनि इरिगेसन प्रजेक्ट मोनसेनि हाबा सोलिगासेनो दड। उदालगुरियाव गंसे कलेज आरो गंसे हायार सेकेन्डारि स्कुल आरो गंथाम हाइस्कुल जाबाय। उदालगुरि ओंसोलनि मानसिफोरनि मादाव बर' यानो गोबांसिन। बर'फोरनि अनगायैबो बेवहाइ नेपालि, साउतालि, हासा आरो गुबुन गुबुन राव आरो धोरमनि मानसिफोर दड'। ■

हारि जौगानायव सोलोंथाय आरो थुनलायनि गोहोम

—जगत चन्द्र बसुमतारी



जगत चन्द्र बसुमतारी (1932) : अलंबार मुगानि खन्थाइगिरि। बिथानि खन्थाइ बिजाब फोराजाबाय 'फानफिवालि दाउ' आरो 'आर 'ज'। बिथानि नआ रौतानि भालुकमारि गामिआव।

सोलोंथाय :

हारि जौगानाय आरो थुनलाइनि सोमोन्दै सावरायनो थाडेब्ला बिनि गिबियावनो सावरायनांगौ जाना फैयो सोलोंथाय। मानोना जेसेबांखि सावरायामानो जाय जेसेबांखि बुडामानो बइनिखुइबो गोनां गुदियानो जादों सोलोंथाय। सोलोंनायनि अन्जिमा गैया। सोलोंनानैबो फोजोबनो हाया। मानसिया थैना थांब्लाबो सोलोंथायखौ सोलोंनानै फोजोबनो हाया। बिनिखायनो श्रीराम-कृष्ण देबआ बुंलांदों दि "जत दिन बाँसि तत दिन शिखि"। सोलोंथाया जाबाय मानसिनि गोसोआव सतगुण गाइसननाय एबा सोना होनाय। सोलोंथायखौ लाभ खालामनाय आरो बिद्या लाभ खालामनाय खोथाया समान नड। सोलोंथायनि थांखिया जादों माहारि सेवा (Service) खालामनाय।

सोलोंथाय माने गुबुन रावयै 'शिक्षा'। बे शिक्षा एबा सोलोंथाय सोदोबा फैदों "शक्" सोदोबखु (धातु) निफ्राय फैनाय। शक् सोदोबखुनि अर्थआ सेवा (Service) होनो गोसो जानाय, सहाय खालामनो गोसो जानाय, जोग्यता जानाय, मावथि जानाय। बिनखाइनो सोलोंथायखौ लाभ खालामनायनि अर्थआ जादों माहारिखौ खुलोमनायनि थाखाय गावखौ बानायना लानाय एबा फोसाबना लानाय। मानसिनियाव जेरैबादि गुन थानांगौ बे गुना गैथ्राब्ला महर-मुसुखाया मानसि महरब्लानो मानसि मुंनि जोग्य जानो हाया। अत्राय (प्रेम), हिंसा

खालामै (अहिंसा), निमाहा (क्षमा), सिबिनाय (भक्ति), मानिनाय (श्रद्धा), दब्थायनाय (संजम), गारनाय (त्याग), सहायनाय (धैर्य), हुदा (अभ्यास) आरो बाहायनाय (व्यवहार) बेफोर गुनफ्रा बेरखां नांगोन एबा सोमजि खांनांगोन गावनि आखल आखुनि गेजेरजों; आरो बिनो जाबाय सत आदर्शनि सोलोंथाय। Education is not a Preparation for life rather it is living माने सोलोंथाया जीउनि थाखाय थियारि नड, सोलोंथायानो जीउ। सोलोंथायखौ इंराजि सोदोबहै education होत्रा बुंदों। Education सोदोबा ल्याटिन सोदोब 'Educare' निफ्राय फैनाय। 'एडुकार'नि अर्थआ जाबाय बोनानै बाहिर खालामनाय, एबा बुंथि (प्रकाश) नाय, आबदाल (जोथोन) खालामनाय। बिनिखाइनो 'Education' एबा सोलोंथाय होत्रा बुडेब्ला बिखौनो मिथिहोनाय जायोदि मानसिनि जीउखौ गोजौआव दैखानो नाजानाय। जीउखौ फोथाना लाखिनो एबा जोंसारनाइनि थाखाय गावनि आखल आखुफोरखौ सामलायनानै (नियन्त्रण) लासैयैनो फोसाबलानो (संस्कार) आरो हुदा (अभ्यास) जोरजों लोगोसे मोजाडै बानायलानाय (सुगथित) मुडनो जाबाय सोलोंथाय।

Herbert spencer साहाबा बुंलांदों—"Education consists of the preparation for complete living" माने सोलोंथाया जाबाय मानसिनि जीउ सुफुंथायनि थियारि (प्रस्तुति)। रास्किनआबो बिखौनो बुडेदि—"Education does not mean teaching people to know what they do not know, it means taching them to be have as they do not be have" अर्थात—सोलोंथाय माने मानसिया जेखौ मिथिया बिखौ फोरोंनाय नड, गुबै बाहायनो फोरोंनायखौसो सोलोंथाय होत्रा बुंजायो। Horn साहाबाबो बुंदों—"Education is growth in the right way" ड: एलेकशिवस क्यारेल साहाबा सोलोंथायखौ बुंदों—"The development of complete human being must be the aim of our educational efforts. It is only with throughly developed individualy that real civilisation can be constructed". स्वामी बिबेकानन्दआबो सोलोंथायनि सोमोन्दै बिखौनो बुंनो थाडेदि—"It is a man-making theories we want". बिथांआ आरो बुंवावदों दि—"Education is the manifestation of preparation already in man".

दिनै-गाबोननि मानसिफ्रा बिजाब फरायनाय एबा आखर लिरनाय बिद्याखौनो गोबाडनो सोलोंथाय होत्रा सानो। बिनि आखल आखु, आसार

खान्थिया जियानो दाजाथों, जाइ जेसेबां बहुम फरायसालियाव सौहैदोंब्लाथाय बियो एबा बिखौ गोरों-गोरा होत्रा सानखाथारबाय। दिग्री थाब्लानोखि जाबाय।

दिनै नुनो मोनबाय दि बहुम फरायसालिफ्रा सोलोंथाय होनानै बोसोराव रोजा रोजा फरायसुला फरायसुलिफोरनो दिग्रीनि "स्टाम्प" बुयै बुयै होबाय। दिग्रीधारिया सानथ्रो हायै ओंखारबाय। नाथाय गियानिया साबसे ओंखारखो? गियाना मा जाखो? बे खोथाया थारैनो सैथो दि आखल आखुखौ फोसाबनो हायाब्ला सोलोंथायनि जेबो बेसेन गैया। महात्मा गान्धीया सोलोंथायनि थाखाय गोख्रोंहैनो बुंभावदों दि—"I had always given the first place of the culture of the heart of the building of character I regard character building as the proper foundation of their education".

दिनै सान्नो गोनां जाना फैबाय हारिनि उननि जाहोना मा जागोन? सोलोंथायखौ गारनानै हारिया थाना थानो हागोन? मानोना सोलोंथायनि गेजेरजोंसो मानसिनि मनुस्यत्वआ बेरखाडे एबा सोमजियो।

गोदो भारतारिनि सोलोंथायनि नेम (खान्थि) फ्रा गुबुन रोखोमहैमोन। भारतनि सोलोंथाया बैदिक सोलोंथायमोन। बेद बिजाबखौ गारनानै भारतारि सोलोंथाया थाना थानो हाया। बेद माने गियान। मानिनाय (श्रद्धा), सिबिनाय (भक्ति) नि अनगायै बैदिक सोलोंथायखौ लाभ खालामनो हाया। बेदनि ऋषिफ्राबो गोसोआव अन्नाय सिबिनाय थाहोनो थाखाय अबंनि खाथियाव आरज गाबोमोन। मानोना अन्नाय (प्रेम) फैयोब्ला सोलोंथाया फैयो आरो सोलोंथाया फैयोब्ला सिबिनायनि (भक्ति) लामा फैयो। 'सा बिद्या जा बिमुक्तये।' माने जि सोलोंथाया राबा (मुक्ति) लाबोना होफैयो बिनो सोलोंथाय। सैथो, धोरोम, गोरोब्लाय, अन्नाय, अहिंसा, बिनो जाबाय भारतारि बैदिक सोलोंथाय।

इउरुपआव सोलोंथाय जाजेनग्रोबोदोंमोन सार्स एबा गिर्जाखौ केन्द्र खालामनानै। मुसलमानफ्रा सोलोंथायखौ जाजेनग्रो होबोदोंमोन मसजिदजों लोगोसे माद्रासायाव। आरो बौद्धफ्रा जाजेन होदोंमोन मन्दिराव। अब्ला बिनिफ्रायनो मिथिनो मोनो दि धोरोमखौ मिथिनो थाखायसो सोलोंथायनि गोनांथि। बिनिखायनो महापुरुषफ्रा बुंलांदों —'गिबिआवनो दीक्षा बिनि उनावसो शिक्षा।' सतगुरुनि दीक्षा लाखांनाय उनावबो सोलोंथायनि खोथाया फैयो। दुलाराय बहुमनि मुंदांखा खन्थायगिरि रबीन्द्र नाथ ठाकुरा दानि सोलोंथायनि गात्रि हेंथा आरो जेंना एबा गोरोन्थिफोरखौ बिनि जोंथि गियानजों नुनानै एबा

मिथिनानै भारतारि सोलोंथायनि ब्यबस्थानि थाखाय हुसियार (साबधान) होबोदोंमोन, बुंबोदोंमोन। नाथाय रावबो नोजोर एबा खोमा होयैलाय गावनो गावनि बोलोहै 'शान्ति निकेतन' गायसननानै आश्रम बादिहै आदर्श सोलोंथायखौ फोथांफिन्नो नाजायो। जुग अवतार श्रीश्री ठाकुर अनुकुल चन्द्रआबो दानि मुगानि सोलोंथाय खान्थि (शिक्षा नीति) फोरखौ खाबसारा नुनानै गुबुनहै आदर्शमुलक 'तपबन बिद्यालय' आरो बहुम फरायसालि सान्दिल्य बहुम फरायसालि लुनानै आदर्शनि गेजेरजों सोलोंथायखौ फोरोंनो हमदों। मानोना बिथां मोनहा आदर्श सोलोंथायनि गेजेरजोंसो गावनि हारि, हारिमुश्री, थुनलाय, जारिमिन, हादोरखौ रैखा खालामनो हायो होत्रानै मोजाहैनो मिथिगौमोन। शास्त्री, बेद, ऋषि-मुनि आरो गिदिर गिदिर मुंदांखा खन्थायगिरि, लिरगिरि बिसोरनि लिरना गालांनाय एबा फोरमायलांनाय खुरांफोरखौ गोथौहै बिजिरनानै नायोब्ला नुनो मोनो मिथिनो मोनोदि हादरआनो बुं, हारियानो बुं, सोदोमश्रीयानो बुं बिसोरखौ हमथानो एबा रैखा खालामनो हानाय गोहोआनो जाबाय आदर्श सोलोंथाय। सोलोंथायाव आदर्श थायोब्लानो सैथोआबो थायो। आरो सोलोंथाया थारैनो आदर्श आरो सैथो जाबोलानो बिनिफ्राय थुनलायाबो आदर्श थुनलाय सोमजिगोन।

जि हारियानो जाथों आरो जि माहारियानो जाथों हारि आरो माहारिखौ जौगाहोनाय एबा दावगा होनाय गुदि लामायानो जादों सोलोंथाय। सोलोंथायखौ गारनानै बे बहुमाव माबा मोनसे हादर एबा हारि जौगाहोनो हाया एबा थांना थानो हाया। जेरावनो बबेबा मोनसे हारिखौ एबा हादरखौ जौगानाय नुदों अब्लानो नुनो मोनगोन बिनि उनाव दडे सोलोंथाय। मानोना सोलोथायनि गेजेरजोंसो मानसिनि मनुस्यत्व गियाना जोंखाडे एबा सोमजियो। सोनाबनि बहुमनि मुंदांखा खन्थायगिरि उइलियाम सेक्सपियेर बुंलोंदों 'There is a great question in the world, How to make man, but one answer education'. माने बे बहुमाव मोनसेबोल' सोंलु दं, माब्रै मानसि खालामनो, बिनि फिना जाबाय 'सोलोंथाय'। मानसि बानायनांगौ खोथायानो सोलोंथायनिफ्रासो फैयो।

नुनो मोनोदि गावनि बिमानि रावजों जिसिबां गोल्लैयै (सहजै) आरो खम समनि गेजेरजों सोलोंनो हागोन गुबुननि रावजों एसे गोल्लैयै सोलोंनो हाया। जि सोलोंथायानो जाथों बिमानि रावजों सोलोंनाय बादि जानो हाया। बिमानि रावजों सोलोंथायखौ सोलोंनानैसो मानसि बानायनो हायो। मानसि बानायनो हायागौमानि हारिखौ फोथांनो एबा जौगाहोनो हाखाथारा। दिनै बे

दुलाराय बहुमनि बिखायाव जायफोर हारिया मोनसे गोखों आरो गोहोबोलो गोरा होत्रानै गसंथानो हादों बिसोरनि उनाव दं लोगोसे बिमानि रावयै थुनलाय, जारिमिन, थुनसल', खुगा मेथाय, हारि मुश्री बायदि बायदि। बिफोर जाबाय हारिखौ हमथाग्रा मोनफा मोनफा गोबौ हाथेर। बहुमनि सुबुं सोदोमश्रीनि सिगांआव हारिखौ सिनायथि होग्रा।

थुनलाय—सोलोंथाया थुनलायनि थाखाय रोदा, आरो थुनलाया हारिनि सिनसि आरो आयना। सिनसिखौ गुबुन रावयै राजहार एबा मेरुदन्द होत्रा बुडे। सिनसिआ जैरै मानसिनि गासैबो बेगें मोदोमखौ थोंगोरहै हमथाना लाखिदों थुनलायाबो हारिखौ आरो हारिनि मान इज्जतखौ हमथाना लाखियो। आयनायाव नायोबोला जैरै गावनि महर एबा सावगारिखौ नुयो, थुनलायखौ बेखेवना नायोब्ला बे हारिनि हारिमु, हारिमुश्री, सोदोमश्री, जारिमिन, बेसे गोजौ थाखोनि हारि बिखौ मिथिनो मोनो एबा मिथि होयो। थुनलाया माहारिनि आयनाल' नडा। माहारिआव जा जा जाना थाडे बिखौ दैखां नायानोल' थुनलायनि आदर्श नडा, जेंना (समस्या) फोरखौ फोजोबस्रां नायनिबो दिन्थि नांगोन। थुनलाया सोमजियो मानसिनि थाखायसो। बिनिखायनो मानसिनि मोजां आरो मोजांनि थाखाय सिन्था थुनलायनि गेजेराव थाथार नांगोन। अब्लासो बे थुनलाया जुगामि जाना थानो हागोन।

सुबुंआबो हारिनि मोजांनि थाखाय हाबा मावलांनोबा सोलोंथाया आरो थुनलाया आदर्श केन्द्रिक जानांगौ। आदर्श केन्द्रिक नडाब्ला सुबुं आरो हारि एबा माहारिखौ मोजां लामायाव दैदेनलांनो हाया। महापुरुषनि आदर्शफोरजों गोरोबनानै एबा बिसोरनि आदर्शखौ केन्द्र खालामनानै जि थुनलाया सोमजिगोन, बे थुनलायासो सैथोनि महरखौ सुबुंनि गोसोआव सोना होनो हागोन, आरो बिनो जाबाय सुफुंथाय थुनलाय। थुनलाय लिरग्रा एबा खन्थायगिरिफ्रा लिरनाइनि गेजेरजों सैथोखौ गाइसननानै माहारिखौ मोजांआव दैदेनलांगोन। जि थुनलाया मानसिखौ गावनि हादोर आरो गावनि हारिमुश्री (संस्कृति) नि नेसोनिनि सोमोन्दै सेतना खालामो, बे थुनलायआ मानसिनि गोसोखौ गुवार खालामो, बैखौनो मोजां मोनो, बैखौनो आंगो सान्नो फोरोडे बिनो आदर्श थुनलाय। जानला मोनला सल'बाथा लिरनानै थुनलाय सोरजिनानै मानसिनि गोसोखौ मोजां मोनहोनो हाब्लानो थुनलाय जाया। मोखा मोसाहोनानैबो मुफुर मोसाहोनानैबो, भुत मोसाहोनानैबो मानसिनि गोसोखौ मोजां मोनहोनो हायो। अब्ला बिबो

थुनलाय जागोन ना? जायनि गेजेरजों मानसिनि जिउखौ फेहेरो फोथाडे बिसो थारैनो सत आदर्शनि थुनलाय जानो हागोन। मानसिजों मानसि मोजां मोनलायनो हानाय, खौसे लामायाव लाबोनाय, माहारिया मा खालामब्ला माब्रै सामलायनो हागोन बिसोरनि बिदिन्थिखौ थुनलायनि गेजेरजोंनो नागिरना मोननांगोन। महाभारतनि खोथाखौ सिन्था खालामना नायब्ला नुनो मोनगोन पाप-पुन्य, सुखु-दुखु, गासैबो दं। बिनि अनगायैबो दडे माहारिनि मोजांनि बिदिन्थि। बेद, उपनिषद, कोरान, बाइबेल, बेफोरनि गेजेरजों हारि जौगानाय माहारि फोसाबनाय, खौसे लाबोनाय, सत आदर्शनि सोलोंथाय बायदि बायदि बेरखांनाय नुनो मोनो। अब्ला बिफोरसो थार सैथो आरो महान थुनलाय होत्रा बुंजायो। महापुरुषनि बाणी एबा सोराफ्रा अरायबो सुबुं माहारिनि मोजांनि थाखायसो। बिसोरनि बानी एबा बुंनायफ्रा बिगियानजों गोरोबनाय। आदर्श थुनलाय सिबियारि उइलियाम सेक्सपियेरनि थुनलायखौ केन्द्र खालामनानै इंराज माहारिया जौगानो खाबु मोन्दों, ईश्वर सन्द्र बिद्यासागर बहुमनि मुंदांखा खन्थायगिरि “रबीन्द्र नाथ ठाकुरनि लिरनाय थुनलाय निफ्राय बाडली हारिया भारतारिनि गेजेराव जौगाहारि होत्रा दिन्थिनो खाबु मोन्दों आरो दिनै जोंनि आसामावबो असमीया हारिया शंकरदेब, माधवदेबनि लिरना गालांनाय नामघोषा, भक्ति रत्नावली, कीर्तनघोषा, बियानाम बायदि धोरोम बिजाबनि खाबु मोत्रानै जौगानो हादों। बिनि अनगाहैबो लक्ष्मीनाथ बेजबरुवा, हेम बरुवा, नलिनी बाला देवी, अतुल चन्द्र हाजरिका बायदि बायदि बिसोरनि आदर्श गोनां लिरबिदां आरो रायथाय खन्थायफ्रा हारि-माहारिखौ जौगानायाव थुलुंगा होदों जौगाहोनो खाबु मोनहोदों।

भारतआवबो पुरुषोत्तम श्रीश्री राम चन्द्र आरो राबननि जीउ खौरां रामायन, पुरुषोत्तम श्रीकृष्णनि गीता, महाभारत, भागवत, पुरान, बेद, उपनिषद, बायदि बायदि धोरोम बिजाबनिफ्राय दै निज्रा ओंखारनायबादि थुनलाय सोमजि खांदों आरो हारिखौ जौगाहोनो खाबु मोनदों। हजरत महम्मद रदुलनि गोथार कोरान सरिफखौ केन्द्र खालामनानै मुसलिम हारिनि थुनलाय, प्रभु जीसु ख्रुस्टनि गोथार बाइबेलखौ केन्द्र खालामनानै बिदिनो आदर्श थुनलाय सोमजिनानै इउरोप, आमेरिका, बृटिश हारिया जौगानो खाबु मोन्दों।

महापुरुषफ्रा जि हारियावनो फैयामानो, बिसोर मोनसे हारिनि थाखायल' फैया। बिसोर फैयो दुलाराय बहुमनि मानसिखौ बोखांनो, फोथांनो, फेहेरहोनो आरो गियान होनो। बिसोर जाबाय गासैबो मोजां गाज्जिनि सुफुंथाय आरो जेनिबो

जेंना (सर्ब समस्या) जोरखौ फोसाब (समाधान)स्रांग्रा। बिनिखायनो जि हारिया महापुरुषफोरनि बुंनाय, थिन्नाय एबा बोसोननि गेजेरजों गनायना सोलियो बे हारिया जेब्लाबो गोग्लैसोनाय (पतन) हारि जाना थानो हाया। राजखान्थि, धोरोम खान्थि, माहारि खान्थि, हाबानि खान्थि जि खान्थियानो जाथों गासिबो हारि जौगानायनि गोनांथि। रायथाय, खन्थाय, सल'बाथा, सल'मा, खुगा मेथाय, मेथाय, भावथिना, जीउ खौरां बिफोर गासिबो हारि जौगानायनि मोनफा मोनफा हाथेर एबा मोनफा मोनफा आयदा। मोनसे मोत्रै आयदाजोंल' थुनलाय सोमजिया। बिफोर बादि आयदानिफ्रायसो मोनफा मोनफा हारिनि आदब खायदा, नेम-नीति, आसार-व्यबहार हारिनि जीउ जारिमिनखौ मिथिनो मोनो। बिनिखायनो हारि जौगानायाव सोलोंथाय, थुनलाय गासिबो मानसिनि गोनांथि।



बर'नि मुं दोननायनि आसार

—दलेश्वर बर'



दलेश्वर बर' (1945-2008) : गोनोखो आयदानि फोरोंगिरि। बर' थुनलाइ आफादनि लेडाइ आफादगिरि आरो आफादगिरि मासिआव थानानै राव आरो थुनलाइ जौगानाय खामानि मावदोंमोन। बिथांआ रायथाइ आरो फावथाइ लिरनायाव बांद्राय गोसोमोन। बिथानि नआ अदालगुरिनि गरायबारिआव।

दुलाराय बहुमनि सुबुं माहारिनाव जोनोम लानाय गोदान गथ'नो मुं दोननाय आसार दड। मुं दोननाय हाबाफारिखौ मोननै आयदायाव रानजायो; मोनसेआ जाबाय धोरोमारि आयदा आरो गुबुन मोनसेआ समाजारि आयदा। बर' समाजाव मुं दोननाय आसारनि सोमोन्दै सावरायनो आखायाव लानाय जादों।

मख'नो गोनांदि बर' हारिनाव गोबां धोरोमखौ गोबानाय नुनो मोनो। खृस्टान धोरोमनि अनगायैबो गोबां आर्यआरि धोरोमखौ सिबियो बर'फ्रा।

जायफोर खृस्टान धोरोमखौ गोबाना दड बिथांमोना गाव धोरोमनि हुदा बायदिहै बापस्टिमा होनायजों मुं लाखियो आरो बांसिन मुंफ्रानो बाइबेलाव थानाय मुं। जायफोर आर्य धोरोमखौ गोबाना दड बिथांमोना फान्जामुथि लेखा ग्रह नक्षत्र नायनानै बिजिरनानै रामायण, महाभारताव मख'नाय गसाइ, मोदाइ, बीर जोहोलाव आरो बीरजोनि मुं दोनो।

जारिमिनाव नुनो मोनो बेसेबांबा मुगानि सिगांनिफ्रायनो बर' राजाफोरनि मुं फोरखौ आर्य आव सोलायबोदों। जैरै नारखु बुदां नरकासुर, बिखादाद>भगदत्त, राजा इरागदाउ>राजा गबिन्द सन्द्र बाइसेत्रा। गोदान मुगाआवबो बर' जोहोलाउफ्रा जेब्ला फरायसालियाव थानानै सोलोंथाय लाहैदों, गोरोंगोरा जादों बिथां मोनहाबो आर्य सोदोबनि मुं लादोंमोन, थोंजोडै बुंनांगौब्ला बर'फ्रा आर्य हारिमुनि गोहोमखौ एंगारनो दाबो हायाखै।

बर'हा गथ' जोनोम जानाय उनाव उथुमाय हानाय आरो उथुमाइ सारनाय मोननै आसार दं। बर'फ्रा उजिफिननायखौ फोथायो; बिनिखायनो उथुमाइखौ

खर'गज' नडै गोखा आखाइनि हिन्जावखौ हानो होयो आरो आद्राफोरखौ दरखंनि सिथ्लाआव फबना दोनो। उथुमाइखौ हाखांब्ला गथ'खौ दुंबुद दैजों थुखैयो; गथ'खौ थुखैखांना सिथ्लाआव संग्राइ सायाव हिस्त्रिजों फिननानै फुथुयो। बिनि उनाव फां 9 दुबरि बिजौ स'ना आस्थाम, (आंखालाव दुबरि हाग्रानि आस्थाम) आवा खुन्दुंजों मेरायनानै लथासे दै लानानै, थुलनसि बिजौजों दै गोथार सारनानै, खुगाजों रायो— "ओइ गथ? नोंबा गोदो मा मोन, बांगाल ना जंगाल, गार' ना गंगार, हासा ना नेफाल मोन? दोनैनिफ्राय नों बर' जाबाय दे!" बिदिहै गथ'खौ गावनि माहारिआव सोना लायो। गथ' जोनोम जानायाव जायफोर हिन्जाव एबा बुरीफ्रा जोथोन लाफा हैदोंमोन सुवा दांफा हैदोंमोन बैसोरखौ गथ' जोनोम जानायनि दानसेनिफ्राय बोसोर सेनि गेजेराव बोथिसे ओंखाम जाहोनांगौ बेखौनो उथुमाइ सारनाय ओंखाम जाहोनाय होत्रा बुडे। बिनि अनगायै गथ'साफोरखौ मुं दोननायनि आसार जोंनाव गैया। गथ' जोनोम जानायनि बोसोरनि गेजेराव गथ'सा फोरनो मुं दोननाय जायो। मुं दोननायनि जेबो थि आसार गैयाब्लाबो बर'फ्रा बोरैहाय मुं दोनोमोन बेखौ सावरायनो लानाय मुं दोननायाव गथ'नि बिमाय आरो बिबैखौ सिगांग्रो होयोमोन।

- 1) जोनोम बाराय : जोनोम बारायखौ लानानै मुं दोनग्रामोन जेरै रबि, सनि, स'म, मंगल, बुध, बिस्ति, सुकुर। हिन्जावसा बोला स'मावारी, बुधवारी, मंगली बाइसेत्रा।
- 2) जोनोम दान : मा दानाव जोनोम जायो, एखमब्ला बेखौ लानानैबो मुं दोननाय जायो—बिहु, शाउन, भाद्र, आश्विन, काति, आघ'न, पुहा, मागन (माग') हिन्जावसानि बेलायाव—फागुनी, सैथी, बैसागी, आषारी, आघुनी भादुरी।
- 3) बोथोरजों : बोथोरखौ लानानै दोननाय मुंफ्रा।
जाबाय—दुफां, उदां, जोमै, खोरोमदाउ, खोरोमसार
- 4) जोनोम सम : जोनोमनि समखौ नायनानै बिलिफां, फुंबिलि, अलंबार, सानजौरां,
- 5) जारिमिन आरो खुगा स'लनि बीर जोहोलाउ आरो धीर आइजो फोरनि मुडै : हेडम्ब, तुलाराम, जयसांद, पृथ्विराज बाइसेत्रा, हिन्जावासा बोला—हिडिम्बा, राणी, जयमती, आइनमुथी, फानजामुथि, सिलामुथी, रथमाली, गाम्बारी, आसागी, बैसागी, गोमब्रीमुथी बाइसेत्रा।
- 6) बिबारनि मुडै : बिबारी, फामे, गलापी, पदमी, कान्सनी, जबा, फुलमथी,

- सुनस्री, नार्जी, बारसिगी, डेइजी, डालिया बाइदि बाइदि।
 हौवासानो— बिबारसा, अश'क, पलाश बाइदि होनो।
- 7) गथ'नि मोदोमनि गावजों : गुफुरसा, जारौ, सोमखा, सोमश्री, गोमोश्री, जोमैश्री, गोसोम (ख'ली) बाइसेत्रा।
- 8) गथ'नि महर मोखांजों : लाउदाब, बुगाउ, लाउगा, बुदां, बुहा, हाइथा, थेफ्रा; थेब्ला; मेब्ला, गाला; बन्दा, लान्था, मालदां, हिन्जावसाफोरखौ— लाउगी, लाउदांगी, हाइथु बिफ्रि, गाइदु, दुब्री, गाउदाब, लुदुगे, लाउदुम, फाउदुर, दुम्फे, हाम्फे, गानथुरी, थुनथ्री, जंजिन, लाउजें, हाफां।
- 9) मेगननि महरजों : सेना, मेब्ला हिन्जावसादु— सिनस्लि, माब्ले, दुलुर बाइसेत्रा।
- 10) बिफां लाइफांनि मुडै : इन्दि, लाफा, दिंखिया, मेथा, थुलनसि, खैसि, खैरी, थाराइ, मुला, सबाय, सिबिं, भिन्दी।
- 11) बंफां फिथाइजों : थाइगीर, गरसि, जाबग्री, दालिम, बेलश्री, बिलाही, सिमफ्री, जाम्बुरा, उदासी, दुम्बु बाइदि।
- 12) आगजें आइला : आलारी, सान्द्री, संग्राइ, हाथा, खफ्री, खादा, खुरै, लथा, थुरसि खदाली, खदाल, थांगोन, थखन, गन्द्राइ, हुखेन, खुन्था, खुन्थि सेवारी, खान्थासी, रासो, खाइथा।
- 13) जुनारनि मुडै : मैसो, मोसा, लखा, गान्दा, माउजि, सैमा, मोखा, मुफुर, अमा।
- 14) दाउनि मुडै : दाउश्री, दाउसिन, दाउसेन, दाउब', दाउखा, सिला, दाउसा, दाउला, दाउखुम, मइना, दाउलुर, दाउराइ, सखा, धनेश।
- 15) अनजाग्रा आखुजों : अथे, अनसुली, अनजिमा, अनले, अनफे, अम्बि, अनजाली, अनारी, हौवासाखौबो-आनसा, अनसुला अनसुमा बाइसेत्रा।
- 16) बर'नि ओंख्रैजों : अनला, मैगं, खारै, बाथोन, रुजा, रोसि, अनदुरी बाइदि।
- 17) बर'नि फिथाजों : एनथाब, अनासी, सौराइ, सबाइ, लाउदुम।
- 18) सानखान्थिनि अनजिमाजों—साथिराम सौरासी, हाजारी, हाजारसिं, बिजारसिं।
- 19) अखलखौ नायनानै : देलाइश्री, सिलांगी, आलुरी, खावाली, खाउथाली, गाबखुली, खान्दुरी, हौवासानि—शियाल, आखेल, खोमथा, बोलोग्रा, जालु, खांखुबा सैसिंग्रा, खान्दुरा, बब्रा, बन्दा, हाराव, जोंब्लाउ, रानथें, हाब्रु।

- 20) शोलेरनि आंगोजों : आनजि, सिनश्री, सालाइ, मेगन, आखाइ, आफा, आसि।
- 21) माइनि मुडै : आसु, माइब्रा, जोसा बाउवा, खेंखुवा।
- 22) बिगुरजों मुं दोननाय : जारौ, सोरां, जांगिला, जोंदाउ, बिरदाव, दाउराव, हेला, रिखां, रिसार।
- 23) बिमुंजों : सिमां, हांमा, सिमांसा, अलंबार।
- 24) Title खौबो मुं दोननाय नुनो मोनो : फुकन, दत्त, चौधुरी, बड़ा, राभा।
- 25) हारिनि मुडै : नेफाल, गंगार, गार', नागा, सिमसा, जार्मानी, जापानी, इराणी, बांगाल।
- 26) हादरनि मुडै—भारत, नेपाल, हादरशी।
- 27) सोलौंथाय मोननाय न'खाराव बांसिनानो आर्य एबा संस्कृत मुं लायो : नारायन, राम, शिव, नरेन, अर्जुन, निरञ्जन, क्षिहित, सुरथ, मेघनाद, भबेन, प्रदीप, कृष्ण, गणेश, बाइसेत्रा। आइजोफ्राबो—रेणु, मीरा, सुमित्रा, उषा, चित्रलेखा, गंगा, यमुना, बीणा, बाइसेत्रा।
- 28) नानि मुंडै : नाथुर, सन्दा, थुरी, नासाइ, खासेब, दुरा, खसुं, दुरा, खांखाइ, थेगोना बाइसेत्रा।
- 29) गथ' गथाइ थैजाग्राफ्रा मुगैथाव मुंदोननाय : सैमाखि, अमाखि, दाउखि, आफाखि, बाइसेत्रा।

आथिखालाव आलदा मडार्ण नख'रा गथ'फोरनि मुंखौबो आलादा दोनो जैरै—ब'बी, ड'ली, पिंकि, रिंकु, पम्पी, डिम्पल। जायखि जाया सोदोबजों मुं दोननो हागौ। नाथाय मुंदोननायाव बेखौ नोजोर होनो गोनांदि मुं दोननायाव बिनि धोरोम, बिनि समाज आरो मुं दोनजाग्रानि सुबुंथि एबा आखुखौ बेरखां होयो। मुं मख'नाय लोगो लोगो बै सुबुंनि सायाव अनखांनाय आरो मान सोमजि खांनांगौ। मुं मख'नायजों जुदि मुगैनाय एबा गिनाय फैयोब्ला बेजों सोर लोगो जानो एबा बिनि साथियाव सोर साफिनो? बिनि खायनो मुं दोननायाव गावनि हारि आरो हारिमु खौ सिनायथि मोननांगौ। सोदोमश्री मोननायजों जों बर' आबो थारै उन जाना थायाखै बिनिखाय जौनि साननाय हनायाव बिगाननि युक्ति थानांगोन। अदेबानि जाहामोनथानो मुं दोननानै गावखौ नेहादनि सिनायथि होनाय सम गैला। गाज्जि सोदोब आरो बइबो मख'नो हायि सोमोन्दोनि मुंजों मुं दोनोबा बोरै लिंथावनो। सोरबा सिख्लानि मुंखौ बेबादि दोनोब्ला आरो सोरबा सेंग्रानि मुंडा सुवामी जानांगौब्ला बोरै गाबज्जि जानांगौ?

भारतीय सावगारि महरनि सुंद' जारिमिन

—रबिराम ब्रह्म

रबिराम ब्रह्म (1954) : अदालगुरिनि सासे लिरगिरि, सावगारि आर्टिष्ट आरो थुनलाइगिरि। बिथां दायो आर्टिष्ट भिलेज (अदालगुरि)नि प्रिन्सिपाल।

दिनैनिफ्राय रोजा जि बोसोर फ्राम आगोलनि बाथ्रा। बै समनि मानसिफोरा लंथं देहायै हाग्रा-बंग्रा हाजो हाला, दंफां दन्दर, अन्थाय दन्दरफ्राव गानानै फिथाय-सामथाय एबा जुनात सिकार खालाम नानै बेदर गोथां गोब्राम जाबोनाय बाथ्राफोरखौ जों राउबो मिथियै नड।

मानसि होत्रायनो मिथिस 'हायै जिरातफोरखौ मखनो नाजायो आरो गोजाम नेसौन फोरखौ बुधुमना मायजलि थुमनानै होबथानो गालाडे। दिनैनि बायदि बै समाव राव थुनलाइ एबा राजखान्थि बाहायलायनाय हुदाया गैयामोन। होमब्लाबो जे, बै समनि हायनो बै समनिफ्रायनो सावगारि एरखांनाया सोलि बोगासिनो दड? बेखायनो सावगारि महरखौ राव, थुनलाइ एबा राजखान्थिनिखुइबो गिबि होत्रानै बुंजायो। गोदोनि मानसिफ्रा हाजो हालानि गिदित गिदित अन्थाय फोरखौ देखानानै खुरै खुरै सावगारि दानानै थालांदोंमोन एबा अन्थाय सायाव हाग्राबंग्रानि गाबजों सावगारि एरखांनो नेसौन गालांदोंमोन। बे सावगारिफोरनि फारिफ्रा (बिषय) बांसिनानो जुन आरो जुनातनि सिकार, दावसेन दावला दंफां-लाइफां आरो अन्थायनि दान्नाय लहानि सावगारिल 'मोन मानोना बै समाव जुनात 'सिकार खालामनानै जानाया जादों बिसोरनि गुदि हाबामोन। बेखायनो बिसोर गावनि हुदा नेसौनफोरखौ अन्थाय समाव अरायबोनि थाखाय होबथानानै गालाडे। मानो होत्रानै बुडे बै समाव लिरथुमनानै गालांनो थाखाय राव एबा थुनलाइ नि बाहायलायनाय हुदा गैयामोन। बेफोरनि थांखिमाफोरखौ उदाहरण दिनैसिमबो महेन्जादारो, हरप्पा, जोगिमारा खंखरफ्राव मोत्रो थाडे। दानि मानसि आरो गोदोनि मानसि बेसेबां जानगार अब्लाबो बै समनि मानसिफ्राबो सावगारि एरखांनायनि आंखल दंमोन, बेबो मोनसे बिथो थांखिन।

बुंगानैयाव गोदो गोदायनि सल 'मायाव बुंथि लांनाय बायदिब्ला बिस्वकर्माया ब्रह्माखौ सावगारि महरनि बिफा होत्रानै बुंलांदो। बुंथिलांनाय बायदि सासे राजायालायनो गावनि गोथै फिसाखौ ब्रह्मनि खाथियाव लाबोना फाहामनानै हरफिन होत्रानै मोदै रथो रथो गाबहैयो बिनि गाबनायखौ नुनानै ब्रह्मायालायनो

दुखु जाफायो आरो बिनि गोथै फिसानि गमामा महरखौ सावगारि एरखांना हरनायलाय दुखु-थिया राजाया गोसो खुसि जालाडे।

बंगाथामाव सित्रलेखानि बाश्रा। महाभारतआव लिरनानै गालांदोंदि, सित्रलेखानि बिलोगो उसा देवीयालायनो सासे मोजां सेंग्राखौ सिमांआव नुनो मोनफेरो आरो बिथांखौ मोखथाडव अरायबोनि थाखाय मोनजानो लुबैयो। बे बाश्राखौलायनो उषा देबीया गावनि सासे बिलोगो सित्रलेखानि सिगांआव बुंफोर नायलाय सित्रलेखाया बिलोगोनि सिमांआव नुजाथिफैनाय सेंग्रासाखौ सानखां गोसोयै सावगारि एरखांनानै दिन्थियो। बे सेंग्रायानो जादों श्रीकृष्णनि फिसौज्ला “अनिरुद्ध”।

बुंगाब्रैयाव रामायननि बाश्रा। रामायनावबो लिरनानै गालांदोंदि—‘मय’ मुंनि सासे एरखांगिरिया रामखौ गोसोखुसियै लाखिनो थाखाय सीता देवीनि गमामा महरमुश्री सोनानि मुसुखा (Image) दादोंमोत्रो आरो रावनाबो रामखौ थैबाय होत्रानै सीता देवीखौ थगायनो थाखाय “बिबर्जित’ मुंनि एरखांगिरिनि हेफाजाबै रामनि गमामा महरनि खरो आरो बोर्लो दाहोनायाबो गोदो गोदायनि मोनसे थांखिमा सलो।

साना थाडे हरा फैयो, समाबो सोलायबाय थाबोनाय लोगो लोगो सावगारि एरखांनायनि महराबो सोलायबाय थाबोयो।

गुप्तमुगायाव एबा महाराजा अशोकनि आमोलाव सावगारिनि महरा बांसिन आरो साबसिन रोदोमखांबोयो। बै समाव हिन्दु फोरनि गेजेराव बौद्ध धोरोमानो गुदि धोरोम मोन।

बे धोरोमखौ गोबाडैनो जेरावबो फोसावनो थाखाय बुद्धदेबनि बुंमा (बाणी) फोरखौ गुबुन सावगारि एबा मुसुखा दाहोनानै फोसावयो। बे सावगारि एबा मुसुखानि हेफाजाबै धोरोम बाश्राया भारत जारिमिनाव गैथारा। बेफोरनि। खिमाखौ दिनैसेमबो। ‘अजन्ता खंखराव नुनो मोनो महाराजा अशोकआ बौद्धधोरोमखौ एसिया हादरनि खोना-खोनला जायगाफ्राव फोसावनो आरो बौद्ध धोरोम सिबियारिफोरखौबो गुबुन आव धोरोम फोसावनो थाखाय सावगारि हरफानानै थिनहरदोंमोन—गुबुन हादोतनि बुद्धदेबनि बुंमाफोरखौ थाबहैनो बुजिसोहानाय बेखायनो दिनै सिन, जापान, बर्मा, जाभा, श्रीलंका, तिर्बत हादोरफ्राव बौद्ध धोरोम सिबियारि फोरखौ गोबाडैनो नुनो मोनो आरो बै बै हादराव जेसेबांखि सावगारि एबां मुसुखा नुनो मोत्राय निफ्रायनो अजन्ता खंखरनि सावगारि एबा मुसुखाजों महर फोजोबो। मानो होत्रानै बुडेब्ला बेफोरो मोनसे भारत हादरनिनो नैसोंन।

बेनि उनाव फैयो गेजेर मुगा। बे बहुमाव भारत हादोरनि बिखायाव भारतीय धोरोम एबा राजखान्थिनि गेजेराव बेले बेजे जागासिनो दंमोन। हिन्दुफ्रा बोद्ध धोरोमनि सोलाय गोदान हिन्दु धोरोमखौ सिबिफिन्नो थाखाय दावराव दावसि खालामगासिनो दंमोन। बै समनिफ्रायनो बोद्ध धोरोमा भारताव मिरौ जिरौ अबस्था जानो हमासै आरो गुबै हिन्दु धोरोमा बेरखांफिन्नायसै। हिन्दुफ्रा गुबुन गुबुन मोदायफोरखौ सिबिनानै गुबुन गुबुन मुसुखा दानो हमासै आरो सावगारि आगर आखाय एरफबनाय धोरोमसालियाव मुसुखा फज'नानै सिबिनो हमासै। बियो दिनैसेमबो हिन्दु धोरोम सिबियारिफोरनि गेजेराव सोलिबोगासिनो दं। बे मुगायावनो भारत हादरआव मोन्नो हानाय आरो आगर आखाय एरखांनायफ्रा लासैनो साबम्रांदोंमोन। बेफोरनि थांखिमाफोरखौ दासिमबो इलोरा आरो एलिपेष्टायाव नुनो मोनो। बेखौ जों दिनै राजस्थानि सैलिया (Style) होन्नानै बुंजायो। राजस्थानि सैलिया भारत हादरनि नेसोंन। बे सावगारिफोरनि फारियाव भारत हादरनि समाजखान्थि, राजखान्थि, धोरोम-खोरोमनि साया बेरखांनाय नुनो मोनो।

ओरैहाय बांगाल (मुसलमान) हारिफोरनि नारानाथाद नाखेबनाय। बांगाल हारिफ्रा एबा बांगाल राजा बाबरा भारत हादरखौ जै खालामखांनानै राइजो सालायो। बाबरा सासे गावनो थुनलायगिरि आरो सावगारि महरखौ मोजां मोनग्रा जोहोलावमोन। बिथांआ भारतखौ जै खालामखांनायनि उनाव लोगोयाव माखासे इरानिनि आखाफाखा सावगारि एरखांग्रा महरगिरिफोर लाबोफादोंमोन आरो भारतनि सावगारि एरखांग्रा महरगिरिफोरजों लोगोसे दोनफानानै हाबा मावदेरफानो थिनदोंमोन। भारतनि महरगिरि आरो इराननि महरगिरि खौसेयै लोगो लानानै जायफोर सावगारि एरखांदों बेखौनो जों दिनै मोगल सैलि होन्नानै मखयो। मोगल सैलि सावगारिफोरनि फारिफ्रा खालि मानसि एरखांनाय राजखान्थि, सामाजिक, राजथावनि आरो मिथिंगानि सावगारिलोमोन। मानो होन्नानै बुडेब्ला सावगारि एरखांनाया मुसलिम धोरोमनि हेंथा आरो नखर सिडवनि नेसोंनफ्रा जालामानि सिंआवमोन। बेखायनो दिनैसेमबो मोगल सैलिआव मुसलिम धोरोमनि सावगारि एबा न'खरनि सावगारि मोन्नो थाड। मोगल सैलिया बांगाल राजा आकबरनि आमोलाव बइनिखुइबो साबसिन हामसिन रोदोमखांनो हादोंमोन आरो उननि राजा औरंजेबआ आमोलाव जोबथाहैयो। मानोना औरंजेबनि सासे रागा थिउरिया अनागारि राजामोन। बिथानि अनागारि आखोलाव फोरजाफा एबा सावगारि एरखांगिरिफ्रा राजथावनियाव थानो हायैलाय जैरे हागौ एरै सेरखाय बेरखाय फोरसा-फोरसि खारसारद्ला जोबलांनो हमासै—गुबुन गुबुन जायगाफ्राव। बिथामोनहा एबा महरगिरिफ्रा गुबुन गुबुन जायगायाव थाहैनानै जायफोर सावगारि

एरखां-लांबाय बेफोरखौ जों दिनै जायगाफोरनि मुं फारियै गुबुन गुबुन सैलिन मुं मख'नाय जायो। जैरै—पाहाडि सैलि, कांग्रा सैलि, गुलेर सैलि, रसौलि सैलि, काश्मीर सैलि, पाटना सैलि, बायदि बायदि।

बेनि उनाव फैयासै ब्रिटिस आमोलनि जुग। ब्रिटिसफ्रा भारत बिमानि बिखायाव राइजो सामलायनानै भारतनि हारिमु सावगारि महरफोरखौ बेसेन गैया होन्नानै जोगारफैनो हमासै आरो कलिकता, बुम्बाइ माद्राजफ्राव सावगारि महर एरखांनायनि फोरोंसालि खुलिनानै भारतनि फरायसाफोरखौ गावसिनि हादरनि सावगारि एरखांनाय आदब-हुदाफोरखौ फोरोंनो हमफैयासै। नाथाय आखल गोनाड अराइबो आखल गोनांखा। आखल गोनां मानसिया गुबननि मोजां गाज्रिखौ निन्दा होखाया, थिख बे बायदिनो सासे आखल गोनां मानसि ओंखारबाय जि मानसिया भारतनि हारिमु सावगारि फोरखौ अनसायखांफिननानै गोजौ थाखोआव दैखां फिनो। बिथां अनसुलायानो जादों एरखांगिरि श्री इ. पि. हेरेल। बिथांनि अनसाय नायाव, बिथांनि नाजानायाव आरो बिथांनि गोहोआव सावगारि महर एरखांग्रा फोरों सालिफ्राव भारतीय सावगारि महरनि आदब हुदाफोरखौ फोरोंनो सोस'न फिननाय जायोसै आरो फरायसाफोराबो गोसो होसारनानै गावनि हादोरनि हारिमुफोरखौ सोलोंफिन्नो हमासै। श्री इ. पि. हेवेला गमामायैनो सासे एसे महर एरखांगिरि गोसोनि मानसिमोन बे हिसाबैनो बिथांआ गुबुन हादरनि सावगारि महरनि बेसेनखौ बुजिनानै गोरंमानि भारतीय सावगारि महरनि बिजाब लिरथुमनानै गालाड। बेनि उनाव श्री इ. पि हेवेलनि मदद आरो थुलुंगा मोन्नानै भारतनि महर एरखांगिरि श्री अवनीन्द्र नाथ ठाकुर बिथांआ गावनि लोगोफोरखौ लाफानानै भारतनि सावगारि महरखौ फोसावफिन्नो नाजायो आरो नाजायै नाजायै बोसोरजिनि उनाव मोनसे गोदान महरनि सैलि बेरखांहोफिन्नो हायो, जायखौ जों दिनै "बांगाल सैलि" होन्नानै बुडे। बेनि उनाव भारतनि महर एरखांगिरिफ्रा, मख' जाथावथावयै—श्रीअवनीन्द्र ठाकुर, गगनेन्द्र नाथ ठाकुर, बामिनि राय, असिनि कुमार हलदर, नन्दलाल देवीप्रसाद राय, बिथांमोनहा खौसे जानानै, भारतनि मोनसे महर एरखांगिरिफोरनि आफाद दायो बे आफादनि मुंआनो जादों "Indian Society Oriental Art" बे आफादनि गेजेरजोंनो भारतनि महर एरखांगिरिफ्रा सावगारि महर एरखांना गुबुन गुबन हादोरआव खिन्थाहैयो आरो धोरोम बाख्याय जानाय बान्था मोनो।

बे बायदिनो, जैरै भारत हादरआव राजखान्थिनि महरा सोलायलायबाय थाबोदोंमोन, बे बादिनो भारतनि सावगारि महर एरखांनायफ्राबो मिरौ जिरौनि गेजेरजोंनो थांबोगासिनो दं। ■

आसामनि साहा आबादआव बड'-कसारिफोरनि भाव

—प्रतुल कुमार भवरा



प्रतुल कुमार भवरा (1938) : अम्बागामि बोरिगामिआव बिथानि न'। दरनि गोजाम खलबनि लिरगिरि। फरायसालि लेडाइ नायदिंगिरि साखिनिफ्राय आजिरा लाना आथिखालाव लिरनायाव मुखुब थायो।

रबार्ट ब्रुसखौ आसामनि जायगानि साहा बिफां दिहुनगिरि होननाय जायो। 1823 माइथायाव ब्रुसआ फालांगिनि थांखि लानानै गरगामिआव फैनाय समाव सासे सिंफौ आगदार (chief) निफ्राय सा आसामाव साहा बिफां थानाय खौरां मिथिनो मोनदोंमोन। उनाव सदियाआव थानाय रबार्ट ब्रुसनि बिफं सि.ए. ब्रुसआ साहा बिफांनि फानैसो फुलि आरो बेगर बुथुमनानै क'लकातानि लाइफां बागाननि नायथिंगिरिनो दैथायहरदोंमोन। 1832 माइथायाव जेनकिन्स साहाबआ आसामनि बायदि बायदि बेसेन गोनां बेसादनि सोमोन्दै मिथिनो फैनाय समाव सि.ए. ब्रुसआ साहा बिफांनि थाथाय आरो साहा बानायनायनि नेम बिथानि नोजेराव लाबोदोंमोन। बै समावनो क'लकातानि मोनसे मख'जाथाव हान्जाया आसामनि हानि गुन आनजाद खालामनो फैनानै जायगानि साहा बिफांनि जोलैबो बुथुमदोंमोन।

गिबिआव सीन हादरनि साहा बिफांआसो नंगुबै साहा बिफां आरो आसामनि साहा बिफांखौ साहाबिफां नड होनना साननाय जादोंमोनब्लाबो उनाव फोरमान जायोदि सीन हादरनि साहा बिफांआ आरो जायगानि साहा बिफांनि गेजेराव जेबो फाराग गैया, बर' जायगानि साहा बिफांनि गुनआ हामसिनद्रायसो। गिबि आउथायाव रोंगैथि गैयिआव आलेकजेन्दार ब्रुस आरो जेनकिन्स साहाबआ सदिया खाथिनि कुन्दिलमुखआव बाला साहेरा हायाव साहा बिफां गायदोंमोन। बेनो आसामनि गिबि साहा बागान। जायगानि सोमोन्दै रोंसारथि गैयिआव

बुर्लुबुथुरनि देरबोनाय दैआ बेखौ बुखारना लांनायसै। गर्डन साहाबआ सीन हादरनिफ्राय फां नैजिजौ साहा फुलि लाबोनानै माखासे कुन्दिलमुखआव गायनायनि उनाव खायफाखौ साबुआव गायदोंमोन। नाथाय सिंफौफोरनि गाग्लोबनायाव 1838 माइथायाव बेखौ जयपुरआव दैखांना लांनाय जानायसै। बेबादियै 1838 माइथायनि गेजेराव जयपुर, दिनजय, सरुटिराइ, सुखान पुखुरि बायदि जायगायाव साहाबागान गायसननाय जानायसै।

इस्ट इन्दिया क'म्पानिआ गिबिआव आनजादबादियै साहानि आबाद मावनो थि खालामदोंमोनब्लाबो क'म्पानिआ नाथाय साहा आबादखौ गावनि आखाइआव लाखिआलासे बेसरखारि फालांगिगिरिनि आखाइआव गथायनायखौनो हामसिन होनना साननायसै। इंलेन्डआव 'आसाम क'म्पानि' मुंयै मोनसे गिदिर फालांगि फसंथान दानाय जानायसै आरो 1840 माइथायआव जयपुर साहा बागानखौ आसाम क'म्पानिआ बायना लानानै आसामआव साहा आबादनि खामानि जुरिजेननायसै।

साहा आबाद मावनो जुरि जेननाय समाव गोबां खामला आरो साहा बानायनो आखा-फाखा मानसि नांगौ जानायाव सीन हादरनिफ्राय लाबोनो गोनां जादोंमोन। नाथाय सीना खामलाफोरखौ लाबोनायाव गोबां रां बाहायनो गोनां जादोंमोन। साहा आबादआव जायगानि सासे खामलानो होनांदोंमोन दान मोनसेआव जिरां, नाथाय एखे समावनो सासे आखा-फाखा सीन खामलानो होनांदोंमोन खमयैब्लाबो ब्रैजि रां। गुबुन फारसे बोसोरथामनि थाखाय सासे खामलाजों रादाय खाबाला सासे सरासनम्रा सीना खामलाया मोनदोंमोन दान मोनसेआव जिड' रां, नाथाय सासे जायगानि खामलानो दान मोनसेआव ब्रै रां होबोलानो जादोंमोन। मब्लाबा मब्लाबा लाबोनाय समाव सीना खामलाफोरा गावनि गेजेराव लामायाव बुला-बुसि खालामनायावबो क'म्पानिआ गोबां रां भोरिनो गोनां जादोंमोन। (1, P. 229)।

बेफोर गासै असुबिदा जानखारहोनो आरो खहानिफ्राय रैखामोननो 1843 माइथायनिफ्राय क'म्पानिआ सीना खामला फोरजों साहा आबाद मावनाय बिथांखिखौ नागारनायसै। बेनि उनाव मख' जाथाव बादियै 1859 माइथायसिम गुबुनमायै हागौमानि जायगानि खामलाफोरजोंनो साहा आबादनि खामानि सालायनाय जादोंमोन। नाथाय जायगानि मानसिफोरखौबो खामलाबादियै मोननाया एसे गोरलै नडमोन। मानोना आसामआव बै समआव आबाद मावनो गावनि

हा गैयि मानसि गैयामोन होनजायो। जायगानि मानसिफोरा मालायनि सिंआव थानानै गोरा नेम खान्थिनि गेजेराव खामानि मावनायनिखुइ उदांयै गावनि खामानि मावनायखौनो हामसिन होनना सानदोंमोन (2, P-313)। जायगानि मानसिफोरनि गोबां आंखालबो गैयामोन जायनि जाहोनाव बिथांमोना साहा बागानआव गोरा जिरान गैयि खामानि मावनायखौ लुबैयाखैमोन (3, P-56)।

खामलानि आंखालखौ जानखारहोनो जायगानि असमीया सुबुंफोरनि सायाव बरसा लायालासेनो साहा क'म्पानि दैदेनगिरिफोरनि नोजोरआ गाहाइ आसामनि बड' कसारि सुबुंफोरनि थिंजाय थांनायसै। सादा सिदा, दुखु खस्थ सहायसुला, बोलोगोरा, लाब्रा-लुब्रा मोदोमनि सरासनम्रा बड' कसारि सुबुंफोरानो हाग्रा बंग्रा सिफायनानै बागान खुलिनो हामसिन खामला जागोन होनना बिथांमोनआ साननायसै। खाम्ला बुथुमगिरिफोरनि गोदै खौरांआव थगायजानानै थगर बगर हान्जा हान्जा बड' कसारि सुबुंफोरा कामरुप, ग'वालपारानिफ्राय साहा बागानआव खामानि मावनो सा आसामआव फैनायसै। ग'वालपारानि साहा बागानआवबो बै समाव गोबां बड' कसारि खामला थाग्रा देराखौ बै समाव कसारि कुलिनि आस्ताना बुंनाय जादोंमोन (4, P. 32-33)।

आसाम क'म्पानिआ बड' कसारि खामलाफोरनि सायाव बेसेबां सोनारनो गोनां जादोंमोन बेनि फोरमान मोननाय जायो 1854 माइथायाव लिरनाय जर्ज उइलियामसननि फोरमायथिआव '... in the cultivation of our future extensions, we must mainly depend on Kachari and immigrant Bengali labour'. (5, P-484)। उइलियामसननि फोरमायथिनिफ्राय मिथिनाय जायोदि बड' कसारि खामलाफोरा दुखु सहायसुला, गोरा खामानि मावनो हाग्रा मानसिल' नडमोन, नांगौजाबोला बिथांमोना खौसेथियै क'म्पानिनि बेरेखायै बिग्राइखानोबो हादोंमोन—'A real or fancied injustice to one man may occasion the withdrawal of hundred (Ibid 484)। बड' कसारि खामलाफोरनिफ्राय साहा बागाननि बिगोमाफोरा आरो मोनसे जाहोनआव जोबोद असुबिदा मोनदोंमोन, बे जादों नांगौ रां थुबुर जानायनि लोगो लोगो गोबां बड' कसारि खामलाफोरा खामानि नागारना थादोंमोन (6, P-22)। 1898 माइथायाव रेभा: डाउडिंआ 'Indian Churchman' मुंनि लाइसिआव लिरनाय लाइजामआवबो बड' कसारि खामलाफोरनि खौरां मोनो—'The Cacharis ... come in large gang to upper Assam and are welcomed on most gardens, working however, only for a certain number of

months'. क'लकाता ब'र्डनि 1840-41 माइथायनि फोरमायथिबादियै बुंनो थांबोला—'it is difficult to keep them and still more to take them so as to bring them back to fulfil, their engagement when they have deserted.

बांसिन साहा आबादगिरिआनो अनगोथे, एनावदुगा मोन। बिथांमोना गावखौनो फोरभु आरो खामलाफोरखौ बान्दाबादि सानदोंमोन, बाहायदोंमोन। गोबां समाव बिथांमोना खामलाफोरनि सायाव मोदोमनि जोबोद साजा होनाय लोगो लोगो सुबिदाबादियै हिन्जावफोरनि आथोननि सायावबो लुबैसुला नोजोर होदोंमोन। दारकानाथ गांगुलिन रावै—'The planters are the lords of the vast wilderness of Assam and people tremble in fear of them. ... Kicking and cuffing are a mode of refined punishment which they inflict upon the coolies'. हिन्जावफोरनि सोमोन्दै दारकानाथआ लिरदों '... they should not feel the least compunction to tempt away by the glitter of gold a class ignorant and simple hearted women and rob them of a treasure which is even more precious than the richest diamond that may adorn a throne'. खारलांनाय आरो खौरांलायि खामलाफोरखौ हमना लाबोनानै हाजदआव दोननाय जादोंमोन आरो बैसाव दै गांब्लाबो दै थोफ्सेबो लोंनो होनाय जायाखैमोन। दारकानाथ गांगुलिन लिरनायाव भ'ला कसारि मुंनि सासे खामलाखौ जोबथे सालिआव दोननाय खौरां मिथिनो मोनो।

बड' कसारि खामलाफोरा साहा आबादगिरिफोरनि गासै इनाइ बिथोनफोरखौ अजद गैयिजासे खर' गंगलायना मानिना लादोंमोन होनना साननो हाया। 1848 माइथायाव बड' कसारि खामलाफोरा दानथामनि नायथिंगिरिनि बांलाखौ घेराव खालामना लाखिनानै इयुनाव मजुरि होनायाव बेबादि इनाइ जानाय नड होनना खौरां लाखादोंमोन (Ibid 15-16)। बड' कसारि फोरनि बे बिग्रायखांनायनि उनाव नायथिंगिरिआ क'लकातायाव थानाय दैदेनगिरिफोरखौ लिरदोंमोन—'The Cachari coolies should not be dependent on, and efforts must be directed to recruit the Bangal coolies (6, P-28)।

1859 माइथायावबो आसाम क'म्पानिनि बड' कसारि खामलाफोरा मजुरि बारायहोनो थाखाय धर्मघट खालामनानै खामानि बन्द खालामदोंमोन। नाजिरा

बागानआव जुरिजेननाय बे धर्मघटआ फारियै गुबुन बागानफोरावबो गोसारलानायसै। मिथिनो मोननाय जायोदि सा 600 निखुइ बारा खामलाया मजुरि बारायहोनो थाखाय 'स्लगान' होदोंमोन। खामानि बन्द खालामनायनि ओंथिआ रादाय सिफायनाय, बे फावखौ दिन्थिनानै बड' कसारि खामलाफोरनि आगदार (leader) फोरखौ जिला खुंथाइगिरिनि आखाइआव गथायनानै साजा होनाय जानायसै (7, P-15-16)।

बड' कसारि खामलाफोरनि धर्मघटआ साहा बागाननि बिगोमा आरो सरखारनि जायगानि खामला थिसननायनि नोजोर आरो गोरोंथिखौ सोलाय होनायसै। बिग्राइखानायखौ दबथायनायनि उनाव आसाम क'म्पानिआ क'लकातायाव थानाय मावखुलिआव ओंथिगोनां मोनसे थांखि लानायसै—'There should be a large proportion of coolies of another class employed; (6, P-31)। आसामनि कमिसनार जेनकिन्स साहाबआ बंग खुंथाइगिरिनि नेहाथारिखौ लिरनाय लाइजाम बादियै—'I trust the event (i.e. the strike by the Kachari labourers) which has just occurred will be a warning to the Assam Tea Company and planters generally not to employ any great mass of Cacharis together and show the necessity of making a provision against such strikes, by importing other class of labours, who would prove a check upon the Cacharees'. (Ibid 30)।

साहा आबादगिरिफोरा खामलाफोरखौ जेरैयैब्लाबो साहा बागानआव खामानि मावनो बाध्य खालामनो थाखाय बायदि खायथालि सोलो गेलेनो नागाराखैमोन। नाथाय एसेबां हास्थायनायनि उनावबो खामलाफोरखौ बागानआव हमथाना लाखिनाया गोरलै नडमोन। खामला फोरखौ गोजोन होनो मजुरि बारायनाय जादोंमोन। 1839 माइथायाव दानसेनि मजुरिआ नै रां डाइन आनामोन। 1858-59 माइथायाव बेखौ बारायनानै खालामनाय जादोंमोन दानसेआव ब्रै रां डाइन आना। बेनि अनगायैबो खामला बुथमग्राफोरा जौ, खानि बायदि मुवाफोरजों खामलाफोरखौ लुबै होदोंमोन आरो रां दाहार होनानै खामलाफोरखौ बागानआव खामानि मावनो बाध्य खालामदोंमोन (Ibid 229-230)।

हानि खाजाना बारायना होबाला रानि आंखालआव खामलाफोरा बागानआव खामानि मावगोन होनना साननानै दैदेनगिरिफोरा सरखारखौ खाजना बारायहोनो

थाखाय खावलायदोंमोन (I, P 230)। खामलाफोरा गोबां खानि जानायनि जाहोनावनो खामानि मावनो बायो होनना साननानै आफु आबाद मावनाय आरो खानि फाननायखौबो बन्द खालामनो बिथांमोना सरखारखौ सुबुरुन होदोंमोन (7, P 9)। नाथाय सोमोनांथाव खौरांआ बेनोदि उनाव बिथांमोनआनो गावनि थिरांथाखौ सोलायनानै खामलाफोरखौ खानि जानायाव थुलुंगा होदोंमोन। मानोना बिथांमोना सानदोंमोनदि गोबां खानि जानायनि जाहोनाव रां नांगौ जाबाला खामलाफोरा साहा बागानआव खामानि मावनो बाध्य जाथारगोन (3, P 89)। बड' कसारि खामलाफोरा बेसेबां खानि बाहायदोंमोन बेखौ 1893 माइथायाव नायबिजिरनो दाना होनाय कमिटिनि सिगांआव साहा आबादगिरिफोरा दाखिल होनाय फोरमायथिनिफ्रायनो मिथिनो मोनो—

'The thousands of Kachari coolies from Kamrup and Goalpara District, who came every year to upper Assam tea gardens for work, use opium for the most part, and they are those who work hardest and least liable to illness. They builed wretched houses and the sanitation of their lives is never necessary to be looked into. As a rule they don't use English medicines and don't suffer from diseases'. (Ibid Appendix-9)।

सायाव रायखानायबादियैब्ला बड' कसारि खामलाफोरा बोरै न'गिजि लुनानै, खिखर गैयालासे मुगैथाव, गाञ्जि आउथायाव बेराम जाब्लाबो डाक्टरनि मुलिबाहायालासे थादोंमोन बेखौ मिथिनो हायो। बेबादि गाञ्जि आउथायाव बेसेबां बड' कसारि खामलाफोरा बेरामआव सिक्किटसानि आंखालआव आलाडिडयै थैनायखौ गोबाना लादोंमोन बेनि जेबो अनजिमा गैया।

जायगानि खामलाफोरनिफ्राय मोननाय बायदि बायदि असुबिदाफोरखौ जानखारहोनो 1859 माइथायनिफ्राय बायजोनि लाबोनानै बड' कसारिफोरनि आवहेला आरो खौसेथियै बिग्रायखानायखौ बादिनांनायबादियै क'लकातानि दैदेनगिरिफोरा बायजोनिफ्राय खामला लाबोनो मोनसे थांखि लानायसै। बेनि सिगांआव 1840 माइथायाव हाजारिबागनिफ्राय सा 652 खामला थगायनानै लाबोनाय जादोंमोनब्लाबो खलेरा बेरामाव माखासे लामायावनो थैनायाव आद्राया खारलांनायसै (Ibid 231)।

बायजोनिफ्राय खामला लाबोनाय उनावबो खायफा साहा बागानआव बड' कसारि खामलाफोरा खामानि मावबाय थादोंमोन। 1893 माइथायाव जगनाथ

बरुवानि साहा बागानआव जागोनबादि सा 500 सामलाया खामानि मावदोंमोन। बे सा 500 खामलानि गेजेराव सा 300 बायजोनिफ्राय लाबोनाय बाडली खामला मोन। आद्रानि आद्रायामोन बड' कसारि खामला (7, appendix-5)। लक्ष्मीनाथ बेजबरुवानि जिउ खौरांआवबो बड' कसरि खामलानि खौरां मोननाय जायो।

दरंआव 1829 माइथायाव साहा आबाद मावनो जागाय-जेननाय जादोंमोन। घाग्रा-कुन्दरबिलआनो दरंनि गिबि साहा बागान। 1870 माइथायाव दरंनि साहा बागाननि अनजिमाया गं 46 मोन, नाथाय 1875 माइथायाव बे अनजिमाया बांनानै जाहैयो गं 94। साहा बागाननि अनजिमाया बांलायनायनि जाहोनाव दरंजिलानि बड' कसारि सुबुंफोरनि जिउ राहायाव गोबां खहा सफैदोंमोन। माइ आबाद थिलिफोरखौ इनाइयै दखल खालामनानै साहा बागान खुलिनाय जादोंमोन। 1866 माइथायनिफ्राय 1875 माइथायनि गेजेरआव दरं जिलायाव 41,475 एखर हानि माइ आबाद खमिदोंमोन। गुबुनफारसे हानि खाजोनायाबो गोबां बारिलांदोंमोन। 1853 माइथायाव आसामआव बृटिस सासननि सोमोन्दै मिथिनो फैनाय क'लकाता सदर देवानि आदालतनि बिसारगिरि मि. ए-जे म'फाट मिलसनि फोरमायथिनिफ्रायनो दरंआव खाजोनाया बौरै बारिदोंमोन बेखौ नुनो मोनो—

1832-33 माइथायाव 41,506 रां

1842-43 माइथायाव 135,454 रां

1852-53 माइथायाव 157,795 रां

बोलो भान्दारि इंराज साहा बागान दैदेनगिरिफोरा माइ आबाद थिलिफोराव इनाइयै साहा बागान खुलिनायाव आरो हानि खाजोना बांलांनयजों लोगोसे बेसादफोरनि बेसेनआ सानस' हायिबादि चबारिलांनयाव दरंनि बड' कसारि सुबुंफोरनि आउथाया दैयाव हांसो सानस्रियिबादि जादोंमोन आरो जानथुबान, उदां गोसोनि बड' कसारि सुबुंफोरा साहा बागानआव खामला मावनो बाध्य जादोंमोन। बेमोन—'growing monetization and coloniencroachment' नि फिथाइ (6, P.21-22)।

गोदोनालि मेसिन बाहायै समाव गोदानै खाना लाबोनाय साहा बिलाइफोरखौ लेहायनो होनानै हान्जा हान्जा हौवा हिन्जाव खामलाफोरा एमनि सायाव आखाइजों रोसि अंखारलांनय बादियै मोजांयै नादोंमोन आरो मोनसे मोनसे

गथा रुटिबादि बानायनानै दुंनो गापहोना दोनदोंमोन। उनाव बैफोरखौ गोबायै सान्द्रिआव होनानै अरखिनि सायाव लासै लासै दुंम्रेमहोनाय जादोंमोन। रोजा रोजा बिघा हानि अरनबारि एवनानै, बनथ'रजफोरखौ खदालजों जावखुनानै हाखौ साहा फुलि गायनो बाहायजाथाव खालामनाय जादोंमोन। जिरान गैयि, गोरा मेहनत आरो देहानि बैरेखा गात्रि, मुगैथाव आबहावायाव सिक्किटसानि आंखालआव गोबां बड' कसारि खामलाफोरा मेलेरिया, कलेरा, कालाआजार बादि बेरामाव आलादिडायै थैनांदोंमोन।

मेसिनफोर आमदानि जानायाव आरो बुर्लुबुथुर दैमायाव 1843 माइथायनिफ्राय जाहाज खारनो लानायाव गिलिर आरो गिदिर मेसनिफोरखौ जाहाज नेग्रा गाथोननिफ्राय अरनबारि गेजेरजों लामा दिहुन्नानै लहानि सिरि फज'नानै बेनि साजों हान्जा हान्जा बड' कसारि खामलाफोरा बैफोरखौ बोना, नारना घाग्राबादि भ'तान हाजोसेरनि नांगौथार जायगायाव लाबोनाय जादोंमोन। बै समाव दरंनि बड' कसारि खामलाफोरा इंराज बैदार आरो नायथिंगिरिफोरजों बायजानाय बान्दाबादि जोजानाय आरो बुजानाया सरासनम्रा खौरांमोन। 1868 माइथायनिफ्राय मोसौ गारि बाहायनोलानायाव बे दुखुआ इसे खमिदोंमोन। बायजोनिफ्राय खामला आमदानि जानाय लोगो लोगो —दरंनि साहा बागानफोराव बड' कसारि खामलानि अनजिमाया सेंलांनायसै। जासिमायै इंराज दैदेनगिरिफोरा उदां, बादगा बड' कसारि खामलाफोरखौ सोरलाब होनना साननो लानायसै। मख'जाथाव बाश्चादि बेनि गेजेरावनो 1865 माइथायआव भ'त पन्दित आरो बितांनि बिजामादै श्रीलुइस भबराया दरंनि द'वामखा गामिआव जागोनबादि 15 बिघा हायाव साहा आबाद मावनो सुरिजेनदोंमोन। जानांगौ गासै आसामनि गेजेराव बेनो बड' सुबुंनि गिबि साहा बागान। दानालि रां गोनां भारतआरि दैदेनगिरिफोरनि सिंआव थानाय दरंनि खायफा साहा बागानआव बड' कसारि खामलानि अनजिमाया जागोनबादि 2% निखुइ खम। गंसे, गंनै बागानावसो जागोनबादि 10% निफ्राय 50% बड' कसारि खामला दड।

1978 माइथायनिफ्राय आसाम सरखारआ जायगानि सेंग्राफोरखौ फिसा साहाबागान खुलिनो थुलुंगा होनायनि उनाव दरंनि गोबां बड' कसारि सुबुंफोरा साहा बागान खुलिनो आवगाय बोदों। 1992 माइथायआव बारग' लेडइ नायथिंगिरि प्रनय कुमार बसुमतारिनि दैदेननायाव द'वामखा-बरिगामिनि परमानन्द भबरा, श्याम दैमारिमोनबादिया मैदेरबारि (ब्रादारहुद) साहा बागान खुलियो।

बै माइथायआवनो डिमाकुसिनि खगेन बर' आरो डेबिद दैमारिआ नालापारा साहा बागान खुलियो। 1996 माइथायआव रिपेन दैमारि, देबाशीष भबरामोनआ ग्रीनलेन्द साहाबागान खुलियो। बेफोरनि अनगायैबो दानालि दरंआव जोंलारि, इडेन, मिजिं, सानजोरां, सिलिखा, गान्दा, लिबारेल बायसेश्रा, जागोनबादि गं 40 नि खुइ बारा फिसा साहा बागान बड' कसारि सेंग्राफोरा हारसिंयै एबा लोगो लाज्जलायनानै खुलिनानै गाव गावनि जिउ राहा दिहुनना लादों। दरंनि अनगायैबो क'कराझारबादि जायगायाव गोसो गुदुं बड' सेंग्राफोरा साहा आबाद मावनो आखाइआव लादों। बेनि गेजेराव 1998 माइथायआव खुलिनाय बिजनिनि सोरजिलु साहा बागानानो मख'जाथाव जानांगौ। ■

मदद लानाय जादों :

1. Borpujari H.K. Assam in the days of company 1826-1858. Guwahati 1963.
2. चेनेही बेगम। असम बुबङ्गी, गेइटेर असमीया अनुवाद।
3. Borpujari H.K. Political History of Assam 1826-1919, Vol-I Guwahati 1977.
4. शर्मा देवेन्द्र नाथ। शुरुदेर कालिचरण ब्रम्हा। योर्बहट १९८३।
5. Antrobus H.A. A history of the Assam Company 1839-1953. Edensburgh 1957.
6. Chattopadhyaya R. (1987). Social Prospective of Labour Legislation in India 1859-1932, As applied to Tea plantation. (unpublished).
7. Guha A (1977) Planters Raj to Sworaj : Freedom Strugle and Eelectoral politics in Assam 1826-1947. New Delhi.
8. चौधुरी प्रसेनजिङ्। असमर चाह बनुरा आरु उँनेश शतिकाब विद्वङ् समाज। शुराहटी १९८९।
9. Ganguli D. Slavery in British Domanion (Compiled by K.L. Chottopadhyaya) Calcutta 1972.

बर' सोदोबनि आखल आरो सोदोबदा (Spelling)

—ज'सेफ दैमारी



ज'सेफ दैमारी (1935-2007) : दरनि गोजाम खल 'बनि लिरगिरि। जिला बर' थुनलाइ आफादनि बारग' नेहाथारि आरो आफादगिरि। बिथानि नआ माजाबटआव।

बर' रावखौ इस्कुलाव होखनजेन होनो हानायनिफ्राय बर' थुनलाया ग्लब ग्लब सोमखांबोदोंसै। बि रंजानायनि बाथ्रा। जानो हागौ बिजाब सफायगिरिफोर थाब्ला आरो बिब्दि फरायग्रा फोरनि बाजार थाब्ला बि गुबुन हारिनि थुनलायफोर बादि समायना रमायना बिबार बारग्लाबसिगौसै।

बि ग्लब ग्लब सोमखां हांनाय समाव मोजां थाल लायाब्ला बर' थुनलायनि उत्रि देरखांबोनायाव हेंथा मोत्रो हागौ आरो मालायनि मेगनाव गुलाय गुजाय नुनो हागौ। बर' रावहा मोजाडै बुथुमोब्ला गोबांथार सोदोब दडे। फा, बिया होगोन हिन्जाव गोदानखौ जाय जैरै खुसि एरै आसान, दौला नाखि गानहोफब्ला समायआ मदरा नुनाय बादि सोदोब फोरनि सोदोबदा (Spelling) फोरखौबो जाय जैरै खुसि एरै दाब्ला बिबो समायआ मदरा जागोन। बर' रावनि सोदोबदा (Spelling) आबो दादसे बिबादि नुजादों।

बर'नि रायनाय सोदोब फोरखौ बिजिरब्ला नुनो मोनो, बिहा क, ट, त, प, क्ष, हांखो फोरखो जोथायनो सोदोब गैया। गुबुन गुबुन रावनि क, ट, त, प, क्ष हांखो फोर थानाय सोदोब बाहायब्लाबो, बिफोरखौ ख, ठ, थ, फ हांखो फोरोजोंसो बायनाय जायो। जैरै, किताप (अः) खिथाब (बः), टोकोन (अ) थखन (बः), पखरा (अः) फाखा (बः), तोपा (अः) थफा (बः), टिकेट (इंराजि) ठिखेठ, बायदिसिना।

ओन्थाय	रायनायाव	“थखन”	लिरनायाव	टोकोन;
”	साखाथि-फाखाथि	”	साकाति	फाकाति
”	थारं	”	तारं	
”	साखन	”	साकन	
”	चौखन	”	सौकन	

सोदोबदा (Spelling) खालामोब्ला बर' फोरनि थाखै सोमो नांथाव थाव जागोन आरो बर'राव सोलौंनाय गुबुन फोलेरनि मानसि फोरनि खुगाव खोनाब्ला बोराब थावया, रायथि थावया जागोन। बिनिफ्राय बर' थुनलायनि महर गोसायाबो गोमा-गोन।

सोरबा सौंनो हागो कोकराझार थाउनिनि मुंखौ बौरै लिरनो। फा कोकराझार थाउनि मुंखौबो बर' फोरनि सालाय खुगाव “खोखराझार होत्रायसो खोनायो। सल'बाथा (इतिहास) लिरगिरि फोरा बुडे “कोकराझार सोदोबा” खांश्राय जाहार (हाग्रा) निफ्राय सफैदों। बि थांउनिया गोदो जाहार (हाग्रा) गेदेतमोननो आरो बियाव जोबोद खांश्राय दंमोत्रो। खांश्राय जाहार सोदोबनि फ्राय असमीया राव आव सोलायनानै जानो हागो, कोकराझार, उनाव कोकराझार जालांदों।

गुबुन रावनि जि सोदोबानो जाथों मानो जि सोदोबा गुबुन रावआव थांनानै जि राव बुंग्रा सालाय खुगानि फ्राय बौरै ओंखारबोदों बिब्दिनो सोदोबखौबो दांब्लासो बि सोदोबा बि रावनि थाखै गोदै दैलु जायो। लासै लासै जि सोदोबा गलाय जानानै रोजोबनानै गाव रावनि आंगो, गुबै जालाडे। गोदान दाजेननाय थुननायहोत्रानै उसुखुथु मोत्रानै, गलायजानानै रोजोबखानाय सोदोब फोरनि खिथा (root word) खौ नामायनानै (नायगिरनानै) दानि युगाव रायनाय बादि दाय्या लाबा खिथानि सोदोब बादि दा-फिनब्ला जि सोदोबा आरो खोनसेबाव रावनि नुजानायाव मिनिथावसो जायो।

मायबानग्रा हलंगा, बर' सोदोब। असमीया रावयै बिखौ बुंहैबाय, लिरहैबाय “होलोड” होत्रानै। असमीया राव-आव बर'नि बादि बिखौ “हलंगा होनलिया। होलोड सोदोबानो बिसोरनि सालाय खुगाव ओंखारबो आरो बिसोरनि रावनि देंखो जों गोदै दैलु गोरोब लाडे। बिबादिनो “जौ” (मद) खौ “जु” लावपानी होत्रानैसो असमीयाफ्रा बुडे।

बिबादिनो “पुरा” (थिक जानाय, बुंनाय) असमीया सोदोबा बर'नि सालायखुगाव फुरासो अंखारो। बर'नि रायनाय रावआव रोजोब खानाय 'फुरा'

सोदोबनि सोदोब खिथा (root word) खौ नामायनानै 'पुरा' लिरफिनब्ला बि बर' थुनलायनि जुनै समायनाय नड। मानो होनब्ला 'पुरा' सोदोबा बर' रावनि देंखोजों गोरोब लांनाय नड आरो फरायनायावबो सोख्थु लांगोन।

असमीया सोदोबफोरनि बादि इंराजि सोदोब बाबो जौनि बर'नि रावआव द्लाम हाबजेनदोंसै इंराजि सोदोबाबो रायनायाव बर'फ्रा गलायनानै गाव रावनि देंखोजों रोजोब होनानै लाबोनो नाजादों। इंराजिनि जेरै काप (cup) खौ खाब; "प्लेट" खौ फ्लेथ, "ग्लास" आरो "टावयेल" खौ (गामसा) थावयेल। रावनि सोदोब फोर नांगौयाव लाबोनानै गाव रावनि देंखोजों रोजोब होनानै लानो हाब्ला बि रावया गोनांद्राय आरो बि गाहामनि बाश्रा।

बर'नि रावआव गारोबनाय सोदोब (spelling) नि आरो मोनसे हेंथाया जादो हांखो लानानै। असमीया हांखो खौनो दासान्दिनि थाखै लांथ'दों होनब्लाबो फारसेथिं नायब्ला बि हांखोनि आखला (character) बेंगलिनिसो जादों। आथिखालाव लिरजानाय बर' थुनलायनि खौरांदा (Sentence) खौ बर' गोरों सासे बेंगलियासो स्रायै फरायनो हागोन; असमीयाफ्रा हानाय नड गोन। मानोना च, छ, स्व आरो ख नि ठाउनियाव 'स' आरो 'श' खौ बर'नि थुनलायाव बांसिन बाहाय नाय जादों।

र'मान हांखो लायोब्ला, जानो हागौ, बिफोर हेंथाया द्लाम जोबगोन। असमीया एबा र'मान हांखोयानो जाथों मानो दुलाराय बर' थुनलाइ आफादा बयजोंबो मानि जानाय सोदोब बिहुं (Dictionary) दिहुनाबला सोदोबदा (Spelling) नि गुलाय गुजायआ जोबनाय नडगोन। ■

बुहुमाव बिमा लोक्षी देबीनि नुजाथिफैनाय

(Legends of The Bodos)

—सुभास चन्द्र बसुमतारी

सुभास चन्द्र बसुमतारी (1959) : रौतानि सासे गागि थुनलाइगिरि। बिथाड गोदोनिफ्रायनो बर' राव-थुनलाइनि थाखै हाबा मावबोबाय थादों। लोगोसे सम-सुबिदा लानानै बर' थुनलाइआव लिरबिदां सोरजिनानै भाण्डारि होलांदों।

खोनासं अन्जालु-अन्जालि माइनावफोर! आं दिनै गुबुन मोनसे गोदो-गोदायनि आबै-आबौ मोननि खुगा खुगा सोलि बोनाय सल'। बुंनो लादों, बेनो जादों 'बुहुमाव बिमा लोक्षी देबीनि नुजाथिफैनाय'।

बे मुगाआ औरै बायदि मोन,—“मुलुगजोंसारावनो (बिश्वब्रह्माण्ड आवनो) नुहाथारि रावयैथारि अबं ग'साइआ लाथिख' महराव दंमोन। सानसे खालि बियो लाथिख' महरनिफ्राय सिरि जाहाथ मोनखांनानै बुहुम सोरजिनो लुबैनायसै।

बबेखानि बुहुम सोरजिनो खांखाय जामिनि आरो अमा राजाखौ फाथाल पुरिनि हिरजांस राजानि राइजो निफ्राय हा लाइनो थिन हरनायसै। बिसोर लाबोनाय हानिफ्रायनो थरथाम लारु बानायनानै बे नायनो समायना बुहुमखौ दानायसै। बिनि उनाव गोसाइ दावसेनखौ बुहुमखौ बानायनायनो फारिया एबा थान्दै गायसनना गालांनयसै। ग'साइ दावसेना बुहुमखौ नायफैनानै फहेला फहेला हाबुआव गाब्रजानो गिनानै लानजायखौ थेनथौ थेनथौ सोमाव नायसै। बियो आनान ग'साइ बाथौ बोराइखौ खेबसे नड, खेबनै नड खेबथाम बुहुमखौ रायाखै होन्नानै थगाय हैनायसै। नाथाय बाथौ बोराइआ गोथौ साननानै बुहुमखौ राबाय होनानै मिथिनो हानानै लोगोआव ग'साइ दावसेन आरो ग'साइश्रीखौ जिराथनि बेगर जोलै लाहोनानै बुहुमखौ नायनो फैनायसै। ग'साइ दावसेना बुहुमखौ गाजेनग्रोनायसै। बिनि उनाव ग'साइ ग'साइ श्रीआबो आगान होनायसै। लोगो-लोगोनो ग'साइआ ग'साइश्री लाबो फानाय बेगर जोलैखौ बुहुमनि सारिगिदिं फोना होआसै।

बिनि उनाव ग'साइ ग'साइश्रीआ सोर्गोआव थांफिन्नानै बहुमाव बेगर रज' होनो थाखै गावनि गोहोखौ समानै फानथामाव राननायसै—“बार, दै, अर। बारा बहुमखौ साग्लोबसार नायसै सोरगिदिं। दैआ बहुमनि सायाव अखा महरै गोग्लैनानै हाखर हाला बुंफबनानै थानायसै। अरा स्वान महरै बहुमनो बिदुं होनायसै। बहुमाबो गावखौनो गावगिदिं-गिदिं साननि सोरगिदिं गिदिंनायसै। बिनिफ्रायनो मोदाय गिदितफ्रा जानायसै, “बरमाली एबा ब्रह्मा=अर मोदाय; बोइसोनु एबा बिष्णु=दै मोदाय; आरो महाईश्वोर एबा महेश्वर=बार मोदाय महादेव।

गुबुन मुडै बिसोरखौनो,— बारि गंथाम=ब्रह्मा; रां रासि=बिष्णु आरो मैथा हाजि=महेश्वर, महादेव, शिब पार्वती बुडे।

दा जोनि आगोमा बहुम बैसोमुथिया बे मोनथाम गोहोनि जुनैनो अबं फोना गालांनाय बेगर फोरनिफ्राय बिफां-लाइफां बन-बनसा स्राय सोमखोर-सोमखोर महरै रजखांबोनायसै। सिरि बोराइ बोराइ बाथौआ बहुमखौ खेबसेनड, खेबनै नड, खेबथाम नाइफैनानै गोसो सोलेरखौ सुदेम मोननानै ओदालगुदियाव जरासे माखुन्दा-माखुन्दि मैदेर जरासे जोनोम होना गालां नायसै। बिनि उनाव ओदालगुरिआव जरासे सुबुं एबा मानसि जोनोम होनानै देगाव जोखलोबनानै गालांनायसै बे देगाव जरासेखौ मैदेरफ्रा जोखुबना गालांनायसै।

बिनि लोगो लोगो सुबुं सानैआ जोंखौ सोर सोरजिखौ जोंखौ सोर सोरजिखौ होन्नानै हान्थु खोराय खोराइ आरोज गाबनायसै।” लोगो लोगो बाथौबोराइ बाथौ बुरैआ बिसोरनि सिगांआव नुजाथि फैनायसै। ग'साइआ बुडासै—बे समान बहुमाव मैया-खै गेले होनोबो बिसोरखौ सोरजिनाय जादों। दा बिसोरनि फोलेरा एरसिगोन होन्नानै सोब गोमोर लांनायसै। ग'साइ आ बुडासै—बिसोरखौ खांनो थाखै सासे खांगिरि बिना बहुमाव थिनहरनाय जागोन। बिदिहोत्रा बेबोश्रोब गोमोर लाडे। बिदिनो ग'साइ-ग'साइश्रीआ बहुमखौ नायफैनायखौ खेराखाव बाथौ गिदिंनाय आरो नाइनानै थांफिन नायखौ उल्टा बाथौ गिदिंनाय बुडे।

मुगा साफेन नाइनि उनाव ग'साइ-ग'साइश्रीया आइ बिमा लोक्षी देवीखौ बुरखाय आखाय गावसोर सोरजिनाय बहुमनि फिसा फिसौ फोरखौ खांनो-बानो, फेदेरनो फोलाउनो थिनहरनायसै। लोक्षी देवी आरो बहुमनि फिसा फिसौ फोरखौ जाहोनो लोंहोनो माइ, दै दाव अमा मोसा लखा फिथाय सामथाय, ना-खासेव एमफौ एनला बायदि बायदि, मुवा जिराथ फोरखौ लानानै फैयासै।

लोगोआव बिसाय नारायन खौबो लाबो फायसै। बिमा लोक्षी देबीआ गाबगु खुगु बिमाबिफा निफ्राय बिदाय लानानै फैनाय सै। ग'साइआ जीब-जुनाद, फिथाय सामथाय जिराथ, मुवा फोरखौ खामानिनि बिबान राननानै हरखा नायसै। नारायनखौ माइ आरो बिमा लोक्षीखौ माइरं माइनाव जाहो नायसै। मोसौ-मैसिखौ हाल एवनो बिबान होनायसै माखासेखौ जाजाग्रा गाखोजाग्रा बायदि बायदि बिबान होनायसै।

मोसौ मैसोआ अबं ग'साइनाव मोनसे आर'ज गाबखनायसै। हे आफा जोंजिदु बोसोरफामानि हालौ नांगौब्ला जोंनो जिराइनायनि मोनसेसो सम रादाय खाना होनांगौ। ग'साइआबो अनखांनानै दाननि पुर्णिमा आरो अमाबैस्या बे मोननैखौ जिराइनायनि सान रादाय खानानै होनायसै। बे सात्रैनि खहाखौ सानसेआवनो सुफुंजोबनो हानाय गोहोबो अबंआ होखानायसै। बेनिखायनो बुजिना खान्थि मानिग्रा मानसिफ्रा बे साननैआव हालखथि खालिमो। मानोना बेसात्रैयाव हालौब्ला मोसौहा मोदोम सायो, बायदि बेराम सोमजियो। खेतिफ्राबो नुवा-नुस्ताबा जोबो आरो बेराम जायो।

दा ओजोंहाय बहुमाव बे जरासे सुबुंनिफ्रायनो गानथिसेयाव गानथिनै बायदि बायदि बाइ-बाहागि अबंलाउरीनि गुनथाम आरो सात मुनि ऋसिनि माता गुनजों सुबुंफ्रा एरलादोंसै। बिमालोक्षी आबो फैनानै आगु सुबुंफोरनो साहा मानन' लुनानै थखा-खथा खथाथाम इसिं, अखं आरो खफ्रा बानायनानै राइजो जानो फोरों फैनायसै रोखा रोखानो। बिमा लोक्षीदेबी आबो गावनो माइनाव बिन्दुखौ गोबानानै थानायसै। लोगोसे नारायना माइ बाख्रियाव गोबानानै थानायसै।

बिदिनो फुं मोना बिलि सिथ्ला गेजेराव सिजौबिफां गायसन्नानै इसिं अखं माइ बाख्री लिरश्रां हश्रां धुप धुना सावफुंनानै बिबार जराजों बावनानै खुलुमनो फोरोंनाय लोगोसे आलासि दुमसि सिबिनाय खौबो फोरोंनायसै।

बिनिउनाव बिमा गोसाइश्री सिरिबुरैआ आफा आनान ग'साइआ रागाजोंब्ला बोरै बुरखाय आजाय खालाम नांगौ; बोरै हान्थु खेराय खेराय आर'ज गाबख' बिख' गोसोखौ फैनानै रंजा होयो बेफोरखौ लोक्षीदेबीनो फोरों लांनायसै। बिमा लोक्षीदेबी आबो गियाननि बिमा सरासतीजों लोगोसे मानसि फोरनो रग'-रग', फिथ-फिथ खिन्था लांनायसै अबंनि सोरजिमा जीब-जुनार, मि, एमफो-एनला, दावसेन-दावला बिफां-लाइफां, दैमा-दैसा बायदि जिराद मुवा बेसादिनि

आखल आखुखौ लानानैनो अबंखौ-बुरखायनाय जायासै बिदिनो ग'साइश्रीआ ग'साइखौ बुरखायनायनिफ्रायनो खेरायनि जोनोम जायासै।

खेराय मोसानायाव बिनिखायनो खौसेनि थाखै खैजोमा फनाय, गाव-गाव गोसो आथोन दबथायनो गानदौला बोननाय, बादालि गेलेनाय, नेवलाय, मैसो, मुफुर, मोसाखावरि सैमा, गराय दाब्रायनाय, जिब जुनाथ गेलेनाय फावफोरखौ खेरायाव मोसानानै फोरमाय थियो। बिनिअनगायै रोनि थाखै ढाल थुंग्री सिबनाय थुंग्रीगाखोनाय, राइगन बारनाय, अर मन'नाय आखु दिन्थियो। जीउ जेंनाखौ बारग'नो सागोलाउ बोनाय दिन्थियो। बिदिनो खेराय सिबिनाय, हाबा जानाय बैसागु जानाय फाव दंवावयो। बिदिनो लोक्षी देबीआ दौदिनिनि महरै मोदाय दावदायनि आखल आखुखौ फोरमायथिलाडे। लोगोसे नारायन नो बो जाराफाग्लानि महरै मोदाय दावदैनि आखु आखलखौ फोरमाय थि लाडे।

बबेखानि बिदिनो बाथौ बोराइखौ हान्थु खेराय नानै आर'ज गाबनानै दाय-दसा फोरखौ निमाहा बिब्ला बायदि जाहोननिफ्राय बारग'नो राहा मोनगोन। साननाय हनायफ्राबो मोजाडै जाफुं लांनो हागोन। बिमा लोक्षीया मानसिनि खुलुमनाय गेवनाय फोरों खांनानै गोबाव मुगानि उनाव सानसे गाव फोरोंनाय मानिखौ थारै फालिदोंना फालिआखै आनजात लानो नारायनखौ लोगोसे लानानै ओंखार लाडसै। नारायना आगु माहाजोन फोरनावसो हाबब्ला जिरायनो आसन मोनो होत्रानै “बे जॉनि हादोर” (बिजनी) नि दडफेथा गामिनि फुलसरन, देगाव, अहर माहोजोननियाव सानै बिबायारिनि मुश्री लानानै हाफहैनायसै। सानजुफु ओंखाम जानाय समलाय बान्दाखौ थिननानै जेबो हरनो हाया होननानै जिराइनो होआ लाबानो थिनहरनायसै। बे बायदिनो देगाव; अहर मोनहाबो जिरायनो होआ लाबानो थिनहरनायसै। लामाआव लोक्षीआ बिसाय नारायनखौ बुडसै—“बोरोहाय नॉनि माहाजोनफ्रा जिरायनो आसन होग्रायालाय थु दाना, जों बै नखरसे गैयै लाउगानियाव थांदिनि बे माहाजोन साथामा जोंखौ जेरै अनागार खालामदों बिदिन मिथिमोना जासे जोबश्रांगोन बिसोरहाबो।” बिदिनो बिसोरहा साथामबो निखाउरी जामार नायसै। बिनि उनाव लोक्षी नारायना लामायाव जलंगा एबा मनायाव माइरं मुथा नैसो बानायनानै लाउगानि नखराव हाफहैनायसै। लाउगानि हिनजाव दैमालीया बे सानै मानसिखौ नुमारनो अनखांनाय सोमजियो। बियो आथिं आखाय सुनो दै होनानै जिरायनो आसन बनानै होनायसै। लोगोसे गइ-फाथै होनायसै।

बिनि उनाव बिसाजो फाइगेखौ ओंखाम संनो थोन नानै बिसोरजों जिराइदेर फैनानै फैनायनि जाहोनखौ सोंनानै मिथिनायसै, मागिनोसो फैदों होननानै। बिसोरखौ जाहोखां लोंहोखां बिदाय लानोसै समाव बुडसै,—“हे आइ आफा। जोंहाबो मागिनानैसो लाबोनाय एसेल’ माइरं दंमोन। नोंसोरखौ उखैनाय गांनाय बादि आनदाज खालामनानै संना खुरना होनाय जाबाय। दा नोंसोरनो हरनो मुथासेबो माइरडनो गैल्या।” बिदि रावखौ खोनानानै लोक्षी नारायना मिनि रंजा खुसियै फिनासै नंल्या आइ! नंला!! जोंहा समा बोथिनैजों बोथिसेआनो जासिगोन। दाथ’ मोना खाबाय। बिनि खाय जों लाबोनाय नैबे माइरंखौ लाखिदो। गाबोन गुबुन राहा खालाम सिगोन जों। नाथाय, दा बावदे आइ!’ बे माइरंखौ माइहेनदो आवसो सोग्रोनानै ओंखामखौ सं। सानफ्रोमबो फुं मोना अबंलाउरी बाथौ बोराइ आरो लोक्षी नारायनखौ सिबि। इयुनाव मोजां लामायाव फैनो हागौ।” बिदि बुंनानै लोक्षी नारायना माइरंखौ होलांनानै बिदाय लानानै थाडसै।

बिसोर थांखांनायनि उनाव मोनाबिलिआव माइरंखौ माइहेनदोआव होनानै ओंखाम संब्ला नुनायसै माइरड दो बुंनो दं आरो मुथासे माइरंखौ संब्लानो ओंखामदोआ बुंनायसै। अब्लाबो बिसोर साननायसै बि सानै मासिआनो लोक्षी नारायन। बिसोर गोसो गोथौयै बाथौ बोराइ आरो लोक्षी नारायनखौ सिबिनो हमनायसै। बिदिनो बिसाय लाउगाया “बेजोंनि हादोतनि राजानि शान्त्री गाहाय बिबान मोननायसै। बिसोरहा दा नखरा जोंखांनायसै।

बिदिनो सानसेखालि थास’ मेगं, मैराथिखि आरो माथि गादेब मेगं खानायाव फुलचरन, देगाव आरो अहरनि हिनजावफ्रा दैमालिखौ लामायाव लोगोमोननानै बिसोरनि खाफाल रिफिनायनि बाथ्राखौ सोंनानै गुदिनिफ्राय गासिबो मिथिनो हानायसै। बिदिनो बिसोरबो नखराव बाथौ बोराइ आरो लोक्षी नारायनखौ सिबिनानै नखरा जानो लोंनो थोफिन नायसै। बिदिनो जोंबो दानिफ्रायनो बाथौ बोराइ लोक्षी नारायन लोगोसे आइ सरासतीखौ सिबिब्ला मोजां राहा लामा मोत्रो हागोन।

जोंनि इयुन्नि जीउखांनाय लामाया हेंथा थाया जासे जीउ सोलेरखौ बारग’ होनो हागोन। दिनैनि सल’आ एसेयावनो। जोब्बाय। ■

हरिसिडानि सिगां जारिमिन

—रति कान्त बसुमतारी

रति कान्त बसुमतारी (1947) : अदालगुरि दिहिंनि सासे गोखों थुनलाइ सिबियारि आरो लिरगिरि । बिथाड बर' राव-थुनलाइ आरो समाज सिबिनाय बेलायाव बाया-मोजोमा गोसो होसारदोंमोन। बिथानि लिरबिदाडव समाजनि सावगारि बेरखाडे।

दानि हरिसिडानि सोरगिदिंखौ नायनानै नुयोदि बिनि साहाथिं जाय सोमलिगुरि गामि, फासिया, देवलगुरि, एदेनबारि, खोलाथिंजाय मेम्बार गामि (निज हरिसिंगा) खासिबारि, बांखहला, थाराइबारि, सोनाबथिंजाय रौमारि, (लखीपारा), दिंखियाबारि, सेंगेलगुरि आरो जाब्राखाउबा सोनाब जाइथिंजाय खान्थालगुरि, लांदांफारा, मेरबांगामि, सोमलिगुरि बाइसेत्रा। “हरिसिड” सोदोबथिखौ गोथौवै बिजिरनानै नायोबोला नुयोदि-बर'फोरा साहाथिंजाय थानाय मिरु (मेरु) गसाइखौ सिबियोमोन। बै मिरु ग'साइखौ कुन्दारबिलसिम लाबोनानै फाख्रिगुदियाव दोनफैग्रामोन बैसागो समाव। उनाव दानि हरिसिड रेल स्टेसननि इसे सानजाहा फुख्रि खाथियाव (दाबो दं) सिबलिंनिफ्राय लाबोनानै दोनफैयो आरो बेवहायनो दौरिया मोदाय सफैनायनि लोगो लोगो हुसिसिड'—हुरिसिड—हरिसिड जायो। खायफा (दानि असमीया) जारिमिन लिरगिरिफ्रा 'हर-हरिनि' दावहानि समाव महाभारतनि सुबुरन्थायगिरि श्रीकृष्णआ बिकुल सुना होनायखाइ हरिसिड जादों होत्रानै बुडे।

लखि दैसा एबा बिसखाइति दैसाया हरिसिडानि सानजाहा गेजेरजों जिरि जिरि बोहैलांदों खोलाहा। हरिसिडानि सोनाब थिंजाय बोरला दैसाआ बोहैलांदों। बे थावनियाव गोदो जोबोद हाग्रासा दंमोन होनना मानसिनि खुगा खुगा खोनानो मोनोदि-बेवहाय मासे गिदिर मोफौ दंमोन बेखौ मानसिआ हमनो एबा दाननो नायगिरब्लानो गोमायोमोन होनना बुंनाय खोनानो मोनो। दायो बे मोफौखौ नुनो मोननो गैला। समनि फाखनाव गोग्लैनानै मा जाखो रावबो मोनथिला। बुंनो थाडेबोला बेवहाय मोसा मुफुर बाइदि बाइदि जुनार थायोमोन।

मोनथिनो मोनोदि हरिसिड रेल स्टेसननि इसे सानजा साहाथिंजाय हरगेजेर समाव खिं-खिं होनना गाबनाय सोदोब खोनानो मोनोमोन। बिबादि

सोदोबखौ सासे बर' मानसिआ नायगिर नायगिर खालामनायाव न'याव थांनानै लोमजा हैनायसै। उनाव बि मानसिखौ सिमाडव मानसि सासे बिनायमोन। नाथाय बि मानसिआ मानसि होनो हाया होननानै अबंनि खाथिआव आरज गाबो। बिनि उननिफ्राय खिं-खिं गाबनाय सोदोबखौ रावबो खोनानो मोनाखिसै। जियानो जाथों गाहायाव जायगाफोरनि बेसेन गोनां ओंथिफोरखौ सावरायनाय जाबाय। देउल गुरि बेउलानोगोर—हरिसिडनिफ्राय नै (2) कि.मि. साहा आरो सानजाथिंजाय खनायाव देउलगुरि गामि। बेवहाय अन्थायनि सुसुबा दंमोन। दायो बि मुसुखाया बहा दं रावबो मानसिआ मोनथिला। अम्बागामिनि खाथिआव थानाय उदालायाव बेउला नोगोर होननाय जायगा मोनसे दं। बेवहाय दौलमिया दं। बेवहायनो गोदो गोदाय बर'फोरा सिबि न' होयोमोन। दाबो बर'फोरनि बाहागो राभाफोरा न' होयो। रौनागर रेल लाइन सानजा खोलाहा रौनागर। गोदो बर'फोरा सुथुरजों दावहा नांग्रा थावनि। बेनिखाय बे रोन्खुलिखौ रौनागर मिथियो। बेवहा गिदिर गिदिर गंनै फखि दंमोन। गासै स्नि फखि दडमोन होत्रा मिथिनो मोनो। फखि खाथियाव थानाय मानसिफोरा सानसे हराव सासे बुरि मानसिनि राव खोनानो मोत्रायमोन आरो हुसिखाव इसिखाव एरै बुंनायमोन—“बे सम्पतिया थाला। गासैबो बावलां जोबसिगोन।” बिदिनो बिखा सौयै सौयै गामि गामि खारखो खारखो गाबनायमोन होत्रानै खोनानो मोनो। बिबादि ईयुनखालिनो बिस खायति दैसाया फखि गंनैखौ खुरखा खुरखा लाडो। गामिनि मानसिफोरा फखिनिफ्राय दैयाव बोहैलांनाय, गफबलांनाय थुरसि लथा, थौ बाइदि मुवाफोरखौ नुनो मोत्रायमोन होनना बुंना लायो। कुइयाबिल : हरिसिडनि दाइन (8) कि.मि. खोलाहा 'कुइयाबिल' होननाय जाइगायाव गंसे थानसालि (मन्दिर) दं। थानसालि सिंआव थालिर बिफांनि द'ना आउथायनानै सिन्दुर धुप-धुना सावनानै रां बाइदि जिराद होबोला बै द'नाया हा सिडव थानाइ गुदुंजों थांनानै फखियाव नुजाहैयोमोन होनना मोनथिनो मोनो। दासान्दि बि थानसालिनि सिबिग्रा मानसिआ गावखौ कोस राजबंसि होनना बुंना लानाय खोनायो।

बेंबारी :

सिमसाफोरा (गंगार) हरिसिडनि साहानि थावनिखौ बें एबा बां होनना बुडेमोन। लोगोसे बांबारिबो होनोमोन। बां-गोजौ, बारि-बैसां गोजौ बैसां जानांगौ। मानसिनि खुगाआव बांबारि जायालासैनो बेंबारि मुं मोनो। बे थावनियावनो गंगारफोरा थं लुनानै खाजाना लायोमोन।

गुरखिया दौल :

गुरखिया दौल एबा लाउखारफोरनिफ्राय सासे लाउखार एबा गुरखिया बुरन बोरमा जाथिनानै थायो आरो सासेआ एला एबा दान्दुर दंफांजों दाननायाव बुरन जानानै थानाय गुरखियानि गोदोनाया थबस्र जयो। बि दिननिफ्रायनो गुरखियाफोरा बे थावनियाव देउल एबा दौल होग्रा खालामो। बिनिफ्राय बे देउलनि मुड गुरखिया देउल जायो।

औवा उल्था :

लाउखार गथ' सासेया धीब एबा भिथा आउथाइनानै खांख्ला थुनानै लाउथिखौ उल्थायै गाइनाइ बाइदि थुना दोनदोंमोन। इयुनाव बिनो दालाइ फेंखा ओंखारो। बि दिननिफ्राइनो बि जायगाया औवा उल्था जायो।

जुजाइ बान्दार :

अन्थाइ बीर मुंनि सासे बर' राजाया सिमसानि (गंगार) फिसा हिन्जावखौ लाबोनानै हाबा लायो। सिमसाया खिथेर लानो साननानै अन्थाय बीरनि दुब्बियाव थानाइ माइफोरखौ गाग्लियो। गाग्लिसे गाग्लिनानै युनाव जुजाइ खालामो। बे खाइनो युनाव जुजाइ बान्दार मुं मोनो। बेंबारिनि साहाथिंजाइ दाबो माइदमनि जाहाराव अन्थाइ बीर थानाइ खुलिखौ नुनो मोनो। बेवहाइ अन्थायनि संग्राय-सान्द्रि नुनो मोनो। बिफोर बायदि बाइला थाउनिफोरनि अनगायैबो मुंदांखा बर' बीर (जोहोलाव) फोरनि सल' खोनानो मोनो।

आन्दो मोखा :

बेंबारि दिहिंनि मुश्री नरेन दासनि (बर') बिबौमोन आन्दो मोखाया। जायफ्रा बारिनि आन्दोया आब्राथारमोन। मानिबा दिखाराव जेलदेब फन्दितखौ बुथारनो फैयो बिनि न'सिम। नाथाय स्टिफेन मुंनि सासे बर' मानसि सासेया बरनबासनि (जाबुर) न'आव जौ लोंबाइ थादोंमोन। स्टिफेनआ बरनबासनि न'निफ्राइ आनदो मोखाखौ नुनाय लोगो लोगो दुफुं सिखांनानै लाउथि लानानै आउदि-माउदि सिबना होयो। अब्ला आन्दो मोखाया स्टिफेनखौ गिनानै ओंखारलाडे। बि बादि लाउथि सिबै सिबै बैग्रि दंफां फांसेखौ बुफायो। बिनि युनाव गिदिर फांसे दंफांखौ लाउथिजों बूस'जोबो। बिनिखाय बिखौ बयबो गियोमोन।

बकुल बीर :

बियो सासे गोहोगोरा बर' बीरमोन। बकुल बीरआ गंगारफोरखौ दाउहायाव फेजेनानै बर'फोरनि राइजोखौ रैखा खालामो आरो सुथुरफोरखौ गिहोबाय थानो हानायमोन। बकुल बीरआ जोहोलाव एबा बीर खाइनो राइजोनि खामानि मावग्राफोरा— 'मालिकि हुकुम, बर बकुलर हुकुम' बोसोन मोनसे बुंनानै मानसिफोरनाव मोननांगौ जिरादफोरखौ मोनोमोन होननानै मानसिनि खुगा खुगा खोनानो मोनोमोन।

फुवालसात्रिया :

पुवाल सात्रिया सासे गोहो गोनां सानसिमोन। बयहाबो आखल मोनसे मोनसे थायो। बै समाव मथि मौजादारनि औवा सुबाखौनो बुखुना न'याव लांनो हानाइमोन होनना मानसिनि खुगा-खुगा खोनानो मोनो। बि बाइदि आखलखौ नुनानै पुवाल सात्रिखौ मौजादार बुथारनो मोनसे फाव खालामो। सानसे मौजादारा थामजौ (300) बथल जौ गोरान बुथुमना मौजादारा गावनि न'याव पुवालखौ लिंन लानानै जौखौ लोंहोयो। बिथिडव मौजादारा बिखौ बुथारनो गोबां बोलो गोरा मानसि दोनखोमानानै दोनदोंमोन। नाथाय मौजादारनि मानसिफोरा गासैबो जौखौ लोंजोबनाय नुनानै सोमोनाडे आरो बांसिन गिनाय साफियो। जाहोनाव मौजादारनि मानसिफोरा गिनानै गाव गावनि जीउखौ थफला बोत्रानै खारजोबो। उनाव पुवाल सात्रिया मौजादारनि न'फोरखौ आसिफोरजों थुफलं जोबनानै देरहासार गोसो लानानै गावनि न'याव थांफिनो।

बेसादिनो आरोबाव खोनानो मोनोदि उलुबारि गामियाव कुबेरनि फखि दंमोन होत्रा जारगामिनि मानसिफोरा दाबो मख'यो। दायो फखिया गैला जानो हागौ। बेबादिनो ज'रा फखियाव सातबीर एबा स्नि जोहोलाव नोगोर दंमोन। बि सातबीरा बर' राजाफोरनि जायगाया "माइदाम्ब्रा" होत्राइ जायगायाव थानोबो हागौ। दायो समनि फाखनाव गोलैनानै बायखोन्दाफोरा नुनो मोनला जाबाय। दाबो हाग्रा-बंग्रा नायगिरबा बर' बीरफोरनि बिदै गोनां सल'बाथा फोरखौ संखानो हागौ। बेफोर खामानि फोरखौ उनावनि थुनलाइगिरिफोरनि रेवगननि दैदेन्नायासो बुरखानो हानोबो हागौ। नाथाय समजों गोरोबनो रोंनांगोन—बे जादों थार बाथ्रा। ■

थुनलाइ आरो गावनि बेसेन मोन्दांथि

—लहेश्वर बसुमतारी

लहेश्वर बसुमतारी (1955) : अदालगुरिनि सासे गोजाम थुनलाइ सिबियारि आरो लिरगिरि। बिथाड लाल बाहादुर शास्त्री गोजौ फरायसालिनि फोरोंगिरि। बिथांनि लिरबिदांफोर ज़ोबोद बेसेन बह्वा।

हांखो लिरनो आरो फरायनो रॉनायनिफ्राय मानसिया बिजाब लिरनो हमबाय। रॉमोन्नाय गियानफोरखौ बिजाब लिरनानै फोरमाइनो लाबाय। बिदिनो थुनलाइ समोजिबाय। थुनलाइनि गेजेरजों मानसिया गावनि रॉमोन्नाय गियाननि अनगायैबो सासेया सासेनि गियानखौ बिथा खालामनानै बांसिन सोलोंबावनो हानाय जाबाय। थुनलायनि गेजेरजों मोनसे हारि एबा माहारिनि थार महर, दुखु-सुखु, गांनाय उखैनाय, आसारखान्थि रांखान्थि, राजखान्थिनि हाल-साल गासिबो लिरलां जाबाय। मोनसे फिरिया बिनि उन फिरिनो नांगौ गियान फोरखौ होलांनो हानाय जाबाय। बिदिनो मानसिया गावनि थार महर, गावनि बेसेन मोन्दांनो हानाय जाबाय।

आं सोर (Who am I ?) आरो मा (What am I ?) बे सोंलुफोराव मानबिनि बेसेन मोन्दांथिनि गोथौ बाथ्रा हाबनानै गावनि बेसेन मोन्दांनायआ जुदा जुदा। आमेरिकान गुफुरसा सासेनि सिनायथि आरो बिनि बेसेन मोन्दांनायजों सासे एफ्र' सिनायथि आरो बेसेन मोदांनायआ रोखोमसे नड। धोनि धोनि न'खरनि सासे फिसानि सिनायथि आरो बिनि बेसेन मोन्दांथिया गोरिब न'खरनि फिसानिजों गोरोबनाय नड। Ruling Class नि मानसिनि बेसेन मोन्दांथिया बान्दानिजों गोरोबखाया। नुनो मोनो—सम लानानै, जायगा लानानै, रा-खान्थियारि थासारि नायानै हारि, हारि-हारिमु, समाजनि नेमखान्थि लानानै, जारिमिनारि बिथा आरो सिगां फिरिनि मोन्थाय लानानै मानसिफोरनि सिनायथि आरो बेसेन मोन्दांथिया दस्रा दस्रा जादों।

सााजों-सा नायबोला साफ्रोमबो मानसिखौ मोनसेल' बेसेननिबादि नुनो मोनो। मानसि आरो मानसिनि गेजेराव जेबो फाराक थाथावा। डारउइननि थिरिजों बिजिरनानै नायोब्ला मिथिंगानि सोलायस्तु आथुजों मानसिनि महर लानाय

साफ्रोमबो जिबिहानो सिनायथि आरो बेसेन मोन्दांथिया मोनसेयानो जानांगौमोन। गुबुन फार्से—मानसि मानिया सासेल' इसोरनिनो सोर्जि होन्नानै गनायना लायोब्लाबो—मानसि आरो मानसिनि गेजेराव फाराकनि सोंलुआनो सफैया। नाथाय-मोकथांआ बिब्दि नड। बहुमनि मानसिफोरनि सिनायथि आरो बेसेन मोन्दांनायआ जुदा जुदा।

जिहुदिफोरा गावसोरखौ इस्वोरनि सायख' जानाय हारि' होन्नानै सिनायथि होयो। मुसलिमफोरा—'आब्राहामनि जोलै' बीर मोत्राय हारिनो। जोंनि साखाथिनि नगाफोरनि बाश्रा खौनो सान्नानै नाइनि फिजोआ बुंलांदों—जों नगा। नगा मानसिफोरा जेब्लाबो उदां। जों बहुमाव नगा मुडैनो थानानै थानो हायो।''

बेयो थार दि, माब्लाबा बबेबा थासारियाव मोनसे हारिनि मानसिफोरा गुबुन मोनसे हारिनि मानसिफोरनि गुबै सिनायथि आरो बेसेन मोन्दांथिखौ सोलायहोनानैबो लायो। जेरै— गुफुरसा आमेरिकान आरो गोसोमसा आमेरिकान फोरनि गेजेराव गाबनि अनगायै गुबुन जेबो फाराक थाथावाब्लाबो गुफुरसाफोरा ब्रा-ब्रायै गोसोमसा फोरखौ जेरेइबो बिसोरनि उन्दै होन्नानै बुंबोदों। "गोसोमसाफोरा बन्दा हारिनि मानसि। बिसोरहा जारिमिनारि बिथा आरो सिगां फोरनि जेबो मोन्थाइ गैया। आरो बिनिआवनो बिसोर गुफुरसाफोरनि समान नड। बिसोर मलायनिआव बैनो थाखायसो'' होन्नानै गुफुरसा आमेरिकानफोरा बुंदों आरो बाहाय बोदों। बेनि जाउनाव निग्र' फोलेरनि मानसिफोरा बोसोरनि उनाव बोहोर गेजेन गोहोनि माहारि (Passivemass) जानानै दद्रयै मालायनि बान्दा जानांबोदों। बिसोर गावसोरखौनो गुफुरसाफोरनि उन्दै होन्नानै सानबोनांदों।

जानो हागौ—डिमापुर, माइबं, खास पुरनि राजउलाफातनि गाम्बारि खाम्पलायाव जनानै राइजो बेंबोनाय बै मुगानि बर'फोरा गावसोरखौ देरहासात, बेसेन गोसा बर' माहारिनि होन्नानै सान्नो हादोंमोन। बिसोर गावसोरनि सिनायथि होनो देरथानाय मोनो मोन। नाथाय दानि बर'फोरा गुरलाय गुरजाय राजखान्थियारि थासारियाव गोदोलाय गफंलाय। गावनि राव, हारिमु, आसारखान्थि, गोहो-बोलो थासेयावबो मालायनि सिंआव। गावनि सिथ्लाआव गावनो बान्दा। मालायनि समानै साननायनि, मालायजों समानै मावनायनि जेबो मोन्थाइ गैजायिबादि। गुबुनजों बिसोर थगायजादों, सोबथ'जादों, जेलाव थिसनजादों। दडे। साफ्रोमबो मानसिनि सिनायथि आरो बर'फोरनि सायाव पुलिस मिलिटारिनि इनाय-अत्यासार। ब्रेइन सारजारि (Brain Surgery), सायक'-

सारजारि (Psycho-Surgery) खान्थिजों मेलेमनि बिसुप सायख' सायख' इलेक्ट्रिक स्वक (Electrick shock) होना नै ब्रेइनसेल (Brain cell) बुधार जादों। आथिं आफानि नार्थ (Nerve ending point) सायख' सायख' हाथुराजों देजादों—नार्थास सिसटेमखौ फाहामजायै बादि बुफे जादों। दाव-अमाफोर बादि होसो होसो गावथार जादों। जाउनाव बर'नि गेजेराव गुरलाय गुरजाय आवहाबा सोमजिदों। बिदां-फंबायनि गेजेराव एना-एनि सान्रायाबो जाखांदों। बेनि गुबुंले थासारि आरो आबहाबानिफ्राय मानसिनि सायाव गाज्रियै Psychological effect गोलैयो। बेबादि थासारिया मानसिफोरखौ 'गोबाय गोसो'नि खालामो। जाउनाव बिसोर Passive mind नि जानायखाय इयुनाव खोमसि नुहरो आरो जीउआ मिजिंक गैयि जालाडे।

दानि बर'फोरनि जा थासारि आरो आबहावा बेखौ जों नुखादों-मोन्दांखादों। जोंहा साननाय आरो मावनायनि गरमिल गैया नंदों। बिनि थासारि, आबहावाजों देरबोनाय जोंनि इयुन जोलै गथ'-गथायफोराबो माबादि जाहैयो। 'गोबाय गोसो'नि गेजेन गोहो'नि जाहैगोन नामा? जाहैयोब्ला—बर'नि इयुना गिथाव-बाथाव आरो दुखु नांथाव।

जिदाइन जौथायनि जोबथा बाहागोनिफ्राय हारिखौ गोदान सानश्रीजों गोख्रोडै दाफिन्नो मोकथांजों मोगा-मोगि जानो हानाय थुनलाइ सोरजिदोंमोन निग्र' लिरगिरिफोरा। गुफुरसाफोरा Less I. Q. नि होन्नानै बुंबोनाय निग्र' मानसिनि बेसेन मोन्दांथि सांग्रां खालामनानै बिसोरखौ जैरेबो आखा-फाखा आरो देरहासात होन्नानै साननो हानाय खालामनो निग्र' थुनलायखौ गोदान महर होनांगौ जादोंमोन। दानि बादायारि मुगायाव बर'नि उनजोलैया जाहाथे डासबिनआव गारजानाय दाखोर बादि जाहैया—बिनि थाखाय सान्रांगौनि समा दानोसै। बेनि बागै नोजोर होनाय हाबाया लिरगिरि फोरनिनो। दावगालु सानश्रीजों सोरजिनाय थुनलायजों थाखानाय समाजखौ फोसाबनायजों लोगोसे हारिनि इयुनखौ गोजों खालामनानै दोनलानोबो हायो। सोरजिलु थुनलाइ जोंनो नांगौ जादों। लिरगिरिफोरा नैबेफोर बिथिंआव नोजोर होनांसिगौ—

(1) लिरगिरिफोरा बर'नि गोजों जारिमिननि बिथा गोनां, थुलुंगा गोनां, मिजिंक गोनां लिरबिदां लिरनांगोन। (2) खोमसि फोथायनाय समाजनि आबहावा गुबुंले खालामनाय, सान्राय, मावनाय आरो लोनाय-जानायनिफ्राय हारिखौ गोदान लामाजों आगान सुरहोनो दावगालु आखुनि रायथाय, खन्थाइ, सल' बायदि

बायदि लिरबिदां लिरनांगोन। (3) मोकथांजों गोरोबनाय सानश्रीजों राइजों-
राजा आरो फरायसाफोरखौ दैदेन्नो हानाय गोदान लामा दैदेनगिरिफोरनो दिन्थिनानै
होनो हानांगोन।

लिरगिरि, थुनलायगिरि बिथांमोनहा माहारि फोसाबनायनि फार्से बांसिन
नोजोर होयोब्ला बर'नि सिनायथिया रोखासिन जागोन आरो बर' सुबुंनि
बेसेनाबो बांगोन। अब्लासो जों बर'नि 'गाबोन खौ गोगोम आरो देरहासात
होन्नानै फोथायनो हागोन। ■

मदद लानाय जादों :

- 1) Dorthy Burnham— Science and Racism (Freedomways Reader)
- 2) Jecqueline Lee young—Criteria in selection of Blak Literature for Children (F.R.)
- 3) Alan Hayward—God's Truth.

सेखार मौजायाव बर' थुनलाइनि दालाइ आफाद

—इलिसन दैमारी

इलिसन दैमारी (1940) : अदालगुरि जिलानि डिमाकुसि दिहिनि निज-पटला गामिनि सासे थुनलाइगिरि। बिथाड धोरोम सिबिनायावबो आखाइ दं। जायनि थाखाय बिथाड 'रेभारेण्ड' बिमुंबो मोननो हादों।

1. इंराजि 1971 माइथायनि जुन मासनि बबेबाखालि आंहा गोसो गैलिया। अदालगुरि कलापरिषद सालियाव दरं जिलानि बर' थुनलाइ आफादनि मावथि आफाद खुंदोंमोन। बै आफादाव हेफाजाब होनो मुश्री धनेश्वर स्वर्गीयारी बिथाड आंखौबो लांफायो। आफादनि फारिया गुबेयै मोनथामल'मोन। (1) दरं जिलायाव थालांनाय बर' गामियाव बर' थुनलाइ दानाय आफाद फसंनाय। (2) अदालगुरियाव "बानासुर" मुनि सेबखांसाली (Press) फसंनाय आरो (3) "बनजार" मुडै गांसे रादाब बिलाय दिहुननाय। फारिलाय बादिनो आफादा जाफुंबाय।

सेखार मौजायाव थानाय बर' गामिफ्राव बर' थुनलाइनि सोमोन्दै जेबो गैयिलाय गोदान दानाय आफाद फसंनो सर्गीयारी बिहुराम बर'खौ (बै समाव बिथाड गासै बर' थुनलाइ आफादनि नेहाथारि मोन) हांखायबोनाय जायो। हांखायनाय बिबानखो आंनोनो होबाय।

2. थुनलाइ आफाद :

बे बोसोरनिनो सेप्टेम्बर मासनि 30 अक्ट'आव गालासुबा, नागासुबा, दारगासुबा, खासियापथार, नाउबान्धा हाबि, दहलाहाबि, सिमलुगुरी, बरडबारी, सोनाब पटला, निज पटला, निज सेखार, दिनदांमाखा, आमगुरी, हाँहसरा, बटाबारी, डिमाकुसि, सनाजुली, भलाटार, थालुंझार, ननाइखास, सगुनबारी आरो गारुवाझार। बर' गामि फोरखौ लानानै "डिमाकुसि बर' थुनलाय आफाद फसंनो गंसे गेवलां आफाद खुंनाय जायो। गेवलां आफादाव बिहुराम बर', मुश्री मिलसन दैमारी आरो मुश्री धनेश्वर सर्गीयारीमोना हेफाजाब होफायो।

गं 22 बर' गामिखौ लानानै मोनसे दालाय आफादखौ फसंनायाव बइबो हामजायोखाय बै सानावनो गाहायाव होनाय सोद्रोमाफोरखौ सायखनानै सेखार मौजायाव "डिमाकुसि बर' थुनलाइ दालाय आफाद" फसडे।

1. मुश्री मनेस्वर कसारी, आफादगिरि, पश्चिम पटला। 2. मुश्री सुकराम डेका, लेडय आफादगिरि, दारगासुबा। 3. मुश्री इलिसन दैमारी, नेहाथारि, निजपटला। 4. ईश्वान ब्रह्म लेडय नेहाथारि, सगुनबाही। 5. मुश्री रतिकान्त दैमारी, रांखाउरी, बड़िगाव। 6. मुश्री ललित कसारी, सोद्रोमा, बरडबारी। 7. मुश्री नगेन नार्जारी, सोद्रोमा, भलाटार। 8. मुश्री मथुरा गयारी, सोद्रोमा, सनाजुली। 9. मुश्री देबेन बर', ननाइ खासबस्ती। 10. मुश्री मंगल चन्द्र बर', सोद्रोमा नाउबान्धाहाबि। 11. मुश्री लालुराम बर', सोद्रोमा, आमगुरी गामी।

आफादखौ फसंनायनि इउनाव आफादखौ दैदेनलांजेन्नायाव गोबां हेंथाफोर दडेमोनब्लाबो सोद्रोमाफोरनि गोसो गुदुंहे हेफाजाब होनायखाय खामानिफोर मावनायाव गोसो रंजायोमोन आरो गोबां मावनायाव जौगा लांदोमोन। रंजायो, 1971-73 माइथायनि गेजेराव गंबा गुदि फरायसालिया बर' रावआव जाखांबाय। आथिखालाव गासै बर' गामियावनो बर' गुदि फरायसालि जाजोब्बाय। पश्चिम पटलायाव गेजेर आरो गोजौ फरायसालि, खाग्राबारीयाव गेजेर फरायसालि जाबाय। गोजोननायनि खुरां डिमाकुसी हायार सेकेण्डारीयावबो 1984 माइथायनिफ्राय बर' रावै सोलोंनो खाबुखौ मोनबाय।

3. सोमावसारनाय :

1973 माइथायनि (Roman Script) र'मान हांखोनि सोमावसारनाय हान्जायाव डिमाकुसि दालाय आफादाबो गोब्राबहैनो बाहागो लाफायो। बे हान्जायाव माउफुंनो थाखै सा स्नि सोद्रोमानि गंसे (Action Committee) खांथि आफाद दायो। नांखुबग्रा मावथि गैयिलाय बै थुनलाइ आफादनिनो नेहाथारीखौनो Action Committee निबो बिबान होनायाव राइजो राजानि बाख्यायथाव हेफाजाब मोनो, सोमोनांथाव-थाव खुराड बेनो दि, बर'फोरनि सुथुरफ्रा र'मान हांखोखौ दैदेनगिरि सानैसोल' मानसैफ्रा लुबैयो होत्रानै बुंसेयावबो थैनायखौ गियालासे राइजो राजाफ्रा लैहोर लैहोर फैनानै पुलिस फोरजों बुजानाय आरो जियाल हाजोताव थानाया बर' जारिमिनाव जेब्लाबो नुजागोन। डिमाकुसी दालाय आफादाव हेफाजाब होनानै जियाल हाजोताव थानाया सा 709 सेंग्रा-सिख्ला आरो बोराय बुरैनिबो बांसिनमोन।

बै बोसोरनि (S.D.O. Civil) महकुमा धिपति मुश्री अश'क शइकीया बिथाड गावनो बर' दैदेनगिरिफोरखौ बुखुबजोबनो नाजाथारदोंमोन। र'मान हांखोनि सोमावसारनायाव सान, हर आंजों नांथाब्बाय थाग्रा बिनोद बसुमतारी जयमासि दैमारी, राजेन बर', दारेन बसुमतारी, शान्तिराम कसारी, साधिराम, प्रश्न बाग्लारी, कुमली-नुमली बसुमतारी, जनाराम बर', धनीराम बर' आरो सिमन हाज'वारी मोनखौ आं जेब्लाबो बावगारा। 1974 माइथायनि मार्ससिम पुलिसनिफ्राय दैदेनगिरिफ्रा हाखमाना थानो माइबारी हाग्रा-बंग्रा, हाजो-हायेन, खारला बाइना ओंखाम दै रसा नांनायखौ जों रावबो बावगारा। अमलाराम बर' मोनबादि र'मान हांखोनि थै गोदौनायखौ आरो जीउ होनाय गोबां अनसुला अनसुरिफोरखो बर' सुबुड बावनाया शाव मोनगोन।

4. थुंगिनाय :

थुंगिनायाव बुंनांगौ फंनैसो खौरां दड। खौराड बेनो दि, 1973-74 माइथायाव र'मान हांखोनि सोमावसारनायाव गोबांआ देहा गेग्रेबबाय, जीउ गारबाय आरो रां-रुपाबो जाबबाय। नाथाय बर'नि खौसेथिया जेब्लाबो नुजागोन। गोसो हांमा सुरनांगौनि खौरांआ जाबाय एसेबां खालामसे दुखु-दाहा जासेयावबो र'मान हांखोनि जाइगायाव देबनागिरि हांखोखौ दलदहै नाजानायासो गोबां खहा जानाय होनजायो। मानोना असमीया हांखो एबा देबनागरि हांखोजों जेबो फाराग गैया। भुटान, ब्रह्मदेश, बांलादेश एबा गुबुन गुबुन हादराव थानाय बर'फोरनि थाखै बे देबनागरी हांखोआ जेबो उदाया आरो गावनि बर' रावआवबो गेबेंहै बुंजोबनो एबा लिरनोबो हाया। बेनिखायनो फैगोन बोथोरफ्राव थुनलाइ आफादा गोथों गुवार साननायजों र'मान हांखोखौ लानो हास्थायनाया बर' सुबुंनि इउननि जौगानाय।

बर' थुनलाइ गेवलांथों ! बर' सुबुं जिउलावथों !! ■

मोननै दैसानि लामा सोलायनाय

—मगेन्द्र नार्जारी

मगेन्द्र नार्जारी (1926-1999) : बिथाङ्ग रौतानि सासे गागि आरो गोजाम बर' थुनलाइगिरि; लिरगिरिमोन। बिथाङ्ग गावनि लिरबिदांनि गेजेरजों बर' हारि-राव-थुनलाइखौ फोसाबनो आरो फेहेरनो नाजादोंमोन।

बोथोर लानानै दैमा-दैसा बिलो फुख्रीनि गोहोआ बारायो जोमै दाखानि मददजों अखा हानानै। गावबा गाव सम लानानै जोमैनि दावखा बिदै गाबजों गिलु-बालु आथिं-आखाइ जोख्रानानै जलदेवतानि रागाजों अखा हायो। हाजो खर'आव हजोनि अन्थाय बिफां-लाइफां गहब-खंखर खुर्खाव खुर्सिं बोहैबोनाय भैरबकुण्डआव नुजाफैनाय धोनश्री आरो जाम दैसाया लामा सोलायनाय बाश्रा।

धोनश्री दैसा :

इं 1962 माइथायनि आसार दान, दैज्लां बोथोर। हाजो खर'आव गिलु बालु दावखा बिदै महर लानानै सोमहाबलायबोनाय बोथोराव दैहुनि दै लखबनाय बायदिनो मेगन मिसिबनानै जुब-जुब अखा हायो। बे आसार दाननि दैज्लां बहरनि अखाजों गोख्रों बोलोगोरा जानानै दरं जिल्लानि धोनश्री दैसाया हाजो खर'निफ्राय हुर्लु-हुथुं देरबोयो गुथाल खानानै बै दिनाव। हाजोनिफ्राय बाप्रोमबोनानै लोमसावबोयो बायदि गामिनि गेजेरजों। बेसेबा गोबावनिफ्राय हाजो-हाला राइजो जाबोनाय गामिफ्रा सुस्राबोजायो बै दिननि दै बानाजों। बेफोर गामिनि मादाब सेसापानी, जल गाथोन, बादागामि ताराजुली, बाइदि गामिफ्रा खुर्खाव बोजायो। मख'जानाय गामि माखासेआ 52 नं गाहाय राजा लामानि साहा थानाय। खोलाहाबो औवारी, नलबारी, गामिनिफ्राय धुपगुरी, बिजुलीबारी, थेकेराझार, गार'गामि, भलुकमारी, नावरासिसा, राङ्गगड़ा बाइदिसिना गामिया खुर्खावल' जायो। गोदोआव धोनश्री दैसानि लामाया औबारी गामि सानजानिफ्राय सानजाहा मोखां जानानै बेडेनाबारी, धुपगुरी, पाउरीपता, सिलबड़ी जानानै बोहैलांदोंमोन। बै साननि धोनश्री दैनि लामाया औबारी, नलबारी गामि गेजेरजों गोदान लामा लानानै गोदोनि नावरा दैसाखौ समायहोलांनाय समाव नलबारी गामिनि बर'निफ्राय गुस्लायनायमाखासे हासा खेना (क'स) फोरखौ लेथेर-

फेथेर खालामलांदों। बिसोरो दा खारसारद्ला जोबनानै थोंजोडै बर' माहारि होननानै लानो लाजिस्लेबो ब्लाबो दियाबारी, औबारी, धुपगुरी गामिफोराव हाबनानै बर'नियाव जानानै-लोनानै थोंजोडै नडाब्लाबो खेंस्ताजों गोदोआव गावसोरनि ग'ट गुदिखौ बर'मोन होननानै सिमान लायोसै। जानो हागौ बिसोरो गावसिनि आलाय सिलायआव नोंगौखौ सिमान जानांदों।

बै समावनि हुरु-हुरु दै बानानि बोलो खानायजों 52 नं सा-सानजा गाहाय राजा लामानि धोनश्री दालांआ सौफाय जालाडे। मानसिनि हान्था-मेलायाव जोबोत हेंथा सफैयो। राइजो खुंनाय समनि फाख'नाव राइजो बेंगिरिफोरनिबो हेंथा-हेंथिया जोबनो गैया। बिब्दि हेना-हेनि, हेंथा-हेंथिआव सीन-भारतनि सीमा मेक-मेहनखौ लानानै मोनानै हाददआव अर जोडे। ब्यावनो बिग्रायारि सीना हानजानि बार गुदुडव तिर्बतनि राजा दालाइ लामाया भारत सरकारनि मदद लानो हायेनाव ओंखारबोयो। लोगोआव रोजा-रोजा तिब्बतीयान ओंखारबोफानो गोनां जायो।

ओजोंहा धोनश्री दैसाया लामा सोलायनो मोननानै देमब्लो गुर्जा महरजों लामा गोदान नावरा दैसानि लामाजों महर गोसायै राजा लामा सौखावनानै बोहैलाडे हान्था-मेलायाव हेंथा होनानै। लामा गोथेफैनाय तिब्बतीयान आरो रोजा-रोजा हायेनारी हान्था मेलारी सुबुड लोमसावो धोनश्री राजा लामा बायसनाय थावनियाव। औरैनिफ्राय हरै, हरैनिफ्राय औरै हानजा हानजा सुबुं आरो गाड़ी मटर बारहोब्लाबो बारहोश्रहाया बिहारी घाटवालफ्रा गोबां सुबुंनि दुखु-जाल्ला, आरो रुगुं दाखिनाय धोनश्री दैसानि दैथुन जाखांनाय दै बाना जोबोर नायथवना मानबो बै समा। मोनसे मेला बाजारमोन लामा सोलायनाय धोनश्री बाला बारीया। गाथोनखौ दाखिनानै लादोंमोन मुश्री अनन्त दास महलदारा। बै समावनो रोजा रोजा रां खामायनायनिबो बिथाड खबु मोनो। राइजोनि बिबानगिरि (बै समनि आसामनि गाहाय मन्त्री) मुश्री बिमला प्रसाद सलिहायाबो बै जायगायाव नुजाफैनो गोनां जानायमोन।

बिब्दियैनो मिथिंगाया महर सोलाइयो। धोनश्री दैसानि लामा सोलाइनायाबो मिथिगानि महरखौ गुबुन महर होनानै दं। थामहिनब्ला गोदोनि धोनश्री लामायाव बालाबारीनि बिखायाव दा लाख-लाख सुबुंनि न' लुनानै आबाद मावनानै मिथिंगानो गुबुन माव होबाय। आरो ओजोंहा गोदान लामाजों ब्लां-ब्लां दैलाम जानानै रोजा-रोजा गामिखौ दैलाम बिखायाव गोबानानै महर मुश्री

गोमोर होबाय। बिब्दियैनो बुहुम बिखानि गेजेराव मिथिंगानि महर मुश्रीया सोलायो, दैलाम दैसानि लामाया सम लानानै सोलायो, बै दिनाव धोनश्रीनि लामायाबो सोलायदों।

जाम पानी दैसा :

राखांनाय देतखांनावनि बयहाबो मोनसे सम दं। बियो मिथिंगानि गुस्लायनाय सम। दैमा दैसानि बे देतगानाय समा दैज्लां बोथोरानो। दरं जिल्लानि भेरब कुण्डखौ समाय होबोनाय जाम पानी दैसायाबो धोनश्री दैसानि समायना मुश्रीजों लोगो लाग्रा दैसा जोला।

इं 1979 माइथायनि 16 जुलाइ दान। दैज्लां बोथोर बहर आहार दानाव हाजो खर'निफ्राय हाजों खंखर खुर्खाव खुरसि फैनाय जाम पानीया दावखा बिदै महर लानाय दाखा-दाखा गोसोम जोमैनि मददयै देवबार सानखालि मोना बिलि समाव गावनि मुश्रीखौ सोलायनानै ओंखारबोयो महर गोसायै।

भैरब कुण्डआव सेसापानी आरो जाम पानी दैसा मोननैजों ज' जादों। बै दिनाव बिसोरो जोबोद रामा जोंबाय खदाल जावख्लाबज्ल देबतानि जांथाइखौ लानानै। दैज्लां बोथोरनि हायना आरो आबुर गोनां महरखौ लानानै धोनश्री दैसायाबो खावसे बाग्लायनानै हायेनथिं मोखां जाबोदों गुम गामि, स'णाइ, बान्दोगुरि, बैग्रिगुरि गामिखौ खुर्खावबोनानै। खामाबारी गामिनि खर'आव खावनै जानानै गामिखौ बेंखनबोयो हर समावनो। सोनाबनि दालाइया आसि खान्दाजों आरो सानजानि दालाइया गामिनि जाम्फै लामाजों दैफां गामि मोनफैयो। खामाबारी गामिखौ गेजेराव गार्बोनानै मोननैबो दालाइया दैफां आरो आसि खान्दा गामिनि गेजेराव फिन ज' जाफिनो।

एसेआव खामाबारी गामिनि सासे दौरीया मोनसे गिदित आरो मोखथाडव जाफुंनाय जाथाइनि सिमां नुयोनो। गामिया गोदोनिफ्रायनो बाथौ सिबियारी बर' गामि। सिमां नुग्रा दौरीयाबो सेंग्रानिफ्रायनो राइजोजों सायख' जानाय मोजां मोनजानाय गोथार दौरी बोराय। मुड मुश्री खेराइ बसुमतारी। बर'आ लक्षी पुजा, गार्जा पुजा, (बाथौ पुजा) खेराइ, माराइ बाइदि रोखोमजों पुजा होनानै बाथौआनो गाहाय होनानै सिबिबोनाय हारि। जोनोमनि जाथायजों गोरोबहोनानै मुं दोनग्रायाबो बर'नि हुदा। सिमानि गिरि दौरी बोरायाबो खेराइ पुजा खालिनो जोनोम मोननायमोननो। बेनिखायनो बिथां दौरीनि मुड बर'नि गोथार उत्सबजों गोरोबनाय। फोथाय जाथाव बिथांनि सिमां आरो मुंनि ओंथिखौ।

जाथाइया औरै :

फैगौ जेला हुरु-हुरु जामपानीया बे साननि (देवबार खालिनि) मोननायाव सानसे मानि लोखो-सोखो खामानिजों मेंनाय देहाखौ लानानै दौरी बोराया ओलोश्री उन्दु दोंमोन। गोदो गोदो उन्दुलांफुनायाव बियो सिमां नुयोनो औरै—गिलु-बालु लैथो महर लानानै देरबोबाय जामपानी सेसा आरो धोनश्री दैजों जानाय दैसाया। लोगोआव खदाल जावख्लाब अखां जल देबताया नांदलाय-नांदलाय फगौनो धोनश्री दैजों। खदाल जावख्लाबा सानै फिसाज्ला। मुझ फारियै डिमा आरो रिमा। खदाला बेसेबा गोबावनि आगोलावनो धोनश्रीनि फिसाजो मैनाश्रीखौ फिसाज्ला दिमानो बिहामजोनि रादाय खादोंमोत्रा। नाथाय बिमा धोनश्रीया हरनो सिमान जाया। बेनि रागायवनो बिसोरो नांदलायो। रागजों-राग बिमा धोनश्रीया फिसासजो मैनाश्रीखौ लानानै लैथोआव थानो हायेनथिं ओंखारबोयो लामा गोदान सोलायनानै।

बिहामजो जानांगौ मैनाश्रीखौ मोननि रागजों खदालाबो ओंखारबोयो आरो लामा थारै नांदलायबोयो। ब्यावनो सौरदाव-सौसि लामा गैयैखौ लामा लाबोयो। बिब्दियै फैयै फैयै धोनश्रीया खामाबारी गामिनि साहा फिसाजोखौ होनो सिमान जानायसै। ब्यावनो खदाल आरो धोनश्रीया फिसाफोरखौ लानानै सानजाहा दौरीनि न' सेरजों आरो गुबुनफ्रा सोनाबहा गावसानानै खावनै जानानै बोहैबोयो। बेनि जाहोनाबो औरैबाव—बिमा लोक्षी आरो आफा बाथौबोराया बौहाथिंनिफ्रायबा रौरोधोनजों फैनानै खामाबारी थामहिनबा दौरीनि गामिखौ इनाय खालामनो मोना होननानै बादा होफैदों मानो होनोब्ला बे गामिया गोदोनिफ्रायनो बाथौ सिबियारी। बेवखायनो बिमा लोक्षी आरो बिफा बाथौ बोराया बिसोरो जोंनि फिसा, बिसोरखौ रैखा खालाम नांगोन होत्रायमोननो। बेनिखायसो खामाबारी गामिया लोमजानो गदोंनो।

फार्सेथिं जैरै खोथा एरै खामानि :

बिथां मुश्री खेराइ बसुमतारी दौरीखौनो डिमा आरो मैनाश्रीनि बिया दाननायनि पुरहित फाथिनानै हाबा होनाय खामानिखौ फोजोब होनानै (बिबियाइ बिजोमाइजो) खदाल आरो धोनश्रीया गावसोरनि साहा थावनियाव दावखो लांफिननायसैनो।

सिरि जाहात सिरि मोननानै बाहेरायाव ओंखारब्ला थारैनो नुनो मोनो गावनि न'नि सानजा आरो सोनाबहाबो गुफुर-फुदुन गाबजों मोननै दैसा

बोहैनाय। लोगोआव गावनि सेथलायाव आग्रौमसे दै। दौरी बोराया गावनि सिमाड थारैनो मोखथाडव जाफुंनायखौ नुनानै उन्दु फिन्नो सम जाल्या सात्रानै लोगो लोगो गावनि फिसा-फिसौ फोरखो फोजाखांजोबो आरो गामिनि गियातिफोरखौ खबर लायो। जाथाइया थार सैथो। अखा नायै गामिनि जालाखार बयनिबो मोखां सोमनाय।

हाबा जाखांनायनि उनाव डिमा आरो मैनाश्रीया मिनिखुसि आसि खान्दा आरो दैफां गामिनि गेजेराव सोनाबनि दालासेजों ज' लोगो लानानै रंजा-बाजा गावसिनि गोसो बाइदियै रौता अदालगुरि दालाइ राजा लामानि दैफां दालांखौ सौफाय फैयो। बेयाव गोबां मानसिनि हान्था मेलायाव हेंथा फैयो, आरो राइजोनिबो खहा जायो। बिब्दियैनो जामपानी दैसाया गोदान लामा सोलायनानै गोबां जायगानि खहा खालामनानै बुर्लु-बुथुर दैमायाव गोग्लै हैयो, मिथिंगानि महरखौ सोलायनानै।

दौरीनि सिमां बायदिब्ला मोदाय-दाबदाइहाबो फोलेर दं। गोथारखौ थारैनो सिनायो। बेयावखायसो गोथारनि आखाइजों गोथार जुलिनि हाबा मावहोदों। बिसोरबो संसाराव गेलेदों। जोबनायाव बयबो दाबसेयावनो ज' जाहैदों। बेयावखायनो बहुमनि दैमा-दैसा, बिलो फुखी, निज्रा निज्रि आरो फुंखाजों नुजानाय गासै दैयाबो मोनसे लैथोआवनो एबा लैथोमायावनो ज' जाहैदों। बिब्दियैनो मैनाश्रीया बिमाखौ नागारनानै (हाबा जाखांनानै) गोदान लामा सोलायदों जामपानीनि जोहैजों आरो हाबा लानाय डिमा दैसानि मददजों।

जौ, जुलि आरो शिक्षा

—प्रेमनाथ बसुमतारी

प्रेमनाथ बसुमतारी (1963) : बिथाडा रौतानि सासे बर' राव-थुनलाइखौ मोजां मोनग्रा सुबुं। आधिखालाव बिथाडा इरिगेसन बिफानाव साखि मावना दड।

जौ, जौआ जादों बर' मानसि फोरनि मोनसे लोंग्रा आरो नागारनो हायि जीउनि आंगो जिरात नडासै? मानोना जौखौ संनानै खानानै जीउ होनानै जोनोम होनो हाग्रा बानानै गिरिआनो जादों बर' मानसिफोर। बिनिखायनो बर' मानसि फोरखौ जौनि जोनोम गिरि होन्नानै मख' जायो। नाथाय बे जौ संग्रा-लोंग्रा हुदाखो गोसोआव मोजां सान्नानै बिखायाव बोजोबनानै गोदो गोदायनिफ्रायनो जौनि बर' मानसिफ्रा जौखौ लोंबो गासिनो थादों; दासिमहा लागैबो लोंगासिनो दड' आरो सिगांहा (Future) लागैबो लोंनो एंगारनो नाजानो थाखाय जेबो राहा लायाबानो लोंगासिनो थागोन नामा?

गोदो गोदायनिफ्रायनो बर' मानसिफ्रा जौ संनानै लोंबोनायखाय दासिमहा लागैनो जौआ बर' मानसिफोरनि साफ्रोमनि न'खरनि थाखाय दुखु-खालामनानै खानानै-बानानै फेदेरनाय फोलाउनाय असे अनसुला फिसा जानानै दड'। नाथाय जौनि बर' मानसिफोरा दासिमहा लागैनो जेबो सान्नानै नायाखै दि गावनि असे फिसाखौ थैसि थांसि फेदेरना फोलावना बाराद्राय अन्नानै गथ'नि भबिस्यत जीउनि (Futurelife) थाखाय गथ'खौ मोजां लामाजों आगान सुरलांहोनो थाखाय गथ'नि सायाव जेबो राहा लायाबानो थायोब्ला सानसे समाव गथ'आ न'खरनि धन-सम्पत्ति (Property) खहा खालामग्रा आरो बिमा-बिफानि खर' सायाव गाखोनानै; बिमा-बिफानि मान मर्जदा आरो अपमान खालामनो बोली मोनहैयो! बेखौनो बुडे दि Spare the rod and spoil the child. अर्थात गोबां अन्नायाव गथ'आ जीउनि धंसनि लामा लायो। भबिस्यत आव गथ'आ सिखाव-डकाइत, गात्रि आखल आखुनि बेराम गोनांबो जाहैनो हागौ। आरो मोनसे Example बाव दि give him an inch he will take smell. अर्थात न'खरनि सैमाखो अन्नानै लाय-लाफा खानो होयोब्ला सैमाआ गोदोनाहा लागै बार ग्राडेनो। बेफोर बायदिनो Example.

जों रिजायना नायोब्ला जौआ बर' मानसिफोरनि बेसेबां खहा खालाम बोगासिनो दड; बेफोरखौ दानि मुगानि सान्रो हनो गोरों गोरफोरनि मेगनजों नुनो मोनो। गोदोनिफ्राय जोंनि बर' मानसिफ्रा गावनि अनसुला गथ' सान्रानै जौखौ न'ख'राव जायगा होबोनाय खाय दिनै जौआ साफ्रोमबो बर' मानसिफोरनि न'खरनि सासे अनजालु फिसा आरो गिदित सत्रु बिभिसन जानानै दड'। बिभिसना रामजों लोगो जानानै बिभिसननि दैदेन्नायाव राबननि राइजो श्रीलंका हादोत आ सानसे समाव धंस' जालां दों मोन। बि बायदिनो जौनि दैदेन्नायाव सानसे समाव साफ्रोमबो बर' मानसिफोरनि न'खरा धंस जागोना सान्रान्गो जाना फैदों। बे एसे गिदित सत्रुखौ दिनै बर'फ्रा न'खराव मानो जायगा होबो गसिनो दड? मानि थाखाय? सैमाखौ अन्नानै लाय होनायाव सैमाया गोदनाहा लागै बारग्रानाय बायदि जौखौ बर'फ्रा बाराद्राय अन्नायाव दिनै जौ आ बर'फोरनि खर'हा लागै बारग्रानानैबो खरनि बेसेबां गोजौ आव बर'ग्रानानै बेसेबां गोथौ साखर सिंआव गाफबनानै दोनदों बेखौ सान्रो थाखाय रावबो बर' मानसिफोरहा सेतना (Consciousness) जाखां फैयाखै। हे! बर' राइजो राजाफोर नोंथांमोना मानो दासिमहा लागै उन्दुनानै थानाय गोसोखौ फोजाखां होनानै जीउनि मोजां लामाजों आगान सुरलांनो नाजायाखै? जोंनि बर' समाजाव जौ, लोंग्रा हुदाया थानायखायनो दिनै जोंनि बर' मानसिफोरनि समाजाव गात्रि आखल आखु आरो बांसिनखौनो जानो लोंनो गोयै गोरिब गुन्द्रा नुनो मोनो। गोदोनिफ्रायनो बर' मानसिफ्रा जौखौ लोडब्लानो जीउनि मोजां लामाजों आगान सुरलांनो थाखाय गावनि आथिं आव गावनो गसनो नाजाबोनायब्ला दिनै बर' मानसिफोरनि खाफालाव जानो लोंनो गैयि बेरामा बानो मोन्नाय नडामोन। मानोना बर'फ्रा आसाम हादोतनि 'भूमि पुत्र' मुं मोन्नाय लाय सानसे समाव साफ्रोमबो बर' मानसिफोरहा हाबा, दडमोन। साफ्रोमबो बर' मानसिफोरहा अन्ततः गावनि आथिं फजानो आरो हाल एवना गायना फुनानै ओंखाम बोथिसेखौ जानो थाखाय हा दंजोबथारोमोन। नाथाय एसे हा थासानदिआवबो दिनै बर' मानसिफोरहा हबा गैयि रिफुजि जालांनयनि जाहोना मा? बिनि गोनां जाहोन खौ जों मोजाडै बिजिरना नायोब्ला नुनो मोनो "जौ लों नाय हुदा।" गोदो निफ्राय जौ संग्रा-लोंग्रा; जौ फेनानै उन्दुनानै थाग्रा, आरो खामानि दामानिनि फार्से गोसो गैयै हुदा एबा आखल आखुफोरा बर' मानसि फोरनि साफ्रोमनि थै जों बोहै फानाय खाय दिनै बर' मानसिफोरनि दुखु दसाआ बे खिनि आव आगान सुरफैबाय। जोंनि बर' राइजो राजाफ्रा बेखौनो सानो नामा दि गोदोनि फ्रायनो जौ लोंग्रा-फेग्रा; फेनानै उन्दुनानै थानाय आखल आखुआ बर' मानसिफोरनि थै जों बोहै

फादों सात्रानै, बेफोर गाञ्जि आखल आखुफोरखौ एंगारबानो खोमसि लामाजों आगान सुरलांबाय थाबानो जीउनि मोजां स्रां लामा आव गाखोनानै थाबाय लांनो हागोन ? नाथाय जों बर' राइजो राजाफ्रा बेखौनो सानोब्ला गोथौ हाखर गिदित खैफोत आव गोग्लै हैगोना थार सात्रानै ला।

जों दा जोंनि बर' समाजाव बर' मानसि फोरनि सभाबखौ (आखल) मा नुनो मोनो ? सेथिआव जि एसे हा दड; बे हाखौ बन्धकि आव होजेत्राय। हा बन्धकि होनाय रांजों जेबो खामानि मावआ दाड जालायनोसै दान मोत्रै, मोन से। नैथिआव जेला राड जेबो अब्ला जानो लोंनो जेबो राहा नुयैलाय हाखौनो बिघासे सो फात्रो हमनोसै। बिदिनो बिघासे, बिघानै फात्रायावनो फात्रायावनो उनाव गाव जनाय न' बिथाखौनो फात्रो हमनोसै। थामथि आव नुनो मोनो मा ? जनाय न' बिथाखौ फानखांनायनि उनाव थानो जेबो राहा गैयैलाय मा-खालाम गोन मा-थागोन जानानै गोसो आव क्रमेनो सानखां फैनोसै मा ? हागोदान नायगिर हैनो। गुबुन हारि बायदि थाव-संखि माइफाथोनि बेपारफोरखौ जोंनि बर' मानसिफोरा साबजाया। जों बर' मानसिफ्रा साबजायो जौ बेपारि आरो हानि बेपारि खौसो। बिनि खायनो जों बर' मानसिफोरखौ जौ आरो हानि मुंदांखा बेपारिफोर होत्रा मख'जायो। बिदिनो हा गोदान नागिरहैनो थाखाय थांनोसै बहाबा लक्षीमपुर, गहपुर, सिलापथार, हुग्राजुलि आरो नागालेन्ड बायदि बायदि जायगायाव। उनाव हाखौलाय बहा मोननो थप्ला-थप्लि लानानै गोदाव-सोराव थाबायथिं थाबायथिं हाथायसालि सालि हर थाथिंबायग्रा अघरी माहारि बायदि हाथायसालि सालि हर थाथिं बायहैनोसै। बेफोर बायदिनि थाखायनो नागालेन्डआव लुंथा नगा मानसिफोरजों आलाइ-सिलाइ दान्थार जाहैबाय गावथार जाहैबाय। बिदिनो जेबो साना हसिआ गुबुन हारिफोरनो हाफोरखौ फात्रा खारै खारै दिनै जोंनि बर'फोरनि Area ट्राइबेल ब्लक आरो बेल्ट फोराव गुबुन हारिफोरा हाबसनजोबफैनो मोनबाय। जोंनि बे ट्राइबेल ब्लक आरो बेल्टफोरनि बेराफोरा बायस्रानायनि जाहोना सरकारनिल' गोरोन्थि नडा जोंनि बर' राइजो राजाफोरनिबो जोबोद गोरोन्थि। गोदोनिफ्रायनो जोंनि बर' मानसिफोरा थायसे जायगायावनो हाफोरखौ फानग्लांआ बानो, खारदूला बायाबानो ग्रोद-ग्रोदहै राइजो जाबायनाय मोनबा, दिनै जोंनि बर' मानसिफोरा बेफोर बायदि आलाइ-सिलाइ जाहैनानै दान्थारजा बाहैनाय; बुथारजा हैनाय नडामोन आरो जोंनि ट्राइबेल ब्लक आरो बेल्टफोराबो बायना-जिना थांनाय नडामोन। एसे धोननि गिरि बर' मानसिफोरा दिनै धन एबा रांखावरिनि ग'लामि जानानै फैबाय। जोबोत दुखनि बाथ्रा ! बिदिबा हे ! बर' राइजो राजाफोर

नोंथांमोना गोसो गोथौयै सात्रानै नायहर नायसै ? जौआ मानसिखौ बेसेबां गात्रि लामाजों दैदेन लांनो हायो आरो दैदेन नांनानै बेसेबां गिदित खैफोतनि हाखराव खोख्लै हैनो हायो।

जुलि : जुलि आ जादों सानै सेंग्रा सिख्लानि गोसो मोजां मोनलायनायनि उनाव जुलि जाखांनानै; मोननै जीउआ मोनसे जानानै अनलायनायनि दोंसे दिरुंजों बे फैलाउ बहुमाव दुखु-सुखुनि गेजेरजों अनलायनानै राइजो जालायनाय। नाथाय जुलि जानायआबो बइनिबो थाखाय Compulsory Subject होत्रानै सात्रानै लाब्लाबो इसे गोसो गोथौयै सात्रानै जुलि एबा हाबा जानाया दि मोजां बेखौ सात्रानै नाय बिदिनो गावनि नखरनि आरो व्यक्तिगत धन-सम्पत्ति (Personal Property) जेंना फोरखौ जेबो सिन्ता खालाम हाब्लानो जुलि जानायआव राइजो जानायनि दुखुथिया फख्रीआव गाब्रनानै गोग्लैयना दै मोलोंनांगो जाना फैयो।

जौ लोडै लोडै थानायखायनो जुलि लानाय हुदाखौ जों जोंनि बर' गामिफोरनि समाजाव गोबां नुनो मोनो। जुलि जानायनिफारसे बिशेषकै बुंनो थाडेब्ला, उन्दै बैसोआव जुलि जानायआ मोनसे गात्रि हुदा। जों दा गामि फोराव उन्दै उन्दै बैसोनि मानसिफोरखौनो गोबां जुलि जानाय नुनो मोनो। बिमा बिफाफोराबो सानो मा गावनि गथ'नो थाबनो हाबाखालामना होनानै नखरनि जेंनानिफ्राय एंगारना थानो। माब्ला बिहामजो गोदानि ओंखाम ओंखी संनाय मोनजागोन आरो फिसौला-फिसौजो फोरनि मोखां नुगोन। नाथाय बेफोर बायदि गोरोन्थि सात्राआ जोबोत गात्रि। जेबो सात्रो-हनो रोडै गोलै बैसोनि गथआ जुलि खालाम—खांनायनि उनाव गथ'आ बेसे दुखु लालांनो गोनां जायो बिखौ बुंस हाया। सांसारिक जीवन-जापन खालाम नायाव गोबां सांसारिक जेंना गसंथे फैयो, बेफोर बायदि जेंना गसंथे फैनायाव बिशेषकै नखरनि जानाय लोंनाय आरो नखरनि बायदि बायदि जेंनाखौ श्रृंखलाबद्ध है सालाय लांनायाव गोब्राब जानानै फैयो। जुलि एबा हाबा खालाय खांनायनि उनाव जोबोत गुरुत्व होनांगो जानानै फैयो गथ-गथाय खांनायाव मानोना उन्दै बैसोआव जुलि एबा हाबा जायोब्ला गथ गथाय खांनायाव गोबां खांद्राय हैयो। उन्दै बैसोआव जुलि एबा हाबा जानायाव बिनि भर जौवननिफ्राय गाहाइ जौवननिसिम बेसेबां गथ' गथाय खांहिनो हाहैगोन साननानै नायहरनासै ? हिन्जावफोरा बैसो जानायनिफ्राय अर्थात 14 (जिब्रै) बैसोनिफ्राय 42 (ब्रैजिनै) बैसोहालागि गथ' गथाय खांनो थाखाय जथेस्त गोहोमोनो। बेनि उननि बैसोनिफ्राय हिन्जावफोरनि गथ' गथाय खांनो हानाय गोहोआ जोबनो हमहैयो। होवाफोराबो 18 (जिदाइन) बैसोनिफ्राय 45 (ब्रैजिबा) बैसोसिम गथ' गथाय खांहैनाय गोहोआ जथेस्त

थाहैयो। 45 (ब्रैजिबा) बैसोनिफ्राय होवाफोरनि गथ' गथाय खांनो हानाय गोहोआ जोबनो हमहैयो। बिदिबा 16 (जिद') आरो 17 (जिस्नि) बैसोआव जुलि एबा हाबा जानाय हौवा हिन्जावा 42 (ब्रैजिनै) आरो 45 (ब्रैजिबा) बैसोआलागि बेसेबां गथ' गथाय खांहैनो गोहो जाहिगोन एबा बेसेबां गथ' गथाय खांहैगोन नायहर? बिनिखायनो हिन्जावफोरा 22 (जिनै) एबा 25 (नैजिबा) बैसोआव आरो हौवाफोरा 30 (थामजि) एबा 32 (थामजिनै) बैसोआव जुलि एबा हाबा जानांगौ। होमानिया साथाम साब्रै गथ' खांहैनो हानायनिफ्राय बारग'नो हाहैयो। बेसोर बायदि बैसोआव जुलि एबा हाबा जायोब्ला गोबां गथ' गथाय खांनायनिफ्राय राहा मोनहैयो आरो बिमा-बिफानि स्वास्थ्य (Health) नि फारसे मोजां जानानै फैयो। पूर्ण जौवन एबा गोरा बैसोआव जुलि एबा हाबा जायोब्ला गोबां गथ' गथाय खांहैनायनिफ्राय राहा मोनहैयो आरो सा 2 (नै) सा 3 (थाम) गथ' गथाय खांनानै गोजोन न'खर दानायाव जोबोद खाबु मोनहैयो। हाबा एबा जुलि जाखांनायनि उनाव गथ' गथाय खांनायानो जादों गथ'फोरखौ मोजाडै फेदेरना-फोलावना लेखा-फरा फोरोंहोनानै बिसोरनि खोमसि मेगनखौ शिक्षा-बिद्यानि जोगेदि गथ'फोरनि भविष्यत (Future) खोमसि जीवनखौ सां खालामना होनानै मानसि खालामनाय। बिनिखायनो दानि मुगायाव सरकारा होनाय मोजां लामा परियाल-परिकल्पनाखौ Follow खालामनानै सा 2 (नै) एबा सा 3 (थाम) गथ' गथाय खांनानै सुखि एबा गोजोन न'खर दानाया जोबोद मोजां। होम्बानिया गथ'फोरखौ हाजासे शिक्षा-बिद्या आर्जि होनो हाहैयो आरो जानाय लोंनायनि थाखाय न'खराव जेबो गोबां जेंना हेंथा जाखांफैया। नाथाय जों दा उन्दै एबा गोरलै बैसोआव जुलि एबा हाबा जानाय जाहोनाव गामिफोराव गोबां गथ' गथाय गोनां आरो जानो-लोंनो गैयि निखाउरि मानसिफोरनि न'खर नुनो मोनो। जानो-लोंनो गैयिनि जाहोनाव बिमा-बिफा आरो गथ'फोरनि स्वास्थ्य (Health) फोरखौ जोबोद गात्रि नुनो मोनो। गात्राय-जोमनाय सि जोमनि फारसेबो गिजि-गोफोनखौनो गात्रानै थालाबायनाय नुनो मोनो। उन्दै एबा गोरलै बैसोआव जुलि एबा हाबा जानायनि जाहोनाव जों बर' मानसिफोरनि गामिफोराव मोनसे जोबोद गात्रि हुदा सोमजि गसिनो दड। बोधकरो (Perhaps) बेफोर गात्रि हुदाया राइजो-राजाफोरनि मेगनाव गोग्लैदोंबाबो, मानि जाहोनाव बे गात्रि हुदाया सोमजिदों बेखौ गोसो गोथौवै सानना नायनो थाखाय रावहाबो चेतना (conscious) जाखांफैआखै। बे गात्रि हुदायानो जादों बै उन्दै एबा गोरलै बैसोआव जुलि एबा हाबा जानाय। जाय मानसिफोरा अबंलाउरिनि अत्रायाव; खाफालाव

लिरजानायाव गामिफोराव जायफोर धोनि एबा माहाजोन मानसिफोर दड बेफोरनि गेजेराव खायफाबा जोबोद गाञ्जि आखल-आखु, गुन्दाफोर दड। बिसोरो उन्दै एबा गोर्ले बैसोआव जुलि एबा हाबा जानायलाय गथ' गथाय गोबां खांद्रायनायाव बिसोरनि हिन्जावफोरनि स्वास्थ्य (Health) फारसे जोबोद गाञ्जि जानानै फैयो। उनाव लासैनो गावनि हिन्जावनि फारसे अन्नाय, मोजांमोन्नाय गोसोआव जोबोबोनो हमबोयो। बिनि जाहानाव गोसोआव क्रमैनो सासे हिन्जाव गदाय लानो थाखाय सारिमोनखांफैनोसै। जानो लोनो गैयै न'खरावदि पबित्र एबा गोथार मोजां महर गोनां बिबार बारा बे नड। जानो लोनो गैयै न'खरावबो पबित्र एबा गोथार बिबार बारनाया Sure। बै पबित्र एबा गोथार; मोजां महर मुस्त्रि गोनां बिबारफोरा गावनि न'खरनि जानो-लोनो गैयैनि थाखाय आरो गावनि अनसुला-अनसुलि बिमा-बिफाखौ फिसिनो थाखाय मालायनि न'आव अर्थात् माहाजोनफोरनि न'आव रुवाथि (Maid servant) जाहैनो गोनां जानानै फैयो। बिदिनो माहाजोनफोरनि न'खराव ग'लाम बैनायावनो बैनायावनो लासैनो गोग्लैनोसै बै गाञ्जि आखल-आखु गोनां माहाजोनफोरनि मेगनाव। उनाव बिदिनो बै गाञ्जि आखल आखु गोनां माहाजोनफोरनि by forcibly attack खालामनायाव सानसे समाव बै गोथार एबा पबित्र बिबारा पापि एबा संसाराव मुगै जानाय बिबार जाना फैयो। जिनाहारि जाखांनायनि उनाव बै गोथार बिबारा समाजाव मुगैजानाय जानायलाय बाध्य जानानै गोसोआव हाजासे दुखु-दाहा लानानै बै बोराइ माहाजोननि हिन्जाव गदाय जानांगौ जाना फैनोसै। उन्दै एबा गोर्ले बैसोआव जुलि एबा हाबा जायोब्ला मानसिया संसारनि मा जेंनायाव गोलैनांगौ जानानै फैयो आरो मा आखल-आखुनि मानसि जाहैयो बोधकरो मिनथिबाय। जॉनि बर' मानसिफोरनि समाजाव बेफोर बायदि गाञ्जि आखल-आखु आरो हुदाफोरा गोखोडै सोमजि बोनायाव दिनै बेसेबां निखावरि बर' सिख्लाफोरा जिनाहारि जानांगौ जाना फैदों। दिनै माहाजोनफोरनि गाञ्जि आखल-आखुनि थाखाय जानो-लोनो गैयै निखाउरि न'खरनि सिख्लाफोरा रुवाथि थानानै न'खर आरो गावनि अनसुला-अनसुलि बिमा-बिफाफोरखौ जाहोनो लोंहोनाया गोब्राब जानानै फैदों। सानसे समाव जॉनि बर' मानसिफोरनि समाजाव हिन्जाव बोनाय हुदाया मोनसे जोबोद गाञ्जि हुदा जानानै फैदोंमोन। नाथाय बर' समाजनि गोखों बान्दोआव दिनै बै गाञ्जि हुदाया जोबलानो हमबाय। बुंनो थाडेब्ला जुलि लानाय हुदाया जॉनि बर' समाजाव एरैबायदि बांबोनो हमबोदोंदि बांगाल हारिनि आखल-आखुवा सन्देरनो हमबोदों। बेफोर बायदि जुलि लानाय हुदाया जॉनि बर' मानसिफोरनि समाजाव द्रुतगतिआव बांबोनायखौ

होबथानो थाखाय आरो समाजनि गात्रि आखल-आखुफोरखौ फोसाबनो (Reform) थाखाय दुलाराय बर' राइजो-राजाफोरनि खाथिआव आर'ज गाबहरो।

शिक्षा :

गोजौआव बुंबोनाय बेफोर जौ संग्रा-लोंग्रा, जौ फेनानै उन्दुनानै थाग्रा खामानि दामानिआव गोसो गैयै जेबो साना हसिआ गुबुन हारिफोरनो हा फात्रा, गुबुन जायगायाव हबा नाइगिर हैथिंबायना दानथार जा बायहैनाय, बुथारफा बायहैनाय; गामिफोराव जौ लॉनानै गोदोसोनानै थानानै सान्नो हनो रोडै गथफोरनो गोर्ले एबा उन्दै बैसोआव जुलि एबा हाबा खालामना होग्रा; बेफोर बायदि गात्रि आखल आखु, हुदाफोरा दिनै जॉनि बर' मानसिफोरनि गोसोआव आरो समाजाव मानि जाहोनाव सोरजिनो मोनखो? मानिथाखाय? मा गैनि थाखाय? मा गैया दिनै जॉनि बर' मानसिफोरनि लोगोआव? जाय जिरातखौ जों गावनि गोसोजों दाफानानै लानोहायो आरो जाय जिरातखौ जों गोसोजों बोहैफा होनानै, जीउनि मोजां खामानियाव दैदेन लांजायो बे जिरातखौनो दिनै जॉनि बर' मानसिफोरा लानो रोडखै आरो बर' मानसिफोरनि लोगोआव गैया। बे फैलाव संसाराव मानसिआ जिसिबां दिन थांनानै थायो बेसेबां दिनहालागै मोजां खामानि आव बाहायनो हाग्रा आरो थै बाबो गाउजों लोगोआव नांफानो हाग्रा मानसिनि बे आंगो लोगोआनो जादों "शिक्षा"। जाय मानसिआ शिक्षा दीक्षानि फार्से गोसो गैया, जाय मानसिया लेखा-पढ़ा रोड बे मानसिया मेगन गैयै बायदि, खाना (Blind) मानसिफोरबायदि बे बहुमाव थांनानै थानो गोनां जायो। जों शिक्षा-दीक्षानि गेजेरजों मेगन थानानैबो मेगन गैयै बायदि खोमसि जाना थानाय खोमसि मेगनखौ ज्ञान (Knowledge) गोनां श्रां मेगन खालामना लानो हायो। जाय मानसिफोरा मानसिनि बे आंगो लोगो जिरात शिक्षाखौ लानो रोंदों बे मानसिफोरानो दिनै बे दुखुथिलै बहुमाव बेसेबां सुखी एबा गोजोनै राइजो जालांगासिनो दड' आरो जायफोर मानसिआ बे शिक्षा-दीक्षाखौ लानो रोडखै बे मानसिफोरानो दिनै गोथौ दै आव बेसेबांबा दै मोनलों बांसिन सानसि गासिनो दड' बेफोर बायदि मानसिफोरनि अन्जिमा गैया। शिक्षा-बिद्यानि जोगेदि मानसिआ सानसे समाव मानगोनां ज्ञानी-गुणी, समाजनि सासे मानगोनां सामाजसिबिआरि आरो हादोत दैदेन गिरि जाहैनो हायो। बिदिबा दिनै जॉनि बर' मानसिफोरा साबसेआ लेखा-पढ़ायनो सोलोंदों साबसेआ लेखा-पढ़ा फरायना समाज सिबिग्रा मुंदांखा मानसि जादों? नाथाय जोबोत दुखुनि बाथ्रा। गोदोनिफ्राय नो जॉनि बर' मानसिफोरा शिक्षानि फार्से अबहेला (Negligent)

खालाम बोनायखाय दिनै जॉनि बर' मानसिफोरनि गेजेराव शिक्षित मानसिफोरनि अन्जिमाआ जोबोत खमथार।

जॉनि बर' मानसिफोरनि गेजेराव अर्थात जायफोर मानसिफोरा इसे-इनै फरायनो गोरों आर्थात थाखो स्नि, डाइन हा लागै फरायनाय बिसोरहानो गोसोआव मोनसे बेराम उजियो। बिसोरो मिनथिगौ दि Little learning is a dangerous thing होन नायखौ। नाथाय बिसोरो बेखौ मिनथिनानैबो; मोजाडै फरायजो बाब्लानो बहाबा मिलिटारी, पुलिस, मटर द्राइभार बायदि बायदि साकरि नागिरनायनि निसायाव गोग्लैयो। बेफोर बादि इसे-इनै फरायनानै साकरि नागिर थिं हैनानै नखरनि धोन-सम्पति खहा खालामनाय मानसिफोरखौ गोबां हैनो नुनो मोनदों। नाथाय बे हुदाआ जॉनि शिक्षित बर' मानसिफोरनि गेजेराव बिराट मोनसे गाज्जि हुदा सोमजिहोगासिनो दड'। दिनै जों गुबुनहारिखौ नुयो — P.U., B.A. आरो M.A. फरायनानैसो साकरि (Service) नागिरनो गोसो आवसिरिमोन खांफैयो। साकरि बाकरि मोनाबाबो गाउ थांना थानो थाखाय मोनसे हारसिं आर्जिनो हानाय लामा लायो जैरै दोकान, रेडिअ' मेकानिक, घड़ी मेकानिक बायदि बायदि। जोंबो जदि इसे-इनै फरायनानै गोबां फरायनो हायाब्लाबो साकरि नागिरनाय निसाखो एंगारना फिसा फिसौ दोकान ग'लानि गेजेरजों फालांगि (Business) नि लामायाव आगा नसुबोब्ला नखरनि गाज्जि रां खान्थि फोरखौ लासैनो जोबश्रां होनो राहा मोनहैगोन। बे बहुमाव थांना थासान्दि रांखाउरि धोन सोम्पत्ति बुथुमनायनि मोनसे मोजां लामाआनो जादों फालांगि (Business) फालांगिनि गेजेरजों मानसिआ सासे गिदित लाखपति धनी-जमिदार जानो हायो। जों दानि मुगाआव, जॉनि मेगन सिगांआवनो नुनो मोनदों दि गुबुन हारिआ Business नि जोगेदि बेसेबां दोपद-दोपे धनी-मानी मानसि जाबोनो हमदों। बिदिनो बेपार खालामनो थाखाय बेपारि मानसि फोरा दै बोहैनाय बायदि मोनसे हादोत आव फैनायावनो फैनायावनो बिसोरनि क्षमताखौ बिस्तार खालामनानै मोनसे हादोतखो राजत्व खालामनो जथेस्त खाबु मोनदों। बेफोर बायदि Example नि फार्से दिनै जॉनि भारत हादोतनि अबस्था खौनो नुनो मोनो। सानसे समाव जॉनि भारतबर्ष आव इंराज मानसिफोरा बेपार-बानिज्य खालामनो थाखाय फैदोंमोन। नाथाय बिसोरो लासैनो सोलो-बोलो मोन्नानै दुलाराय भारत हादोतखौनो राइजो खुंनो खाबु मोन्दोंमोन एबा खुंदोंमोन। होमब्ला Business नि लामाआ व्यक्तिगत (Personal) धन-सम्पत्ति बाढाय नायनि अनगायैबो राइजो खुंनो थाखाय राइजोबो मोनहैनो खाबु मोनहोयो। नाथाय गुबुन हारिआ बेफोर बायदि सरम क्षमता फोरखौ मानि जोगेदि मोनखो ?

शिक्षा-बिद्यानि जोगेदि। दिनै गुबुन हारिआ मालाययि नखराव थानानै मालायनि नखरखौ सेना लानो थाखाय सोलो बोसो मोनदों। नाथाय जोबोत दुखुनि बाथा दिनै जॉनि बर' मानसफोरा गोदोनिफ्रायनो शिक्षा बिद्याखौ गोसो होनानै सोलों बोयैखायनो; ज्ञानी-गुणी जानो नाजाबोयिखायनो; जों बर' मानसिफोरनि थाखाय फार्से थिनिफ्रायनो फुरायनो हायै खहाजालानाय जोबोत गिदित फखी जानानै दड'। जों नि बर, मानसिफोरा लेखा-पढ़ा फरायना सान्रो-हनो, ज्ञानी-गुणी मानसि जाबोनो रौडैनि थाखाय मा मा खहा जाबोखोहोमब्ला? सेथि आव जॉनि बर' मानसिफोरा जाम्बा-जाम्बि जाना थाबाय, नैथि आव जॉनि बर' मानसिफोरनि रां-खाउरि धोन-सम्पत्ति आ गुबुन हारिनि उदैआव जमा जाहै जोबबाय। थामथि आव जों बर' मानसिफोरा लेखा-पढ़ा फरायना समाज सिबियारि जानो रों बोयैखाय दिनै जॉनि बर' मानसिफोरहा राइजो गोमाबोबाय। बेफोर बायदि जाथायनि अनगायैबो, जों बर' मानसि फोरहा फुरायनो हायै गोबां खहा जाबोबाय आरो जागासिनो दड'।

मालाय गुबुन हारिआ गथ'फोरखौ 5 (बा) बोसोर जानायनि लोगो लोगो शिक्षा-बिद्यानि जोगेदि ज्ञाननि स्रां जों मेगन गेवहोनो थाखाय, खोमसि मेगनखौ स्रांहोनो थाखाय फरायसालि आव थिनहरो। नाथाय जॉनि बर' मानसिफोरनि गोसोआ Dismetrically opposite मानोना जॉनि बर' मानसिफ्रा सानो— गथ'आ 5 (बा) बोसोर जानाय लोगो लोगो फरायसालिआव थिनहरनाय अनगायै मालायनि न'खराव लाउखार आरो बखालि दोनहरना बेतन जानोसो। जि समाव गथफोर खौ फरायसालिआव थिनहरना; लेखा-पढ़ा सोलों होनानै खोमसि मेगनखौ स्रां खालामहोना, गुणी-ज्ञानी जाहोना भबिष्यत नि जीउनि थाखाय गथखौ मोजां मानसि खालाम नांगौ बेसमाव मालायनि न'खराव लाउखार बखालि दोनहरब्ला; बे गथ-फोरनि जीउआव बेसेबां खोमसिनि गोसोम जोमैआ साग्लोब जोब फैगोन। जों बर' मानसिफोरनि गेजेराव उन्दै एबा गोलै बैसोआव जुलि एबा हाबा जानाय हुदाआ थानायखाय बै गथफोरा मालायनि न'खराव दाहोना रुवाथि थानानै बैसो बायाब्ला नो थाबनो जुलि एबा हाबा जानोसै। उनाव बिसोरबो जाम्बा-जाम्बि लाय गोबां गथ'-गथाय खानो गोर जाहैनो सै आरो बिनि जाहोनाव बिसोरबो गथफोरखौ फरायसालिआव थिनहरा ब्लानो गावसोर बायदि गथफोरखौ खोमसि, मेगन गैयै खालामना लानोसै। बिफोर बायदिनि जाथायआव दिनै जॉनि बर' मानसिफोरनि गेजेराव शिक्षित मानसिनि अन्जिमाआ गोबां बांबोआ ब्लानो जाम्बा-जाम्बि मानसिनि अन्जिमाया गोबां बांबोनो हमबोदों। जॉनि बर' मानसिफोरा जाम्बा-जाम्बि गोबां

गथफोर खांनायखायनो सानसे समाव अज्ञानि गथजों बिमा-बिफाआ बुजाना गो जाना फैयो आरो बुजायोबो। नाथाय दिनै गुबुन हारिआ शिक्षानि मुलत्वखौ मिनथिनायखाय हाजासे शिक्षा बिद्या खांनानैसो आजि Self reliance and self supporting जाखांनायनि उनावसो हाबा एबा जुलिनि रादाब गोसो आव सानखांफैयो। शिक्षा बिद्याखौ लानो रोडै खायनो दिनै जोंनि जाम्बा-जाम्बि बर' मानसिफोरा Office फोराव जैरै, मन्डल अफिस, बायदि बायदि Office नि फिसा-फिसौ खामानि आवनो मन्डल,कानुनगु, केराणि आरो साधारन पियन फोरनो नो रां होनानै खामानि मावनांगौ जाना फैयो। जोंनि बर' मानसिफोरा जाम्बानि अन्जिमा गोबांखायनो दिनै जोंनि निखाउरि बर' मानसिफोरनि रांखाउरिआ अफिस आदालदाव दाहोना बैनाय गोलामि, सरकारनि संख्रि जानाय मानसिफोरनि उदैआव हजम जाहै जोबदों।

नाथाय दानि मुगायाव जों दुलाराय बर' मानसिफोरा गोदोनि बायदि जाम्बा जाम्बिजाना थानाय सम गैलिआ। जोंदा हागौ मानि गोजौ थाखोआव गाखोनानै आवगायलानो नाजा लांनाय जाना दुलाराय बर' राइजो राजा फोरनि खामानि। जोंहा दा उन्दुनानै थानाय समा गैलिया। गुबुन हारि बायदि शिक्षा-बिद्यानि जोगेदि ज्ञानि-गुणी जानानै दुलाराय बर' मानसिफोरा गाउनि आथिंआव गाउनो गसंना नाजानायआनो जोंनि बर' मानसिफोरनि कर्तव्य। जों शिक्षा-बिद्याखौ मोजाडै गोसो होनानै सोलोंनो नाजायोब्ला गुबुन हारिफोरनि मोजां गोमोथाउ आखल आखुफोरखो Follow खालामनानै (लानानै) गावनि व्यक्तिगत मोजांनि थाखाय, हारिनि मोजांनि थाखाय दावगालामा (Progressive way) नि फासै गुबुन हारि बायदि आगान सुरलानो नाजायोब्ला सानसे समाव जों बर' हारियाबो जोंनि बर' माहारिखौ मोनसे मुंदांखा माहारिहोन्नानै मुलुगाव मिबथिसार होनो गमा हागोन। बिनिखायनो गोजोआव बुंबोनाय गाज्रि आखल-आखु, हुदा फोरखौ गोसोनिफ्राय एंगारना लानानै लेखा-पढानि फासै गोसो होनानै लेखा फरायना, सान्रो हनो गोरोंगोरा जाना, जोंनि बर' समाजाव सोमजिनाय गाज्रि आखल-आखुफोरखौ फोसाबनो थाखाय, दुलाराय बर' राइजो राजाआनो खौसेनि बान्दो जानानै; दुलाराय बर' राइजो राजानि मोजां मावलांनो थाखाय, दुलाराय आसाम हादोतनि बर' राइजो राजाफोरनि आथिंआव खर' गंग्लायनानै आर'ज गाबहरो। ■

शिक्षानि थांखि, बर' फरायसा आरो बिमा-बिफाफोरनि जाल्ला

—हलि राम बसुमतारी

हलि राम बसुमतारी (1952) : रौता ओन्सोलनि बिथाड सासे गागि लिरगिरि।
थुनलाइ सिबिनायाव बिथांहा मैखोमै आखाइ दंमोन। आथिखालाव बिथाड सासे
आइनजिबि।

शिक्षा माने मा? माखौ शिक्षा होत्राय जायो? बिनि फिन्नाय होनाया गोर्ले
नोड। आरो बिनि बिजिरथि (difinition) होनायाबो गुरै नोड। नाथाय, शिक्षा
होत्राय जिरादा मा, बिनि थांखिया मा जानांगौ, आरो बे शिक्षा होत्राय जिरादा
गैयाब्ला मोनसे माहारिया बोरै गुबुन हारिनि उनाव गोलैसोनानै थानाडे बिखौ
मिथिया एबा सान्नो रौनाया गुबु हारिनि उनाव थानाय माहारिफोरनि जोबोर
गोनां खामानि। मानोना शिक्षायानो सुबुं सोदोमश्रीनि जीउ। जीउ गैयि मोदोमा
जैरे मावनो रोड बे बादिनो शिक्षा होत्राय जिरादा गैयाब्ला मोनसे माहारिया
बुहुमाव सुबुं हिसाबै थांना खानो हाया। शिक्षा होत्राय जिरादा नोडामोनब्ला
दिनै सुबुंमाहारिया सोदोमश्रीनि इफा गोजौआव गाखोनो हानाय नोडामोन। जाय
माहारिया शिक्षा-दिक्षायव गुबुन हारिनि उन बे माहारिया गुबुन हारिजों आगान
सुरफानो हाया आरो बे माहारियानो गुबुन हारिजों मुगै जायो, नेवसि जायो
आरो नाखेबनानै दिनजायो। शिक्षा होत्राय जिराद इफाग्राब मैला थानानैबो बिनि
मैलाखौ दाबो बांसिन बर'आ मिथिजोबाखै। बिनि गुरत्वखौ बांसिनानो मिथिनो
हास्थायखै आरो बिनिखायनो जोंनि बर' माहारिया शिक्षा होत्राय मुंथियाव
बैबो गोसो होसारनानै थार शिक्षाखौ लानो नाजायाखै आरो नाजादोंब्लाबो
बांसिनानो बायदि बायदि हेंथा-हेंथि, जेन्थि-जाल्लानि थाखै देरहानो हायाखै।
शिक्षा होनब्ला जों माखौ मिथिनांगौ। शिक्षानि थांखिया मा। आरो बेफोर
थांखिफोरखौ जों मानो जाफुंहोनो हायाखै; बिफोरखौ गुसुंहै बिजिरनायानो बे
लिरबिदानि थांखि।

शिक्षा माने जों गोथोडै फरायसालियाव थांनानै लिरनाय, फरायनाय, आरो
मोत्रैसो सानखान्थि खालामनाय बिखौनो मिथिगौ। आरो बिनि एसे गुवारै

गोजौनिफ्राय गोजौ फरायसालिफ्राव फरायनानै एम.ए., बि.ए. डिग्री लानायखौनो सात्रा लायो। नाथाय नोडगुबै सोदोबथियाव जों शिक्षा होत्राय जिरादखौ एसे खान्दाहै हमना लानो हाया। गुवार सोदोबथियाव जाय शिक्षाया सुबुंखौ सुबुंहिसाबै "शारीरिक, मानसिक आरो आध्यात्मिक" बिसोरखौ बारस्रांहोनो हायो; जाय शिक्षाया सुबुंहारिखौ सुबुंबादियै थांना थानायनि राहा होयो बिखौनो जों शिक्षा होत्रो हागौ। शिक्षा होत्राय जिरादा सासे मानसिनि सायाव उजिनायनिफ्रायनो आरम्भ जायो। बिनिखायनो शिक्षा आरो जीउ बे मोत्रै जिरादखौ मोत्रैजों मोनसेल' जिरात होनजायो। सासे मानसिनि सायाव उजिनायनिफ्राय थैजासिम अनेक गुरस्लाय फैयो। जेरै गोलैनिफ्राय गथ', गथायनिफ्राय लासैनो सेंग्रा एबा सिख्ला जायो आरो बिनि उनाव लासैनो बोराय लाडे। बिफोरबादि गुबुन गुबुन अवस्थायव सासे मानसिनि गोसो मोदोम जीउआ गुबुन गुबुन रूप लाबोयो। आरो बिदिनो गुबुन गुबुन समाव गुबुन गुबुन आरो गोदान गोदान ज्ञान अभिज्ञता मोनो। बिफोरबादि ज्ञान आरो अभिज्ञतानि नारखे-नुरखेजोंनो थांना थानो सोलोडे आरो थैजासिम सोलि लाडे। बिनिखायनो शिक्षाबिद Dumuille आ बुंदों—"Education in its widest sense inables all influences which act upon the individual during the passage from the cradle to the grave". बिनि मुंथिया जादों गुवार सोदोबथियाव शिक्षा होनब्ला सासे मानसिनि सायाव गोलै उजिनायनिफ्राय सखरसालिसिम अर्थात देरै लाउवै बोरायना थैजासिम गोसो मोदोम जीउ जा बाह्यिक प्रभावा बै मानसिनि सायाव जा खामानि मावओ बेफोर गासैखौबो लाफानानैसो शिक्षा होत्राय जायो। बिदिब्ला जों दा मिथिना मोनो दि सासे मानसिनि जीवाव सासे मानसिहिसाबै संसार जालांनाय समाव जा जा हाबा-हुखा, खामानि-दामानि मावनो गोनां जायो बेफोर गासैजोंबो शिक्षा होत्राय जिरादा हाबना थायो एबा सोमोन्धो थायो। बिनिखायनो महात्मा गान्धीयाबो बुंदों—Education covers the entire field of life. There is nothing in life however small, which is not concern of education". बर'आव बिनि मुंथिया जादों शिक्षा होत्राय जिरादा मनसिनि जीउनि फोथारखौनो साग्लोबना लायो। आरो बिनिखायनो संसार संग्रामनि फिसा-बिला खामानियाबो शिक्षाजों सोम्बोन्दो थायो।

शिक्षाबिद T. Raymont आबो बुंदों : "Education means that process of development in which consists the passage of human

beings from infancy to maturity the process whereby he gradually adapts himself in various ways to his physical, social and spiritual environment". अर्थात् गोलैनिफ्राय बोराइसिम सासे मानसिनि सायाव 'शारीरिक, सामाजिक आरो आध्यात्मिक' जैरै प्रभाव गोलैयो आरो बे सायखंजों बे मानसिया जैरै गावखौनो मिलायना लानानै उन्नति खालामो बे नेमखान्थिखौनो शिक्षा बुंनाय जायो। शिक्षा होत्राय जिरादा मा बेखौ जिस्बिं बिजिरनो थाडे बिसिबानो ओंखारलांबाय थायो। बिफोरखौ बिजिर जोबनाया बे गुसुं लिरबिदाडव गोलै नोड। गोजौवाव बिजिरनाय बिजिरथिफोरनिफ्राय जों शिक्षामाने गुसुडै बिखौनो हमना लायोदि— मुंथिया मानसिनि गोसो-मोदोम, जीउआव हाबना थानाय शारीरिक मानसिक आरो आध्यात्मिकनि गुबै गोहोखौ बारश्रांहोनो' हायो, जाय मुंथिया गोसोनि खोमसि दरसिखौ सोरां जाहोयो, मिथियि बाश्राखौ मिथि होयो; संसारनि दाहायाव देरहानो एबा संसाराव मानसि हिसाबै थांना थानो राहा होयो बिखौनो शिक्षा होत्राय जायो। नाथाय बे खिनियावनो सोंनाय फैयो। माबायदि शिक्षाजों मानसिनि गोसो मोदोम, जीउ हाबना थानाय गुबै गुन आरो शक्तिफोरखौ बारखांहोनो हागोन? मा बायदि शिक्षाजों मानसिनि गोसोनि दरसिखौ होखारनो हागोन? मा बादि शिक्षाखौ लाबोला संसारनि मिथिनोगोनां बाश्राफोरखौ मिथिनो हागोन? आरो मा बादि शिक्षाखौ मोनबोला संसार रोनाव मानसि हिसाबै थांना थानायनि राहाखौ मोनगोन? जोहै बुंनो थाडेब्ला शिक्षानि थांखिया माब्रै जानांगौ? बिनि फिन्नाया फंसेयाव जोबनाय नोड। मानोना, शिक्षानि थांखिया अराइबो मोनसेआनो थानो हाया, हायाखै आरो हानायबो नोड। बिनि थाखैया जादों मानसिनि गोसोआ जैरै सोलाइसुला बे बादिनो सुबुं माहारिनि जीवन-दर्शनाबो सोलाइसुला। सुबुं माहारिनि जीवन दर्शना सोलाइनाय लोगो लोगो शिक्षानि थांखिआबो सोलायो। सुबुं माहारिनि जीवन-दर्शना गुबुन गुबुन जुगाव गुबुन गुबुनै सोलायनायनि गुदिआवनो दं मोनसे समनि गोनां दाबि। जाय दाबिया सुबुं माहारिखौ साबसिननिखुरै साबसिन सुबुं बादिथै थांना थानायनि राहा होनो नागरि। आरो बे राहाखौ मोत्रायनि मिजिं लानानैनो शिक्षानि थांखिखौ मोनसे आदर्शनि गेजेरजों थिख खालामना लायो। नाथाय बे खिनियावनो मोनसे बाश्रा गोसोआव लाखिनो गोनां बिनोदि सम एबा सोदोमश्रीनि फाखनाव गोलैनानै मोनसे देशनि आदर्शआ दस्रा मोनसे देशनि आदर्शजों गोरोबलाया। आरो बिनिखायनो जों शिक्षानि थांखि सोम्बोन्दै गुबुन गुबुन देशनि शिक्षाबिद फोरनिफ्राय गुबुन गुबुन मतामत मोनो। बिफोर मतामतखौ बिजिरनानै बे लिरबिदांखौ फोलावनो लुगैल्या।

गोदो गोदाय सुबुं सोदोमश्रीनि गुदि जांख्लायाव शिक्षानि थांखि होत्राय मोनसे जिराद गैयामोन होनब्लाबो गोरोन्थि जानाय नोड। मानोना बै समाव मिथिंगायानो सुबुंनि फोरोंगिरिमोन। मिथिंगाजों दावहा नांनानै थांना थानायानो बि समनि शिक्षानि थांखिमोन। आरो बै समनि सुबुं माहारिनो जीवन-बोध एबा जीवन दर्शनाबो गेसेब थारमोन। थांना थानो थाखै जानाय जिराद, बार अखा आरो गुसुनिफ्राइ खारग'नो थाखै बंफां बिगुर, बंफां-धन्दर एबा जीव-जुनारनि बिगुर बिखौ मोनोब्लानो जेबो नांल्यामोन। नाथाय, लासैनो सुबुंमाहारिया सोदोमश्रीनि जांख्लायाव गाखोयै गाखोयै मोनसे समाव लिरनाय-फरायनाय जिरादखौ दिहुनो। आरो बे लिरनाय, फरायनाय जिरादखौ दिहुत्राय लोगो लोगो मानसिनि गोसो-गोरबानि अन्जिमायाबो अरनायनिफ्राय अरनो हमबाय आरो सुबुंनि जीवन दर्शनाबो गोख्रैयै बिसिबांबा गुवार जाबोबाय। सोदोमश्रीनि बोलोआव सुबुंमाहारिया लासैनो धर्म, दर्शन, शिल्प, चिकितसा, बिद्या, राव-हारामुद थुनलाय, बायदि बायदि शिक्षाखौ लानानै दिनै गसं फैदों गिलु-बालु नाथाय सोमोनां एटम् बम, एपल'नि गोख्रों गोनोखोनि जुगाव दिनै सुबुंनि शिक्षानि फोथारा बुहुमावल' नौला। हाजार हाजार गोजौवाव थानाय अखाफोरावबो सहैबाय। बिदिब्ला सुबुंनि शिक्षानि थांखिया मा जानांगौ? बिनि फिन्नायखौ शिक्षानि जौसिन जांख्लायाव गाखोनाय माहारिफोरनि सायाव दिन्नानै जौनि भारत हादरनि शिक्षानि बाथ्रायाव थांफिनाया मोजां जासिगोन।

गोदो गोदाय भारतनि मानसिफोरनि जीवन दर्शना दानिखुरै आलगामोन। मोनसे सम दंमोन जाय समाव भारतीय मानसिफ्रा शारीरिक, मानसिक, आध्यात्मिक आरो नैतिक बायदि बायदिनि ज्ञान लानानै सासे गुबै मानसि बादिहै गाव गावनि आधिंसायाव गसंनो हानाय शिक्षाखौ लानो बोलो होयोमोन। लासैनो गुबुन गुबुन सोनाब माहारिफोरनि सोदोमश्रीनि बारमोन्नानै भारतीय जीवन-दर्शना सोलायनो हमो। आरो जेला 16 श शतिकानिफ्राय इउरोपी मानसिफ्रा भारताव हाबफैयो बे समनिफ्राय भारतीय शिक्षा खान्थियाव गोबां गुरस्लाय फैयो। बांसिनै गोनोखोनि शिक्षायानो जायगा मोनो आरो बे गोनोखोनि गुबुन गुबुन दालाय शिक्षाफ्रा भारताव जायगा मोन्नाय लोगो लोगो भारतीय मानसिनि जीवन दर्शनाबो गोख्रैयै सोलायगारो। दानि भारतनि जीवन दर्शना बुहुमुखी। आरो बिनिखायनो भारतीय शिक्षानि थांखियारो बहुमुखी।

बे जुगनि मोनफ्रोमबो देशनि गुदि आरो गिबि शिक्षानि थांखिया जादों लिरनाय, फरायनाय आरो संसार रोनाव सोलिनायाव हिसाब राखिनो थाखै

सानखान्थि सोलोंनाय। बि खिनि गुदि आरो गिबि शिक्षाया गैयाब्ला दानि समाजाव सोलिनाया गोब्राबख्र. मानोना बिखिनि शिक्षायानो जादों गुबुन गुबुन शिक्षा लानायनि नोंगौबै गिबि थाला साबि। जाय देशनि मानसिफ्रा बिखिनि आरो गिबि शिक्षाखौ मोन्नाया खम; बि देशानो गुबुन देशनि उनाव गोलैना थानाडे। बिनिखायनो जोंनि भारताव गुदि फरायसालि नि गेजेरजों जुगनि बे दाबिखौ फुरायनो नाजानाय जायो।

नाथाय, बे गोनोखोनि जुगाव गुबुन गुबुन हादोरजों आगानसुरब्ला नोंखाय लिरनो, फरायनो आरो मोन्नेसो सानखान्थि रोंनायजोंल' सोलिया। बिनिखायनो जोंनि भारतावबो फसंदों हजार हजार स्कुल, कलेज आरो बिश्वबिद्यालय। बिनि अनगायैबो मानसि हिसाबै थांना थानो, जानाय-लोंनाय, गात्राय-जोमनाय बिफोर जाल्लाखौ फुवारनायनि थांखि लानानै फसंनाय जादों खिति, बानिज्यिक, इन्जिनियारि, डाक्टरि, कारिकरि बायदि बायदि शिक्षानुस्थान। बिफोरबादि शिक्षाखौ लानानैनो गुबुन गुबुन हारिया जुगजों आगान सुरदों। होजों गणतान्त्रिक हादोराव बिशेषकै भारतनि राजखान्थिनि फाखनाव सलिनोब्ला मोनसे माहारिया रांखान्थि, राजखान्थि, आरो आइन सोम्बोन्दै गुवार शिक्षा गैयाब्ला एबा मोनाब्ला बे माहारिया जेब्लाबो माहारिहोत्रा थांनो थानो हाया। भारतनि गुबुन गुबुन माहारिया दिनै बिफोर बाश्राखौ मिथिमोन्नानै बिफोरनि थार शिक्षाखौ लानानै गोखैयै दावखोलांनो हमबाय। होजों माहारि बादियै थांना थानोब्ला, मोनसे माहारिनो, गावनि बिमानि राव थुनलाय, हारामुदनि शिक्षा बिफोरनि सा-सुबिधाफोरखौ मोनदों आरो लानो रोंदों, बिफोर माहारियानो जाखानायनि लामाजों आगान सुरलांदों। नाथाय जोबोद दुखुनि बाश्रा, बिफोर बायदि शिक्षाखौ लानानै जों बर'आ भारत होन्नाय मोनसे हादोरआव थानानैनो गुबुन हारिजों आगान सुरफानो हायाखै।

दिनै भारता उदांश्री मोन्नाया 25 बोसोर बारलांबाय। बे 25 बोसोरनि गेजेराव बर'फोरहा मा उन्नति जाखो, मा उन्नति खालामखो आरो शिक्षानि लामायाव बिसिबां आगान सुरखो। बिफोरनि हिसाब लायोब्ला जोंहा दुखुजों बिखा गावनो नागिरो बर'फ्रा दाबो दानि जुगाव सोलिनो थाखै गुबै शिक्षा फोरखौ लानो रोडाखै। आसामनि बाहेरनि बर' फोरनि बाश्राखौ बुंफानो थालिया। जोंनि आसामनि सीमा मोनब्रैनि बर'फोरनि बाश्राखौनो बिजिरना नायजायो? जों आसामनि जारिमिन बोरलाना नायब्ला नुयो दि बर'आनो जुग जुग सिगां निफ्राय राइजो जाबोनाय आसामनि मुंदाखा गुबै माहारि। नाथाय

जारिमिननि मुं दांखा माहारिया शिक्षा-दीक्षानि मुंथिआव मानो इफाग्राब उनफित्रा थाखो? जोंनिनो गुस्थिसेनि नागा, खासीया, मिजु बिफोरजोंनो जों मानो आगान सुरफानो हायाखै? बिफोरनि गुबै थांखिखौ बिजिरना नायनानै थांना थानायनि लामाखौ लानाया जोबोर गोनां जाबोबाय।

बर 'फ्रा शिक्षा दीक्षाजों गुबुन हारिनि उनाव थालांनायनि (क) राजखान्थि, (ख) रांखान्थि (ग) समाज खान्थि आरो (घ) नखर खान्थि बायदिसिना थाखै दं। आरो बिफोर बर' बिमा-बिफा आरो फरायसाफोरनि शिक्षानि लामायाव जेनिबो जाल्ला जानानै गसंथेना दं। बिफोरखौ गाहायाव गुसुं गुसुडै बिजिरनाय जाबाय।

क) राजखान्थि :

सोरबा सासे राजखान्थि गिरिया बुंलांदोंदि राजखान्थि जिरादआ बुर्जा बिसाननि मानसिआ खम बिसाननि मानसिफोरनि सायाव शासन खालामनाय नेम खान्थिल'। बियो राजखान्थिनि बिजिरथि जानो हायाब्लाबो दानि राइजो खुंनाय फारियाव बे व्यबस्थाखौनो नुनो मोनो। दिनै भारतनि राजखान्थिनि नेम-खान्थियावबो खम बिसाननि एबा अनुन्नत माहारिफोरखौ नाखेबनायसो जादों। मानोना खम बिसाननि एबा उनाव थानांनाय माहारिफ्रा गाव गावनि राव थुनलाय, हारिमु सिबिनायाव आरो बिमानि रावजों शिक्षालानायनि लामायाव जोबोद हेंथा मोनबोदों। दिनै आसामाव बर' माहारिया राजखान्थिनि फाखनाव गोलैनानै गाव गावनि राव थुनलाय सिबिनायाव आरो बिमानि रावजों शिक्षा लानायाव मात्रै हेंथा मोनबोदों बेखौ बैबो मिथिगौ। भारता उदांश्री मोन्नाय लोगो लोगोनो बिमानि रावजों शिक्षा लानो खाबु मोन्नाय मोनब्ला दिनै बर'नि अबस्थाया बेबादि जानाय नोडमोन।

ख) रांखान्थि :

आसामाव बर'फ्रा शिक्षानि लामायाव गुबुन हारिजों आगान सुरफानो हायिनि मोनसे गोगोम हेंथाया जादों रांखान्थिनि गात्रि अवस्था। रां-रुफानि आंखालावनो जोंनि बर' बिमा बिफाफोरा मेलेम गोनां फरायसा गथ 'फोरखौबो एसे फरायहोनानै गार गारहोनांगौ जायो। बेबादिनो बिसिबां मेलेम गोनां बर' फरायसायादि गोजौ शिक्षा लानायनि मिजिंखौनो ज्राब गारनांदों आरो गोबोंसे हांमा लानानै गोरिब खेतियक जीवन लानांदों बेखौ बांसिन बर'आनो मिथिगौ। दिनै जों नुनो मोनोदि जा सासे बर' फरायसा सुंखै बानलुजों ओंखाम जानानै

फरायनानैब्लाबो मेट्रिकनि देउनाखौ बारो, बिसोरखौ रां रुफानि आंखालावनो गोजौ शिक्षा लानायनि मिजिंखौ गारनाडे। होमब्ला जॉनि गेजेरनिफ्राय बोरै गिदिर गिदिर शिक्षाबिद, दार्शनिक, कबि साहित्यिक, राजनीतिबिद, डाक्टर, उकील, इन्जिनियार अंखारनो हानांगौ? बिनिखायनो बिजिरना नुनो मोनोदि रांखान्थिनि गात्रि अबस्थाया बर' माहारिनि शिक्षानि लामानि मोनसे गोनां हेंथा।

ग) समाजखान्थि :

शिक्षा लानायनि लामायाव हेंथा बादियै जॉनि समाजखान्थिनि नेम खान्थिखौबो मोनसे हमजायो। सासे मानसिया जा समाजाव थानानै देरो लावओ, बे मानसिया समाजनि नेम खान्थिजॉनो सोलिनो लुगैओ। बर' गामिफोराव गिदिं गिदिं नायथिंब्ला बांसिन गामिखौनो नुनो मोनो बोरै बर'आ दाबो गोदोनि जुगनि primitive age जॉनि गिबि सुबुंसायफोरबादि सोलिगासिनो दं। दाबो बर'आ मदाय दावराय, भूत-खुबेर, देब-देबी बिश्वास खालामो आरो बिफोरखौ फुजियो आरो बिफोरखौ फुजिनायाव नांगौ जायो जिदौहै जिदौ जुमाय। अखा नाइब्लानो अजा बाइलंनि मेल। जुमाय आरो जुमाय। आरो नुनो मोनो मोनसेल' खामानि बेनो जादों नांगोल खेंखाजों हाल एवनानै मावै दाडै जानाय। सान हाबदों सोरांदों; दिना बारलांदों हाप्ताहनिफ्राय दान, दाननिफ्राय बोसोर। थेवबो बे मोनसेल' खामानि अखानायबाथाय हाल एवनाय। माइ-दै मोनब्लाथ' खुसिसै जेबो नांला। सेंग्रा गोलै दंब्ला सिख्ला गोलैजों हाबा खालामना होबाय। होजों जानो दंना गैया खबर गैया। नांगौथाय हाबानि उनाव बिसि बिसाय दाहोना रुवाथि थागोन। थेवबो हाबाया जाप्रोगोन। जुग गोदाननि दुंहाव दुंहाव बारि मोदोमाव नांदों थेवबो गुरस्लायनो नागिराखै। दाबो बर' बिमा बिफाफोरा गथ' गथायखौ फरायसालियाव हगार हरा। हगारथाबोब्लाबो बोसोरनैल'। बिनिफ्रायनो थुंगेबाय। जाय सासे फरायो बिसोरबो ससेआवनो ज्राब गारनानै गामिनि जौ-देबता, दाबखा एमफौ जाना थायो। बेबादिनो आदा खिश्रा फरायना एसे बाबु जाफ्रामना गामिनि राइजोनि हाथाइनि चु जाना थानाय नुयो। जायनि थाखै शिक्षा गैयि बिमा बिफाफ्रा बिफोर आखलखौ नुनानै शिक्षा होत्राय जिदादखौ फिसा फिसौ लाहोनो बायो। मानसिआ परिबेसनि गोलाम। बेफोरबादि समाजनि परिबेसाव थानानै बोरै शिक्षा दीक्षायव आवगायनो हानो बिखौ औरैनो हमनो हायो। बेसर बेगरा मोजांब्लाबो जेरै हा मोजां मोनियाव एबा हासार गैयिआव जानो हाया बेबादिनो मोजां मेलेमनि गथ' ब्लाबो बेफोरबादि परिबेसनि नारसित्रायावबो जॉनि बर' गथफ्रा शिक्षानि लामायाव इनायनो हेंथा मोन।

घ) नखरखान्थि :

नखर खान्थिया समाज खान्थिनि मोनसे अंश। नखरनि परिबेसाबो शिक्षा लानायनि फारिआव गोबां बिबान गोग्लैयो। मानोना सासे मानसिनि शिक्षाया ननिफ्रायनो जाजेनो। जाय नखराव शिक्षा गोनां मानसि थायो, जायनाव सानफ्रोमबो शिक्षा-दीक्षा, मोजां ज्ञान आखल लानायनि बाथ्रा सावरायबाय थायो, बै नखरनि गथ'-गथायफ्राबो शिक्षा-दीक्षाआव आवगायनो हायो। जाय नखराव अरायबो जौनि जुथुमा जयो, नांलाय खोमलायनायनि बहरा जायो, बे नखरनिफ्राय फरायनायाव मोजां गथ' अंखारनाया जोबोद गोब्राब जायो। जौनि बर' गामि फोरनि नखरनि परिबश फ्राबो शिक्षानि बेरेखा। बांसिन नखरावनो गथ' गथायफ्रा फरायनायनि टेबुल सियारनि आरो आलगा ख'थानिथ' खाबु मोनथारानोसै बिनि अनगायैबो सानफ्रोमबो नांलाय खमलाय, गाबलाय खुलाय, आलासि-उलासि आरो जौनि जुथुमानि दाउरावजोंनो फरायनो हाया। बेबादिनो नखरनि गात्रि परिबेसाबो जौनि गथ'फोरखौ शिक्षा लानाय लामायाव हेंथा होयो।

गोजौयाव बिजिरनाय बाथ्राफोरजों जों मिथिना मोनबाय दि बर' फरायसा आरो बिमा-बिफाफ्रा शिक्षा लानाय फोरआव माब्रै हेंथा मोत्रांगो जायो। बैफोरनि अनगायैबो बिमा-बिफा आरो फरायसाफ्रा गावबा गावनो माखासे हेंथा दिहुत्रा लायो। जैरै जौनि माखासे बर' बिमाफ्रा रां-राहा थाब्लानो फिसा-फिसौखौ फरायनायनिफ्राय ज्राब गारहोना थाबनो हाबा खालामनानै संसारनि जेथोआव सरसोमना होयो। बे बादिनो बिमा-बिफानि गोरोन्थिआवबो माखासे फरायसाया थार शिक्षाखौ लानो हाया। होजों जौनि फरायसाया फोरनायावबो जोबोद गोरोन्थि दं। दानि फरायसाफ्रा बांसिनानो गोसो-मोदाम होसारना फरायबाड। आरो बिनिखायनो आन्जाद फोरावबो सौथुनांगौ जायो। बि बादिनो फरायसाफ्राबो गावबा गावनो शिक्षानि लामायाव जेउरा दुमथेना लायो। फरायनाय खामानिया ओंखाम जानाय बादि जानांगौ। जैरै फुं-मोना ओंखाम जानानैसो मानसिआ लासैनो देरो-लाववो, बे बादिनो सानफ्रोमबो इफा इफा फरायनाय हुदाखौ राखिब्लासो शिक्षा होत्राय जिरादखौ लानो हायो। जाय फरायसाय बेखौ सान्नानै सानफ्रोमबो फरायो बे फरायसानि जीवनाव फेइल होत्राय जिरादा सफैआ। दिनै बर' फरायसा आरो बर' बिमा-बिफानाव मुगा अरनि आन्जाद लानो नागिरदों। बे आन्जादाव देरहानोब्ला बिमा-बिफा आरो फरायसा खौसे जानानै थार शिक्षा लानायाव गोसो होनांसिगोन।

गोजौआव बुंबोनाय जादों दि दिनै जुगा सोलायथारबाय। दिनैनि जुगा जोबोत जेथो जाल्लानि जुग। सुबुंजों सुबुं बादायलायनाय जुग। बे जेथो जाल्लानि जुगाव मोनसे माहारिया माहारि बादियै थांना थानोब्ला थों थों मोनसेल' शिक्षानो थांना थाहोनो हाया। दिनैनि बहुमुखि शिक्षानि जुगाव लेखा-फाथर फरायनायजोंल' जेबो जालिया। बिनि अनगायैबो कारिकरि शिक्षा जैरै मिस्त्रि, सोनारि, दर्जि, बायदि बायदि जिरादिनि फेक्टरिनि हाबा; मटर मेकानिक, घड़ी मेकानिक, रेडिअ' मेकानिक, इलेक्ट्रिसियान बेफोरबादि टेकनिकेल शिक्षा; फोरोंगिरिनिफ्राय लानानै डाक्तरी, आइन (बेपार) फालांगिनि शिक्षा बेफोर गासैखौबो लानांगौ जाबाय। जाय शिक्षाखौ लायोब्ला जोंहा रांखान्थिनि जेथोआ गुरै जानायनि राहा थायो बिफोर शिक्षाखौ लानो जेब्लाबो बोलो होनांगौ। ओम्बासो सानसे औरैबादि सम सफैगोन जेला जोंनि गेजेरावबो 'फरमेल इडुकेसन' अर्थात गोजौ फरायसालि, भूम फरायसालि बायदि बायदि शिक्षानि खुलियाव फरायसानि बिसाना बारायगोन आरो ओम्बासो जोंनि गेजेरावबो गिदिर गिदिर शिक्षाबिद, राजखान्थिगिरि, रांखान्थिगिरि, दार्शनिक, खन्थायगिरि, थुनलायगिरि, खनगिरि, लिरगिरिफोरनि जोनोम जागोन। आरो होम्ब्लासो जों मोनसे माहारि बादियै गसंना गुबुन हारिजों बादायलायनो हागोन आरो बे बादिनो जुगजों आगान सुरनानै गुरै सुबुं बादियै बहुमाव थांना थानो हागोन। जोंनि बर' माहारिया बे समखौ सानसे मोनगोनआ गोब्राब नोड। बिनि थाखै नांगोन जोंनि गोसो मोदोमनि हास्थायनाय, ब्रा ब्रा नाजाथारनाय आरो गोख्रों खिरा। जीउआनो बोरलांथों थेवबो गोसोनि सात्राया जाफुंथों; बेफोरबादि खिरा लानानै जाय जैरै हायो गुबै आरो गोनां शिक्षाफोरखौ लानो थाखै हाजार हाजार फरायसाफ्रा हास्थायोब्ला जों थाबैनो बै दिनखौ नुनो मोनगोन। ■

थांनाइ नैजिबा बोसोर बर' राव थुनलाइयाव रौतानि भान्डारि

—तीरेन बर'

तीरेन बर' (1951) : रौतायाव बिथानि जोनोम। बिथाडा सासे गागि सल 'मागिरि आरो रायथाइगिरि। 'बिग्राय आरो दैप्राय' सल 'मा बिजाबनि थाखाय बर' थुनलाइ आफादनिफ्राय 'समेश्वरी बान्था' मोनबाय।

जेब्ला कोकराझारनि बर'फ्रा गावखौ सिनाइथि होनो बर' राव थुनलाइखो गाइसन्नो थाखाय नाजागासिनो दडमोन होम्बा बे समावबो दरं आरो बाइदि दिहिंनि बर'फ्रा उन्दुहाबनानै दडमोन। बै समाव खोनादोंमोन कोकराझारनि बर'फ्रा बर'रावजों फरायसालियाव फरायबाय। बे बाश्राया दरंनि बर'फोरनि मोदोमावबो नांफैनायसै नाथाय बै समाव बे मुंथियाव दैदेन लांनो थाखाय दैदेन गिरिनि जोबोरैनो आंखालमोन।

1967 मायथाय। रुंसारी बिहुराम बर'आ होम्बा भरतपारानिफ्राय फोरोंगिरि साखिखौ नागारनानै रौता सारिआलि हाइस्कूलआव फोरोंगिरि जाफैदोंमोन। बे समाव होम्बा रौता दिहिंनि बर'फ्राबो असमीयाफोरनि असमीयाकरण जे साना नांहां नांहां जाबायमोन। बालिसिया, माधब ग'हाइ गामिफोराव गावनि धोरोमखौ नागारनानै नामघराव नाग्रा द'ल दामग्रा जाबायमोन। बिहुराम बर'आ गावनि न' रौतायाव फैनानै उन्दुहाबनाय बर'फोरखौ फोजाखांनो खिरा जायो। बे समनि रौता सारिआलि हाइस्कूलनि फरायसा मुश्री जिगासरण ब्रह्म, मुश्री महन्त कुमार ब्रह्म आरो आं मुश्री तीरेन बर' माखासे फरायसा सेंग्रा फोरखौ लानानै बर'राव थुनलाइनि हाबा मावनो जान्जि खाफ्रानायसै। सानसेखालि आंनि सासे लोगोआ आंखौ बुंबाय—नोंखौ अमुक सारआ लिरहरदों। माबा हाबा दडनो। अखानायै आं लोगोफोरजों ज'यै बिथानि खाथिसिम थांनायसै। बिहुराम सारआ गांसे गोमो सि फुवारना दिन्थिनानै बेव बर' थुनलाइ आफादनि सिम्बलखौ म'हर होनो बुजाय आजाय थिनो। होम्बा बर' थुनलाइ आफादनि सिम्बलआ मा बेखौ रावबो मोजांहे मिथियामोन। आन्दाजजोंनो गावबो आखिफ्रामना दिन्थिना बेखौनो

मोजाडै देलाय होनो बिथोन होयो। सात्रैसोनि उनाव आंबो बिथां थिन्नाय बादियैनो आखिना हैनायसै।

रौता सारिआलियाव बर' मैखोम थावनिब्लाबो बर' राइजोआ बेव दान्दिसे जथुमनानै सावराइलाइनांगौ जायोब्ला मुश्री जिगासरण ब्रह्मनि नआव जनानैसो सावराइनांगौ जायोमोन।

1967 माइथायनि 16 नबेम्बरखालि भालुकमारि गुदि फरायसालियाव थुनलाइ आफादनि जोनोम सानखौ खुंनायजों लोगोसे रौता दालाइ बर' थुनलाइ आफादखौबो दानाय जायो। ऐसानखालि गेवलां मेलनि आफादगिरिया नगेन मोसाहारि। बिहुराम बर', मुश्री जिगासरण ब्रह्मखौ फारियै आफातगिरि आरो नेहाथारि बिबान होयो। बिहुराम बर'आ थांफिहांनाय बर' राव थुनलाइनि सोमोन्दै गुवारै बेखेवनानै होयो बिनो रौता दिहिडव बर' थुनलाइनि मुंथियै गिबि सावराय जेन्नाय आफाद।

रौतायाव दालाइ बर' थुनलाइ आफाद दानानै बर' रावखौ गुदि फरायसालियाव सोसत्रो गुवार हाबाफारि आखायाव लाबाय। दरं जिलानि मादाव आगोल बर' राव थुनलाइनि थाखाय जांखि खांदोंमोन रौतायावनो। बिनिफ्रायसो दुलाराय दरं जिलायाव फारि फारि गोसार जोबनो हमनायसै। बे मुंथियाव रौतानि फरायसाफोरनि गोहोमआ मख'थावना। बिनिखायनो रौताखौ दरंनि "सान" होन्नानै बुंनो हायो। रौतानि फरायसा मावथिफ्रा ठेकियाजुलिसिम गोहोम खोखलैदोंमोन।

1973/74 माइथायावनो दरं जिल्लायाव गुदि फरायसालियाव बर' रावखौ सोखन जोबनाय जादोंमोन। आगोलगौमानि बे खामानियाव रौतानि मावथि हान्जाया इसे आख'फाख'आव गोग्लै दोंमोन। गोबां गामिनि राइजो आरो फोरोंगुरुफोरा बर' रावखौ फारायसालियाव सोसत्रो बादबदोंमोन। सरकारनिफ्राय थोंजों बिथोन मोनालासिनो सोखनब्ला माबा हेंथा सफैगोनखोमा होन्नानै हेंथा होदोंमोन। गोबाडनो नैबे अजदखौ दिन्थिदोंमोन मा, बर' रावखौ सोलोंनानै मा मुलाम्फा जानो। गथ'फ्रा असमीया राव रौनाय नड। साखि मोन्नाय नड। बेफोर आरि आरि माखासे खोमसि फोथाइनाया राइजोफोरनि गोसोआव बाहा लानानै दडमोन। खायफा फोरोंगुरुफ्रा गिदोंमोन मा, बर' रावखौ फोरोंब्ला साखि दानजागोन आरो नडब्ला बेथन मोन्नाय नड। भालुकमारि ज'गल गुदि फरायसालिनि फोरोंगुरु मुश्री नगेन्द्र नार्जारिया गावनि फरायसालियाव बर' राव

सोखननो बाजादोंमोन। रौता गुदि बर' थुनलाइ आफादआ बिथांनि फरायसालियाव बर' राव थिसत्रो थोननायाव बिथाड गनायनो नागिराखैमोन। सानसेखालि^० बिहुराम बर' आरो माखासे फरायसाफ्रा आफाद खुंनानै नासोंमनायावसो बिथाड बर' राव फोरोंनो राजि जायो 2 नं जाहारगामि, आइथानझार, बालिसिया गामियाव आगोल बर' रावखौ सोखत्राय जादोंमोन।

रुंसारि बिहुराम बर'नि दैदेत्रायाव आरो रौता सारिआलि हाइस्कुलनि बर' फरायसाफ्रा सान्दुं थिखा थिखि अखा-बांखा साइकेल दाब्राइदाव दाब्राइदाव रौता दिहिंनि उन्दुगादुरि बर' राइजोफोरखौ फोजाखांनो नाजानाया इसिल' गोब्राम बाथ्रा नडामोन। गोबां दुखु दाहा सहायनानै गाव गावनि बेसेन बहा बुब्लिखौ खहा खालामनानैबो बिमा राव थुनलाइखौ जौगाहोनायाव रौतानि माखासे फरायसा फरायसुलिफ्रा आगानसे फासया खैमोन। रौता दालाइ बर' थुनलाइ आफादखौ दानाया दिनैसिम नैजिबा बोसोर बैसो जाबाय। बे नैजिबा बोसोर गोलाव बुब्लियाव रौता गुदि बर' थुनलाइ आफादआ बर' राव थुनलायाव मा मा भान्डारि होनो हाखो एबा होगासिनो दड बेखौ सावरायलायनायनि सम सौफैदों। बे नंगौ दि थुनलाइ आफाद दाखांनाय लोगो लोगो रौतायाव राव थुनलाइ जौगानाय हाबाफारिजों लोगोसे हारिमु, रांखान्थि, समाजखान्थि फारफ्रोमथिंबो जौगालांनो हमदोंमोन।

1967 माइथायावनो रौता बर' फरायसा आफादनि दैदेत्रायाव "शिजौ" मुंनि गांसे बोसोरारि सानलाइ लाइसि दिहुनो। "शिजौ" लाइसिनि गिबि सुजुगिरिआ जादों फारियै मुश्री महन्त कुमार ब्रह्म आरो आं मुश्री तीरेन बर'। मखथावना बाथ्रा दि बे "शिजौ" लाइसियानो दरं जिल्लानि मादाव आगोल नुजाजेत्राय लाइसि। दरं जिल्लानि उन्दुहाबनानै थानाय बर' राइजोखौ बर' राव-थुनलाइ सिबिनो थुलुंगा होजेत्राय लाइसि। नाथाय दरं जिल्लानि गिबिसिन बे लाइसिखौ गोबाव बोसोर दिहुत्राय नुनो मोनाखिसै। जिसेगां बिसान ओंखारनायनि उनाव नुजायाखिसै।

हाग्रानि बिबारआ हाग्राबारियावनो बारगारनानै सिरिगारलांनाय बादि रौतानि बर'फ्राबो गावनि सिथुलायावनो बारनाय बिबारनि समायना आरो मोदोमनायखौ लानो रोडखैमोन। बिबार मुगानि खन्थायगिरि रुंसारि क्षितिस भूषण ब्रह्मआ रौतानि दैगला गामियाव जिरायनानै सिरियै बर' राव थुनलाइखौ सिबिबाय थादोंमोन। बै समआव रौतानि उन्दुहाबनाय बर' राइजोआ बे खन्थाइगिरिनि मुंथियै जेबोखोनो मिथियामोन। बाथौ गिथाल, बाथ्रा दांखा बिलाइ खोलि

दानसिनाय हाबाफारि, आदि बाथौ धम्मर तत्त बेफोर बेसेन बहरा बिजाब बिथाड बर' राव थुनलायाव भान्डारि होलांदों। 90 बोसोर बैसोयाव बे गामियावनो बे गेदेमा थुनलायगिरिया सिरियै थैलांबाय।

“शिजौ” लाइसिया रौतानि बर'फोरखौ बर' राव थुनलाइ सिबिनो थुलुंगा होदोंमोन। गोदान जांखिखांनाय लाबोदों मोन। रौता दिहिंनि लिरगिरिफ्रा लिरनायनि सोलाइबो बर'राव थुनलाइनि माखासे गागि लिरगिरि मुश्री मन'रन्जन लाहारी मुश्री ब्रजेन कुमार ब्रह्म, मुश्री गिरिन्द्र ब्रह्म दैमारि, बिहुराम बर' मोन बादि थुनलाइ गिरिफ्राबो “शिजौ”नि गेजेरजों लिरनानै बर' राव थुनलाइखौ सिबिदोंमोन।

1975 माइथायाव मुश्री जिगासरण ब्रह्म सुजुनाइ “आर'ज” (खन्थाइ) आरो “राडिरदे” (खन्थाइ-मेथाइ) गांनै बिजाब ओंखारो। बिनो रौतानिफ्राय नैथि खेब सेबखांनाय महरआव बिजाब ओंखारनाय। बे बिजाब गांनैया बै बुब्लियाव माखासे बर' फोरखौ राव थुनलाइ सिबिनो ओंखार गोदान फोरनि गेजेरआव हाजासे गोहोम खोखलैनो हादोंमोन आरो थुलुंगा मोनदोंमोन। रौतायाव राव थुनलाय जांखिखांनायजों लोगोसे फावथिना सोमावसारनायाबो लोगोसेनो जादोंमोन। फावथिना लिरनानै बेखौ दिन्थि सालियाव दिन्थिनानै बिनि गेजेरजों राइजोखौ फोजाखांनायनि गुवार हाबाफारि आखायाव लादोंमोन। मुश्री सुकलाल ब्रह्मनि 'राहा' दिनैनि दखरसे खोमसि जोम, मुश्री जिगासरण ब्रह्मनि 'बिबायारिनि हान' नोंसोर फाग्ला एरनायनिखुरै बिलिरनाया गाहामसिन', मुश्री महन्त कुमार ब्रह्मनि 'आसथाम' 'आलारि' मुश्री बिजेन ब्रह्मनि बाइगरनि साजा, राहाया मा, गोथार जुलिनि लाइजाम, हांमा मिजिंक मुश्री रामेश्वर ब्रह्मनि—तालिम, बेफोर फावथाइफोरा बै समाव हाजासे जांखिखांनाय लाबोनो हादोंमोन।

बिहुराम बर', मुश्री तीरेन बर', मुश्री जिगासरण ब्रह्मनि दैदेननायाव “रौता आदि बासि कला परिसद” मुडै मोनसे हारिमु आफाद दानानै दिहिडव हारिमु जांखिथायनि दोहोड लाबोनो नाजादोंमोन। मुश्री बिरेन ब्रह्म, मुश्री महन्त कुमार ब्रह्म, मुश्री बिपिन ब्रह्म, मोनहा मेथाइ देंखोनि गेजेरजों माहारि बर' आखु सात्राय सोमजि होदोंमोन मुश्री तीरेन बर', मुश्री रबिराम ब्रह्म मोनहा सावगारि एरखांनानै बिनि गेजेरजोंनो माहारि जांखिखांनाय लाबोदों। कार्तुनिस्त बादियै मिथिजानाय मुश्री तीरेन बर'आ बर' फराय बिजाबफ्रावबो सावगारि एरखांदों। बिथांआ लिरनायनि सोलाइनो बायदि लाइसि आरो रादाब बिलाइफ्राव

सम सम कार्तुन सावगारि आखिबाय थायो। मुश्री रबिराम ब्रह्मआ पाटना आरो बर'दा निफ्राय 'आर्ट' मुंथियाव गोजौ सोलोंथाइ लानानै फैबाय। उदालगुरियाव 'आर्टिज भिलेज' गाइसन्नानै दासान्दि बिथांआ आर्टजों जांखिथाय लाबोनो नाजागासिनो दड।

दरंआव बर' रावखौ सखनखानायनि उनाव गुदि फरायसालिनि फरायसा-फरायसुलि फोरनि गोरोबनाय फराय बिजाब जोबोर आंखालमोन। मुश्री मगेन्द्र नार्जारीया गुदि फरायसालिनि सोलोंथाइजों गोरोबनाय गोबां बिजाब लिरनानै बे आंखालखौ सुफुंदोंमोन। दासान्दि बिथाड फोरोंगिरिनिफ्राइ जिरायबाय। फोरोंगिरि जानानै थानाय बहरआवनो बिथाड फराय बिजाब लिरनानै बर' थुनलाइआव गोबां भान्डारि होलांबाय। फोरोंगिरि बहरआवनो बिथाड फोरोंगिरि आफादआव बाइदि गिलोर बिबानबो बानस'ना थादोंमोन।

1984 माइथायाव थुनलाइगिरि रुंसारि बिहुराम बर'आ बाथौ धोरोम बिजाब "गिबिबिथाय" लिरनानै दिहुनयो। बे माइथायाव बाथौ धोरोमनि सोमोनदै सुंद'थै बिजिरनाय आसारबा' खौबो बिथाडनो लिरनानै दिहुनयो। गोबाव सम बाथौ धोरोमारिफोरनि गेजेरआव बाथौनि मुंथियै गोथौ धोरोम तत् लिरनाय बिजाब इनाइनो आंखालमोन। बर'नि गिबि धोरोमआ बाथौ। गोजाम धोरोम बे धोरोमआ गोदान मह'र होनानै फोसावनायनि आंखालआव बे धोरोमखौ गोथै लामाथिं गाश्रोदना दोनहर बायमोन। मिरौ जिरौ थैहां-बरहां बाथौ धोरोमखौ गोदानयै फोसाबनानै बर'फोरनि गेजेरआव फोसाव फिननो माखासे सानसुमै बर'आ नाजादोंमोन। नाथाय होनब्लाबो बे धोरोमखौ बयनिबो आजावथावना खालामनो हायाखैमोन बारायै बे धोरोमनि मुंथियै गांसेबो गद बिजाब गैयैयाव गोदान बर' फोरनि गेजेरआव गुवारै गोसारनो हायाखैमोन। बयनिबो आजावथावना जायाखैब्लाबो 'गिबि बिथाय' आ गोदान बर' फोरनि गेजेरआव गोदानयै गोहोम खोखलै फिन्नोहादों होन्नानै बुंनागोन। दरं जिल्ला याव दिनै बाथौ धोरोमआ गुवारयै गोसार फिन्नो हमनाया बिनिनो गोहोम। "गिबि बिथाय" नि नैथि खोन्दो "गोदान बिथाय" आ लिरखानाय जायैनो गोग्लैना दड होन्नानै मिथिना मोन्दों बाथौ धोरोमसुला बर'फ्रा बनि पान्दुलिपिखौ फोसावनो आखायाव लाबोला बियो बाथौ धोरोमनि गिदिर धोन जागोन।

1972 माइथायाव^० बिहुराम बर'नि सुजुनायाव बर' रावजों 'बनजार' सानस्नि याहि रादाब बिलाइ ओंखारो। 'बनजार'आनो बर'रावनि आगोल रेजिस्टार्ट रादाब बिलाइ। 'बनजार' खौ गोदान बर' थुनलाइनि दरखं होन्नानै

बुनांगोन। ॐ बिहु राम बर'नि नाजानायावनो उदालगुरियाव 'बानासुर प्रेस' (क'अपारेटिभ स'साइटि) गायसन्नाय जायो। बनजार रादाब बिलाइआ बर'फोरनि सोथाइबो गुबुन गुबुन रावआरि फोरनि गेजेरआवबो थोजासे गोहोम खोख्लैनो हादोंमोन।

बर'राव थुनलाइ जौगनाइनि खामानियाव थाबायथिंनानाइनि रौता सारिआलि हाइस्कुलनिफ्राय ॐ बिहु राम बर'खौ स्कुल मेनेजिं कमिटिया फोरोंगिरि साख्रिनिफ्राय होखारबाय। बे बाथ्राया सैथोदि रौता सारिआलि हाइस्कुलखौ फसंनायाव रौता दिहिंनि बर' राइजोनिबो गोबां भान्डारि दड्मोन। नाथाय बिहारु असमीयाफ्रा बे फरायसालिनि मुंखौ दन्दधर चहरीया मुडैसो मुंख'बाय। बे फरायसालिनि बिहारु असमीया दैदेनगिरिफ्रा बर' रावखौ गेजेर खलबआव थिसन्नो होआखैमोन। बिनि खायनो असमीया बिहारु फोरनि सायाव बर'फ्रा दिउ दिउ रागा जोंसोगारासै। बिहुराम बर'खौ साख्रिनिफ्राय होखारनाय आरो बर'रावखौ बे फरायसालियाव थिसन्नो होयैनि थाखाय बर' राइजोफ्रा दानि 'जयभद्र हागजेर मेमरियेल हाइस्कुल' खौ 1976 माइथायाव गायसननायसै।

1987 माइथायाव आं मुश्री तीरेन बर' नि सुजुनायाव दानथामारि हारिमु लाइसि 'जोंनि हारिमु' ओंखारो। बे लाइसिखौ देबनागिरि हांखोजों सेबखानाय जादोंमोन। 'जोंनि हारिमु'आ बर' रावनि आगोल फोसावजेन्नाय हारिमु लाइसि। बिनि गिबि बिसानखौ जोहोलाव नीलेश्वर ब्रह्म गोनां बिसान महरयै दिहुन्नाय जादोंमोन। बे लाइसियाव सल', सावगारि कार्टुन, बर' मेथाइ देंखो, सिनेमानि मुंथियै गुवारै फोसावनाय जादोंमोन।

हारिमा थामोनथा रैखान्थिनि सोमावसारनाय जाइखिजाया बारहुंखायानो रौतानि बर'फोरनि खर' साजों बारलां गासिनो थादों। बबेबा बबेबा समनि बारहुंखाया रौतानि खर' सागों गाज्रि रोखोमै बिलिरलांदों। बर' रावखौ थिसन्नाय, हांखौ सोमावसारनाय, बै समनि उदयाचल आर्जिनाय आरो नै दानि एबसुनि दैदेननायाव "बड'लेण्ड" आर्जिनानै सोमावसारनाय बेफोर खेबफ्रोमबो सोमाव सारनाइनि बारहुंखाया रौतानि साजों बाइदि बुब्बियाव बाइदि रोखोमयै बारलादों। थेवबो रौतानि बर' राइजोआ थोंगोरयै गसंनानैनो दंगासिनो दड्। माब्लाबाफोरबो गेजेन जानानै खर' गंग्लायनाडसै।

बर' माहारिनि थामोन्दा रैखाथिनि अलखद बुब्बियाव रौताआ बाइदि फसंथाननि गोखों दैदेनगिरि होनो हानाया रौता दिहिंनि बर' फोरनि थाखाइ

देदगानांगौनि बाथ्रा। रुंसारि बिहुराम बर'आ थुनलाइनि नेहाथारि बादि गिलोर बिबान बानस'नानै दडमोन। गोबाव सम नेहाथारि बिबानआव थानानै बिथाड बर' राव थुनलाइआव गोबां भान्डारी होलांबाय। मुश्री करेन्द्र बसुमतारीआ गोबाव सम एबसु (ABSU) नि आफादगिरि आरो सुबुरन्थाइगिरि बिबान बानस'नानै बे सेंग्रा गोहोखौ गोखोडै दैदेनलांबाय। मुश्री रबिराम ब्रह्म, मुश्री महेस्वर बसुमतारीया दासिमबो एबसुनि गिलोर बिबानआव थानानै दैदेनलांगासिनो दड।

1987 माइथायाव बड'लेण्ड सोमावसारनायनि नैथि आरो थामथि मुंख्लं आलेन्द्र बसुमतारी आरो मुंख्लं कबिराम बसुमतारीनि सुंद' जिउ खौरां (Life Sketch) 'लाइलांफारिनि थै' आरो 1990 माइथायाव रौतानि गासिबो मुंख्लंफोरनि सुंद' जिउ खौरां 'थैनि जाइख्लं'आ मुश्री तीरेन बर'आ लिरनानै दिहुनो। हरिसिडानि मुंख्लं टंकेश्वर बर'नि जिउ खौरां खौबो आंनो लिरनानै दिहुनदोंमोन।

बर' रेबग्रा फोरनि मादाव खन्थाइ रेबग्रानि अनजिमाया बांसिन। जौनि गेदेमा थुनलाइगिरिफ्रा समसम बर' खन्थाइगिरिनिखुरै खन्थाइनि अनजिमाया बाडयल'सिन। गोदान खन्थाय लिरगिरिया मुश्री गपीनाथ ब्रह्मनि खन्थायाव इयुननि जौंथि नुहुरयो। 'रादाब' रादाब बिलाइआव बिथाड लारियै खन्थाय लिरलांबाय थादोंमोन। बिथाड दाबो सम सम बाइदि लाइसिफ्राव खन्थाइ लिरबाय थायो।

1988 माइथायाव आंनि सुजुनायाव 'थै आरो मोदै' सुंद' जारिमिन बिजाब नुजायो। बेयो जादों बड'लेण्ड आर्जिनानै हरिया थामोनथा रैखाथि सोमावसारनायनि थै आरो मोदै जों लिरलांनाय सुंद' जारिमिन।

बर' थुनलाइआ दिनैसिम जिसिबां जौगा नांगौमोन बिसिबां जौगाखांनो हायाखै। बिनि गुबै मोनसे जाहोनआनो जाबाय मुंथियाव लिरगिरिनि आंखाल। सुंद' सल'आनो जा सल'मायानो जा, रायथाइआनो जा बाइदि बिथिंआव लिरगिरिनि आंखाल। बावयैसो नुजानाय मुश्री तीरेन बर'नि "बिग्राय आरो दैश्राय" सल'मा बिजाबआ गोबाव सम हाल' जानानै थानाय थावनिखौ सुफुंबाय। बड'लेण्ड सोमावसारनाइनि बिग्रायारी सानम्रिजों लिरनाय बे सल'माया बर' थुनलाइआव गोदान जिराद होदों होत्रानै बुंनांगोन। बिथांनिनो आरोबाव नैथि सल'मा "गोदान बर'"आ ओंखारनायनि लामायाव। सल'मानि सोलायबो बिथाड सुंद' सल'बो लिरो। "जरासे मालाडां" बिजाबआ ओंखारनायनि

लामायाव। बिथाड 'आर'नाइ' आरो 'बडसा'नि बिथोनजों जिरन गैयाजासे बाइदि बिथिंआव लिरलांगासिनो दड। बडलेण्ड सोमावसारफुथारनायाव बर' माहारिनि अलखद बुब्लिआव बिथाड आर'नाइ आरो बाइदि लाइसिफ्राव गोबौ गारांजों नोजोर बोना लिरनानै माहारिखौ खौसे जानो खावलायदोंमोन। सोमावसारनाय बहराव पुलिस अनागारिखौ हेंथा होनानै गोख्रों गारांजो सोंखरिदोंमोन। बेरा फार्सेथिं बिथांखौ फरायग्राफ्रा सासे "समाल'सक" बादियैबो मिथिगौ।

'सिजौ' लाइसिनि लिरगिरि मुश्री रबिराम ब्रह्म आरो मुश्री हलिराम बसुमतारीनि लिरबिदांआ गेजेर आरो गोजौ फरायसालि फराय बिजाबआव सखन जाबाय। मुश्री रबिराम ब्रह्मआ दाबो सम सम बाइदि रादाब बिलाइ आरो लाइसिफोराव लिरगासिनो थायो। रेडिअ' आर्टिस्त मुश्री जयन्त कुमार ब्रह्मआ दासान्दि रौता दिहिंआव बर' हारिमु मेथाय देंखौ, दामनाय-देनायानि मोनसे जाख्रिखांनाय लाबोनो नाजागासिनो दड।

थांनाय 25 बोसोराव रौताया बर' राव-थुनलाइ आरो हारिमुआव जिसिबां जौगाखांनो हाबाय बिनि आन्दोआवनो दड दुलाराय बर' राइजोनि सहाय आरो हेफाजाब। रौता दिहिंनि बर' राइजोआ मोनफ्रोमबो खामनियावनो सहाय आरो हेफजाब होबोबाय थादों। बिनि थाखाय जों देरगानो हागौ। ■

बैंक : बेसे गोजाम

—महेश्वर बसुमतारी

महेश्वर बसुमतारी (1960-2002) : रौतायाव बिथानि जोनोम। बिथाड सासे राफोद लिरगिरि आरो एबसुनि बारग' नेहाथारि।

'बैंक' सोदोबखौ गोसोआव फैयोब्लानो काउन्टाराव ज'नानै लुथुर लाखार लिरख्रबाय थानाय, खस-खसाय गोदान गोजाम रांनि नोट सा फ्लेबाय थानाय अफिसनि केसियार-केरानि आरो अफिसार फोरनि सावगारिखौ गोसो खाडे। आरोबाव सेभिंस, रेकारिं, फिक्स दिप'जित, द्राफ्ट, सेक, कारेन्ट एकाउन्ट, दिमाण्डलोन, लोन गोल्ड, ट्रेभेलास सेक बायदि रोखोमनि खामानि लानानै अफिस मोखाडव थुबुर जाफैनाय सानप्रोमबोनि आन्थोर जयै ग्राहक फोरजों लोगोसे अफिसनि एन्जुराव आलायनानै दोत्राय गोबां बाथा फोसावनाय एडभारटाइज सावगारि फोरनि सावगारिया मोखाडव जाइख्लं महरै नुजाथिफैयो।

मोनसे जौगा रांखान्थियारि माहारिनि गेजेराव रांखावरि नि मुंथिया बेसेबा हेब्रे माब्रे आरो बिजों बि गोरुबलायै। बेफोर माहारियाव सान हर रां रुपानि सोलायसल' जायो। सोराबाबा हादोर नाडै फालांगि खालामदों, सोरबाबा बहुमानाडै फालांगि खालाम नो लादों, स्वोरबाबा रांनि दाहार सुख'नो जीउ थाजासे जुजिदों, सोरबाबा न खाथियावनो हाथाय खालामदों सोरबाबा हादोर दावबायनानै हाथाय खालामदों, आरोदि बेसेबांबा मा दड बुंथ्र हाया।

बेफोर बायदि गोबां खामानि फोरखौनो हेफाजाब खालामलायनो गोबां रोखोमनि रां खावरि आफादफोरनि जोनोम मोन्दों (Discount House, Merchant Bank) Finance House आरोबाव गोबां। रांलाथुमनाय, रांदाहार होनाय, रां मोत्रांगौखौ लानाय गोबां थांखि सिगांआव लानानै रां हेफाजाब होनाय बेफोरनो बै आफादफोरनि मावनांगौ हाबा। रांखाउरिनि होनाय लानायानो बैफोर आफादनि गाहाय आरो सेथि खामानिब्लाबो बैंका नैथि जौथायाव मोनफा हादोरनि बरात दाग्रा जानानैबो दं।

स'ना-रुफानि अनगायैबो दिनैगाबोन गांसे (कागज) बिलायनिबो रांबाहायासै। स'ना-रुफानि फ्राय गांगर बिलायसिम सौफैनायावो दडबोयो गोबां

जारिमिन। सुबुं माहारिनि जौगानाय गोग्लैनाय बायदिनो बेनि जारिमिनावबो दड; गोबां गुरलाय गुरजाय। बयजोंबो मिबथि जानाय लुबैजानाय रादाब।

गोदो गोदाय जेब्ला सुबुंआ, सुबुंनि जीउवा दद्रमोन दानि बायदि हेब्रे-मोब्रे जेथो गोनां नडमोन होमब्लानि सुबुंफोरनि जीउ खानायाबो बेले बेजे नडमोन। बै समाव सुबुंनि गेजेराव रांनि बाहायथि गैयामोन। मानसिफोरा गावनि न'खरनि गोनां मुवाफोरबो गावबा गावनो दिहुनना लानायमोन। जानाय लौनाय थानाय आरो गाननाय जोमनाय बे मोनथामनि आंखालखौ सुफुंना लानो थाखाय गावबा गावनो नाजायोमोन। गावबा गावनि दिहुनथायआ माब्लाबा बांद्रायो आरो माब्लाबा थोआ लोमाबो जायोमोन। बेबायदिनो जाबोनो हमनायसै गोनां-गोथों आरो गैजारोडै निखाउरि नखर। बे बायदिनो सुबुंनि गेजेराव गैजारोडै फोरा गोनां गोथों फोरनिफ्राय लांनाय आरो हरनाय मुवानि सोलाय गुबुन मुवा लानाय राहा खालामनो गोनां जानायसै जायखौ रांखान्थिनि रावआव Burter System (सोलायसोल खान्थि) होन्नानै मिबथिगौ। बेबायदिनो फालांगिनि जोनोम जानायसै।

फालांगिरि फोरनि जेंनाखौ बै समाव सुश्रानायनि राहायाबो गोर्ल्लै नडमोन। फालांगियाव सोलाय सोल' खालाम जानाय मुवाफोरनि बेसेनखौ माजों सुनो? बेसेन दिहुन्नायानो बै समनि गिदिर जेंना। मासे बोरमानि सोलाय थायबेसे थायलिर नांगोन? मासे मोसा बिगुरनि थाखाय बेसे माय नांगोन? सासे हिन्जावनि थाखाय माबेसे अमानांगोन? बेबायदिनो फालांगिनि जेंनाफोरा गावबा गाव नो सिगांबोदोंमोन।

गावनि जानायखौ गावनो दिहुन्ना लानाय, मोसौ बोरमा फोरखौ गावनो फिसिनानै लानाय, गावनि गात्राय जोमनायखौ गावबा गावनो दाना लानाय फोरनि थाखाय जेंनाया जेसे गोब्राब मोन बिनिखुय बांसिन गोब्राबमोन गावबा गाव आथिंआव गसंथानो हायैफोरनि थाखाय बिसोरनि थाखाय फालांगिआनो थाना थानायनि राहा लामा।

फालांगियानोल' रां दिहुन्नायनि गुदि नडमोन। हिन्जाव हाबा लानाय आरो दायनि खिथेर होखारनायाबो बिसोरनि गोजामसिन रां दिहुन्नायनि लामामोन। Ken Holy आरो Geoffrey Whitehead नि "Money and Banking" मुंनि बिजाबाव लिटरदों— "Marriage and revange are older practices still and appear to have played a considerable part in the

development of money. Bride-price and blood-price are ancient institutions and are often reported among primitive people. Compansation for a man's death is a sum equivalent to what his father paid as bride-price for the dead man's mother her a generation before". बे फार्सेथिं नायनो थाडेब्ला बै समाव सोलायसोल, हाबा आरो खिथेर होखारनाया मोनसे साननो गोनां मुंथिमोन आरो गोदान सानथिनि फुंखा बायदि। मानोना बै गोब्राब जेंनाफोरनि सुम्रानाय राहा महरै रां बाहायनायनि गोनांथिखौ हमनो हादोंमोन आरो रां दिहुन्नायाबो जानानै फैदोंमोन।

सानजा आफ्रिकानि मोनसे सुबुंमाहारिया बोरमाजोंनो बेसेन सुनायमोन होन्नानै Geoffery Crowther नि "An outline of Money" मुंनि बिजाबाव बुंदों। जैरै, मैहुराव गोनां जानाय गंसे दाबा सुरिनि सोलाय मासे बोरमा, मासे बोरमानि सोलाय थाय बाजि थायलित फिथाय, बायदिसिना। आदेबानि माब्लाबा मिनिथावनाबो जायो। Crowther आ बिजाबाव लिरबावदों how many bushels of corn should exchange for one tiger skin, if three bushels of corn were equal to five bananas, twenty bananas to one goat and twenty goats to one tiger-skin. गोजौनि बायदि मिनिथाव जेंनाया सुबुंनि गेजेराव रांनि बाहायथिखौ फोरोडे।

रां दिहुननायनि सिगां बाहागोआव सोलायसोल' खान्थिखौ एसे फोसाबनानै गोबां मुवाफोरखौनो बायनाय फान्नायनि बिजों महरै बाहायनाय नुनो मोन्दोंमोन। मुवाफोरनि अनगायै लैथोनि सामु (संख), मोननोथाडै बेसेन गोनां अन्थाय,खाउरि बेगर फोरखौ रांनि सोलाय बिजों महरै बाहायनायानो जानो हागौ सुबुं माहारिनि सिगांथार रां बाहायनो आरो बेसेन थि खालामनो सोलोंनाय। बोरमाजों थायलिरजों सोलायनाय, अमाजों हिन्जावजों सोलाय लायनायनिखुय बे खान्थिखौनो उनाहालागै साबसिन मोन्नायसै।

सोलायसोल' खान्थिया दानि सोदोमश्री मुगायावबो बाहायजाबावनाय नुनो मोनो। नैथि मुलुगनां दावहानि उनाव जार्मानियाव जेब्ला रांनि आंखालाव गोगलैदोंमोन होनब्ला सोलाय सोल' खान्थिया मिबथि स्लाबा जासेनो बाहाय जादोंमोन। जाउनाव मोनसे Non-legal-tender रां खान्थिनि जोनोम मोनदोंमोन। जेराव सिगांनि रेटानो रांनि खामानि होदोंमोन। जायनि जुनै 'Barter and swan merchant'। गोदान मोनसे फालांगिरिनि जोनोम मोन्दोंमोन नैथि मुलुगनां

दावहानि उनाव जार्मानिया बृटिस सान्त्रिफोरनो सप्ताह खुनसेआव 50,000 होनाय जादोंमोन। बिनो गोबां माहेना मोननाय सासे सुबुंमोन।

रांखान्थिआ लासैनो जौगाबोनाय लोगो लोगो रां दिहुन्नायनि गोनांथिआबो बांबोनो हमदोंमोन। स'ना-रूफा आरो तामाखौ रां महरै बाहाय नायावबो जेंनाया खारजोबाखिसै। पर्तुगिजफोरा उत्तमासा अन्तरिपजों भारतसिम फैनाय लामा संखांनाय आरो स्पेनिसफोरा मेक्सिको आरो पेरुखौ संखांनाया इउरोपआरि बेसेन बहा मुवा फोर लांनायखौ बांहोदोंमोन बेनि रुजुथायाव मुवाफोरनि दिहुनथाया बाड खैमोन। स्पेइन आरो पर्तुगालनि इउरोपआरि गासैबो धोन सम्पत्तिखौ बायना लाखिनो हानायनि आन्दोआव बेसेन बहा मुवा बुथमनाया खामानि होदोंमोन।

बृटेइनाव सरकारा गुबुन हादोराव हरनाय मुवानि थि खालाम खानाय बेसेनखौ आरो हारि माहारि गोहोखौ बांहोनायनि थांखियाव गोबां रोखोमनि बिथोन खान्थि दादोंमोन। इस्ट इण्डिया कोम्पानि आरो हाडसन बे कोम्पानिखौ गोसो बायदियै दैदेनलांनो होन्नानै गावसोर हेफाजाबगिरि जानानै थानाय मोन। बेबायदिनो दुलाराय बहुमावनो फालांगिरि आरो गोनां गोथोंफोरा साग्लोबदोंमोन आरो रां बाहायनायाबो गोनांथार जाबोदोंमोन।

जिनै जौथायावनो बृटेइनाव सेथि फालांगिरि हान्जाया खामानि मावजेनदोंमोन। बिसोर इटालिनि लोम्बाडि हायेननि लोम्बार्डफोर। बेउहायनो 'Lombard league' मुंनि गोबां उदां नोगोर जोनोम मोन्दोंमोन। लण्डनाव फालांगिनि आगान सुरजेन दोंमोन। दाबो लोम्बार्ड स्ट्रीटआ British banking system मिरुबायदि जानानै दड।

लोम्बार्डफोरा फालांगिखौ नागारनायनि उनावनो फोरा सोना-रूपानि गहेना बानायनायनि गेजेर गेजेर लोम्बार्ड फोरनि खामानिखौ मावनो लायो। सोरहाबा गावनि स'नाया गावनि नांगौनिखुइ बांद्रायोबोला स'नारि फोरनाव बैखाथिनि थाखाय दोनहैनो हायो जायफोर सोनारो फोरनाव दोनथुमहैयो। बिसोरनो जानायसै दोनथुमग्रा आरो दोनथुमना नायनि होनो गोनां जायामोन एसे रां बिनो 'बेन्स सार्ज' मोन। दोनग्राफोरा जायहा रांनि गोनां जानानै फैयोमोन बियो सोनारि फोरनि फ्राय लायनां गौमोन।

नाथाय बिबो बारा बानजानाय नेम जायाखिसै। मानोना दोनथुमग्राया सोरनोबां रां दाहार होनो गोनां जायोब्ला गावनो स'नारिनि खाथियाव थानानै

रांखौ हरनो गोनांमोन। बे जेंनाखौ फोजोबनो जोनोम मोन्नायसै cheque system. बिब्दिनो Banking नि जोनोमाबो सानफानि सानफा बैसो बांलांनो हमनायसै।

दिनै गाबोननि बेंकखौ जोनोम होग्रा स'नारिफोरा बृटिस फोरानोमोन। बिसोरनो सासेनिफ्राय गुबुन सासेनिसिम लाइजामनि रादाब लांलाय लाबोलाय खालामोमोन आरो सेकनि महर होदोंमोन। लण्डननि स'नारि बेंकनि सिगांसिन सेकखौ दाबो लाखिनानै दोनदों। बेव 1605 माइथाय लिरनाय दड'। बेबायदिनो स'नारि फोरा साफा साफा Banker जानायसै, दानि बायदि रांनि जोनोमबो मोन्नायसै।

लण्डननि स'नारिफोरा लण्डन टावाराव गोबां बोसोर स'ना-रूफाखौ लाखिनानै लादोंमोन। नाथाय राजा सेथि सार्लसआ आंखालाव गोग्लैनानै 1640 माइथायाव गोसैबो स'ना-रूफाखौ सेनानै लाजोबो आरो स'नारि फोराबो फालांगिखौ नागारनो गोनां जायो।

जिस्नि जौथायनि लण्डननि बै स'नारिफोरानो आधिखालनि बेंकनि जोनोमगिरि। बै बेंकारफोरा बेन्सआव जनानैनो रां होनाय लानाय खालामोमोन बे इंराजि सोदोब Bench निफ्रायनो जार्मान रावआव Banck आरो इटालियान रावआव Banco जादों आरो बिनिफ्रायनो Bank जादों होन्नानै मिबथिमोनो होमब्लाबो ख्रीस्टगिरि 2000 माइथायावनो बेबिलननि मन्दिराव बेंकनि नेम दडमोन होन्नानै मिबथि मोनो। नाथाय Makliod नि बायदिब्ला ख्री:गि 1640 माइथायनि सिगाडव बेंक होन्नाय जेबो सोदोबानो गैयामोन।

भारतवर्ष आव :

भारतवर्षनि रांखान्थियारि जारिमिनाव बेंकिं आरो बेंकार फोरनि थाखाय मोनसे मानगोनां मासि दड'। सानक्यनि अर्थसास्त्र (300 सो ख्री: गि:) आवबो मख'नाय दड' दि फालांगिरि बेंकारफोरा सुबुंनिफ्राय रां लाखियो, रां दाहार हरो आरो गुबुन गुबुन बेंकिं खामानि मावो। गुबुन हादोरारि हाबफैनायनि उनावसो राजखान्थियारि गोहोआ लोर्बा जानानै हेंथा सौफैदों। बै समाव बेंगलनि नबाबनि गोहो मोन्नाय जगत सेथआ बयनिबो मिबथिजानाय मोन। बबेखानि गुबै मोगल सम्राट औरंगजेब आरो बृटिस इस्ट इण्डिया कोम्पानियाबो बिथांमोननिफ्राय रां दाहार लानो गोनां जादोंमोन।

आधिखालनि बिथिं नायनो थाडेब्ला भारताव मोनथाम प्रेसिदेन्सि बेंक गायसन्नाय लोगो लोगोसो बेंक जोनोम जायो। 1806 मायथायाव Bank of

Bangal, 184-P माइथायाव Bank of Bombay आरो 1843 माइथायाव Bank of Madras गायसन जायो बेफोर बेंकआ फालांगि मावलांग्रा एजेन्सि हाउस निफ्राय गोहोमोन्नाय इस्ट इण्डिया कोम्पानिया सरकारनो रां दाहार होनायनि थांखिया आरो रां दाहारनि रैखाथिनि थाखाय बेफोर एजेन्सि हाउस फोरखौ बन्ध खालामानै होदोंमोन। भारतबर्षआव सिगां बेंकिं आफाद दड'मोन इराज एजेन्सि हाउस Alexander & Company कलिकातायाव गायसत्राय Bank of Hindustan। 1740 माइथायआव बिनि खामानिआ जागायजेनदोंमोन।

उनाव बेफोर प्रेसिडेन्सि बेंकफोरखौ जथायसे खालामाना 1921 मायथायनि जानुवारिआव Emperial Bank of India मुंदोनो। बेनि थांखिया हादोराव नोटरां बाहायनाय आरो बेंकार फोरनि बेंक आरो सरकारि बेंकनि फालांगिनि थाखाय Central Bank जोनोम होनाय। 1860 माइथायाव Limited Liability नि खान्थि आजाव नायनिफ्राय गोबां Joint Stock Company Bank जोनोम जायो। बेखायनो 1860 माइथायखौ भारतबर्षनि बेंकिं जारिमिनाव बेंक गायसत्राय माइथाय महरै मिबथि मोनो। बेनि उनावनो 1863 माइथायाव Bank of Uper India, 1865 माइथायाव Allahbad Bank, 1868 माइथायाव Bangalore Bank, 1874 माइथायाव Alience Bank of Simla बायदि बेंक गायसन जायो आरो लोगो लोगोनो भारतारिफोरा गायसत्राय Joint Stock Bank फोरा बन्ध जानो हमो। बेफोरनि मादाव 1881 माइथायाव Udh Commercial Bank आरो 1894 माइथायाव Punjab National Bank।

1906 माइथायाव उदांश्री सोमावसारनायनि जाउनाव Bank of India, माद्राजाव Indian Bank, Central Bank of India, Bank of Baroda फोरा जोनोम मोनो। मोननै मुलुगनां दावहाया बेंकिं खामानि फोरखौ लामा दिन्थिनानै होनाय बायदि जादों। मानोना, बे समावनो गोबां बेंकफोर गायसन जादोंमोन। नाथाय 1929-30 माइथायाव Great economic crash जानाय लोगो लोगो बेंक फोराबो बिलाय सिरिनाय बायदि सिरि लांजोबनो हमदोंमोन। दाउहा जोबनाय लोगो लोगो 1935 माइथायाव Banking Companies Act आ गनाय जायैलाय जेबोखौनो मावनो हायाखैमोन। भारतबर्षआ उदांश्री मोनखांनानै फालांगि बिथिं बेंकनि दाहारखौ सोलाय होयो आरो भारत सरकारा हादोरनि रांखान्थि जौगानायनि हाथियार महरै गनायनानै लानो हमो।

दानिया बेंकखौ सुबुंनि आंगो खालामनायाव सरकारानो नांथाबबाय। 1969 माइथायाव बेंकफोरखौ Nationalised खालामनायनि सिगां भारतबर्षआव

फालांगियारि बेंकनि दालायफ्रा गासै 8,262 गं मोन। 1997 माइथायनि मार्स सिम 53,565 गं बेंकनि दालाय खुलियो। 1969 माइथायाव सा 65,000 सुबुंनि गेजेरावनो गंफाहै बेंकनि दालाय दडेमोन। 1987 माइथायाव सा 13,000 सुबुंनि गेजेरावनो गंफाहै बेंक जायो। गासै दोनथुमनाया रां 4,646 कौटिनिफ्राय 1,00,000 कौटि सिम जादोंमोन। दाहारा 1969 माइथायनि जुन सिम 3599 कौटि रां निफ्राय 1987 माइथायनि मार्ससिम 60,000 कौटि रां जायो। ग्राहकफोरनि अन्जिमाया 1969 माइथाय मार्सनि 18 निजुतनिफ्राय 1987 माइथायनि मार्ससिम 280 निजुत सिम बांबाय। रां दाहार लाग्रानि अन्जिमायाबो 1970 माइथाय डिसेम्बरआव 1.7 निजुतनि थावनियाव 1987 माइथायनि मार्ससिम 38 निजुत सिम बांबाय।

दानि बिज्ञान आरो टेकन'लजिनि मुगायाव बेंकनि खामानिफ्राबो बांबाय। बेखायनो बेंकावबो बिज्ञाननि गोहोमा बारासै। इलेक्ट्रनिक बेंकिं, Magnetic Ink Character Recognition (MICR), Automated Teller Machine (ATM) जोंबो खामानि मावनो हमबाय। आमेरिकायाव स्वान हर मिबथियाजासेनो बेंकिं खामानि मावग्रा जाबाय। भारतबर्षआवबो कम्पिउटारजों बेंकिं खामानि मावनो लाबाय। ■

बर'फोरनि माहारि रंजानाय

—डा: लीलाधर ब्रह्म

डा: लीलाधर ब्रह्म (1954) : सोरखारि डाक्टर जिउ खुंनाय बादियै बिथानि नआ भक्तपारायाव। बर'नि दामनाय मोसानाय आयदायाव बिथाड मोजा गियान दड'।

जानो हागौ बहुमाव मोनसेआनोल' हारि दड' जायनि गोदोनि समाज दर्शननि सानथौजों 'बा' (Five) अनजिमाया एंगारनो हायैबायदि अराय लोब्बा थानाय नुनो मोनबोदों —बे हारिआनो जादों बर' हारि। जेरै, बर'फोरनि गुदि अनजिमाया जाबाय मोनबा थामहिनबा 'से'निफ्राय 'बा' सिम, बाथौनि बान्दोआ बान्दोबा, गुदि (Basic) दार्शनिक सानथौआबो मोनबा, बर' बोरायनि गुदि (Origin) आसाराबो मोनबा आरो बेबायदिहैनो बर'फोरनि गुदि माहारि रंजानायाबो मोनबा। बर'फोरनि गोदोनि समाज जारिमिननिफ्राय 'बा' अनजिमाजों लोब्बा थानाय आरो माखासे बिदिन्थि दंबावो। बर'फोरनि माहारि रंजानायनि फार्से सावरायनायासो बे लिरबिदांनि गाहाइ जाहोन जानायनि थाखाय आद्रा माखासेखौ बहाय मखनाय जालिया। जा जाथोंसै मोनबा थाखोनि माहारि रंजानायखौ बर'फोरा सरासनस्राहै जायगा जायगा खुंबोबाय थादोंब्लाबो नाथाय बिथामोना बेनि फार्से बारा बड (Sense, conciousness) गैया। थामहिनबा बे माहारि रंजानायफोरखौ गुवार बहुमनि नोजोरा गोलैनाय बायदिहै बर'फोरखौ खुंनाय नुनो मोना एबा बर'फोरा गावनि आंगो माहारि रंजानायनि बागैबो गोख्रों नोजोर गैया। बेनिखायनो बिथामोनखौ बर'फोरनि माहारि रंजानाया बेसेबां होत्रा सोरबा सोडेब्ला 95% बर' मानसिआनो थारहै फिननो हानाय नड नंदां! मानोना बर'फोरा बे माहारि रंजानायफोरखौ फोर्सावनो, फेहेरनो आरो मुगाजों लोब्बा लाखिना अनसायना दाफिन्त्रो दासिमबो हायाखै। जा जाथोंसै बर'फोरनि बे मोनबा थाखोनि माहारि रंजानायनि सोमोन्दै बुंनाय सिगाडवनो बाथौनि सोमोन्दै गुसुडैब्लाबो एसे बुंग्रोना लानाय जानोसै। मानोना होनब्लासो मोनबा सानथौनि सायाव सोनारनानै जोनोम लानाय बे मोनबा थाखोनि माहारि रंजानायनि गुमुरखौ एसे थाबहै दांग्रोमना मोनगोन।

सायाव फोरमायथिनाय जादोंदि बर'फोरनि धोरोमारि सानखांथिफोरनि गिबि खाम्फाया 'बा' थामहिनबा बर'फोरनि धोरोमारी सानथौफोरा "बा दर्शन" (Philosophy of five) नि सायाव सोनारनानै सोमजिखांदों। बेनिखायनो बर'फोरनि गिबि (Origin) धोरोमनि मुड 'बाथौ' बेनि थोंजों ओंथिआ जाबाय—

बा = मोनबा

थौ = सानथौ

थामहिनबा मोनबा सानथौ एबा मोनबा दर्शननि धोरोम। बेनिखायनो जानोहागौ गिबि (Primitive) बर' धोरोमगुरुनि (बर' बोराइनि) खुगानिफ्राय रिखांदोंमोन—

थायगिरनि खड खंबा
सिजौनि सिरिया सिरिबा,
बाथौनि बान्दोआ बान्दोबा
बर' बोरायनि आसाराबो फंबा।

बाथौ धोरोमाव जायखौ—“रांसि मैथाहाजि, गोहो रांसि गना गंथाम, नों सासेआनो जादों फानथाम” होननानै फोथायनाय आरो सिबिबोनाय जादों। बेखौनो बर'फोरा बोराय बाथौ होत्रा गाबज्रियो। बिथाड माखासे मुं दड'। बे मुंफोरनि मोनफ्रोमबो बिथानि गुबुन गुबुन गोहो-बोलोखौ फोरमायथियो; जै—

क) बोराय बाथौ : बेनि ओंथिआ जाबाय मोनबा सानथौनि (पन्स 'तत्व) गिबि (Primitive) बिगोमा।

ख) खोरिया बोराय : गेदेमा बुहुमनि सोरजिगिरि।

ग) सिब्राय : बेनि ओंथिया जाबाय लावबा (Five sense organ), खावबा (Five Organs of action) आरो गोसोखौ जथायनानै जिउ लाग्रा गिबि (Primitive) सैथो सुबुं (पुरुष)।

सोर्जिगिरि बोराय बाथौखौ फुजिनो आरो आर'ज गाबनो थाखाय जा आफाद सोमजिखांदों बेखौनो खेराय बुंनाय जायो। बे खेरायखौ असमीया रावआव कीर्तन बुंजायो। खेरायखौ एबा खेरायनि नेमखान्थिखौ नागारथारनानै बर'फोरनि गासै माहारियारि रंजानायखौ खुंनाया गोब्राब। बेनिफ्रायनो मोनथिना मोनोदि बाथौ आरो बर'फोरनि माहारियारि रंजानायनि गेजेराव जोबोर गोख्रों

लोब्बा दड' दा बे माहारियारि रंजानायनि सोमोन्दैनो सुंद' सुंद'है सावरायनो लानाय जाबाय। बर'फोरानि मोनबा माहारियारि रंजानायफोरा जाबाय (1) खेराय संसारि, (2) गारजा खेराय, (3) आमथि खेराय, (4) मायनाव खेराय आरो (5) बाथौ खेराय।

1) खेराय संसारि :

बैसाग दाननि से खालाराव बे रंजानाया जागायजेनो। फुजानि नेमखान्थिफोरा बाथौ धोरोमनि थिन्नाय बायदियै जायो। अदेबानि बर' समाजाव गोदोनिफ्राय सोलिबोनाय खायसे आसार फोरखौबो बे रंजानायाव दाजाबदेरनाय जायो। बे रंजानायनि गाहाइ ओंथिया जाबाय गोदान बोसोरखौ बरायनाय। आथिखालाव असमीयाफोरा खुंनो लानाय "बाहागी मेला" रंजानाया खेराय संसारिनि गोहोमाव सोमजिखांदों होत्रा बुंनायनि खायसे गोग्गोम ओंथि दड'। बाथौआरि बर' समाजा गावबागाव ननि सिजौ दंफां सिडव सानफ्रोमबो आलारिबाथि लगायना बोराय बाथौखौ आरज गाबनायनि अनगायैबो समाजनि बयबो ज' जानानै गुबुन सिजौ दंफांनि सिडव सानफ्रोमबो आलारि बाथि लगायना बोराय बाथौखौ आर'ज गाबना खुलुमनाय हुदा दड'। बे बायदि सिजौ दंफांखौ समाजनि थानसालि एबा खेरायसालि एबा बाथौसालियाव गायनाय जायो। खेराय संसारिखौ खुंनाय सिगां सिगां थानसालि एबा खेरायसालियाव बयबो थानानै बाथौ धोरोमनि नेमखान्थि बायदियै बहाय थानाय सिजौ दंफांनि सिडव आलारिबाथि लगायना खाम, सिफुं आरो जथानि रैसुमै देंखोजों लोब्बा लाखिना बोराय बाथौखौ बयबो गोसो गोथारै फुजिग्रोयो, आरज गाबग्रोयो। रायजो राजाया जहै थानसालि एबा खेरायसालियाव बोराय बाथौखौ खेराय होनानैसो फुजिनाय नुनो मोनो। खेराय होनाय समाव दौदिनिआ फार्सेनिफ्राय खेराय मोसानायफोरखौ मोसायो। दौदिनिआ मोसानाय लोगो लोगो खायफाया गावनि गोसोखौ हमथानो हायैनि थाखाय दैदिनिनि उन उन रंजा बाजा खेराय मोसानायाव बाहागो लायो। बे बायदि फुजिनाय आफादा जोबोर गोलाव जायो। मोनाबिलि मोसौ खाजेननायनिफ्राय खुंनो लानाय खेराया माब्लाबा माब्लाबा नखानायै सानजौफु जाहां जाहांआवसो जोबहैलायनाय नुनो मोनो। बेनिखायनो खेराय होनायखौ गोनांथार होत्रानै रायजो-राजाया नाजावना लायाब्ला दौदिनि लायालाबासिनो खेराय संसारिनि खामानिफोरखौ फोजोबनाय जायो। दौदिनि लानायनि रुजुनायाव दौदिनि लायै आफादा जोबोर गुसुं जायो। बेबायदि गुसुं आफादाव खालि दौरिआनोल' थाब्लानो जायो। अदेबानि दौदिनि गैयाब्लाबो

नाथाय खाम, सिफुं आरो जथानि देंखोजों रायजो रायाजा बाथौखौ गिदिं गिदिं बिथां बोराय बाथौखौ आरज गाबो आरो गोदान बोसोरा जैरैबो जेनिबो बयनिबो थाखाय जाहाथे मोजां जायो बेनि थाखाय बिथां सोर्जिगिरि बाथौनि खाथियाव बोर बियो। बेनि उनावनो रायजो राजाया न' न' हुसुरि रोजाबनो थाडे। लिरबिदाड बारा गोलाव जागोन सात्रानै बर'फोरा हुसुरि खुंनायनि सोमोन्दै बहाय सावरायनाय जायाखिसै। हुसुरि खुंनाया खालि मोनसे गोनां सानसिमहा लागैसो थायो। बे हुसुरि फोर्बोआ जोबनाय नखानायैनिफ्रायनो बैसागो रंजानायखौ खुंनो लानाय जायो। हुसुरि, बैसागु रंजानाय आरो खेराय संसारिआ समनि फाखनाव गोरोबनानै मोनसे दाहारजोंनो बोहैबोनो हमो। बिनिखायनो दिनै बे गासैखौबो जों मोनसे महराव नुनो मोन्दों। बैसागो रंजानाय आरो खेराय संसारिआ मोनसे दाहारजोंनो बोहैयामोनब्ला बर'फोरनि माहारि रंजानाया दिनै मोनड' जागौमोन नंदां! बे मोत्रै आफाद खुंनायनि सम, थांखि आरो बोराय बाथौनि फासैं थानाय धोरोमारि गोथार फोथायथिआनोदि मोननैआ मोनसे जानायनि गाहाइ जाहोन बेखौ गले गले बुंलायनो गोनां नड। मानोना बर'फोरा बोराय बाथौखौ आरज गाबालासैनो थैहांथैहां जानाय बेमारिखौबो अजा एबा डाक्टरनि मुलैबो दौवा। बेनिखायनो बिथांखौ आर'ज गाबालासैनो बैसागु बायदि उदां बोथोरनि गेदेमा रंजानायाव बर'फोरा बाहागो लायो होत्रा सानजाथावा। जा जाथों, बैसागु रंजानायाव बाहागो लानाय सिगां बर'फोरा बोराय बाथौखौ नेमखान्थिआ थोत्राय बायदियै जोबोर गाजा गोमजाहै फुजा खालामना आर'ज गाबग्रोयो; जायनि थाखाय बर'फोरा खेराय संसारि रंजानाय खुंदों ना बैसागो रंजानाय खुंदों बेखौ गोलैयै (easily) फाराग खालामनो हाया। बुंनाया मोजां जागोनदि बेखौ दिनैसिम फाराग खालामना दिहुत्राय जायाखै आरो दिहुत्रायाबो जेब्लाबो मोजां जानाय नड। बेबायदि खालामनायनि ओंथिआ जागोन माहारि फोथायनायनि सायाव गोब्राब आथिंजों गादामब्लेनाय।

2) गारजा खेराय :

बे रंजानायखौ जेथो दाननि से खालाराव जागायजेत्रा बैसागो दानखौ रायदावहरनो थाखाय खुंनाय जायो। बेनि अनगायैबो गुबुन गुबुन मोनब्रैसो थांखिनि थाखायबो गारजा खुंनाय जायो। जैरै—गामिआव बेमार आजार जायोब्ला, मान्ना हाबोब्ला खैफोद आरि जायोब्ला बर'फोरा बेनिफ्राय रैखा मोत्रो थाखाय गारजा खुडे। गामिनि सोरबा मानसिआ सोरजोंबा जिनाहारि खामानि मावोब्ला बेनिफ्राय रैखा मोत्रो थाखाय गारजा होयो। बेबायदि होनाय गारजानि

थाखाय जेबो थि (Definite) सान थाया थामहिनबा जेब्लानो गोनां होत्रा सान्नाय जायो होनब्लानो बेखौ खुंनाय जायो। बेनिखायनो बायदि बायदि थांखिआव खुंनाय गारजाफोराबो बायदि बायदि। बे गुबुनथिनि थाखायनो बर' समाजाव मोन जिगु गारजा दड'। थेवबो बैसाग दानखौ रायदाव हरनो थाखाय सायाव बुंबोनाय बायदि जेठो दानाव खुंनो लानाय गारजाखौनो गाहायै रासिन गोसो होनाय नुनो मोनो। बेनिखायनो बेखौ फुजा बुड लाबासिनो "गारजा खेराय रंजानाय" होत्रा बुंब्लासो रासिन मोजां जागोन। बर'फोरनि बे गारजा खेराय रंजानायनि गोहोमावनो असमीयाफोरा आथिखालाव खुंनो लानाय "बहागी बिदाय" रंजाथाया सोमजिखांदों होत्रा गोख्रोडै बुंनो हानायनि जायगा दड'। मानोना बे "बाहागी बिदाय" रंजाथाया गारजा खेराय रंजानायनि रुजुनायाव असमीया समाजनि थाखाय जोबोर गोदान। बैसागो दानखौ रायदावहरनो थाखाय खुंनो लानाय गारजा खेरायनि मोनसे गोनां ओंथिबो दड'। बे ओंथिआ जाबाय गुबुन मानसिफोरनि सनदेरनाय, बोराबखांनाय, सान्नां सान्नाय आरिफोरनि थाखाय समाव मिथिनानै एबा मिथियालाबासिनो दाय आरो आबुर गोनां खामानि मावप्लानो हागौ आरो बायदिमैया मोजां गाज्जि मानसिनि खाथिआव थांनाय जायो। बेनिखायनो बर'फोरा बे दाय आरो आबुरनिफ्राय रैखा मोत्रो थाखाय खुंनो लानाय गारजायाव बैसाग दानखौ रायदाव हरनायनि लोगोसे मोनथिनानै एबा मोनथिया लाबासिनो खालामनाय गोरोन्थिनि थाखाय बोराय बाथौनि खाथियाव आर'ज गाबना निमाहा बियो। बेनो जाबाय गारजा खेराय रंजानाय।

3) आमथि खेराय :

आमथि खेराय रंजानायखौ स्नि आसाराव खुंना आसार दानाव मोत्राय थायजौ, खान्थाल बायदि बायदि फिथाइ-सामथाइफोरखौ जानायनि सिगां सिगां बाथौ धोरोमनि नेमखान्थि बायदियै बोराय बाथौनिसिम आरज गाबहरो। बे फिथाइ-सामथाइफोरा मानसि समाज आरो बहुमनि जिउ जुनादफोरखौ जाहाथे गोख्रों खालामो बेखौ हास्थायनायानो जाबाय बे आर'जनि गाहाइ थांखि। बे रंजानायखौ आसार दानाव खुंनाय जायो। अदेबानि बे रंजानायखौ बारा गाजा गोमजाहै खुंनाय जाया। बेनिखायनो बेखौ रंजानाय होनाबालासिनो फोर्बो होत्रा बुंब्लासो साबसिन जागोन। बे फोर्बोआ सान स्नि सिम थायो।

4) मायनाव खेराय :

माइ-दै, रां-रुफा, हा-बार, सुखु आरिनि बिगोमा होत्रा बर'फोरा फोथायबोनाय मायनाव आइजो मोदायखौ फुजिनो थाखाय खाथि दाननि से

खालार खालि मायनाव खेरायखौ खुंनो लायो। बे खेरायनि गाहाइ थांखिआ जाबाय मायनावखौ रंजा होना समाजखौ एबा बहुमखौ जैरेबो जेनिबोफ्राय माइ-दै, रां-रुफा आरिजों बंफब होनाय। गासै बोसोरावनो आबाद आरो फिथाइ-सामथाइफोरा मोजांहे आरो थोजासे थायनायनि थाखायबो आरज गाबनाय जायो। बे मायनाव खेरायखौनो बर'फोरा असमीया समाजनि गोहोमाव "काटि दमासि" होत्रा बुंनो लादों आरो बेनि खुंनाय नेमखान्थिफोराबो गोदोनि बर' मायनाव खेराय खुंनाय बायदिथार जायालाबासिनो गलाय-गथाय बर' हारिमु महरै सोमजिखांबोनो हमदों।

5) बाथौ खेराय :

बाथौ खेराय रंजानायखौ से मागो आरो जायगा लाना जायगा मागो दाननि पुर्णिमा हराव खुंनाय जायो। बे खेरायजों बर'फोरा गावनि लुबैनाया जाफुंनायनि थाखाय आरो बहुमनि सान्तिखौ हास्थायना बोराय बाथौनि खाथियाव आरज गाबो। सायाव बुंबोनाय मोनबा रंजानायनि मादाव बे मोनसेआ नाथाय बर' समाजाव जोबोर गुवार आरो गाहाइ मासि मोनबोदों। गमामायैनो बे रंजानायखौ "बाथौ धोरोम रंजानाय" होनब्लासो साबसिन जागोन। जा रंजानायानो जायाथोंमानो खेराय होनो गोनांब्ला मोनफा मोत्रैनि अनगायै आद्रा माखासेखौ नाथाय पुर्णिमा हरावसो खुंनाय जायो। मानोना खेरायनि गोरों-गोराफोरा बुडेदि मोन्थोर खालायजानाय दौदिनिनि मोदाय गोहोआ पुर्णिमा हराव खुंनाया गोनांथार। बे जाहोननि थाखायनो दिनैसिम बाथौ खेरायखौ पुर्णिमा हरावसो खुंबोबाय थानाय जादों। मानोना बाथौ खेरायनि गाहाइ थांखिआ जाबाय बहुम सान्तिनि थाखाय बोराय बाथौनि खाथियाव आर'ज गाबनायनि लोगोसे सिबिसुलाफोरा बिथांखौ दौदिनिनि बिजोंजों खाथिथाराव मोत्रो हास्थायनाय। बेनि सोमोन्दै फोजोबधिआव फनैसो बुंनाय जागोन। जा जाथों, जा समाव दौदिनिनि मोदाय गोहोआ रानि गोखों जायो होत्रा फोथायनाय जायो बे समावनो (पुर्णिमा हराव) बाथौ खेराय खुंनायनि फार्से गोरों-गोराफोरा गोखों मदद होबोदों।

सायाव बुंबोनाय मोनबा थाखोनि रंजानायफोरनि मादाव दिनैसिम खेराय संसारि आरो बाथौ खेरायखौ रासिन गुवार आरो गोनांसिन मासि होबोनाय जादों। आद्रा मोनथामनि खुंनाय आरो फालिनाय महरखौ नायना बेफोरखौ रंजानाय होनालाबासिनो फोर्बो होत्रा बुंब्लासो रासिन गोरोबगोन। सायाव बुंबोनाय थांखिफोरनि अनगायैबो आरो मोनब्रैसो जाहोननि थाखाय खेराय खुंनाय

जायो। जैरै—(1) आसार एबा सावोन दानाव आसुमाइ आरो बे समनि आबादफोरनि मोजांनि थाखाय; बेखौनो आसु खेराय बुंनाय जायो। (2) फुखु आरो मागो दानाव माइसालि आरो बे समनि आबादफोरनि मोजांनि थाखाय; बेखौनो सालि खेराय बुडे। (3) र'ग-बियादि, दुखु, खैफोद, मिथिंगानि गात्रि बारहावा आरिफोरनिफ्राय रैखा मोननो थाखायनो खेराय खुंनाय नेमआ बर' समाजाव दड'। अदेबानि बेफोरबायदि खुंनायनि थाखाय जेबो थि दिन, बार आरो खालार गैया। बे थाखोनि खेरायखौ जेब्लानो गोनां होत्रा सानो होमब्लानो खुंनाय जायो।

जोबनायाव दौदिनिनि सोमोन्दै फंनैसो बुंनाया मोजां जागोन। मानोना दौदिनि गैया लाबासिनो खेराय होनाय जाया आरो होनोबो हाया। बहुमनि गुबुन गुबुन धोरोमनि फोथायसुला आरो सिबियारिफोरा सोर्जिगिरि इस्वोरखौ मोत्रो थाखाय इस्वोरनि गोहो थानाय देरसिन आरो गिबिसिन होत्रा फोथायजानाय सोरबा मानसिनि बिजोंजोंसो इस्वोरखौ आर'ज गाबहरो। मानोना धोरोमा फोथायो दि गाबगैयै, गुदि-बिजौ गैयै, जोबनो गैयै आरो जोनोम—देरनाय—थैनाय गैयै बयनिखुइबो अरायसान गोहोबोलो गोरा इस्वोरखौ आर'ज गाबनानै थोंजोडै मोत्रो हाया। बिथांखौ मोत्रो गोनांब्ला इस्वोरनि गोहो-बोलो गोनां बयनिखुयबो गोख्रोंसिन आरो गिबिसिन होत्रा फोथायजानाय सोरबा धोरोमारि गोथार मानसिनि बिजोंजोंसो आर'ज गाबनांगौ। बे फोथायनायनि थाखायनो हिन्दुफोरा कृष्णखौ, खृष्टानफोरा जिसुखौ, बौद्धफोरा बुद्धखौ, इस्लाम धोरोमनिफोरा हजरत महम्मदखौ, जैनफोरा माहाबीरखौ आर'ज गाबनानै इस्वोरखौ मोत्रो हास्थायो। बे बायदिहैनो बाथौ धोरोमारिफोराबो खेराय खुंनानै दौदिनिनि बिजोंजों बोराय बाथौखौ लोगो मोत्रो हास्थायो। एखायनो—दौ+धी>दौधी>दौधिनि>दौदिनि। बेनि ओंथिआ जाबाय जायनि बिजोंजों गावजों फुजि जानाय मोदायखौ “ध्यान” खालामनाय जायो। ऋगबेदआव दड' दि 'दौ'=फुजिजाग्रा मोदाय, 'धी'=ध्यान, थामहिनबा गावनि आंगो फुजिजाग्रा मोदायखौ जायनि बिजोंजों आर'ज गाबहरनानै 'ध्यान' खालामनाय जायो आरो बेनो जाबाय बाथौआरिफोरनि दौदिनि। ■

50 बोसोर आगानाव बर' थुनलाइ आरो सल'मा

—नबीन मल्ल बर'

नबीन मल्ल बर' (1959) : सल'मा, सुंद'सल' रायथाइ, खन्थाइ, मेथाइनि लिरगिरि। देब 'जित मलिना आरो आं (सल'मा), हादान (सुंद'सल') बिजाबफोरा बिथांनि थुनलाइ सोरजिनायनि नेरसोन। बिथांनि नआ अदालगुरिनि मायदांगुरिआव।

गोजौआव मुंथिनाय आयदा बादियै '50 बोसोर आगानाव बर' थुनलाइ' होनब्ला बर' साहित्य सभानि स'नाथि फोरबो खुंनो हानाय सम थामहिनबा 50 बोसोराव आगान होनाय बर' साहित्य सभानि बैसोखौ बुंनाय जादों आरो बे 50 बोसोर समनि गेजेराव बर' सल'मानि मान सानखोआ बेसे दावगाखौ बेनि हिसाब-बिजाब मोनदांनायनि बाथा बुंनाय जादों। बर' सल'मानि मान बिजिर नायनि सिगां सिगां जों सल'मानि सोमोन्दै सुंदयै सावरायग्रोगोन।

थुनलाइनि बायदि आयदानि मादाव सुबुं माहारिनि आबुं महर होनो हानाय साबसिन बिजोंआ जादों सल'मा। सल'मानि गेजेरजों सुबुं जिउनि सावगारिखौ जा रोखोम बिजिरनानै दिन्थिनो हायो थुनलाइनि गुबुन आयदाफोराव आस 'खान्दा जाहैयो। गुबुन फारसे सुबुं समाजनि बइबो थाखोनि मानसिया सल'माजों जाबादि गोसो गोजोननाय मोनो थुनलाइनि गुबुन आयदाफोराव बिब्दि गोजोननाय मोनजोबा।

“मैहुर” सल'मानि सल'मागिरि मुश्री धरणीधर औवारीया सल'मानि सोमोन्दै बुंदों—'बर' रावै सल'मानि सोदोबथिया जाबाय सल'बिमा; थामहिनबा सल'गोलाव एबा सल'गेदेर। नाथाय सल'वा गोलाव एबा गेदेर होनब्लाबो मोनफ्रोबो सल'खौ सल'मा बुंजाया। थुनलाइनि नोजोरै बिहा जुदा बिमुंथि दड'। मोनसे फोथाइजाथाव जाथाइ, सिनाइजाखानाय सुबुंसा, समाजनि मोनफ्लेबाय थानाय आखु आरो मोखथांआरि जाथाइजों लोगोसे जिउनि मिनि-रंजा, दुखु-दाहा, गांनाय-उखैनाय जेब्ला बै सल'आव आबुडै फोरमायथि जायो अब्लासो बै सल'खौ सल'मा महरै मख'जाथावगोन।

इटाली सोदोब Novela निफ्राय सल 'मानि इराजी सोदोब Novel जादों। Novel नि ओंथिया गोदान, सोमोनां (strange), थाजिम, जिउनांब्लाबो इराजी सोदोब बिहुंआव आरो मोनसे ओंथि बुंदों—मोनसे जोबोद गोलाव गोसोजों साजायनाय बाथ्रानि सल 'जेराव थार जिउनि थान्दैयारि आखु आरो आखुथाइखौ इसे-एनैब्लाबो जेथोगोनां सल 'आव महर मोनो (a fictitious prose narrative of considerable length in which characters and actions representative of real life are portrayed in a plot of more or less complexity.)

सोनाबारि बिजिरगिरिफोरनि बादिब्ला थुन भावथाया गेबें थुनलाइनि थाखो आयदायाव सरजाबफाया, बेबो भाव दिन्थिफुंनो हानाय मोनसे गोरोबथा आर्टल'। सल 'माया नाथाय गेबें आरो उदां जानायखाइनो गेबें थुनलाइआव थिस 'नजानाय। सल 'मानि बे उदांश्रीखौ नोजोर होनानै मेरीयन क्रफ 'र्डआ सल 'माखौ बुंदों—बियो गस्ला सिफियाव सोनानै लाजानाय मोनसे थियेटार एबा भावथिना, जेराव भावथिनानि सल ' एबा जाथाइ आरो भावथिना दिन्थिग्राफोराल' नड बिसोरनि गाननाय-जोमनाय, भावथिनाजों लोगोसे गुबुन गुबुन गोनां आइजें आइलाबो थादेरो। (Pocket Theatre, containing within itself not only plot and actors, but also costume, scenery and all the other accessories of dramatic representation.)

सल 'मानि जाफुंसारनाया सोनारो सुबुं जिउनि गोथौ मोनदांथिफोरनि नंगुबै सावगारि बेरखांहोनो हानायासो। बेखाइनो सुबुं जिउमानि साबसिन हामसिन बिथायासो सल 'मानि गुदि गोनांथि। (The basis of the greatness in a novel is to be sought in the greatness or substantial value of its raw-materials—Hudson)

सल 'मानि गोनां आखुथाइफ्रा जादों— (1) सल ' एबा बिथा (Plot), (2) आखु (character), (3) बाथ्रा रायज्जायनाय (Dialogue), (4) आबहावा दानाय (creation of environment) आरो (5) रेबग्रानि जिउ-सानस्रिनि गोहोम (influence of the Philosophy of the writer) बायदि बायदि। बेनि अनगायैबो आयदा-फारिखौ नाइनानै सल 'माखौ गुबुन गुबुन आयदायाव राननो हागौ। जेरै— जारिमिनारि (Historical) सल 'मा, समाजारि (Social) सल 'मा आरो संगालियारि (Detective) सल 'मा।

1719 इं माइथायाव देनियेल दिफ 'नि आखाइआव 'रबिनसन क्रुस' मुंनि सल 'मायानो मुलुगनि सिगांसिन नुजानाय सल 'मा बै सल 'मायाव इलान्डनि

फालांगिरि समाज आरो सानमिनि महरा बेरखांदोंमोन भारतबर्षआव सिगांसिन नुजानाय सल'माया जाबाय बांला रावजों लिरनाय भवानी सरण बन'पध्यायनि 'नब बाबुबिलास'। बेयो 1823 इं माइथायाव नुजायो। 'नब बाबुबिलास'आ नाथाय फेस्लायै सोंखारिनानै (satirical) लिरनायलाइ सल'मा गुबै जादों होननानै गनायनो गोब्राब जायो आरो 1864 इं माइथायाव ओंखारनाय बंकिम सन्द्रनि 'दुगेरा नन्दिनी' सल'माख्रौसो गोदान भारतारि सल'मानि (Modern Indian Novel) जारिमिन जागायजेननाय होननानै बुंजायो।

असमीया थुनलाइआव इंराजीनिफ्राय राव सोलाइनाय 'जात्रिकर जात्रा' (Pilgrim's Progress) खौ गिबि सल'मा होननानै बुडब्लानो पदनाथ ग'हाइबरुवानि 1811 इं माइथायाव नुजानाय 'भानुमती'खौ गिबि असमीया सल'मा होननानै बुंजाय जायो।

जारिमिननि नोजोरजों नायोब्ला बर' सल'मानि फोथारा बारा गोबाव जायाखै। दाखालि 1962 इं माइथायनिफ्रायसो बर' रावनि सल'माखौ राइजो राजाया फरायनाय खाबु मोनदों। 1962 इं माइथायाव ओंखारनाय सित्तरनजन मुसाहारीनि 'जुजायनि अर' सल'मायानो बर' रावनि गिबि मख' थावना सल'मा। बेल' नडा, बर' थुनलाइ बाख्रियाव दासिम सल'मागिरि सित्तरनजन मुसाहारीनि अनगायै रावबो सल'मागिरिया बिथानि बादि बांसिन बिसाननि सल'मा सोरजिनाय नजिर गैया।

मख'थावना फंसे गोनां बाश्राया बेनो दि गुबुन राव-थुनलाइआव सल'माया सुंद'-सल'निखुइ सिगां जोनोम मोनगोदों; बर' थुनलाइआव नाथाय सल'मानिखुइ सुंद'-सल'आसो सिगां जोनोम मोन्दों। प्रम'द सन्द्र ब्रह्मनि सुजुनायाव 'हाथखिर्-हाला' लाइसियाव 1940 इं माइथायाव ओंखारनाय ईशान मुछाहारीनि 'आबारी' सुंद'-सल'खौनो बर' थुनलाइनि गिबि सुंद'-सल' होननानै बुंजाय जादों। नाथाय बै एखे बिसाननि लाइसियावनो प्रम'द सन्द्र ब्रह्मनि लिरनाय "पाग्ली" मुंनि गुबुन दोंसे सल'बो नुजादोंमोन होननानै मोनथिनाय जादों। गुबुन फारसै बर'नि गिबि लाइसि 'बिबार'नि गिबि बोसोर गिबि बिसाना (एप्रिल, 1924 इं माइथाय) सतीश सन्द्र बसुमतारीनि लाखुमानाय मुं (Pen name) रंदिनी फाग्लीनि मुडै 'दाव-संबायनाय' मुंनि सुंथाब सल' दोंसे ओंखारो।

गोजौआव मख'नाय जादों दि बर' थुनलाइनि बाख्रियाव सित्तरनजन मुसाहारीनिखुइ अनजिमायाव बांसिन बिसाननि सल'मा रावबो भान्दारी जगायनो

हायाखै। बिथानि गुबुन गोनां गोनां सल'माफ्रा जादों— 1. जुजायनि अर (1962), 2. बिखाया गाबो खुगाया गेवआ, 3. फुलमति (1983), 4. गोरोन्थिनि उनाव (1970), 5. गार्लस ह'स्टेल (1981), गिबिखोन्दो), 6. गार्लस ह'स्टेल (1982) (नैथि खोन्दो), 7. आं नीलिमामोन (1983), 8. नोंनि मेगनानो आंनि मेगन, 9. शार्मिस्टा, 10. आं नेनानै थागोन (1985), 11. क'लगार्ल, 12. सुजाता, 13. बिलोगो (1986), 14. मोदै, 15. उनदाहा (1987). 16. जिउनि लामायाव (1988), 17. बारसे बिबार माथाम बांभ्लेया, 18. बिबारजों दासुनाय, 19. हाबानि आसथाम, 20. फानजारिनि दाव, 21. नोंनि थाइसे मेगनानो आंनि मेगन, 22. अन्थायनि मोदै (1987), 23. दावखा बाहा, 24. नोंखौ मोनाबा (1992), 25. खितिर (1993), 26. लेहायनाय बिबार (1994), 27. ग'लाप बिबारनिसु (1995), 28. आं नोंनि नों आंनि (1996)।

सित्तरन्जन मुसाहारीनि सल'माफोरा गोबांआनो आखु गाहाइ सल'मा। नाथाय खाइफा सल'मानि आखुथाया आखु गाहाइब्लाबो आखुफोरखौ रोखायै बेरखांहोनो हायाखैबादि नुनो मोनो। 'मैहर' सल'मानि सल'मागिरि, राइथायगिरि मुश्री धरणिधर औवारीनि बादिब्ला—'मुसाहारीनि सल'माफोराव समाज-जिउनि सुबुडरि सावगारिखौ दांग्रोमनानै मोननो गोब्राब। सल'माफोरनि जाथाइआ बांसिनानो र'मान्टिक आरो लोरबां नाथाइ भावथिनारि। खाइसे सल'मानि जाथाइखौ जेथोगोनां खालामनो थांनायाव आखुफोरा लामा आन्दायनाय जालांदों।' Prof. Madhura Boro आबो सित्तरन्जन मुसाहारीनि सल'माफोरनि सोमोन्दै बुंदों—'He was contributed maximum number of Novels, but in appeasing he will be appreciated if he can produce standard Novels than commercial ones to maintain morality and to established sound change in the society'.

खन्थाइगिरि रामदास बर'नि रावै मुसाहारीनि सल'माफोराव बायदिसिना जाथाइफोरा सौदावसौसि जादों। सौदाव-सौसि जाब्लाबो सुजुथाइ खुन्दुंआ हरखाब जनानै बबेयावबा गोमनाडखै।' बिथानि बादिब्ला मुसाहारीनि गासै सल'मानि जाथाइफोरा (Plot) गोगगो। खाइफा जाथाइफोरा गाहायै गोसो थोज्लायनायनि आरो बेनि जाहोनाव नुजानाय हांमा-हांसानि। खन्थाइगिरि रामदास बर'आ सल'मागिरि सित्तरन्जन मुसाहारीखौ बुंदों—'सल'मागिरि महरै सित्तरन्जन मुसाहारीनि बैसोआ बयनिबो बांसिन। बिथानि लिरनायफोरा राफोद

जाबाय। बिथांनि लिरनाय फोरख्रौ फरायब्ला खाबुनि (technic) फारियाव हिन्दी सल'मागिरि प्रेमसान्द, बडालि सल'मागिरि बंकिम सन्द्र आरो शरत सन्द्र चट्टपाध्यायखौ गोसोआव गोग्लैफैयो।' (लाइथुन-दिहुन गादाइन, बिलाइ—153-154)।

'बोरदावली सिफुं'नि खन्थाइगिरि सर'ज बैसोमुथियारीया बुंदो—'सित्तरन्जन मोसाहारीनि बांसिन सल'मानि theme आ मोजां मोननाय, लाइमोन बैसोनि सेंग्रा सिखोला Romance खौ बिथाड जेन' माहारिनि (Society) बिखानिफ्राय थर्ल बख्ल'नानै लाबोना सल'मानि फानजारिआव दोननो नागिरदों। ... बबेखानि सल'माफोरा सम आरो मुगाजों गोरोबदों जानांगौ; फरायग्राफोरनि गोसोआ नडब्ला मानोथो गार्लस ह'स्टेलखौ एड्भान्स बुकिं खालामनो नागिरो?'

सल'मागिरि मन'रन्जन लाहारीया खारलुं (1976) आरो हायना मुलि (1985) मुंनि गांनै सल'मा बर' थुनलाइआव भान्दारि होदों। खन्थाइगिरि रामदास बर'नि बादिब्ला बिथांनि सल'मायाव गुदिनिफ्राय जोबजासिम बाइदिसिना जाथाइफोरा गाहाइ बिबान रुजुनदों। रामदास बर'वा बुंदों 'मन'रन्जन लाहारिनि जाथाइफोरा बर' सुबुंनि गोजों सावगारि। बिथांनि 'हायनामुलि'खौ फरायब्ला Lord Lytton नि The Last Days of Pompei नि जाथाया गोसोआव नुजाफैयो।' गावनि लुबैनायखौ जाफुंहोनो थाखाय खायफाया बेजालि, दाइना-भुद बाइदिसिना गात्रि खामानियाबो, बे आखुवा 'हायना मुलि'याव बेरखांदों।

'खारलुं' आ लाहारीनि गिबि सल'मा। बर'नि खारलुं हुदाखौ बे सल'मायाव गहेलनि आखलजों फोरमायनाय जादों। जिउनि सानमिजों गाब फुननायखाइ 'खारलुं'आ गोथाव जादों।

'मैहुर'आ धरणिधर औवारीनि राफोद आखाइजों सोरजिजानाय गांसे मख'थावना सल'मा। हाग्रानि बेदर जाग्रा जुनारखौ मैहुर खालामनानै जानाय आरो बर'फोरखौ रिजार्थ फरेस्टनिफ्राय होखारनायखौ बिथा खालामनानै 'मैहुर'खौ फसंनाय जादों। बिथा खालामनानै लिरनाय आयदानि सायाव सल'मागिरिया जाफुंसारदों। 'मैहुर'नि सोमोन्दै Prof. Madhuran Boro आ बुंदों— 'The Novel is a successful one consisting of Bodo social picture with religion, economic, cultural, educational, literary and Linguistic view bounts. 'सल'मागिरि आरो बिजिरगिरि मन'रन्जन लाहारीयाबो 'मैहुर'नि आखुफोरनि सायाव बुंदों—'each and every character of the novel is an individual endowed with personality'. मैहुराव आथिखालनि

बर' माहारीनि सुबुं-माहारि, हारिमु सोदोमस्रियारि, धोरोम-राजखान्थियारि आरो सुबुं फोथाइथिनि सावगारिया रोखा बेरखांदों। थुनलाइ बिजिरगिरि मुश्री राखाव बसुमतारीनि रावै— 'बर' सल'मानि जारिमिनाव 'मैहुर'नि बेसेना गोबां। बे सल'माजों सल'मागिरि धरणिधर औवारीया बर'फोरनि राइजो जानायनि जिउ सावगारिखौ बेरखां होनो थाखाय नारा-नाथा नाजादों।

सल'मागिरि सित्तरन्जन मुसाहारी, मन'रन्जन लाहारी आरो धरणिधर औवारी मोननि अनगायै गोबां मख'थावना सल'मागिरिफोरा बर' राव थुनलाइआव बिथांमोननि सोरजिसुला आखुजों सल'मा सोरजिनानै थुनलाइनि बाख्रिखौ गोगोम खालामदों। गाहायाव मख'थावना बिब्दि माखासे सल'मागिरिफोरनि सल'माखौ होनाय जाबाय।

फारिनं	सल'मागिरि	फारि नं	सल'मानि मुं	नुजानाय माइथाय
3.	रामचन्द्र बसुमतारी	32.	खाफालनि बोसोन	(1972)
4.	परमेश्वर ब्रह्म	33.	पियारि	(1972)
5.	नबीन औवारी	34.	बैसोनि देंखो	(1977)
6.	बिरेश्वर बसुमतारी	35.	जौमोननि बरसा	(1978)
7.	राजेन्द्र ब्रह्म	36.	फैमाल	(1979)
8.	कामाख्या चरण नांजारी	37.	हांमा	(1980)
9.	नन्देश्वर दैमारी	38.	मन्जुबाला देवी	(1980)
10.	बुद्धेदेब बसुमतारी	39.	दैथुन	(1980)
11.	जाराफाग्ला	40.	बिसनि लैथो	(1981)
12.	हांमा	41.	आनरनि जिउदिछ	(1981)
13.	समरजित कुमार ब्रह्म	42.	मालती	
		43.	हिन्जाव गोदान	
14.	नबीन मल्ल बर'	44.	देवजित, मलिना आरो	(1983)
15.	मन'रन्जन लाहारी	45.	डन कुइक्सद(रा:सो)	(1982)
16.	रुधीर ब्रह्म	45.	खाफालनि बोसोन	(1983)
17.	कान्तेश्वर ब्रह्म	46.	फागुनी	(1984)
		47.	औरै जेबोला	(1984)
		48.	निजरा	(1986)
18.	हरेश्वर बसुमतारी	49.	थैजों दुगैनाय उदां	(1984)
			बोथोर	

- | | |
|----------------------------|---------------------------------|
| 19. हाबिला बसुमतारी | 50. फाखन फैसालि (1985) |
| 20. जि. आर. बसुमतारी | 51. गोरोन्थिया आंनि नड (1985) |
| 21. बिष्णुज्योति कछारी | 52. बांग्रिं (1985) |
| 22. पानीराम दैमारी | 53. बोलो ना गियान (1990) |
| 23. दैमालु बर' नार्जारी | 54. मन्जुलानि सिददावनाय थै |
| | 55. अलखद (1991) |
| 24. जाराफागला | 56. ईशादी (1988) |
| 25. फुंरजे | 57. इन्दुमुथीनि मोदै (1987) |
| 26. बेनुधर बसुमतारी | 58. हेलेन केलार(रा:सो:) (1988) |
| 27. हरेन्द्र सन्द्र दैमारी | 59. सल'नि सल' (1982) |
| 28. नालेब इस्लारी | 60. जाइख्लं (रा:सो:) (1988) |
| 29. अरन राजा | 61. हरै मारुआव (1990) |
| 30. उत्तम मोसाहारी | 62. थरथिंसे थैनि बेसेन (1991) |
| 31. जोंसार | 63. जारिमिननि फैसाली (1992) |
| 32. नीलकमल ब्रह्म | 64. जावरीया (1992) |
| 33. ननीग'पाल ब्रह्म | 65. कल्याणी नों आंनि (1992) |
| 34. रत्नेश्वर ब्रह्म | 66. फरेस्तार (1992) |
| 35. तीरेन बर' | 67. बिग्राय आरो डैम्राय (1992) |
| 36. प्रम'द सन्द्र बसुमतारी | 68. मोदैनि बाना |
| | 69. गोरोन्थि लामायाव (1993) |
| 37. अनिप सन्द्र बसुमतारी | 70. ललिता (1995) |
| 38. सिबेन्द्र ब्रह्म | 71. गुमै (1995) |
| 39. धीरेश्वर बर' नार्जि | 72. जीउ गाग'लांनाय सान(1995) |
| 40. बिस्टराम औवारी | 73. अरगें (1995) |
| 41. रुपनारायण मुसाहारी | 74. फेलेंजुलि (1995) |
| | (रावसोलायनाय—पराभुत प्रेम) |
| 42. कमलस्रां मोसाहारी | 75. सुजुफिनजायै गोरोन्थि (1996) |
| 43. ग'पीनाथ मोसाहारी | 76. खैना खुबेर (1996) |
| 44. मीना खेरकाटारी | 77. गोबोंनि रादाय |
| 45. नीलकमल ब्रह्म | 79. आदै टमनि डेरा |
| | (राव सोलायनाय) |
| 46. मगेश नार्जारि बर' | 81. गोथार थुलुंसि (1997) |

गोजौआव रेबग्राजों लोगोसे जों मोदांनाय सल'माफोरनि मुं सल'मा नुजानाय माइथायखौ होनाय जादों। मोनदांहायैयाव गासिबो सल'मानि मुंखौ होनो हायैनि थाखाइ निमाहा बिदों।

1962 इं माइथायाव सित्तरन्जन मोसाहारीनि 'जुजायनि अर' सल'मा ओंखार जेननानै 1969 माइथायसिम बर' थुनलाइनि फोथाराव सल'मानि बाख्रिखौ आरोबाव लान्दां बादि नुनो मोनो; 1970 माइथायाव मोसाहारीनिनो 'गोरोन्थिनि उनाव' सल'माया बे लान्दां बाख्रिखौ मोजोमसे भान्दारि होयो। बिब्दिनो 1972 माइथायाव रामसन्द्र बसुमतारीनि 'खाफालनि बोसोन' आरो परमेश्वर ब्रह्मनि 'पियारि' ओंखारनानै 1975 माइथायसिम बर' सल'मानि बाख्रिया लान्दा-खान्दा जाफिनो। उनाव जेनिबा मन'रन्जन लाहारीनि 'खारलुं' (1976) आरो कामाख्या सरण नार्जारीनि 'हांमा'या (1976) लानदां बाख्रिखौ सुफुंनो नारा-नाथा जानजि खाफ्रायो। बिब्दिनो समजों गोरोबनानै थाद' थाद' माब्लाबा लिनथ्रि बाइदि सल'मागिरिनि आखाइआव बर' सल'माया थुनलाइनि बाख्रिखौ गोख्रों खालामनो हायाखैब्लाबो निखावरी खालामाखै। बुंनो थाडेब्ला बिजाब महाराव नुजानाय सल'मा बिजाबा सुंद'-सल', खन्थाइ बिजाब एबा थुन भावथाइ बिजाबफोरनिखुइ बिसानाव बांसिन।

सुबुं जिउनि गांनाय-उखैनाय, मिनिरंजा, दुखु-दाहाफोरखौ आबुं महर होनो हानायनो सल'मानि जाफुंसारनाय। बिब्दि जाफुंसार महर गैया होनजाया बर' सल'माफोराव।

1977 माइथायाव ओंखारनाय नबीन औवारीनि 'बैसोनि देंखो' आरो 1978 माइथायआव ओंखारनाय बिरेश्वर बसुमतारीनि 'जौमोननि बरसा' सल'मागानैया सेंग्रा सिखोला मोजां मोनलायनाय आयदानि सायाव सोनारनाय सल'मा। मख'थावना दि, आगोमा जिउखौ खोमानाडब्ला बिरेश्वर बसुमतारीनिफ्राय जों आरोबाव बेसेन बहा थुनलाइ सोरजि बर'सा खालामजागौमोन। नबीन औवारीनि 'बैसोनि देंखो' सल'माया बै समाव ओंखारनाय 'आबिर' लाइसियाव लिनथ्रियै नुजादोंमोन।

1980 माइथायाव ओंखारनाय नन्देश्वर दैमारीनि 'मन्जुबाला देवी' आरो 1981 माइथायाव नुजानाय जाराफाग्लानि 'बिसनि लैथो' सल'मा गानैखौ बिजिरगिरि राखाव बसुमतारीया गावनि 'थुनलाइ बिजिरनाय' बिजाबाव डिटेकटिभ (संगालियारि) सल'मा होननानै बुंदों। 'बिसनि लैथो' सल'माखौ

आमेरिकान स्टाइलजों सोरजिनाय जादों। गोजौ फरायसालियाव फरायब्लानो मोनथांखा बैसोजों लिरनाय नन्देश्वर दैमारीनि 'मन्जुबाला देवी'या सुंद'ब्लाबो गांसे गनायथावना सल'मा। सल'मायाव Dialogue फोरा गोखों जादों, बर्नायथिफोरा राफोद जादों जेन' नन्देश्वर दैमारीया बेखौ बैसो रानानैसो सोरजिदोंमोन।

नन्देश्वर दैमारीया सल'मागिरिल' नड सासे राफोद सुंद'-सल' रेबग्राबो। बिथांनि 'थांनायनि दावहा' आरो 'बक्सिं'आ बेनि इसादी। दैमारीनि सोरजिफोराव गुबै दरडीया बर' सोदोबनि खहाब गोनां बिदै मोनो, राव-थुलाइ जौगानाय बिधिडव बियो बरायथावना। जाराफाग्लानि गुबुन गांसे सल'माया—'ईशादी'। बेयो 1988 माइथायाव ओंखारो। बेयो गांसे गोजौ थाखोनि नाथाय गोदान आथालनि सल'मा।

बिजिरगिरिफोरनि बादिब्ला 1982 माइथायनिफ्राय बर' सल'मायाव मोनसे सोमावसारनायनि नेसोंन नुनो मोनो। बे राइथायनि रेबग्रायाबो 1983 माइथायाव 'देबजित, मलिना आरो ...' मुंनि सल'मा गांसे फारायग्रा राइजो-राजानि आखाइआव होयो। थुनलाइ बिजिरगिरि मुश्री राखाव बसुमतारीनि बादिब्ला—'नबीन मल्ल बर'आबो गावनो आन्था सल'मा सोरजिदों। सल'मानि मुड देबजित, मलिना आरो ...' गोदान आथालनि आइजो राइथायगिरि स्वर्ण प्रभा सैनारीया बुंदों—'नबीन मल्ल बर'नि सल'मा 'देबजित, मलिना आरो ...' आ गांसे मख'थाव सल'मा। बेयाव सल'गिरिया देबजित, मलिना आरो गावनि लोगोजों लोगो अनलायनाय, बोराबलायनायखौ लानानै लिरदों। नन्देश्वर दैमारीनि बादि बे राथायगिरिनि सल'मायाबो सेंग्रा बैसोनि मोनथांखा बैसोजों रनसायनानै गोबावनि उनाव सेबखां जानाय सल'मा। सल'मानि 'लांगोना'याव खन्थाइगिरि आरो सल'मागिरि बिष्णुज्योति कसारीया बुंदों—'बर' हारिमानि गोदान सानसुमाफोरा जा सानदों, जा जौगाखांनाय लाबोनो नाइगेरदों हारिनि जुनै, बिफोर Underlying sentiments नि खाइसेखौ सोदोब आरो रावनि गोथां सावगारियाव रोखायै बेरखां होनो नाजादों नबीना। ... सोरजिजेननायनि उन्दै-उनला, आउवा-आवधि बे सल'मायाव गैया होनानै बुंजाया, फोसाबजागोन।' सल'मानि लोगोसे नबीन मल्ल बर'खौ सुंद'सल' आरो दावबायनाय सल' लिरनाय नुनो मोनो।

1987 माइथायाव नुजानाय फुंरजेनि 'इन्दुमती' आरो बर' सुंद'-सल'नि सम्राट नीलकमल ब्रह्मनि (1992 माइथायाव ओंखारनाय) 'मावरीया' सल'मा

गांनैखौ जारीमिनारी सल'मा होनना बुंनो हागौ। जारिमिननि बै समाव जाफ्लेबाय थानाय बर'नि सायाव गंगारनि (सिमसा) खैसारीफोरखौ महर होनो थानायाव सल'मागिरि नीलकमल ब्रह्मवा जाफुंसारदों। Dialogue आखल सोरजिनायाव इसेबो फेलें जायाखै सल'मागिरिया।

उत्तम मोसाहारीनि 'थरथिंसे थैनि बेसेन' (1991), तीरेन बर'नि 'बिग्राय आरो दैम्राय' (1993) आरो जोंसारनि 'जारिमिननि फैसाली' (1992) खौ बिग्रायारी सल'मा सारियाव लाबेनो हायो। बिजिरगिरि राखाव बसुमतारीया बुंदों— 'तीरेन बर'आबो गांसे गोजौ थाखोनि बिग्रायारी सल'मा सोरजिबाय। बिबो सल'माखौ आखाइ होबाय थायोब्ला गोखों सल'मा सोरजिनो हागोन। तीरेन बर'नि 'बिग्राय आरो दैम्राय'आ बिग्रायारि सल'माब्लाबो बेयो राजखान्थियारि सल'मा बर'लेण्ड सोमावसारनायनि गुबै सावगारिखौ सल'मागिरिया गावनो बिजाबनि 'आंनि फंनैसो आव बुंदो—'बर'लेण्ड सोमावसारनाया गुबैयै मोनसे राजखान्थि सोमावसारनाय। बै सल'माखौबो बे सोमावसारनायजों लोब्बा लाखिनानै लिरनाय जादों। गुबुयै बियो गांसे सामाजिक (Social) सल'मा होननानै बुंनंगोन।'

अरन राजानि 'हरै मारुआव' (1990) सल'मायाबो गांसे मख'थावना सल'मा। सेंग्रा-सिखोलानि मोजां मोनलायनाय सावगारिया बे सल'मायाव बेरखांदोंब्लाबो जौआ बर' हारिनि खाइफा नखरखौ माबादि सिलिंखार खालामदों बेखौ दिन्थिनाय जादों।

गोदान आथालनिफ्राय गोदान लिरगिरि मुझी बिस्टराम औवारीनि 1995 माइथायाव ओंखारनाय 'अरगें'आ गांसे मख'थावना सल'मा। सल'मानि मोखां बिलाइआव बर'नि गागि सानसुमै लिरगिरि मुझी रामचरण ब्रह्मआ बुंदों— 'जेबो गिज्रा एबा फरायथावै राव बाहायालाबानो सेंग्रा बैसोनि बे सल'मा लिरगिरिया सल'खौ बुंलानो हानाया मोनसे गेदेर देरहानाय।'

बर' सल'मानि बाखियाव आइजो सल'मागिरिनि आंखाल। दासिम जों सानैल' आइजो सल'मागिरिनि मुं लानो हायो। सासेया नालेब इस्लारी आरो गुबुन सासेया मीना खेरकाटारी। नालेब इस्लारीनि बेलायाव आइजो सल'मागिरि बुंनायनिबो इसे आख'-फाख' जायो, मानोना इस्लारीनि 1988 माइथायाव ओंखारनाय 'जाइख्लं' सल'माया राव सोलाइनाय सल'मा। होनब्लाबो आइजो सल'मागिरिया बेखौ गावनि गोर्बोनिफ्राय ओंखारनाय बादि खालामनो हादों।

1996 माइथायाव ओंखारनाय मीना खेरकाटारीनि 'गोर्बोनि रादाय' सल 'माखौ गोदान आथालनि आइजो रेबग्रा स्वर्ण प्रभा सैनारी आरो सल 'मानि दिहुनगिरिया आइजोनि गिबि सल 'मा होननानै दाबि खालामदों। गोदान आथालनि लिरगिरि मुझी उथ्रिसार खुंगुर बसुमतारीनि बादिब्ला—'गुबैयै मीना खेरकाटारीनि 'गोर्बोनि रादाय' सल 'माया Love theme खौ मिरु (base) खालामनानै लिरनाय गांसे समाजारि र'मान्टिक सल 'मा। सल 'मानि Plot आ थोंगोथों मोनसेल' आरो गुसुं। सुंद'-सल' दोंसेयाव खहाबथावै लिरजोबनो हानाय बादि।' एखे सानस्रिजोंनो स्वर्ण प्रभा सैनारीयाबो बुंदों—'बिथानि (मीना खेरकाटारी) सल 'मानि आखु दानाय एबा जाथाइफ्रा एफाग्राब गोख्रों जायाखैब्लाबो बेयो थारदि बिथाड बे सल 'माखौ सोलिबाय थानाय समजों गोरोबहोनानै लिरदों। नडब्ला बिफाया मैनानि थाखाय सायख'नाय अलंबारखौ जोगारनानै गावनि जिउजुथि साइखंनि जानानै मैनाया बिफाजों बाथ्रा दानथेलायनो हानाय नडमोन।' बेफोर जायखिजाया मानो आइजो सल 'मागिरि महरै मीना खेरकाटारीया 'गोर्बोनि रादाय' सल 'मानि गेजेरजों बर' सल 'मानि गोर्बो बाखियाव हाबनो हाबाय।

1995 माइथायाव ओंखारनाय मेथाय लिरगिरि मुझी धीरेश्वर बर' नार्जिनि 'जिउ गाग'लानाय सान' सल 'माखौ दासिम रावबो बिजिरगिरिया मख'नाय नुनो मोनाखै। मख'नाय सल 'माखौ सल 'मागिरिया थाइजौगुरि गामिखौ बिथा खालामनानै बै हालामनि हारिमु गुस्लायनायनि सावगारि होनो नाजानाय जादों। सल 'मानि खाइफा (बाथ्रा राइज्जलायनाय) (Dialogue आ economy जायाखैब्लाबो बर्नायथिया गोख्रों जादों। सल 'मानि सोमोन्दै बै समाव 'बर' रेबग्रा जथुम'नि आफादगिरिनि मासिनिफ्राय बिजाबनि 'बुंफोरनाय' आव थुनलाइगिरि मुझी दलेश्वर बर'वा बुंदों— 'बे सल 'माया दाबसे हाजो आफानि थाइजौगुरि गामिनि सल'। ... बै समाव बर'फोरहा हानि आंखाल गैयामोन, हादान सिफायब्लानो हा मोनोमोन। ... सम बारस्लायनाय लोगो लोगो बर' गामि सेर सेर लांदां जायगायाव गुबुन हारिफ्रा साग्लोबफैबाय'।

गोजौआव सम आरो खाबुनि आंखालाव गांनैसो मख'थावना सल 'माफोरखौल' सुंद'यै सावरायनाय जाबाय। जों गोजौ थाखोनि सल 'मा मोनफुंनो हायाखैब्लाबो सम आरो बोथोरजों लोब्बा लानानै साम' लेंग्रिनि आगानजों दावगाबोनाय सल 'मानि बिसानखौ खमद्राय बुंनो हाया। जों मोनथिगौ, दाबोनो बर' थुनलाइनि बाखियाव आंखाल गुबुन' रावनि गोजौ

सल 'माफोरनि बादि, जारिमिनारि सल 'मानि, राजखान्थियारि जाफुंसार सल 'मानि। सम सम बर' राइजो राजाया बर'नि आगोमा मोजोमसे लिरगिरिफोरखौ आजोर दैखांबोदों—बर' रेबग्राया गोजौ थाखोनि थुनलाइ सोरजिनो नो हायाखै। बेनि फिननायखौ जोंबो थोजों होनो हाया। मोजोमसे बर' रेबग्रानि थुनलाइ सोरजिखौ सेबखांनो ओंखारबोदों साबोसे दिहुनगिरि? सानैसो दिहुनगिरिया गावनि सिफिनि रां बाहायनानै दिहुननाय आगोमा बर' बिजाबनि Capital money खौ मोनफिनदों साबोसे? गेदेमा थुनलाइ बिजिरगिरि जाफुंसार 'अखां गंसे नांगौ 'नि खन्थाइगिरि मुझी ब्रजेन्द्र कुम्र ब्रह्मआ सम सम थुनलाइआरि आफाद फोराव बुझे—'रोजासे बर' बिजाब साफाइनानै दिहुनब्ला फाननो सम लायो बोसोरथामनिफ्राय बोसोरबासिम।' फोजोबनायाव बर' थुनलाइ जौगानाय, फेहेरनाय, देरहानाया साफ्रोम बर' फिसानि आखाइआव। ■

ना:गो: —

बे रायथाया दरं जिल्ला बड' साहित्य सभानि 33थि बर' बाजार जथुम्मानि (2002 माइथाय) सावरायमायाव फरायथिनाय। —सुजुगिरि

दौरि गामि-देउरी गाँउनि सुंद' जारिमिन

—महन्त कुमार ब्रह्म



महन्त कुमार ब्रह्म (1952) : दरंनि गोजाम थुनलाइ मावथि। बिथानि नआ रौतानि गेरुवाबाजाराव। बिथाड गेरुवा गेजेर फरायसालिनि गाहाइ फोरोंगिरि।

खेराय जेन्नाइ

बे थावनिया (मंगलदै जिला बर' थुनलाइ आफादनि गा 11थि बोसोर जुथुमा जानाय थावनि) गेरुवा बाजार। नाथाय बे मोनसे जायगानि मुंसो। बे माइथायारि जुथुम्मा थिलिनि मुड दौरिगामि डेउरी गाव फोथार। बे जुथुम्मा थिलिनि साहा 1 माइल गोजानाव मोनसे फिसा आरो बर' गामि दं। जायनि मुड आथिखालाव देउरिगाव होन्नानै मख'जायो। बे गामियानो बर'फोरनि मोनसे गोसोखांथाव जारिमिनखौ दैबो गामिनो दड। 1947 माइथायनि उनावसो बे गामियाव आथिखालनि 1नं देउरी गाँव मोनो। (आलिसिड होन्नानैबो मिथियो।) नाथाय बिनि सिगाडव बे गामिनि मुड दौरिगामि गुबै बर'नि मुंसोमोन। 1546 माइथायाव कोच राजा महाराज नरनारायना आहोम फोरजों दावहायाव देरहानानै देरहासार गिदिनाइ (दिग्विजय) थांखियै फंबाइ सिलारायखौ लोगोआव लानानै गावनि गुबुन आगोमा फंबाइ गोहाइ कोमल खोनाइ बुर्लुबुथुर दैमानि साहा 380 कि:मि:सो गोलाव 'गोहाइ कोमल' आलिजों कोचबिहार निफ्राइ लक्ष्मीपुरनि नारायनपुरसिम आगान सुरलाडे। अब्ला बिसोरो बे लामानि साहा थानाइ बे दौरि गामियावबो गुबुन गुबुन जायगायाव खेरायबोनाइ एबा खेराइ लांनाइ, बोलि होलांनाइ (केचाइ खायथि मोदायनो) बायदि खेराय लांदोंमोन आरो बोलि होलादोंमोन होन्नानै फोथायो। बे समनि फ्रायनो बे गामियाव शिवरात्रि फुजानि सम-समबो खेराइ जाहोयो। खेराइ जेन्नाइ समनि गिबि दौरिनि मुड लाबगा दौरिमोन। बै समनि दौरिनि मुड सराइ दौदिनि

आरो लांगा बुरैमोन। बिसोर दौरि गामिनि खोलाहायाव माइलसे गोजानाव थानाय भोरागुरि गामिनिमोन। गामियाव दासिमबो बे लाबगा दौरिनि फोलेरफ्रानो खेराइनि दौरि जाबोगासिनो दंबोयो। खेराइसालिया बे गामिनि इसेल' खोलाहा— दाबो बिफां लाइफांजों बुंफबना दं। भालुकमारि कपाटि PWD लामानि सोनाबहा।

आइ थानाव मानसि दान्नाइ

गोजौवाव मख'नाइ खेराइसालिनि से फालासो खोलाहा, लामानि सानजाहा दाबो दखरसे बोरि दुबजां दं लामानि सेरथारावनो बेनो आइनि केचाइ खायथि (मोदाइ) थानसालिमोन आरो दासिमबो। गोदो-गोदाय बेवहाइ सायाव मोन 63 आलारी महरनि फिसा फिसा हाखर दंखायोमोन आरो साहा फांसे, खोलाहा फांसे, खारंखान्दार, आरो सानजाहा फांसे सोनाबहा फांसे शुमलि बिफां दंमोन। सानजाहा थानाइ शुमलि बिफाडा दाबावैसो थैदों। सोरगिदिं अरन-बिरनजों बुंफबनाय बेनोमोन बै समनि मानसि दानग्रा आइनि थानसालिया।

दानजाग्रा मानसिया जेथ दान हाबनाइ लोगो लोगो गाव-गावनो हार्सिंडै मानसिदानग्रा दौरिनि नवाउ नुजा हैयोमोन आरो दौरिया बिनो सान्नैसो लाइजौवाउ ओंखाम होयै होयै दिनोमोन। पुजानि सम जाब्लाथाइ थानसालियाव लांनानै दानहैयोमोन। बिदिनो बयनिखुइबो सिगांथाराव गाब्जा कसारी होन्नाइ दौरिनि बिफायानो मानसि दानबोजेनो बोलि होजेनो। बनि उनाव गाबजा दौरिआबो साथाम मानसि दान्ना (दौरिनि फेलेरफ्रानो बे आइ थानाव मानसिनि अनगा बोरमा दानबाइ थायो—जेथ दाननि पुजानि समाव।)

मथर हमथानाइ

बे मुंख'नाय आइ थानावनो जानानै थांनाइ मोनसे गोमोथाव जाथाइ दड। बेयो नैजिथि मुगानि फोथायथावै जाथाइ जाब्लाबोदि गफा एबा सैथो बेवहाइ जेबो 1947 माइथायनि इसेल' सिगांनि बाथ्राथार। बै समाव बरगरा साहा बागान आरो बायलांनाइ रौता साहा बागाननि सासे इउरुपीयान साहाबानो दैदेनोमोन। सानसेखालि बेयो बरगरा बागाननिफ्राइ रौता बागानाव थांदोंमोन—गंसे जीप गारीयाव गाखोनानै। बै समनि अरन गेजेरजों रौता कौपाटि आइनि लामायानोल'मोन बागाननि फिसा लामा। जेब्ला बियो मटरजों आइनि थानसालिहालागै मोनफैयो लागै मोनफैयो अब्ला मटरनि इन्जिनफ्रानो खामानि मावा जानायसै। प्छार्ट

खालामब्लाबो प्छार्ट जाया, गाञ्जि जानायनिबो फोरमान गैया। साहाबनि बे दुखुखौ नुनानै गिलुं गिलुं बै समनि सासे होलुवाया बेउहाइ मोदाइ थानाय आरो बोरमा बोलि होनांगोनि बाथ्राखौ फाव—फेसन आरो थं-थं, थां-थां बर' जाजोबै हासा जाजोबै बाथ्राजों साहाबनि सिगांडव बुंफोरसै। बै समाव हाग्रा जिनायजों आरो सरकारा मानसि दान्नाइ हुदाखौ बेआइन होन्नानै आइन खलामनायाव मानसि दान्नाइ हुदाया गैलामोन) बे बाथ्राखौ मिथिनि मोन्नानै मोदायदावदै फोथायै इउरुपीयान साहाबा रागा जोंदोंमोन आरो थाबायनानै बागान बागान गिदिं लांफिन दोंमोन। बे रागाजोंनो साहाबा कामारनिफ्राय लहानि बोरमा दाहोनानै आइ थानाव लाबोदोंमोन आरो दौरिखौ लेंहरदोंमोन। बे समनि इउरुपीयान साहाबनि थिन्नाइ। गिसां-गसाडैब्लाबो दौरिया साहाबनि खाथियाव फैदोंमोन। अब्ला साहेबा दौरिनो नांदर (एला बिफां) बिलाइ होनानै लहानि बोरमाखौ दान्ना थिनो थानसालियाव। थांखिया माबायदि बोलि जाग्रा मोदाइ आन्जाद नायनाइ। दौरिया अब्ला गिबांसिन (साहेबखौ) गय फाथै जरा होनानै गासा लगायनानै बिमाखौ गोसो गोबों होनानै रायमनदोंमोन आरो सिबिदोंमोन। बिनिफ्राइ नांदर बिलाइजों आइनि मुडव बोलि होदोंमोन। बेसेबा गोमोथाव बाथ्रादि लहानि बोरमाया नांदर बिलाइजोंनो थबस्र जनानै सें सें थै गदोंमोन। बे लहानि बोरमाखौ गाबजा दौरिनि उननि दौरियानो दान्ना मोन्दों मोन। बे जाथायखौ नुनानै साहाबा गोमोदोंमोन आरो मटराबो अब्लासो प्छार्ट जादोंमोन। बै समावनो साहेबा दौरिनो गंब्रै खुन्दा गैयै सिलाइ (Pipe gun) होलांदोंमोन। मानो होलांखौ बुंस' हाया। जानो हागौ बे जायगानिफ्राइ मोदायखौ गावफुंन खारहोनो। दासिमबो बे सिलायफोरनि मादाव गं थामा दड। गंसेखौ सोरबा खुन्दा लागायनो होन्ना थगायना लांनानै थाहैबाइसो। बे गंथाम सिलायनि गंसेखौ दर गोथै बावब्ला, गंसेखौ आइनि पुजाब्ला गावफुडे आरो गंसेखौ "मेरु" बायदि बाहायो। गोदो साहाबा पुजानि सम सौब्ला बारुदबो हरोमोन।

बे बादिनो बर' धोरुम-हारिमुनि गोबां बेसेन गोनां खेरायनि दौरि आरो नैजिथि मुगानि सोदोमश्रीनि गिखंथाव मानसि बोलि होग्रा दौरिफोर थानायलाइ बे गामिखौ 'दौरिगामि' होन्नाइ जायोमोन।

दानि देउरिगाव—दौरि गामिनि आगोमा बर' फिसाफोरखौ जोंहा बाख्जायनो गोनांथार। मानोना बे गामिनि खोला सोनाब खनायाव थानाइ खाथिथारनि गामि माघगोसायाव श्रीश्री शंकरदेबनि गाहाइ सोलोंसा माधबदेबआ

जेब्ला बैष्णव धोरोम फोरसाव फैदोंमोन अब्ला गेरुवानि सोरगिदिं थानाइ गोदोनि
 बर' गामिनि बर'फ्रा गाव गावनि आंगो बाथौ धोरोमखौ एनगारनानै फालो
 फालो बैष्णव धोरोमनि दीक्षा लादोंमोन आरो दाव अमा फिसिनाइ गारनानै
 'नामघर' लुयै लुयै नाग्रा-खल-खावां दामनानै नाम खननो हमदोंमोन अब्लाबो
 सोरगिदिं नाग्रा खावांनि गोमसारनाइ गेजेराव हान्जासेल' जानानैब्लाबो बेफोरखौ
 खोमा फांथेनानै खेरायनि खाम सिफुं जथाखौ गोसो मोदोम जीउ होसारनानै
 रिखां होदोंमोन। आफा बोराइ बाथौखौ बिदिनो दासिम्बो सिबिबोदों। बे बर'
 धोरोम हारिमुखौ लाखिनायनि दावहायाव इसेबां गिदिर देरहानाइ नड। ■

खन्थाइनि दाथाय

—ग'पीनाथ ब्रह्म

ग'पीनाथ ब्रह्म (1963) : रौताया बिथांनि जोनोम जायगा। बिथाड सासे राफोद खन्थाइगिरि, रायथाइगिरि, सुंद 'सल' लिरगिरि। आथिखालाव बिथाड हेम बरुवा हायार सेकेन्दारि फरायसालि (तेजपुर)नि फोरोंगिरि। बिथां सुजुनाय 'रेगा', 'आं मानसि जानायनि आगोलनो बर' जाबाय' गानै खन्थाइ बिजाबा मुंख' जाथाव।

खन्थाइआ माखौ बुडे, बेनि फिन होनाया दाबो जोबोर गोब्राब जानानै दड। खन्थाइनि बिबुंथिखौ फंसे रावजों होनाया गोरलै नड। दासिम खन्थाइनि सोमोन्दै जेसेबां बिबुंथि होनाय जाबाय बेफोरनि गासैआवबो खन्थाइनि आखुथाय थायो।

भारतआरि आरो सोनाबारि लिरगिरि, बिजिरगिरि फुन्देरफोरा गुबुन गुबुन नोजोरजों खन्थाइनि बिबुंथि होलांदों। बेफोरनि माखासेआ गाहायाव होनाय बाइदि।

0:01 भारतआरि फुन्देरफोरनि बिबुंथि :

आसार्य भरतमुनिआ गोजाम संस्कृत फावथायाव खन्थाइनि मोन 36 लैखोन धानायनि बाश्रा बुंलांदों। नाथाय बिथांनि लैखोना नुथाय-खन्थाइ (फावथाय) नि नोजोरजों फोरमायनाय बेखाइनो गासैबो गनाइथाव खन्थाइनि लैखोन होनना मानिजायाखै।

भामहआ खन्थाइनि लैखोनखौ थारला फोरमायना बुंदों—“शब्दार्थो सहितों काव्यम”। सोदोब आरो ओंथियानो खन्थाइ। नाथाय सोदोब आरो ओंथियानो खन्थाइ होननायाव गोबां गोरोंथि दड। सोदोब आरो ओंथिआ सुबुंनि बाश्रा राइलाइनायावबो बाहाय जायो। थेवबो बिथांनि बिबुंथिखौ उननि आसार्यफोरा खन्थाइनि लैखोन दड होनना मानिबोदों। आसार्य रुद्रटआ एसे दाजाबदेरना बुडे—“ननुशब्दार्थो काव्यम”। रुद्रटनि खन्थाइनि बिबुंथिखौ गनाइनानै आसार्य आनन्दवर्द्धन आरो आसार्य अभिनवगुप्तआ बुडे—“शब्दार्थो शरीर तावत् काव्यम”। खन्थाइनि बे देहायाव 'आत्मा' थानांगौ—‘देखो’ आनो आत्मा, आरो बुडे—“ध्यनिरात्मा काव्यम”।

आसार्य मम्मता खन्थाइआव सोदोब आरो ओंथिखौ गोसो होयो।

गोजौआव मुंख 'बोनाय खन्थाइनि लैखोनफोरखौ बारनानै आसार्य विश्वनाथआ खन्थाइआव 'रस' थानांगौ—'वाक्यं रसात्मकं काव्यं'। नाथाय बिथानि बिबुंधियाबो गनाय जाथाव जायाखै।

आसार्य जगन्नाथआ बुडे—'रमणीयार्थ प्रतिपादकः शब्दः काव्यं'। थामहिनबा—'रमणीय' ओंथि फोरमायनाय सोदोबखौ खन्थाइ बुंडे।

सुंद'यै बुडेब्ला, भारतआरि फुन्देरफोरा बिदैखौ नोजोर होना खन्थाइनि बिजिरथि होनो नागेरदों। बेखाइनो "बिदै गोनां रनसाइआनो खन्थाइ"। खन्थाइआव सोदोबनि गहेना गानहोनायानो खन्थाइनि दाथाय होन्दों। नाथाय गहेना गानहोब्लानो खन्थाइ जानो हाया एबा गहेना गैयाब्लाबो खन्थाइजानो हागौ। बेखाइनो उनाव माखासे आदब बाहायना रनसाइनायानो खन्थाइ। बेयाव खन्थाइनि खान्थि एबा स्टाइलखौ बांसिन नोजोर होनाय जायो। सोदोबनि गहेना, ओंथिनि गहेना आरो आदब एबा खान्थि बाहायनाय उनावबो खन्थाइनि बिबुंधिया ओंखाराखै। मानोना खान्थिया खन्थाइनि बेखेवथि जानो हाया। उनावहाय बुंभावनाय जाबाय खन्थाइआव बिदै थायो। बेखाइनो बुंनाय जाबाय—'बिदै गोनां रनसाइआनो खन्थाइ'। बेबाइदिनो मोनगु बिदै—शृंगार (गुदि), हास्य (मिनिनाय), करुण (दुखु), रौद्र (रागा), वीर, भयानक (गिलुबालु), वीभस्य (गिखंथाव), अद्भुत (गोमोथाव) आरो शांत (दद्र)।

0:02 सोनाबारि बिजिरगिरिफोरनि बिबुंधि :

ग्रीक सावरायगिरि अरस्तुनि बादिब्ला—खन्थाइआ मोनसे आर्ट, जायनि गुदि बिथाया सोलौंनाय। बेयो रावनि बिजों जाफुडे। (Poetry is defined as an art, the fundamental principle of which is imitation—that imitation being through the medium of Language.) जनसननि बाइदिब्ला खन्थाइआ "खबामजों रनसाइजानाय लिरथाय।" (Poetry is metrical composition)। कालारिजनि बाइदिब्ला खन्थाइआ साबसिन रोखोमै साजायनाय साबसिन सोदोबनि जथाय।" (The best order of the best words)। कालाइलनि मथेब्ला देंखोआरि साननाय (musical thought)। शेलीनि मथेब्ला—सानबोलावरिनि फोरमायथिनाय (Expression of imagination)। वर्डसवर्डनि मथेब्ला—Spontaneous overflow of powerful feelings. मैथ्यु आर्नल्डनि बाइदिब्ला criticism of life. बेनेदेट' क्रसेनि बादिब्ला—खन्थाइआ मोनसे आर्ट आरो आर्टआ expression.

सोनाबारि सावरायगिरिफोरनि मादाव मोनथाम खोन्दोनि गुबुन गुबुन नोजोर नुयो। क्लासिकेल नोजोरजों बिजिरनाय। प्लेट' आरो एरिष्ट'टलनि बेखेवथिया क्लासिकेल—बिसोर सैथो आरो समाइनाखौ नोजोर होदों।

गेजेर समाव रमान्टिक जुग। बे समाव खन्थाइनि बिदैखौ बांसिन नोजोर होनाय जादों—जिउ आरो बहुमनि बागै गोमोनाय नोजोर।

गोदान मुगानि बिजिरनाया आरो बेखेवथिया गुबुन। टि.एस. इलियटआ बुंदो—poetry is not a turning loose of emotion, but an escape from emotion, it is not the expression of personality, but an escape from personality.

1:00 खन्थाइआव दाथाय एबा महरनि गोनांथि :

खन्थाइखौ जायखि नोजोरजों नाइआ मानो आरो गुबुन गुबुन बिबुंथि होआ मानो खन्थाइआ खन्थाइआनो। खन्थाइआ मोनसे आर्ट आरो खन्थाइनि समाइनाया बेरखाडे खन्थाइनि दाथायावनो। दाथाय होनोब्ला रोखोमसे फोरमायथि आरो महरखौनो फोरमायो। इंराजीआव Form, texture आरो Structure बे मोनथाम सोदोबआ रोखोमसे मुवाखौनो फोरमायो। जों मोनफा मुवा बानायोब्ला बेसादखौ बाइदि बाइदि आदब बाहायना दिहुनो। जैरै माइरंनिफ्राय जुमाइ आरो फिथा। जुमाइ आरो फिथाया गावबा गाव महर थायो मोननैबो मोनसे बेसादनिफ्रायनो दिहुन जानाय। मोननैनिबो मादाव फिथाया सुबुंजों जैरैबादि अनसाइजायो, जुमाइआ नड। फिथाया मेगननि नोजोराव नांथावथाव गथा महरनि। बे बाइदिनो न'खरनि आइजें आइला सियार, टेबोल, सिना साजाइनायावबो समाइनाय आरो बेनिफ्राय गोजोननाय फैयो। बाभ्रा राइलाइनायावबो बान गैयै खोथाखौ खोनासंनो बायो; बे बाइदि नंबांजाबां लिरनाय लिरथायफोरखौ फरायनो गोसो जाया।

खन्थाइनि दाथायाबो गुबुन गुबुन महरनि जायो। खन्थाइनि बे महरनिफ्रायनो खन्थाइनि समाइनाया बेरखाडे। फरायग्राफोरा बे महराव खन्थाइनि समाइनाखौ मोन्दाडे। खन्थाइनि बे समाइनायखौ नाइनानैनो खन्थाइनि दाथायखौ बिजिरनाय जायो।

बबेखानि खन्थाइआव जायफोर मुवा थायो, बेफोर मुवाफोरा खन्थाइआव हाबसोनानै थायो। जों बेखाइनो खन्थाइनि बे मुवाफोरखौ बोफलेनानै बिजिर जोबनो हाया।

खन्थाइनि दाथायाव माखासेमानि मुवा सरजाबना थायो। बेनि दाथायाव जा माखासे मुवा सरजाबना थायो बेयो राइथायाव थानाय मुवाफोरनिफ्राय जोबोर गुबुन। फारसेथिडै खन्थाइआ थुनलाइनि गोजामसिनथार आयदा।

गोदोनि दिनाव खन्थाइफोरखौ जा बाश्रा एबा मुवाफोरखौ नाइसोमनानै लिरनाय जायोमोन आथिखालाव बे मुवाफोरा सोलाइबोदों। दानि दिनाव खन्थाइआव गाव गावनि गोसोनि बाश्राया बांसिन जायगा मोन्दों।

गोदोनि दिनाव खन्थाइखौ जायफोर साननाय हनाइजों लिरनाय जादोंमोन बेफोराव खन्थाइनि मोदोमखौ नोजोर होनाय जायोमोन। बेखाइनो गोजाम खन्थाइफोरा मोदोमनि महरनि सायाव गोसो होजानाय। खन्थाइनि रिखां (Rhythm), खबाम (Rhyme), थाद'नाय, रिसार बादि देंखोआनो खन्थाइ दाथायनि गुदि मुवाफोर। गुबुन बागै सोदोब बाहायनायनि गेजेरजों खन्थाइखौ महर होनाय, खन्थाइनि दाथाया जादों गोसोआरि। बेयो खन्थाइनि गोसोआरि दाथाय (Mental Form)।

2:00 खन्थाइनि मोदोमनि दाथाय :

खन्थाइनि मोदोमनि महर आरो गोसोआरि महरखौ गुबुन गुबुन आरांगायाव दोननानै खन्थाइखौ बिजिरनाया गोरलै बाश्रा नड। मानोना मोननैबो बेजों बेहा सिथाब लाइनानै थायो। मानसिनि मोदोम आरो बिनि गोसोआ जैरै बेजोंबे खौसे—खन्थाइ सोरजिनायाबो बेबाइदिनो, बेनि बाइजोनि महर (मोदोम) आरो सिनि महर (गोसोआरि) जों गुबुन जानो हाया। थेवबो खन्थाइनि बाइजोनि महरनि बिथिनिफ्राय खन्थाइखौ गुबुन गुबुन महराव थाखो राननो हायो।

2:01 रिखां आरो सेवारि (Rhythm & metre) :

खन्थाइ दोसेखौ गोबां खोन्दोजों दानाय जायो। बेफोर खोन्दोफोरखौ खलब (stanza) बुंनाय जायो। मोनफ्रोम खलबआव माखासेमानि सारि थायो। खाइफा खोन्दोखौ सारिनैजों आरो खाइफाखौ सारिब्रैजों दानाय जायो। आथिखालनि खन्थाइ सारिसेजों मोनफा खलब खालामनायबो नुयो। बेबाइदिनो सारिथाम आरो सारिबानि खलब दानायबो नुनो मोनसै। खन्थाइनि सारिफ्रा खन्थाइ खलबाव खबाम सोरजिनायनि खोन्दो।

खन्थाइनि मोनफा सारिखौ माखासे खोन्दोआव रानबावनाय जायो, बे खोन्दोफोरखौ मोनफा आगान (Foot) बुडे। बे आगानफोरखौ आरोबाव माखासे फिसा फिसा आगानसायाव रानबावनाय जायो। जायफोरखौ गुबै रावै सोदोब बुडे-बेयो खन्थाइनि मोनफा मोनफा आगानसा।

सोदोबफोराव फिसा फिसा माखासे खोन्दो थाबावो बेफोर सोदोबखोन्दो एबा हांखो (Syllable)। मोनफा सोदोबखौ गारांबोब्ला माखासे रिसार फैयो। बे बाइदि गारांबोलो होनायाव रिसारनायफोरा मोनफा रिखां (Rhythm)।

रिसारफोरखौ माखासे जखा लानानै सुनाय जायो। बे जखा (Measure) आनो मोनफा सेवारि (metre)।

गुबुन रावै बाश्ना बुंब्ला रिखांनायाव माखासे दोहौ सोमजियो आरो बे दोहौखौ मोन्दां हायो—बेनो रिखां (Rhythm)। आरो बे दोहौखौनो माखासे जखार्जो फारियै रानोब्ला बेखौ बुडे सेवारि (metre)। गुबैयै गारां बोलो होनायखौ नाइना रिखां (Rhythm) खौ थि खालामनाय जायो।

खन्थाइनि सेवारिखौ सोदोब खोन्दो एबा हांखोनि गोरा गारां आरो गुरै गारां नाइना थि खालामनाय जायो। जायफोर सोदोबखोन्दोखौ मुंख'ब्ला बोलो होनांगौ जायो बेयो गोरा गारां आरो खम बोलो होनांगौ जायोब्ला गुरै गारां बुडे। खन्थाइनि आगान मोनफाया बे गोरा गारां आरो गुरै गारांनि जथायजो जायो आरो बेखौ जखा लाना सुनाय जायो।

2:02 इराजी खन्थाइनि गाहाइ आगानफोरा गाहायाव होनाय बादि :

Iambic : गुरै गारांनि उनाव गोरा गारां फैनाय

Anapaest : गुरै गुरै गोरा।

Trochee : गोरा गुरै।

Dactyl : गोरा गुरै गुरै।

Spondaic : गिबि मोननै गोरा गारांनि आगान थानाय।

Pyrrehe : लोगोसेयैनो मोननै गुरै गारांनि आगान थानाय।

2:03 खन्थाइनि सारिआव थानाय आगाननि अनजिमाखौ लानानै माखासे सेवारि मुंआव राननाय जायो।

आगानसे — मुसे (monometre)

आगाननै — मुनै (dimetre)

आगान थाम — मुथाम (trimetre)

आगान ब्रै — मुब्रै / जखाइ (tetrametre)

आगानबा — मुबा (pentametre)

आगान द' — मुद' (hexametre)

आगानस्नि — मुस्नि (heptametre)

आगानडाइन — मुदाइन (octametre)

गाहायाव सेवारि जखा दिन्थिनाय जाबाय।

क) अ सि / खो ला / मो ना / बि लि = मुब्रै।

ख) सेंग्रा / सिख्ला / उरां / फारां = मुब्रै।

2:04 गोजौआव हांखोखौ सोदोबनि फिसा खोन्दो एबा सोदोबसा होननानै बुंबोनाय जादों। बे सोदबसाया माखासे हांखो जथायना जायो। बेयो मोनफा रिसार। बर' रावआव दाजाबथाय हांखोनि रिसार आरो गेवलां (उदां) हांखोनि रिसार दड। जैरै— 'मोनाबिलि'आ मोनसे सोदोब। बेयाव मोननै रिसार एबा (Syllable) दं-मोना+बिलि, आरो गारां (sound) दं—मोनब्रै (मो+ना+बि+लि), हांखौ (letter) दड मोनदाइन (म+ओ+न+आ+ब+इ+ल+इ)। नुनो मोनो— गारां मोनसेआ सोदोबनि खोन्दो आरो हांखोआ खोन्दोसा।

गाराड मोननै बाहागोआव रानजायो—रिजाब आरो रिजाब नडै एबा उदां। गारां हांखोनि रिजाब (Diphthong) आरो दाजाब खौरां हाखो (फ्र, ग्र) फोरा रिजाब गारां आरो एखुथा हांखोफोरा उदां गारांनि।

जैरै—सेंग्रा सिख्ला उरां फारां बे बाध्रायाव (सें+ग्रा/सि+ख्ला उ+रां फा+रां) मोनडाइन गारां दड। बे गारां फोर सरजाबना रिसार (syllable) आरो माखासे रिसार मिलाइना मोनफा सोदोब एबा आगानसा; आगानसानिफ्राय आगान आरो आगानफोरजों सारि आरो सारि माखासेजों मोनफा खन्थाइ खलब।

नोजोर होनो गोनांदि उदां खबामनि खन्थाइफोराव गारां बोलोनि खान्थिया गोख्रों नड।

3:00 रिसारथि महर : खबाम

खन्थाइयाव हांखो गोरोबनायानो खबाम। खन्थाइनि आगान एबा सारिनि जोबथारनाय हांखो गोरोबनाया जादों खन्थाइनि खबाम (बेखौ) सारिनि जोबथारनाय हांखो गोरोबनायखो आसि खबाम बुंजागौ। (मोनसे रिसारआव जोबनायखौ जोला आरो मोननै रिसारनि खबामखौ जो बुडे)। माब्लाबा खन्थाइनि आगाननि गेजेर खोन्दोआवबो खबाम फैयो। बेखौ जेरबा खबाम होनजागौ। खबामनि दाथाया सानथ्र'हायै हांखो गोरोबनायजों जानो हागौ। जैरै— aaa, abab, aabb, abcb बाइदि बाइदि।

फेस्ला खन्थाइ एबा जंखाइनाय खन्थाइफोराव नाथायबा बे खबाम खान्थिखौ मानिया जानो हागौ।

3:01 भारतनि गोजाम थुनलाइफोराव खबामफोरखौ माखासे मुं होदों। खन्थाइनि सारिआव एबा आगानाव थानाय हांखोनि अनजिमाखौ साननानै होनाय मुंफोरा जादों—

क) सारिनैनि (Couplet) आरो आगान मोननैनि खबाम : पयार।
हांखोआ — 14+14.

3 5 2 4
 दावज्ला गिसिरबाय / अखा नाइनो सै /
 4 4 3 3
 हाथरखि हालाफोरा / गोमोर बोदोंसै /

अखा नाइसि : क्षितीश ब्रह्म।

हांखोआ 14 नि बारा आरो खम थानाय पयारबो बर' खन्थाइआव नुनो मोनो।

ख) ल'नि पयार एबा गुसुं दुलुरी : पयार बाइदिनो, बेसेबां हांखो थानाय।
 हांखो अनजिमाया—4+4+6 जायो।

ग) दुलुरी : आगानथाम (Triplet)। आगानथाम आगानथाम आगानद'आव जोबो। 6+6+8/6+6+8

जोथ्रोदनानै नों / आंखौ गोजानाव /

सेनो बोजबफिनो, ॥

बेखाइनो नोंनि / जोथ्रोदनायखौ / (आं)

नोंनि अननाय सानो। // (खन्थाइ अनफावरि : बिष्णुज्योति कसारि)

खरा दुलुरीआव खम हांखो थायो। आरो बारा हांखो थायोब्ला लेंग्रा दुलुरी बुडे।

घ) सबि एबा गोलाव आगानथाम। 8+8+10 / 8+8+10। बेयाव गासै 52 हांखो थायो। जेरै— आय जिउनि मोदाय / बिखायाव जनानै नों /

बबे लामाजों थांबावखो;॥

दुखु दाहा होयै होयै / बे मुलुक संसाराव।

नों आलाइ सिलाइ थाहैखो। //

(हांमा : निलेस्वर बसुमतारी)

बेनिखुइ बाराब्ला लेंग्रा आरो खमब्ला खरा बुडे।

ड) लेसारि : आगान मोनथाम। गासै मोनद' आगान जों मोनफा खोन्दो।
 हांखोआ 10+10+14/10+10+14 जायो।

बेनि बाराब्ला लेंग्रा आरो खमब्ला खरा लेसारि बुडे।

च) झुना : सारिनैनि खबाम। हांखो अनजिमाया 11+11 गोलावब्ला 12+12 आरो गुसुंब्ला 10+10 हांखोनि जायो।

छ) झुमुरी : बेयो सारिब्रैनि खबाम। आगान मोनफायाव मोनदाइनहै थायो। हांखोआ 8+8+8+8। खबा खान्थिया aabb.

गोलाव झुमुरीआव 10+10+10+10 हांखो थायो।

ज) कुसुम माला : बेयो सारिब्रैनि खबाम आगाननि हांखोआ 6+6+6+6।
खबामा aaaa.

झ) पांचालि : सारिबानि खन्थाइ। मोन 30 हांखो थायो। खबामा
aaaba. ब्रजेन्द्र कुमार ब्रह्मनि खासि बिबार खन्थाइआ सारिबानि, खबामा
abaaa. हांखो अनजिमाया 30 नि बारा।

ञ) जथाय खबाम : गोबां समाव जथाय खबामजों खन्थाइ लिरनाय
जायो। बेफोर जाबाय— पयार + झुना, सबि + दुलुरि।

ट) गोदान खबाम : गोजौआव मुंख'नाय खबामफोरखौ मनिनानै गोबां
खन्थाइगिरिफोरा खन्थाइ लिरा। खन्थाइनि सानमि फोरमायनो थाखाय सोदोब
साइख'नानै बाहायनायफोराव गावनि गोसो खुसियै खबाम खान्थिखौ बाहायो।
बेबाइदि खबाम खान्थिखौ बिजिरनानै मुं होजोबनो हानाय नड थामहिनबा
सानश्र' हायै मुं बाहायनो गोनां जागोन।

3:02 माब्लाबा खन्थाइनि गेजेर आगानफोरनि गेजेरावबो खबाम सिखाडे।
बेफोर खबामखौ जेरबा खबाम बुंजागोन। बे बाइदि खबामा जैरै—

दुम दुम दाम दाम माय सौदोंसै।

आरो—हाबाब माबादि आखाइनि सोरजि नोडे।

ठ) सनेट : सारिजिब्रैनि खन्थाइ। बेयाव मोननै खोन्दो थायो गिबि सारि
8 खौ Octave (जखाइनै) आरो उननि जोबथा सारि 6 खौ Sestette
(जखाइसे खावसे) बुडे। इराजीआव बेयो Iambic Pentamentre. बर'आव
नाथाय (गुबुन भारतआरि) मोनफ्रोम सारियाव जिब्रै हांखो थायो।

सेक्सपियारनि खबामा— abab, cdcd, efefgg.

इटालियान एबा पेट्रारसाननि खबामा

abba, abba, cde cde एबा

abba, abba, ccd, eed.

हांमा

1	सोर मिथिगौ सोरनि जिउआ माबादि	a
2	मा मिथिगौ सोरनि सोलेराव मा दं;	b
3	सोरनि गोसोआव गैया दाहा बिदा	b
4	बुं फैलाव बिखाया अराय बिबादि?	a
5	सोरबा जानोखौ लुबैया देरहासाद	c
6	सुबुं गेजेराव गावनि मुं दोनूो;	d
7	बुहुमाव अराय आगान दोनलानो	d

8	नागिरै जिउनि साबायखर बेसाद ?	c
9	नाथाय सुबुंनि खाफाल रिफिनाय	e
10	बुहुमनि मोनबोनाय दाहा दिखारखौ;	f
11	जिउनि फोरमान आरो आनजादखौ	f
12	सोर बुंनो मोनसेयै सोरजिनाय ?	e
13	खाफालनि लिरनाया अराय जागोन	g
14	लुबैनाय सान्नायाव हांमा फैगोन।	g

ध्वजेन्द्र ब्रह्म

बर' खन्थाइआव गोबां समाव सेक्सपियार एबा इटालियान खबामखौ मानिनाय नुनो मोनो।

4:00 थाद'नाय : खन्थाइ फरायब्ला थाद'नाय बोलो होनाय, गुरैयै एबा गोबरै मुंख'नायनि थाखाय माखासे सिन बाहायो। गोजाम खन्थाइआव बे सिनफोरखौ रोखा रोखायै होनाय जायोमोन। आथिखालनि खन्थाइफोरा गांखं आरो थाद'नाइ सिनफोरा बांसिन समाव थाखोमायो। बे बाइदि थाद'नायखौ मानिनानै फरायब्ला खन्थाइनि सानथौ आरो देंखोआ रोखा बेरखाडे आरो खन्थाइनि सिनि समाइनाखौ मोन्दां हायो। दारि, कमा, कलन, सेमिकलन, देरा, सॉलु सिन, सानबोलावरि सिनफोरा खन्थाइनि थाद'नायखौ रोखा खालामो।

5:00 जाउले जाउले (alliteration) : हांखो मोनसे खौनो खनले खनले बाहायनाय खान्थिखौ जाउले जाउले बुडे। बे जाउले जाउले बाहायनाया खौरां हांखोनि बेलायाव जायो। जैरै—In a somer seson whan soft was the sonne (Old English)

बिनि बिखायाव बिरलांनाय दावलिं जरासे बादि। (गहेनायाव नाइदो)

6:00 बुंफिननाय (Repetition) : खन्थाइनि सारि, सोदोब एबा बाश्राखोन्दोखौ खनले खनले बाहायनाया खन्थाइनि मोदोम दाथायनि मोनसे आखुथाय। बे बाइदि खनले खनले बाहायनायनि गेजेरजों खन्थाइनि सानभिखौ गोहोम गोनां खालामनाय जायो आरो मेलेमाव फोनांनाय जायो। बुंफिननाया मेलेमाव गोहोम खोख्लैनायनि मोनसे आदब।

6:01 खन्थाइनि सारि—

उदां बोथोरनि

अख्राडव अरजोंबाय

सोमब्लि फिथायनि

रेजें खुनआ बार मोदायजों

बिरबाय लांबाय
 मुलुगआ फाग्लि बोरबाय
 उदां बोथोरनि
 अख्राडाव अर जोंबाय।

(उदां बोथोर : जगदीश ब्रह्म)

6:02 बाश्रा खोन्दो—

हाबाब खैना हिनजाव मजां
 नंलाइ आंनि मा एसे मजां
 नाइब्लाब नाइस' हाया
 अनब्लाबो अनस हाया
 हाबाब खैना नंख'लाइ आं अनस' हाया

(आंनि खैना : रुपनाथ ब्रह्म)

6:03 सोदोब—

फुंखाया गैलिया, नाथाय फुंखाया मानो गैया जानो
 फुंखाया थातारनांगौ—बिदि बोलो फोरानानै
 फुंखाखौ नागेरलाडे आं फुंखानि न'आव।
 फुंखा, फुंखा होननानै गाबज्रिदों आं
 फुंखाया सेडखै। नाथाय
 फुंखाया गैलिया, आय' फुंखा ...

(आंनि थैनाय सैनाय : सुरथ नार्जारी)

7:00 मुहिनि नांहोनाय (Pure Magical Effect) :

आर'ज मेथाइ, बोसोनारि खन्थाइ, सल' खन्थाइफोरखौ खनले खनले
 बुंफिननानै गोसोआव मुहिनि नांहोनाय जायो। गिनाय आरो फोथायनाय बाइदि
 थर गैयै गोसोआव थर मोनहोनाय जायो। बाथौनि आर'ज मेथाइ आरो ख्रिष्टाननि
 आर'ज मेथाइफोराव बे आदब बाहायनाय दं।

8:00 गहेना : खन्थाइनि मुस्त्रिखौ समाइना खालामनो खन्थाइआव बाइदिसिना
 गहेना बाहायनाय जायो। सोदोबफोरखौ बाहायनायखौनो गहेना बुडे। गहेनाया
 मोननै— सोदोब गहेना आरो ओंथि गहेना। माब्लाबा गहेनाया सोदोब आरो
 ओंथि मोननैआवबो जयै नुजाथियो।

सोदोब गहेना (Figures of Words)- हांखोआनो एबा सोदोबानो
 बाइदिसिना फाव फेसनजों खन्थाइखौ समाइना खालामनाया सोदोब गहेना।
 सोदोब गहेनाफ्रा जादों—जाउले जाउले (alliteration), जाउजा (Pun),
 (analogue), रिजायनाय (Paronomasia) बाइदि बाइदि।

ओंथि गहेना (Figure of thought) : सोदोब एबा बाथ्राखोन्दोफोरखौ बाइदिसिना रोखोमै गुबुन गुबुन ओंथियाव बाहायनाय गहेनाया ओंथिनि गहेना। बेफोर जादों—रुजुनाय, बेरेखा दिन्थिनाय बाइदिआ ओंथि गहेना।

सोदोब गहेना —

8:01 जाउले जाउले (alliteration) : मोनसे खौरां हांखोखौनो सोदोबफोराव खनले खनले बाहायनाय गहेनाया जाउले जाउले। जाउले जाउले बाहायनाया मोनथाम रोखोमनि—

क) आनजायसे (ख) खर' गज' (ग) जोबथा।

क) लारियैनो एबा आगोलाव जेरै बाहायदों बे बाइदिनो खौरां हांखो बाहायनाय गहेना। जेरै—

हनै उन्दै उन्दै बिबारा

मल मल मोनामनाया। (उन्दै : परसुराम ब्रह्म)

ख) खर' गज' आ जादों लारियै नडब्लाबो मोनसे एबा रोखोमसे खौरां हांखोखौ जाउले जाउले बाहायनाय गहेना।

सानसे नड साननै नंआ

दानसेबो नंआ दाननैबो नंआ। (बिबार : जलधर ब्रह्म)

ग) जोबथाया जादों सारिनि जोबथारनाय खौरां हांखोखौ खनले खनले बाहायनाय गहेना।

जौ लोनानै सप सर्प

जाबाय थानानै गब थप थर्प।

* * *

सिखांद बैब आफापर

जाखांद नंसर फिफाफर। (उन्दै : परसुराम ब्रह्म)

जाउले जाउलेआ गारां हांखोनि बेलायाव जायो बेखौ इंराजियाव Assonance बुडे।

8:02 जाउजा (Pun) : मोनसे सोदोबखौनो मोननै ओंथियाव बाहायनाय गहेना। बेयो सोदोबनि गेलेनाय। देंखोसे (homonyms) एबा हांखो रोखोमसेनि मोननै सोदोब बाहायनाया जाउजा गहेना। जेरै—बियो सुंजों सुबाय। Ambiguity (ओंथि गोबां) आव मोननैनि गोबां गुबुन गुबुन ओंथि बेरखाडे। जेरै— सुदों। बेव जंजो सुनाइ ना जि सुनाइ ना सेरजों सुनाइ ना गुसु जानाइखौ बूंखो—माबा मोनसे।

रिजायनाय (Paronomasia) आ मोनसे सोदोबखौ गुबुन गुबुन ओंथि दिहुननाय। जैरै—फुंखा

आर फुंखा थैनायाव

आंखौल' दुखु जादों दासान।

बेयाव फुंखाया मानसिनि मुं आरो Source बे ओंथियाव ओंखारो।

मोनसे सोदोबखौनो खनले खनले बाहायना बेखौ गुबुन गुबुन ओंथियाव फोरमायनाय गहेनाखौ analogue बुडे। जैरै—

ए सानजारि गथ' / मा नागेरदों रथ'।

बेयाव सानजारि सोदोबनि ओंथिया— 'सानमोखां' आरो सानजाबागै थानाय सुबुंबो जायो।

8:03 Anaphora (आनाफोरा) : सारिनि गिबियावनो सोदोबखौ खनले खनले राइखांनाय गहेना। जैरै—

बिसरो बेखौनो खेरखेरायाखै

बिसरो मानोना गोजोननि सानथ्रि हान्जा

8:04 Epistrophe (एपिस्ट्र'फि) : जोबनाय बागै सोदोब मोनसेखौ गले गले राइखांनाय। जैरै—

मिनिगन खुदुमगन गबागन सेरें सेरें

मावलायगन, दांलायगन बल फरा फरा सेरें सेरें।

(दद्रे फांदां : कालि कुमार लाहारि)

8:05 Onomatopoeia : जुनार, दावमा दावसा आरि सुबुं नडै बेसादनि रिनायजों रिखांनाय। जैरै—

मेव मेव मावजि।

सिउ सिउ बार।

8:06 गुदि ओंथि आरो दिन्थि ओंथि (Denotation & connotation) : सोदोबफोरा मोननै रोखोमनि ओंथि फोरमायो। सोदोबनि गुदि ओंथि आरो बे सोदोबनि नैथि ओंथि बाइदियै दिन्थियो। जैरै—

न' होनोब्ला थाग्रा जायगा (गुदि ओंथि) आरो दिन्थि ओंथि—गावनि, नखर, गाहाम सानलाइनाय ओंथि।

9:00 ओंथि गहेना :

सोदोबनि ओंथिआ बाइदिसिना जानो हागौ। सोदोबनि ओंथि बाहायनाय गहेनाआनो ओंथि गहेना। बेसाद-हाबा, सानस्रिफोरखौ गावजों गाव गोरोबनाय

एबा गोरोबै सानस्रि सोंजिहोनो खन्थाइआव सोदोबनि गहेना गानहोनाय जायो।
बेफोरखौ गाहायाव दिन्थिनाय जाबाय।

9:01 गोरोबनाय गहेना (Figure of comparision)

(i) रुजुथाय (Simile) : गुबुन गुबुन गुन थानाय मुवा एबा सानस्रिखौ रुजुनायानो रुजुथाय (simile)। बेयाव मोननैबो मुवानि गुनखौ रोखोमसे दिन्थिनाय जायो—जेरै, बाइदि सोदोब बाहायनानै। बेयाव रुजुग्राखौ Tenor आरो रुजुजाग्राखौ Vehicle बुडे। जेरै—सानसुमाया सिंहबाइदि साइज गोनां। बेयाव 'सानसुमा'या रुजुग्रा आरो सिंहआ रुजुजाग्रा।

(ii) महरथाय (Metaphor) : बेयाव रुजुग्रा आरो रुजुजाग्रानि मादाव फारागखौ नुनो मोना। बेयाव रुजुजाग्राखौ रुजुग्रानि सायाव जाबसिनना होनाय जायो। बेयो सानबोलावरि गहेना। जेरै—

सानसुमाया दावहाथिलियाव मासे सिंह। बे बाश्रायाव 'सानसुमा'नि गुनाव सिंहनि गुनखौ जाबसिनना होदों।

माब्लाबा मोनसे मुवानि सायावनो गुबुन गुबुन फुंखानि मोननै आखुखौ सरजाबना होनाय जायो, बेखौ गलाइमोन्देर (mixed metaphor) महरथाय बुडे। जेरै—जारलानि लैथोनि बेरेखायै हाथियार हम।

माब्लाबा महरथायखो मिथिमोनै मुवानिफ्राय हानहरनाय जायो,
बेखौ हानहरनाय (forced metaphor) बुडे।

जारौनि खावलाइआव सानध्र'हायै हाथखि (सालमाय)?

(iii) महरथि (allegory) : थाखोमानाय गियान गोनां बाश्राखौ माखासे मावफुंग्रा एबा दिन्थिसावगारि (symbol) बाहायनानै खौसेयै फोरमायनाय गहेनायानो महरथि; बेयाव रुजुग्रा आरो रुजुजाग्राया नुजाथिया। जेरै—

नाइहर हनै सोरांबाय सानजायाव

सोरांबाय सानजायाव।

बेयाव सोरांबाय सानजायाव होननानै बर' हारिनि गोजों सम फैनायखौ फोरमायदों।

(iv) Parable (सुंथाब महरथि)

(v) सल'बाथा (Fable) : जुनाद एबा मिथिगांनि बेसादफोरा बाथा राइलाइनाय गहेना।

(vi) Exemplum : दोहोरोमनि बोसोनफोरमायनो थाखाय फोरमायनाय सल'आव बाहायनाय महरथि।

9:02 सरजाबनाय (Association) : माखासे सोदोब थुबुरै बाहायना सानबोलावरि सोमजिहोनाय खान्थिखौ सरजाबनाय (association) बुडे। खाइसे सोदोबफोरखौ सुबुड एरैनो मिथिखायो। सरजाबनायनि गेजेरजों बे सोदोब एबा बाश्राखोन्दोआ मोनफा सानबोलावरि सोमजिहोयो आरो सानस्रिआ रोखा जायो। जेरै— 'बिबार' होनब्ला समाइना, गोथार, नोरोम ओंथिखौ बुजियो। बे बाइदिनो थै होनोब्ला जों गोबां ओंथि बुजिनो हायो—हारि, गोसो बु थारनाय, दावहाबो बुजिनो हागौ। बेबाइदिनो 'गुसु थै', 'गुदुं थै'—बेफोर बाश्राखोन्दोआ साननो गोहो गैयै, नोरजिया, अलसिया आरो उननिजों मावथि, बुजिनो गोरों, सानसुमै ओंथि बुजिनो हागौ।

खन्थाइनि सानथाय (context) लानानै सोदोब सरजाबनाया गुबुन गुबुन आरो गोबां ओंथि फोरमायनो हागौ।

सरजाबनायखौ गोबां राहाजों खालामनाय जायो—

(i) मुवानि मुंखौ बेनि देहानि बाहागोजों दोननानै (Synecdoche Antonomasia) जेरै—आंहा सना आरो रुफा गैया (सम्पत्ति)

(ii) बुजिखानाय गुबुन मुंजों मुं होनानै (Metonymy)

जेरै— (a) बियो 'हाउस'खौ थांखिदोमोन। (हाउस-आफादिनि मानसि)

(b) गासै बहुमा मिथिगौ बेखौ। (बहुम-मानसि)

(iii) लाली (थाइलाली) खौ सासे सुबुंनिफ्राय गुबुन बेसाद आव सोलाइनाय (Hypallage)

जों जोबोर सुखी सान खाथायबाय।

(iv) जारिमिनारि एबा सलन्थायनि जाथायखौ गोसोआव लाबोना सरजाबनाय (allusion)।

Not long for Mida's golden touch.

Allusion आ सुबुं थावनि एबा जाथाय एबा गुबुन थुनलाइआरि सोरजिथाय एबा खोन्दोखौ सुंदयै आरो खेंस्लायै लाबोनाय आदब। गोबां समाव खन्थाइनि आइदाखौ गोखों खालामनो फेहेरनो थाखाय allusion खौ बाहायो।

9:03 (ग) बैरेखा गहेना (Figure of Difference) :

1. उलथा सानथाय (antithesis) : उलथा सोदोब एबा मोनसे सानलुखौ उलथायै नाथाय सिखोन साखोन बाहायनाय गहेना।

सोरगोआव बान्दा जानायनिखुइ नरखआव राजा जानाया साबसिन।

2. Oxymoron (सकखा-जाम्बा) उलथाजों गोथोंजों बंजाबनाइ फोरमाय देरनाय सोदोब बाहायनाय गहेना।

An unwilling voluntter. एबा—a cruel kindness, एबा सुथुर लोगो एबा-बरफा आंखो खामदों।

3. Paradox गावनो गावखौ उलथां फालथां बाहायनाय सोदोब नाथाय ओंथिया रोखा बेरखांनाय।

जेरै—थैनाय, नों थैखागोन।

4. Climax (दोहौ) : सानस्रि एबा रावआव (excitement एबा suspension) फाखन सोमजिहोनाय गहेना। जेरै—हादान! नों राइख 'सि।

5. Catachresis : सोदोबनि गावनि गुबै ओंथिनिफ्राय गुबुन ओंथि फोरमायनाय। हमिलाहा समाइना गारां दं। (गोदै)

6. Anticlimax or Bathos (उलथा दोहौ) : एकसना लासै दावख्लाइनाइ/ गोबांनिफ्राय एसे फोरमायनाय जेरै

नों अखां बेसे गुवार

बेसे अनसुलि

नोंनि बिखाखौ सिंखावनानै

मोनगोन नामा हारिनि माव हारिमु?

7. Syllepsis

मोननै गुबुन गुबुन सोदोबखौ बाहायना मोनसेखौ मोनसेनिफ्राय गुबुनथि सानस्रि फोरमायनाय।

She lost her heart and necklace at a ball.

9.04 सानबोलावरि गहेना (Figure of Imagination)

1. सुबुंथाय (Personification) : मुवा एबा सानस्रिफोरखौ सुबुंनि आखल फोरमायनाय सोदोब बाहायब्ला. बेखौ Personification होनाय जायो। बेखौ थामथि सुबुडव बाहायनाय जायो। जेरै—जोमैया मिनिदों।

2. सुबुडरि महरथि (Personal metaphor) : जिउगैयै मुवाखौ सुबुंनि गुन होनाय। जेरै—सिमब्रेनाय बार।

3. Pathetic Fallacy : मिथिंगानि बेसादनि गुनखौ सुबुंनि मावफुंसार गोहो आरो मोन्दांथियाव फोरमायनाय आदबखौ Pathetic Fallacy बुडे। जन रास्किनआ 1856 आव बाहायजेननाय बे बाश्रा खोन्दोजों—बेसादनि सैथोखौ बरनायनायनि गेजेरजोंसो फोरमायनो हायो, नाथाय गमा महरखौ हाया। बे

आदबजों—असाधारण एबा नंखाइ महर मोखां होनाय जायो, जेब्ला आबेगजों दैदेन जानाय एबा गोसोआव थाखोमानाय समाइनाखौ फोरमायनो नाजायो।

The one red leaf, the last of its clan

That dances as often as dance it can.

4. Apostrophe (थांखिनाय) : सोरबा सुबुं एबा मुवा एबा सानस्रिखौ (राइदावनानै) थांखिनानै सोमजिहोनाय सानबोलावरि।

दागि नों रजे, अनग्रा गोसोआ

थांनानै दडबा

नोंखौनो अननो हागोन आं।

5. जाइख्लं नुथाय (Vision) : गोदोखौ एबा इयुनखौ आथिखालाव बुंनाय सोदोब बाहायनाय गहेना।

A lady with a lamp, I see.

6. Prolepsis or Anticipation

गुबैयै जाफुंनाय जाथायफोरमायनाय सिगां बुब्लि फोरमायनाय गहेना।

बिसोर बिदा बिफं दावगाबाय आरो सासे गोथैया दावगाबोबाय।

7. बुंगलाबनाय (Hyperbole) : बबेबा मोनसे मुवाखौ जोबोर बाखनायनानै एबा जोबोर खमाइना बुंनाय सोदोब बाहायनाय गहेनाया बुंगलाबनाय (Hyperbole) मानसिखौ मोदायनि गुन गोनां खालामनाया बेनि बिदिन्थि।

बाइलंनि खुगाजों ना बेरफ्रावदों।

दैयाव ना बेरफ्रावनाय जेरै सानस्लाबनो आरो हमस्लाबनो हायै बेबाइदिनो बाइलंनि मोदाय राइनायखौ हमस्लाबनो हायै ओंथियाव बाहायनाय जादों।

8. सानस्रि महर (Image) : बेयो सोदोबजों दाजानाय महर एबा सावगारि। खन्थाइआव लानथ्रियै माखासे रुप एबा सावगारि मोन्दाडे। बे सावगारि फोरा मोनसेआ गुबुनखौ रोखा खालामो। माब्लाबा मोनसेआ गुबुननि उलथा फोरमायो। खाइफा खन्थाइआव मोनफाल' सावगारि थायो। खन्थाइआव बाहायनाय सोदोबआ फरायग्रानि गोसोआव मोनसे सरजाबनाय बोना मोनफा सावगारि बेरखाडे। गोसोआव बेबाइदि सावगारि बेरखांनायखौ Imagery बुडे।

9. Conceit -बेयो सानस्रिनि सावगारिखौ बोनानै लाबोनाय गहेना। मोननै गुबुन गुबुन गोरोबै मुवा एबा जाथायखौ लारि लारियै फोरमायनाय जायो। बेयो मोननै रोखोमनि—गोसोयारि खन्थाइआव बाहायनाय आरो metaphysical. Metaphysical conceit आव गासैबो गियानखौ खन्थाइनि गहेना हिसाबै

बाहायो। मोखथांनि जाथायखौ जारिमिनारि एबा सलन्थाइजों स्रैहै फोरमायनाय गहेना बाहायनाया Conceit.

I find no peace ; and all my war is done ;
I fear and hope ; I urn and freeze in ice.

9:05 खेंस्ला गहेना (Figure of Indirectness) :

1. खेंस्ला सोंखारिनाय (Innuendo) : बेयो इंगिदजों फोरमायनाय।
बियो जोनोम मोन्दों दोहोनि नाथाय सोद्रोम नखराव।

2. Periphrasis (फाइखन फोरमायना) :

Moring isles of winter (iceburge)

बुथारग्रा हासुं (सिलाइ)

3. Euphemism : गिलुबालु बाथ्राखौ गुरै रावजों फोरमायनाय।

He has gone the way of all flesh (थैनाय) बिमाया नेयै नेयै
हारा गारबाय (थैबाय)।

4. Irony (खैखा) : थारथा होनाय रावजोंनो गुन गाइनाय एबा
बाखनायनाय रावजों थारथा होनाय गहेनाखौ खैखा (Irony) बुडे। बेयो गुबैयै
नंखाइफाला बुंनाय राव—बेयाव गुबैयै बुंनाय आरो बुंजानायनि मादाव गोरोबलायनाय
थाया।

बे गहेनाया गोबां रोखोमनि—खुगानि खैखा, दाथाय खैखा, सक्रेटिक
खैखा, फावथायारि, सोरगोआरि आरो रमान्टिक। गोदान बिजिरगिरिफोरा बे
खैखाखौ थुनलाइआरि बेसेन बिजिरनायाव बाहायो।

बिदिन्थि—मावरियाप्पोन,

लाबोफिनबाय नों साद' बिदा फंबायखौ?

5. थारथा (Sarcasm) : बेयो गोथों रावजों थारथा होनाय।

राम राबननि दावहा जादों

गासैबो सुबुंनि गोरबोआव

कुरुक्षेत्रनि दावहा जादों

बे दुलाराय बुहुमाव।

6. सोंखारिनाय (Satire) : थोंजों नारदबनाय रावजों सुबुंनि आखल
आखु आरो समाजारि खान्थि आसार फोरखौ फोसाबनाय थांखिजों बुंनाय गहेना।
बेनि रावआ थारथा होनाय आरो मिनिथाव जायो। जेरै—अब्लाबोदि बिसोरहा
दं दिनैबो फोथायनाय। केन्सार-जक्षाजों जुजिनो थाखाय। खासिनिया जोबना
थाडाखै थेबगां अजानियाव।

7. Litotes - नडै सोदोब बाहायना नंगौ फोरमायनाय।

जैरै—मानसिया जाम्बा नड (सियान)।

8. paralipsis (एरखेनाय) : बुंजागौ बाश्नाखौ बुडब्लानो एराइना थांनाय। जैरै—आं मोनबो बुड, बि सुबुंनि आखुखौ, फैगोन सानफोरावबो। (थामहिनबा गाज्जि)

गुबुन माखासे गहेनाफोर—

क) लालि सरजाब (Transferred Epithet) : थाइलालि एबा थाइलालिनि थाइलालि बाहायनाय गहेना। जेब्ला मोनसे थाइलालिखौ थर गैयै मुवानि जायगायाव बाहायनाय जायो बेखौ लालि सरजाबनाय बुडे। जैरै—Fleet footed Achilles.

आदै बेग्रां एकिलिस

ख) क्लिस (Cliche) : सोदोबनि ओंथिखौ अराय बाहायनाय ओंथिनिफ्राय दोरोदहोनाय आरो नोजोराव गोग्लैहोनाय जैरै—हिन्जावखौ आंनि विख्लो अनजालु खौ अनख'

गुबुन रावनि माखासे बाश्नाखोन्दो बाहायनाय गहेनाबो क्लिसनि गहेना।

ग) बम्बाष्ट (Bombast) : फोरमायनाय मुवानि रुजुजखायै बांद्रायसिन बुंनाय।

Oh ! Huncamunca, Huncamunca, oh !

Thy pouting breasts, like kettle-drums of brass,

Beat everlasting lud alarms of joy ;

घ) आर्किजम (Archaism) : गोजाम एबा गारजानाय सोदोबखौ (obsolete in common speech) खौ बाहायनाय गहेना।

ङ) ओंथि गोबां (Ambiguity) : मोनसे सोदोबानो गोबां ओंथि फोरमायोब्ला बेखौ ambiguity : बुडे। बेयो रोखोमसे रिसारथिनि सोदोब (equivocal) बो जायो। जैरै—'सु' सोदोबआ गोबां ओंथि जानो हागौ।

असमीयाआव मोन 7 सोदोब गहेना आरो मोन 59 ओंथि गहेना मुंख'दों, सोनापटि देवशर्माआ 'असमीया साहित्यर साज' बिजाबाव संस्कृत रसवादी आरो 'लंकार सास्त्र' बिजिरगिरि मम्मटआ गहेनाखौ बाहागो खालामदों—मोन द' सोदोब गहेना आरो मोन 63 ओंथि गहेना। बर' खन्थाइआव आरो आथिखालाव बिजिरनो खाबु गोनां माखासेखौल' बेयाव दिन्थिनाय जाबाय।

च) सोदोब साइखनाय : सोदोब साइख'नानै बाहायनायाबो मोनसे गहेना दानाय आदब। सोदोब साइखनायाव माखासे खान्थि बाहाइओ। बेयो खन्थाइगिरिआ

खन्थाइनि आइदा साइख'नायजों सोमोन्दो थायो। बेफोर जादों— (क) रोंगथि आरो आब्रुथिनि बेरेखा सोदोब बाहायनाय (Barbarism), गोजाम सोदोब बाहायनाय (Archaism), गोदान सोदोब दानाय (Neologism), ओन्सोलारि सोदोब, गामियारि (Slang/Vulgarism), रावखान्थिगैयै बाइदि बाइदि।


10:00 खन्थाइनि गोसोआरि दाथाय (Mental Form) :

खन्थाइनि गोसोआरि दाथायखौ लानानै बरनायनाय (objective) आरो गोसोआरि (subjective) मोननै बाहागोआव राननाय जायो। बेफोर जादों—

- क) खन्थाइमा (Epic)
- ख) सलन्थाइ खन्थाइ (Epic Narrative)
- ग) बाथ्रा खन्थाइ (Verse Essay)
- घ) खन्थाइ मेथाइ (Lyric)
 - (i) फावथायारि (Dramatic monologue)
 - (ii) दाहा खन्थाइ (Elegy)
 - (iii) अड (Ode)
 - (iv) सनेट (Sonnet)

ङ) हाइकु आरो Epigram.

खाइफा बिजिरगिरिआ राननाय बाइदिब्ला :



छ) महरथि (Allegory) (viii) ससाइटि खन्थाइ (Verse de society)

ज) जंखाइनाय/सोंखारिनाय (Satire) (ix) सनेट (Sonnet)

झ) पेर'दि (Parody) एपिग्राम

10:01 क) बेलाड : खुगा खुगा सोलिबोनाय सल' फोरमायनाय खन्थाइखौ बेलाड बुडे। बेनि सुजुग्राखौ मिथिनाय जाया। बेबाइदि बेलाडखौ सुबुं बेलाड बुडे। बेयो गुबैयै फावथायारि नड आरो गोसोआरिबो नड। सल' फोरमायग्राया खन्थाइनि रावजों दोहौ सिखां होना आवरायजेनो आरो खिन्थालाडे, माल्लाबा फाव फेसन आरो बाश्राबो बुडे।

बेलाडआ गुबैयै सारिब्रैनि खलब। नैथि आरो ब्रैथि सारिआ खबाम गोरोबनाय जायो। बर' खन्थाइआव बासिराम जोहोलाव आरो दावहाराम जोहोलावआ सुबुं बेलाड।

थुनलाइआरि बेलाडआ जादों खन्थाइगिरिआ सुजुनाय बरनायनाय जाथिनि खन्थाइ। खन्थाइनि महर आरो सानमिआ सुबुं बेलाड रोखोमनि। रुपनाथ बसुमतारिनि सम्बुधन कसारी आरो सुरथ नार्जारिनि सान्दो बावदियाया थुनलाइआरि बेलाडनि बिदिन्थि।

ख) खन्थाइमा (Epic) : बेयो जोहोलाव खन्थाइ। गिदिर आरो गोजौ आइदा थानाय गोलाव बरनायनाय खन्थाइ। इसरनि खावसे गुन थानाय जोहोलाव सुबुं— जायनि हाबाया हारि, हादर एबा सुबुं माहारिनि बागै फोरमायनाय जायो।

गुबै खन्थाइमा एबा सुबुं खन्थाइमाया जादों जारिमिनारि एबा सानबोलावआरि मुवा—जायफोरा खुगा खुगा सोलिबोनाय—बेखौ सासे गेदेर खन्थाइगिरिया रनसायो। रामायन, महाभारतआ बे रोखोमनि खन्थाइमा।

थुनलाइआरि खन्थाइमाया जादों—गुबै खन्थाइमानि आखुथायाव लिरनाय खन्थाइमा। भार्जिलनि Aenied (इनीद), आ थुनलाइआरि खन्थाइमानि बिदिन्थि।

खन्थाइमानि गाहाइ आखुफोरा जादों—

(i) बेनि जोहोलावआ हादरनि एबा मुलुकनि थाखाय मुंदांखा आखु (Character)। गुबैयै दावहारु फोलेरनि सुबुं।

(ii) खन्थाइआव बुहुमनि जेरावबो जायगाया आनकि सोरगो आरो फाथालावबो फोरमायजायो।

(iii) दावहाआव Super human गोहो बाहायनायनि खौरां थायो।

(iv) दावहाफोराव मोदायफोराबो बाहागो लाफायो, हेफाजाब होयो।

(v) खन्थाइखौ फारि फारि आरो रोखायै फोरमायनाय जायो।

खन्थाइमानि दाथाया एरै जायो—

जुक्तिजों आइदाखौ बुंफोरनाय सिगां गियाननि बिमाखौ (Muse) गोहो हरनो आर'ज गाबनाय बाथ्रा थायो।

बुंग्राया गोहोम खोख्लैनो आइदानि गेजेर खोन्दोखौ जाउरि गारो।

गाहाय आखु (सुबुं) खौ खोन्दो खोन्दोआव रानना फोरमायो। बेफोरखौ मोनफा पर्व बुडे।

ग) Mock Epic (सोरखौबा जंखाइनाइ) : खन्थाइमानि लैखोन थानाय सल'न्थाइनि खन्थाइखौ जंखाइनाइ खन्थाइमा बुडे। बेयाव रेजें सानम्रिजों मिनिथाव रोखोमै बरनायनाय जायोखाय फेस्ला खन्थाइमाबो बुडे।

घ) गोसो थोनाय खन्थाइ (Matrical Romance) : बेयो रोखोमसे बरनायनाय खन्थाइ। खन्थाइमा बाइदिनो बेयावबो जोहोलावनि सल'खौ बरनायनाय जायो। बेनि आखुथायफोरा गोजौ गिदिर फोलेर, राजा महाराजानि गिदिर गाथां खोथा, बिसोरनि गोमोथाव नागेरदिनाय, गोजौ फोलेरनि जोहोलावजोजों गोसो थोलाइनाय, गिलु बालु दावहा नांनाय, देरहानाय बे रोखोम खन्थाइनि आइदा। 12 जौथायाव फ्रान्सआव बे खन्थाइआ सोमजियो फरासि खन्थाइगिरि Chretien de Troyes नि Gawain and the Green Knight आ 'आर्थार नाइट'नि सायाव लिरनाय गोसो थोनाय खन्थाइ।

ङ) फावथायारि (Dramatic) : फावथिना रोखोमनि, खन्थाइनि आखुथायनि खुगाजों राइलाइनाय खन्थाइखौ फावथायारि खन्थाइ बुंनाय जायो। जेब्ला खन्थाइआव सासे सुबुड (खन्थाइनि आखुथाय character) आ गासै खन्थाइनि रावखौ बुंजोबो —बेयाव सोरबा सुबुंखौ थांखिनोबो हागौ एबा बाथ्रा दानथे लाइनोबो हागौ, —नाथाय बेयाव बुंग्राया गुबैयै सासेआनो जायो आरो बेखौ मिथिनो हायो। बे खन्थाइआव आखुथायनि आखल, गोसोआरि थाथायखौ बि बुंनाय रावनिफ्राय बेरखांनाय नुनो मोनो। बे रोखोमनि खन्थाइखौ Robert Frost, E.A. Robinson, Ezra Pound, Robert Lowell बाइदि खन्थाइगिरिफोरा लिरलांदों। T.S. Eliot नि The Love Song of J. Alfred Prufrock आ बेनि बिदिन्थि। बर' खन्थाइआव सुरथ नार्जारिया बे रोखोमनि खन्थाइखौ लाबोदों।

च) बोसोनारि (Didactic) : नीति खोथा, दोहोरोमारि एबा दर्शननि बाथ्राखौ फोरमायनो लिरनाय खन्थाइ। बेफोरनि गेजेरजों सुबुंनो आखल आखु

दानो फोरोंनाय जायो। मिलटननि Paradise Lost आ बे रोखोमनि खन्थाइ। बर'नि सतीश चन्द्र बसुमतारीनि—'जा हाबाब' आ बोसोनारि खन्थाइनि बिदिन्थि।

छ) महरथि (Allegory) : मोनसे सल'आव थाखोमानाय गोथौ ओंथि बहा इंगिद थायोब्ला बे रोखोमनि सल'खन्थाइखौ महरथि (allegory) बुडे। माखासे थान्दै आरो गोसो सावगारि बाहायनायनि गेजेरजों खेंस्ला आब्रु गोनां ओंथि बेरखांहोनाय जायो। बे थान्दै आरो गोसो सावगारिखौ ज' सरजाबना मोनफा गथा महर होनाय जायो।

महरथि खन्थाइआव बाहायनाय महरथिफोरा जारिमिनारि, राजखान्थियारि, सानस्रियारि एबा सानबोलावरि जायो। Paradise Lost (Book II) आ बे रोखोम खन्थाइनि बिदिन्थि।

ज) थांखिनाय एबा लाइजाम खन्थाइ (Epistle) : सोरबा गैयै सुबुंखौ थांखिनानै नीति खोथा, सावरायनाय, मोजां मोननाय एबा गुबुन आइदा फोरमायनाय खन्थाइखौ थांखिनाय खन्थाइ बुडे। बे खन्थाइआव खन्थाइगिरिआ गावनो गाव बुडे, सेथि सुबुडव आरो लाइजाम फोरमायनाय बाइदि फोरमाय हरो। प'प नि Eloisa to Abelard आ बे रोखोमनि खन्थाइ। रमान खन्थाइगिरि हरेसआ बे रोखोमनि खन्थाइखौ लिरजेनदों।

झ) जंखाइनाइ/सोंखारिनाय (Satire) : सुबुंनि गेनाखान्थिफोरखौ सुसानो थांखियै आरो समाजनि गात्रि खान्थिफोरखौ फोजोबनो नोजोर लाना लिरनाय खन्थाइखौ सोंखारिनाय खन्थाइ बुडे। सोंखारिनाय खन्थाइआव मिनिथाव राव थायो नाथाय बेयो फेस्लानिफ्राइ आलादा, बेयाव मिनिथाव रावखौ हाथियार हिसाबै बाहायो। फेस्लानि मिनिथाव रावआ मिनिहोनो थाखायनो जायो।

बर' रावआव लिमारिक होनना लिरनाय खन्थाइफोरा मोनफा मोनफा सोंखारिनाय खन्थाइ खोन्दो।

ञ) पेर'डि (Parody) : सोरबा गिदिर खन्थाइगिरिनि खन्थाइफोरखौ सोलोंप्लानानै लिरनाय खन्थाइखौ पेर'डि बुडे। बे बाइदि सोलोंनानै लिरनाय खन्थाइआ माब्लाबा गोजों खन्थाइनि महर मोनो, नाथाय गुबै खन्थाइखौ नारश्रोदनानै दोननाय जाया। शेलीआ Peter Bell the Third मुडै वार्डसवार्डनि खन्थाइ Peter Bell खौ सोलोंना लिरदों।

10:02 गोसोआरि खन्थाइ एबा खन्थाइ मेथाइ (Lyric) :

देंखो बोनानै मेथाय रोजाब जानाय गुसुं आरो बरनायनाय नडै खन्थाइफोरखौ खन्थाइ मेथाइ (Lyric) बुडे। बेयाव बुंग्राय सासेल' आरो बिनि गोसोआरि

थाथाय एबा मोन्दांथिखौ फोरमायो। बे खन्थाइफोराव 'आं' नि बाश्रा थायो। बेनि 'आं' आ खन्थाइगिरिआ गावनो जानोबो हागौ एबा खन्थाइगिरिया सोरजिनाय आवहावानि आखल बो जानो हागौ।

खन्थाइ मेथाइआ सानबोलावरि एबा मोन्दांथिनि सुंद' फोरमायथिबो जानो हागौ। बेखाइनो खन्थाइ मेथाइआ सुंद' सुंद' जायो। माब्लाबा खन्थाइ मेथाइआव गोबां मोन्दांथिनि लानथ्रियै फोरमायनायाबो जानो हागौ।

खन्थाइ मेथाइनि रोखोमफोरा जादों—इसोर सिबिनाय, हादर अनसाइनाय, मोजां मोननाय, मिथिंगा सिबिनाय, रिफिखन्नाय (Reflexive), अड, इलेजी, समाजारि खन्थाइ (verse de society) आरो सनेट।

क) इसोर सिबिनाय (Devotional) : दोहोरोम एबा सोरजिगिरिनि बागै गंग्लायनाय, सिबिनाय सानसि लानानै लिरनाय खन्थाइफोरा इसोर सिबिनाय खन्थाइनि बाहागो। कार्डिनेल निउमेननि Lead Kindly Light आ बे बाइदि मोनसे दिन्थि। भारतआरि थुनलाइआव 'भक्ति' सोमावसारनाय समाव गोबां बे रोखोमनि खन्थाइ रनसाइनाय जादों। बर'नि गुदि सिबसा आरो आरज आ इसोर सिबिनाय खन्थाइ।

ख) हादर अनफावरि (Patriotic) : हादरखौ मोजां मोननाय आरो हादरनि गाहामनि थाखाय, हादरनि खैफोरनिफ्राय रैखा खालामनो आउगायनाय सानसिनि खन्थाइफोरा बे रोखोमनि खन्थाइआव गोग्लैयो। बंकिम सन्द्र बेनार्जीनि—'बन्दे मातरम' आ बे खन्थाइनि गोजों बिदिन्थि। बर' खन्थाइआव बे रोखोमनि द्लाम खन्थाइ नुनो मोनो।

ग) मोजां मोननाय खन्थाइ (Love) : जायफोर खन्थाइनि मोजां मोननायनि आसा निरासा, फोथायनाय, सन्देहफोर बेरखाडे, बे रोखोमनि खन्थाइखौ मोजां मोननाय खन्थाइ बुडे। बे बाइदि खन्थाइआव खन्थाइगिरिआ गावनि गोसोनि मोन्दांनाय आरो रोंमोनथाय खौनो लिरो। मोजां मोननाय खन्थाइआ गासैबो रावनि थुनलाइआव गोबां दड। असमिया खन्थाइआव जतीन्द्र नाथ दवाराया गोजौ थाखोआव दड। बर' खन्थाइगिरिफोरनि फ्राय गासैबोखौनो मोजां मोननाय खन्थाइ लिरनाय नुनो मोनो।

घ) मिथिंगा सिबिनाय (Nature) : मिथिंगानि महर मुस्रिखौ नुनानै गावनि गोसोआव रोसि नांनाय, मुहिनाय फोरमायनाय खन्थाइफोरखौ मिथिंगा खन्थाइ बुडे। इंराजिआव वार्डसवर्थआ मिथिंगा खन्थाइगिरि होनना मिथिसार जानाया बर' खन्थाइआव इसान मसाहारि, समर ब्रह्म सौधुरी, मन'रन्जन लाहारि, अन्जु मोनहा द्लाम मिथिंगा खन्थाइ लिरदों।

ड) रिफिखनाय खन्थाइ (Reflexive) : गोथौ दर्शन, जिउमा आरो बहुमनि सोमोन्दै गाव मोन्दांनाय गोमोथाव रोंगथि फोरमायनो लिरनाय खन्थाइफोरा रिफिखननाय खन्थाइ। टेनिसननि Place to Art आरो रबी ठाकुरनि 'येते नाहि दिब' आ बे रोखोम खन्थाइनि दिन्थि।

च) अड : अडआ गोलाव खन्थाइ मेथाइ। बेनि मुंथिया गोथौ आरो फोरमायथिनाय रावनि। बे रोखोमनि खन्थाइआ ग्रीस हादराव सोमजिदों। सोरबा सुबुं, मिथिंगानि बेसाद गोसो सावगारिफोरखौ महर होनो (eulogize) अड खन्थाइखौ लिरनाय जायो। इराजीनि Ode to Autumn, Ode to the West Wind, Ode to the Nightingale आ मुंखजाथाव अड खन्थाइ। बर' खन्थाइआव गुणेश्वर मुसाहारिनि 'फेरेंगादाव' आ अड खन्थाइनि बिदिन्थि।

छ) दाहा खन्थाइ (Elegy) : दाहा खन्थाइआव खन्थाइगिरिआ गावनि रोंमोनथायाव सोमजिनाय जारलाजों फैफानाय दाहाखौ फोरमायनो लिरो। बे दाहायाव गावनि हारसिंनि दाहानि अनगायैबो हादरारि दाहाबो फोरमायो। माब्लाबा गेदेर सुबुं थैनायावबो बिनि आखल आखु, जिउमा, सानस्रिनि बागै बरनायना दाहा खन्थाइ लिरनाय जायो। मिल्टननि Lycidas आ दाहा खन्थाइनि बिदिन्थि।

दाहा खन्थाइआव दर्शन आरो गोथौ सानस्रिबो हाबो।

दाहा खन्थाइनि मोनसे बाहागोआ जादों लावखार खन्थाइ (Pastoral Song)। खन्थाइगिरिया गावनि आंगो सुबुं थैनायनि दुखुआव बुंफोरो। सेलीनि Adonais, आर्नल्डनि Thyrsis आ बेबाइदि दाहा खन्थाइ।

ज) ससाइटि खन्थाइ (Verse de society) : जिउनि रंजालि बुब्लि आरो समाजनि साज्रां सावगारिया खन्थाइगिरिनि साननाय हनायजों बेरखाडेब्ला बे बाइदि खन्थाइखौ Verse de society बुडे। इराजीआव अस्टिन, डबसन, हेरिक मोनहा बे रोखोमनि खन्थाइ रनसाइलांदों। असमिया खन्थाइगिरि बेजबरुवानि माखासे खन्थाइफोरा बे रोखोमनि।

झ) सनेट : सनेटआ सारि जिब्रैनि खन्थाइ। इटालि Sonnetto निफ्राय इराजीआव Sonnet जादों। मोनसेल' सानस्रिखौ बेयाव फोरमायनाय जायो। (सनेटनि खबाम खान्थिखौ आगोलाव फोरमायनाय जाबाय)

भारतआरि थुनलाइआव माइकेल मधुसुदन दत्तआनो गिबि सनेट लिरजेनो। बर' रावआव मंकेस्वर बसुमतारीआ 'बुरलां' खन्थाइनि गेजेरजों सनेटखौ लाबोयो। ध्वजेन ब्रह्म आरो ससिन बसुमतारिआ गोबां सनेट लिरबाय।

ज) एपिग्राम : गुसुं खन्थाइफोरखौ एपिग्राम होननाय जायो। गोसोथोनाय (amorous), दाहा, गोसो खांहाबनाय, गोसो (Complimentary), गोमोफ्रामनाय एबा सोंखारिनाय आरि सानस्रिखौ आमथा खालामनानै दिन्थिनाय खन्थाइआ एपिग्रामनि आखुथाय। सानस्रिआ गोमोथावै थाखोमायो एपिग्रामआव।

जिद' जौथायनि जोबथा आरो 17 जौथायनि गिबि खोन्दोआव इलन्डआव एपिग्राम दलाम सोरजिनाय जादों। इयेटस, एजरा पाउन्ड, रय केम्पबेल, उगडेन नाश मोनहाबो दलाम एपिग्राम लिरदों।

बर' खन्थाइआव ब्रजेन्द्र कुमार ब्रह्मआ बे महरखौ गाइसनफैदों।

ट) बाश्रा खन्थाइ (Verse Essay) : बाश्रा खन्थाइआ गोदान थुनलाइआरि सोरजि। रुसियानि आइभान टुर्गेनिभआ बे रोखोमनि खन्थाइखौ लिरजेनो, गावनि खामि हारायाव केन्सार बेराम जानाय समाव थैनायजों जुजिनानै थाब्ला, राइथायनि महराव गोलाव खन्थाइ Poems in Prose मुडै।

बाश्रा खन्थाइआ राइथायनि महराव लिरनाय खन्थाइ। खन्थाइनि रिखां (Rhythm), देंखो, (सन्द, लय) बेयाव थायो। बर' रावआवबो दोंफा दोंनै बाश्रा खन्थाइ लिरनाय नुनो मोन्दों। असमिया थुनलाइआव जतीन्द्र नाथ दुवाराया बे खन्थाइखौ लाबोयो।

11:00 जुक्तिजों सोरजिनाय :

खन्थाइखौ जुक्तिजों सोरजियो। गेबेडै आरो सिखोन साखोन नोजोरजों नाइबिजिरनो थाखाय बेखाइनो बद गोनां गोसो जानांगौ। खन्थाइआवदि आबेग थायो आरो मा मा आबेग हाबना द'ड—बेयो गेदेर बाश्रा नड, सोंलुआ बेसो दोंसे खन्थाइआ सुबुंजों मानो अनसाइ जादों—बेनो खन्थाइनि सिडव थानाय मुवा। गोबां समाव खन्थाइखौ खनफा फरायनानै बुजिनो एबा हमदांनो गोब्राब जायो। नाथाय खन्थाइखौ खनले खनले फरायसेआवबो बुजिनो हायाब्ला बे ओंथिखौ हमदांनो हायैनि फिनआ जादों— (क) हादरनि आरो गुबुन हादरनि सलन्थाय, जारिमिन एबा mythology, legend नि खोथाखौ मिथिनांगोन। गुबुन बागै गोसोनि थाथाय Psychoanalysis, Dialectical materialism एबा Theory of relativity बाइदिनि गियान थानांगोन थामहिनबा खन्थाइनि गोसोआरि दाथायाव गोजौआव मुंख'नाय मुवाफोरा थाफायो। खन्थाइ सोरजिनायाव बेफोर खोथाखौ जुक्तिजों लाबोयो खन्थाइगिरिआ। (ख) महरथि (allegory) बाहायनानै सल'नि गेजेरजों ओंथिफोरखौ इंगिदिनि गेजेरजों फोरमायो। माब्लाबा सानस्रिनि महरथि बाहायनानै बयबो मिथिखानाय ओंथिखौनो फोरमायो।

(ग) सरजानाय सोदोब आरो बाश्राखोन्दो बाहायनायनि ओंथिखौ हमदानो हानांगोन। (घ) दिन्थि सावगारि (Imagery) खौ हमनो हानांगौ।

गुबैयै खन्थाइनि ओंथिया गोबां समाव थाखोमायो।

बुंस्लिमनाय—बर' खन्थाइआ 20 जौथायनि गिबि जिथाइनि उननिफ्रायसो महर मोनबोदों। भारतनि गुबुन गुबुन रावनि थुनलाइ फरायना रौनाय बर'साफोरा खन्थाइ महर होनायाव गावसोर फरायनाय थुनलाइनि आदबखौनो बाहाय बोदों। बांला आरो असमिया थुनलाइआनो बर'फोरनि खाथिसिन थुनलाइआरि मुवा जानानै फैदों। फराय बिजोंआ गिबि समाव बांला आरो उनाव असमिया जानायलाय बर' खन्थाइगिरिफोरनि खन्थाइ सोरजिनायाव बाहायनाय मुवाफोर (आइदा, दाथाय आरो सानस्रि) आवबो बिसोर सोलोंनाय रावनि खन्थाइनि मुवाफोर हाबबोदों। गुबुन बागै इंराजि सोलोंथाया भारतआव गोसारनाय लोगो लोगो इंराजि थुनलाइआबो भारतआव गोसारो। इंराजी थुनलाइआ खन्थाइनि बाइदि गुबुन गुबुन महर लाबोयो, गोदान सानस्रि आरो दाथायखौ होफैयो। बहुमनि दाब दाब हादर—इउरुप आरो आमेरिकाआव जाउरिखांनाय थुनलाइआरि हादर, गोदान सानथाय आबो इंराजि थुनलाइनि गेजेरजोंनो भारतआव हाबदों होनोब्ला खाब जासिनो। बर' खन्थाइआव नुनो मोननाय खन्थाइनि महरफोरा माब्लाबा खेंस्लायै—भारतआरि (बांला आरो असमिया) थुनलाइनि गेजेरजों हाबफैयो आरो माखासेआ इंराजि राव सोलोंनाय फरायसा फोरनि गेजेरजों। बेखाइनो बर' खन्थाइनि दाथायखौ भारतआरि खन्थाइ दाथाय आरो इंराजि खन्थाइ दाथायनि नोजोरजों नाइनो गोनांथि दं। गोजौआव दिन्थिबोनाय खन्थाइनि आखुथाय आरो दाथायफोरा भारतारि आरो इंराजि खन्थाइ दाथायनि नोजोरजों लाबोनाय जादों। बेखाइनो माब्लाबा बर' खन्थाइनि दाथायखौ नाइबिजिरबोला बे राइथायाव मुंख'नाय आखुथायफोरजों गोरोबै एबा गुबुन आखुथायबो नुनो मोनो। खबामजों सुजुनाय एबा उदां खबामानो जाथों बर' खन्थाइखौ बे राइथायाव मुंख'नाय जखा सेवारि, मुं आरो सोदोबनि ओंथिफोरनि बाहागोजों बिजिरजोबनो हानाय नझ।

गुबुन बागै आथिखालाव खन्थाइ एबा आर्ट एबा थुनलाइआरि सोरजिथायाव एरैबाइदि गोदान गोदान माखासे सानस्रि हाबफैदों आरो बेफोरखौ बिजिरनाय जादों बे गोदान नोजोरजोंबो खन्थाइनि दाथायखौ नाइबिजिरनांगौ जायो। बबेखानि बे राइथायानि असमिया आरो इंराजि Rhetoric नि सायाव सोनारना दिन्थिनाय जादों खन्थाइ दाथायखौ। ■

दरं जिला बड' साहित्य सभानि सुंद' जारिमिन (1955-1994)

—हरि चरण बर'



हरि चरण बर' (1966) : टंलानि साजना चेनिपारा गामियाव बिथां बर'आ जोनोम जायो। बिथाड दरं जिला बर' थुनलाइ आफादनि आफादगिरि मासिखौ समाय होखांबाय। आथिखालाव बिथाड बाइदि आइदानि बागै लिरनानै थुनलाइ सोरजिबाय थादों।

1952 माइथायनि 16 नबेम्बराव बासुगामिआव दाजानाय बर' थुनलाइ आफाद (Bodo Sahitya Sabha) नि गोहोमा दरं जिल्लायावबो लासैयैब्लाबो गोलैओ 1955 माइथायाव। मख'नो गोनांदि बर' थुनलाइ आफाद दानाइ जथुम्मायाव दरं जिल्लानिफ्राइ देभिटसन भब्रा, एम.एल.ए. आरो सदानन्द बसुमतारि बिथांमोनहा दजनसे थान्दै लोगो लानानै बाहागो लाहैनो हादोंमोन। 1955 माइथायनि 20 आरो 21 नबेम्बराव दरं जिल्लानि टंला जालुकबारि गामिआव बर' थुनलाइ आफाद Central Bodo Sahitya Sabha) नि 4 थि जथुमाया दरं जिल्लानि बर' फोरनि नाजानायाव जाफुंनानै थाडे। मख'नो गोनांदि बै जथुमाखौ जाफुंसार होनायाव टंला नोगोराव थानाय मार'वारि फोलेरनि हिरालाल पाट'वारि बिथाड गोबां मदद होदोंमोन। बर' थुनलाइ आफादनि बारग' आफादगिरि, बै जथुमानि समनि बर' थुनलाइ आफादनि लोगो नेहाथारि ज'गेन्द्र कुमार बसुमतारीनि रावैब्ला हिरालाल पाट'वारि गैयामोनब्ला टंलानि बै जथुम्माया जाफुंसारनायानो गोब्राब जानानै फैगौमोन। बै जथुमनि 10 बोसोर उनाव दरंनि लेखा गोरों बर' सेंग्रा फोरा दरंआव बर' थुनलाइ आफाद दानो गोनां जानाइ बाथ्राखौ सानखांनो हादोंमोन। बै सेंग्राफोरनि नाजानायावनो 1965 माइथायनि 11 डिसेम्बराव हरिशिंगा गुदि फरायसालिआव बाहादुर बसुमतारी, एम.एल.ए. नि आफाद दैदेननाय गेवलां जथुमायाव पखिराइ डेका

आरो मंगल सन्दि ब्रह्मखौ फारियै आफादगिरि आरो नेहाथारि लाना गासै सा 21 मावथिजों दिदोम मावथि आफाद दानानै मंगलदै (बै समनि मंगलदै महकुमा) जिल्ला आथिखालनि दरं जिल्ला बर' थुनलाइ आफादखौ दानाइ जायो। मख'नो गोनांदि बै जथुमाखौ मंगल चण्डि ब्रह्म बिथाड हांखायदोंमोन। बिथानि रावैब्ला बिथांखौ बर' साहित्य सभाया बिथानो गांसे लाइजाम जों बै जथुमाखौ हांखायहोदोंमोन। फारसेथिं टंलानि धनेश्वर स्वर्गीयारिनि रावैब्ला बिथाड 1965 माइथायाव हरिशिंगायाव पखिराइ डेका आरो मंगल सन्दि ब्रह्मखौ फारियै आफादगिरि आरो हांखाइगिरि साइख'ना मंगलदै जिल्ला बर' थुनलाइ आफादनि Ad-hoc Committee खौ दानानै होगोयो। बिथाड दाना होनाइ बै जथुमायाव बाहादुर बसुमतारि आरो पखिराइ डेका सानैबो गैयामो। बै समाव धनेश्वर स्वर्गीयारी बिथाड Central Bodo Sahitya Sabha नि Organising Secretary मोन। बिथाड 1964 माइथायाव Central Bodo Sahitya Sabha नि 6 थि मालागुरि जथुम्मायाव कटन कलेज नि फ्राय थान्दै जाना थंनानै दरंनिफ्राय Organising Secretary साइख' जादोंमोन।

दायो आंनि आखायाव गोलैनाइ Record बाइदिब्ला Mangaldai Dist. Bodo Sahitya Sabha खौ Full Fledged दानाया हरिशिंगायाव 1965 माइथायनि 11 डिसेम्बाराव आरो बै जथुमायानो आफादनि 1 थि जथुम्मा। बै जथुमानि आफादगिरि आरो नेहाथारिया फारियै बाहादुर बसुमतारि आरो मंगल चण्डि ब्रह्म। बै आफादखौ दाग्रा फोरनि मादाव धनेश्वर स्वर्गीयारी आरो मंगल चण्डि ब्रह्म बिथां सानैआ मख'जाथाव।

18 आरो 19 एप्रिल, 1968 : मंगलदै जिल्ला बर' थुनलाइ आफाद (MDBSS) नि 2 थि जथुम्मा दैफां नोलोबारिआव जथुमो। बै जथुमायाव आफादनि आफादगिरि पखिराइ डेका थानो हायाखै। बेखाइनो आफादनि लेडाइ आफादगिरि लंकेश्वर बसुमतारि बिथाड आफादनि थान्दै मेल आरो गेवलां मेलखौ दैदेनो। आफादनि नेहाथारि मंगल चण्डि ब्रह्म बिथाड गावनि खामानिखौ दैदेनो। आफादनि बै जथुम्मायावनो लंकेश्वर बसुमतारि आरो बिहु राम बर'खौ फारियै आफादगिरि आरो नेहाथारि साइख'ना आफादनि गोदान मावथि आफाद दानाय जायो।

6, 7, 8 मार्स, 1969 : MDBSS नि सिंआव थानाय राडगरा (अदालगुरि) गामिआव Central Bodo Sahitya Sabha नि 10 थि जथुम्मा MDBSS नि बानजाइनायावनो गाजा गोमजायै जानानै थाडो। बानजाय आफादनि आफादगिरि आरो नेहाथारिया MDBSS नि आफादगिरि आरो

नेहाथारि फारियै लंकेश्वर बसुमतारि आरो बिहुराम बर' बिथांमोनानो जानांदोंमोन। 21, 22 मार्स 1970 MDBSS नि 3 थि जथुम्माया ग'पसासुबा गामिआव जाना थाडे। बै जथुम्मायाव आफादनि आफादगिरि लंकेश्वर बसुमतारि बिथाड गावनि मोदोम गात्रिनि थाखाइ नुजानो हायैआव आफादनि लेडइ आफादगिरि जसेफ दैमारि बिथाड आफादनि थान्दै मेल आरो गेवलां मेलखौ दैदेन्नो गोनां जायो। आफादनि नेहाथारि बिहुराम बर' बिथाड गावनि खामानिखौ दैदेनो। मख'नाय जायोदि आफादगिरि लंकेश्वर बसुमतारी बिथाड बेरामाव गोलैना 20.6.70 खालाराव जिड नागारो।

1, 2 फेब्रुवारि, 1971 : रौता बालिसिहा गामिआव MDBSS नि 4 थि जथुम्मा जथुमो। आफादगिरि जसेफ दैमारि आरो नेहाथारि बिहुराम बर'। बै जथुम्मायाव धनेश्वर स्वर्गीयारीखौ आफादगिरि आरो बिहुराम बर'खौ नेहाथारि लाना आफादनि (MDBSS) गोदान मावथि आफाद दाफिनो।

10, 11 फेब्रुवारि, 1973 : खैराबारिआव MDBSS नि 5 थि जथुम्मा जथुमो। आफादगिरि धनेश्वर स्वर्गीयारी, नेहाथारि बिहुराम बर'।

24 नबेम्बर, 1973 : रौता सारिआलिआव MDBSS नि मावथि आफादनि जथुमायाव Mangaldai District Committee, Roman Script Demand Action Committee खौ मंगल चण्डि ब्रह्म आरो रन्जित बर'खौ फारियै Chairman आरो Convenor लानानै 3 थि थांखिनि गेजेरजों दायो। नाथाइ 31.8.74 अगथ'आव अदालगुरि सिनेमा हलाव जथुमनाइ आफादनि General Meeting (Public Meeting) आव MDC/RSDAC खौ फोसाबना मंगल चण्डि ब्रह्मखौ Chairman आरो दिम्बेश्वर ब्रह्मखौ Convenor लाना गोदानै दाफिनो जथुमानि 2 थि थांखिनि गेजेरजों। मख'नो गोनांदि र'मान हांखो नाइगिरिनानै सोमाव सारनाइनि खामानिफोराव बाहागो लानायनि थाखाय पुलिसजों वानटेड जानानै बे जथुमायाव रन्जित बर' बिथाड बाहागो लानो हायाखै मोन होत्रा बिथाड गावनो बे लिरगिरिनो खिनथादों।

4, 5 फेब्रुवारि, 1974 : बेबारि गोजौ फरायसालिआव आफादनि 6 थि जथुम्मा जथुमो। बै जथुम्मानि आफादगिरि धनेश्वर स्वर्गीयारि आरो नेहाथारि बिहुराम बर'। बै जथुम्मायावनो धनेश्वर स्वर्गीयारिखौ फिन आफादगिरि लाफिननानै आरो जिउराम बर'खौ नेहाथारि लाना आफादनि गोदान मावथि आफादखौ दायो। मख'नो गोनांदि बिहुराम बर' बिथाड Central Bodo

Sahitya Sabha नि 1971 माइथायनि 12 थि सिमुलुगुरि (लखिमपुर) जथुम्मायाव Central BSS नि गाहाइ नेहाथारिनि बिबान मोनखाबोबायमोन।

1, 2 फेब्रुवारि 1975 : भक्तपाराव आफादनि 7 थि जथुम्मा जथुमो। आफादगिरि धनेश्वर स्वर्गीयारि, नेहाथारि जिउराम बर'।

17 एप्रिल, 1975 हरिशिंगाव आफादनि आफादगिरि धनेश्वर स्वर्गीयारिनि आफाद दैदेननायाव MDBSS नि मावथि आफादनि जथुमाव आफादनि Acting General Secretary प्रेमनाथ दैमारिखौ 2 थि थांखिनि गेजेरजों आफादनि गाहाइ नेहाथारि साइख'यो आरो बे मोनसे थांखिनि गेजेरजोंनो आफादनि नेहाथारि जिउराम बर' बिथाड गावनि मोदोम गात्रिनि थाखाइ आफादनि नेहाथारि मासिनिफ्राइ बिबान एंगलाइनाइ लाइजामखौ आफादा गनायना लायो।

8, 9 फेब्रुवारि 1976 : नावहेरुवा (माजबाट) आव आफादनि 8 थि जथुम्माया जथुमो। बै जथुम्मायाव आफादनि आफादगिरि धनेश्वर स्वर्गीयारि बिथाड नुजाहैनो हायैआव आफादनि लेडइ आफादगिरि जसेफ दैमारि बिथाड आफादनि हाबाफारिखौ दैदेनो। आफादनि नेहाथारि प्रेमनाथ दैमारि बिथाड गावनि हाबाफारि दैदेनो। मख'नो गोनांदि 8.2.76 अगथ'आव जथुमनाइ मावथि आफादनि जथुमानि 3 थि थांखिनि गेजेरजों 9.2.76 अगथ'नि गेवलां मेलखौ दैदेननो पुर्ण मसाहारिखौ थांखिनाइ नुनो मोनो।

9, 10 फेब्रुवारि, 1977 : कुबेरआलिआव आफादनि 9 थि जथुम्माया जथुमो। जथुम्मानि आफादगिरि धनेश्वर स्वर्गीयारि आरो नेहाथारि प्रेमनाथ दैमारि। बै जथुम्मायाव प्रेमनाथ दैमारिखौ आफादगिरि आरो जसेफ दैमारिखौ नेहाथारि साइख'ना आफादनि गोदान मावथि आफादखौ दायो।

13, 14 फेब्रुवारि, 1979 : पचिमपटलाव आफादनि 10 थि जथुम्मा जथुमो। आफादगिरि प्रेमनाथ दैमारि, नेहाथारि जसेफ दैमारि।

8, 9 एप्रिल, 1980 : रौतानि गेरुवाबाजाराव आफादनि 11 थि जथुम्मा जथुमो। आफादगिरि प्रेमनाथ दैमारि, नेहाथारि जसेफ दैमारि। बै जथुम्मायाव महेश्वर बर' आरो बेनुधर बर'खौ फारियै आफादगिरि आरो नेहाथारि साइख'ना गोदान मावथि आफाद दायो।

22, 23 फेब्रुवारि, 1981 : टेजियालपारा (कलाइगाव) गामिआव आफादनि 12 थि जथुम्मा जथुमो। आफादगिरि महेश्वर बर', नेहाथारि बेनुधर बर'। मख'नो गोनांदि नेहाथारि बिथाड बिबान मोननाइनिफ्राय गावनि नेहाथारिनि हाबाफारिफोराव बाहागो लाबोनो हाबोआखैब्लाबो बै जथुमानि

हाबाफारिखौल' दैदेनदोंमोन आरो बिथांखौ लोगो नेहाथारि अमरेन्द्र स्वर्गीयारि बिथाड मदद होदोंमोन। नेहाथारि बिथाड आफादनि उननि जथुमा एबा मावथि आफादनि जथुमाफोराव बाहागो लानो हायैआव आफादनि लोगो नेहाथारि अमरेन्द्र स्वर्गीयारि बिथाड नेहाथारिनि हाबाफारिफोरखौ दैदेननांदोंमोन।

26, 27 फेब्रुवारि, 1982 : अम्बागामिआव आफादनि 13 थि जथुमाया जथुमो। आफादगिरि महेश्वर बर', नेहाथारि अमरेन्द्र स्वर्गीयारि (i/c)।

29, 30 जानुवारि, 1983 : अरांनि बिष्णु राभा मेम'रियेल गेजेर फरायसालिआव आफादनि 14 थि जथुम्मा जथुमो। आफादगिरि महेश्वर बर', नेहाथारि अमरेन्द्र स्वर्गीयारि (i/c). बै जथुमायावनो मिलसन दैमारिखौ आफादगिरि आरो अमरेन्द्र स्वर्गीयारिखौ नेहाथारि लाना आफादनि गोदान मावथि आफाद दायो।

12, 13, 14 मे, 1983 : अदालगुरिआव Central BSS नि 24 थि जथुम्माया MDBSS नि गोखों नाजानायाव जानानै थाडे। बे जथुम्मायाव जगेन्द्र कुमार बसुमतारीखौ आफादगिरि आरो बिहुराम बर'खौ फिन गाहाइ नेहाथारि सायख'ना बर' साहित्य सभानि गोदान मावथि आफाद दायो।

9, 10 मार्स 1984 : गुमगाव गुदि फरायसालि (भैरबकुन्द) आव आफादनि 15 थि जथुम्मा जथुमो। आफादगिरि मिलसन दैमारि, नेहाथारि अमरेन्द्र स्वर्गीयारि। मख'नो गोनांदि बै जथुमायाव 8 थि थांखिनि गेजेरजों आफादनि मुंखौ Darrang District Bodo Sahitya Sabha खालामो।

2, 3 फेब्रुवारि, 1985 : बाहादुर आदर्श गामि (माजबाट) आव आफादनि 16 थि जथुम्मा जथुमो। बै जथुमायाव आफादनि आफादगिरि लिसन दैमारी बिथाड थांनो हायैआव लेडइ आफादगिरि कान्दुरा कसारी बिथाड जथुमानि हाबाफारिखौ दैदेनो। नेहाथारि अमरेन्द्र स्वर्गीयारि बिथाड गावनि हाबाफारि दैदेनो। मख'नो गोनांदि आफादनि आफादगिरि नुजायैनि थाखाइ कान्दुरा कसारी बिथाड आफादनि आफादगिरि बिबानखौ आफादनि 1986 माइथायनि माजुलिबस्ति जथुमासिम रुजुनो गोनां जादोंमोन।

10, 11 फेब्रुवारि, 1986 : माजुलि बस्ति (हरिशिंगा) आव आफादनि 17 थि जथुम्मा जथुमो। बै जथुमायावबो आफादनि आफादगिरि मिलसन दैमारी बिथाड नुजा हैनो हायैआव आफादनि लेडइ आफादगिरि कान्दुरा कछारी बिथाड जथुमानि हाबाफारि दैदेनो आरो नेहाथारि अमरेन्द्र स्वर्गीयारि बिथाड गावनि हाबाफारि दैदेनो। मख'नो गोनांदि बै जथुमायावनो Darrang Dist

Bodo Sahitya Sabha खौ महकुमा बाहागो आव अदालगुरि जिला बर' साहित्य सभा आरो मंगलदै जिला बर' साहित्य सभा दानाय जायो।

अदालगुरि जिलानि (Udalguri Sub Division) थाखाय अमरेन्द्र स्वर्गीयारिखौ आफादगिरि आरो नन्देश्वर दैमारीखौ नेहाथारि लाना आफादनि गोदान मावथि आफादखौ दानाइ जायो। मंगलदै जिला (Mangaldai Sub-Division) बर' साहित्य सभानि थाखाय मंगल चण्डि बर' बिथांखौ आफादगिरि आरो भजेन बर'खौ नेहाथारि लाना Ad-hoc. Committee दानानै हरनाय जायो। दुखु नांथावदि बै जथुम्माखौ 17 थि जथुमानि सोलायै 16 थि जथुमा होनना गोरान्थि आवनो जथुमानि हाबाफारिखौ मख'नाइ जादों। बे गोरान्थिनि थाखाइ उननि जथुमाफोरनि खुंथाइथिआ गोरान्थि जालाडे।

6, 7 फेब्रुवारि, 1987 : खैराबारिआव अदालगुरि जिल्ला बर' धुनलाइ आफाद (UDBSS) नि 18 थि जथुम्मा जथुमो। आफादगिरि अमरेन्द्र स्वर्गीयारि, नेहाथारि नन्देश्वर दैमारी। नाथाइ बै जथुमाखौ 17 थि जथुम होननासो गोरान्थिआवनो मख'नाइ जादों।

22, 23 फेब्रुवारि, 1988 : टंला कलेज आव UDBSS नि 19 थि जथुम्मा जथुमो। आफादगिरि अमरेन्द्र स्वर्गीयारि, नेहाथारि नन्देश्वर दैमारी। बै जथुमाखौबो 18 थि जथुमा होननासो गोरान्थिआवनो मख'नाइ जादों।

13, 14 फेब्रुवारि, 1989 : बाहिनिगामि (अदालगुरि) आव आफादनि 20 थि जथुम्मा जथुमो। आफादगिरि अमरेन्द्र स्वर्गीयारि, नेहाथारि नन्देश्वर दैमारी। बै जथुमाखौबो गोरान्थिआवनो 19 थि होननासो मख'नाइ जादों। बै जथुमायाव सुजेन्द्र नाथ दैमारि आरो रखेश्वर ब्रह्मखौ फारियै आफादगिरि आरो नेहाथारि लाना आफादनि (UDBSS) गोदान मावथि आफादखौ दानाइ जायो।

7, 8 मार्स, 1990 : काजियामाटिआव आफादनि 21 थि जथुम्मा जथुमो। आफादगिरि सुजेन्द्र नाथ दैमारी, नेहाथारि रखेश्वर ब्रह्म। बै जथुमाखौबो गोरान्थि आवनो 20 थि जथुमा होननासो मख'नाय जादों।

6 अक्ट'बर, 1991 : रौता सारिआलिनि जयभद्र हागजेर गोजौ फरायसालिआव सानसेनि हाबा फारि लाना आफादनि 22 थि जथुमा जथुमो। आफादगिरि सुजेन्द्र नाथ दैमारि, नेहाथारि रखेश्वर ब्रह्म। बै जथुमाखौबो 21 थि होननासो मख'नाय जादों।

19, 20 फेब्रुवारि, 1992 : दैफां नोलोबारि, एल.बि. शास्त्री गोजौ फरायसालिआव आफादनि 23 थि जथुमा थामहिनबा रुफाथि माइथायारि जथुमा

जथुमो। आफादगिरि सुजेन्द्र नाथ दैमारी, नेहाथारि रखेस्वर ब्रह्म। नाथाइ बै जथुमाखौ 1968 माइथायनिफ्रायसो हमना लाना रुफाथि माइथायारि जथुमा महरै खुंनाय जादोंमोन। मख'नो गोनांदि बे आफादखौ 1965 माइथायावनो Full Fledged महरै दानाइनि फोरमान दड। बेखाइनो 1965 माइथायखौ हमोब्ला रुफाथि माइथाइखौ बारबाइमोन। आरोबाव मख'नो गोनांदि बै जथुमायावनो mangaldai Dist. BSS आरो Odalguri Dist. BSS मोननैखौ ज' खालामना Darrang Dist BSS मुडै आफादनि गोदान मावथि आफाद दानाइ जायो। रखेस्वर ब्रह्म आरो धिरेस्वर बर'नार्जिखौ गोदान मावथि आफादनि फारियै आफादगिरि आरो नेहाथारि साइख'नाय जायो। नाथाइ बै जथुमायाव मंगलदै जिल्ला बर' थुनलाइ आफादनि बिबानगिरि फोरा सफैजोबनो हायाखैमोन। बेखाइनो मंगलदै जिल्ला बर' थुनलाइ आफाद आरो अदालगुरि जिल्ला बर' थुनलाइ आफादनि गोजाम मावथि आफादनि बिबान एंग्लाइनायनि जावजा जथुमा 4.4.92 अगथ'आव भकटपारा गेजेर फरायसालिआव जथुमानै मोननै जिल्ला आफाद बिखान्थि बादियै ज' जालायो।

5, 6 जानुवारि, 1993 : सोनाब कलाइगावनि सोडापथार गामिआव दरं जिल्ला बर' थुनलाइ आफादनि 24 थि जथुमा जथुमो। नाथाइ बे जथुमाखौ 22 थि जथुमा होनना गोरौन्थिआव मख'नाइ जादों। आफादगिरि रखेस्वर ब्रह्म, नेहाथारि धिरेस्वर बर'नार्जि। बै जथुमानि थान्दै मेलाव नेहाथारि बिथाड गवखौ आफादनि नेहाथारि मासिनिफ्राय बोखारनो खावलाइनाइखाय बिथांखौ आफादनि नेहाथारि मासिनिफ्राय बोखारनाइ जायो आरो बिथांनि जाइगायाव आफादनि लोगो नेहाथारि प्रसन्न बर'खौ साइख'नाय जायो।

25, 26, 27, 28 फेब्रुवारि, 1993 : टंलाव बर' थुनलाइ आफादनि 32 थि जथुमाया DDBSS नि नाजानायाव जाना थाडे। बै जथुमाखौ जाफुंसार होनायाव DDC/ABSU, DDC/AATWWF आ बानजाइ आफादखौ गोख्रोंयै मदद होदोंमोन। DDC/ABSU नि बिथोन बाइदियै Khairabari AC/ABSU, Bhergaon AC/ABSU, Dimakuchi AC/ABSU, Tangla AC/ABSU आरो गोबां बर' सेंग्रा-सिख्ला मावसुमा हानजा फोरा बाइदिसिना खामानि फोराव बानजाइ आफादखौ हेफाजाब होदोंमोन।

बिथांमोननि अनगाथैबो टंला बियाबनि बर' राइजोफोर, Tangla AC/ARSU नि दैदेननायाव राभा राइजोफोर, बानजाइ आफादनि बाइदिसिना बिबानाव थानाइ असमीया, बाडालि मारवारि, राभा, शरनीया, नेफालि, इउ.पि., फोलेरनि मावथिफोरा बानजाइ आफादखौ मदद होदोंमोन। बानजाइ आफादनि

गाहाइ बिबानगिरिफोरा फारियै आफादगिरि मंगल चण्डि ब्रह्म, मावफुंग्रा आफादगिरि दिन नाथ दास, गाहाइ नेहाथारि रन्जित बर' बिथांमोनामोन।

18, 19 फेब्रुवारि, 1994 : पश्चिम पटलाव (डिमाकुसि) आफादनि 25 थि जथुमा जथुमो। बै जथुमाखौबो गोरोन्थिआवनो 23 थि जथुमा होननासो मख'नाइ जादों। बै जथुमानि आफादगिरि रखेस्वर ब्रह्म, नेहाथारि प्रसन्न बर'। मख'नो गोनांदि बै जथुमायाव आफादनि आफादगिरिया हानथामेलानि जेंनानि थाखाइ 19 फेब्रुवारिनि सानजौफुआवसो नुजा हैनो हायो। फारसेथिं आफादनि लेडइ आफादगिरियाबो नुजा हैनो हायैआव 19 फेब्रुवारिनि फुंनि समाव हरिचरण बर'नि दैदेननायाव जथुमनाइ मावथि आफादनि जथुमनि थांखि बाइदियै बर' रेबग्रा जथुमनि आफादगिरि दलेस्वर बर'खौ आफादनि फिरफिलाखौ बिरहो होयो आरो बिथांखौनो थान्दै मेलखौ दैदेन होनाय जायो।

बेआव मख'नाइ जायोदि DDBSS नि 1986 माइथायनि माजुलिबस्टि जथुमानिफ्राय 1992 दैफां नोलोबारि जथुमासिम मंगलदै जिल्ला बर' थुनलाइ आफादनि जारिमिनखौ बेआव मख'नाइ जायाखै।

थुनलाइ आयदा :

DDBSS आ थुनलाइनि बेलायाव गोखोंहै मावनो हायाखै। धनेस्वर स्वर्गीयारि सुजुनायाव मंगलदै जिल्ला बर' थुनलाइ आफाद दिहुननाइ गोसोखां बिजाब (मोखां बिलाइ गांनै) 1968, 1970 माइथायाव ओंखारो। 1977 माइथायाव जिउराम बर' आरो दलेस्वर बर' सुजुनायाव 'बर' राव थुनलाइनि मंगलदै जारिमिन' गोसोखां बिजाब बिसान मोनसे आफादनि दिहुननायाव ओंखारो।

बेदिनो आफादनि माइथायारि जथुमाफोराव बानजाइ आफादनि दिहुननाइ गोसोखां बिजाब गांफा-गांनै ओंखारो जेरै, 1982 माइथायनि अम्बागाव जथुमाव 'अम्बारि', 1988 माइथायनि टंला जथुमाव 'दिमाफुर', 1992 माइथायनि दैफां नोलोबारि जथुमाव 'दैरांसा' 1993 माइथायनि कलाइगाव-सेडापथार जथुमाव 'आगान', 1994 माइथायनि पश्चिम पटला जथुमाव 'दावमासार' बायदि लाइसिफोर ओंखारो।

र'मान हांखोनि सोमाव सारनाय (1974-75) :

बर' थुनलाइ आफादा र'मान हांखोनि सोमाव सारनाइनि जाहोनाव दरं जिल्ला बर' थुनलाइ आफादनि सिडव अदालगुरिनि एनजेलिस बाग्लारी आरो

स'मबार ब्रह्म, रौता भालुकमारिनि पानिराम दैमारी बिथां जोहोलाव साथामा मुंख्लं जायो। गोबां बर' जोहोलाव जोहोलावजोफोरा पुलिस फोरजों बुग्लिजानानै अराइसमनि थाखाइ लोरबां जानानै थानाडे। टंलानि रन्जित बर'नि फ्राय मिनथिनाय बाइदिब्ला र'मान हांखोनि सोमाव सारनायाव दरं जिला बर' थुनलाइ आफादनि सिडव Maintanance of Internal Security Act (MISA) नि दहाइयै गोबावसिन जेइल जानांनइ फोरा जितेन बर', हरिशिंगा; मनि साहा, टंला; रन्जित बर' टंला, बिथां मोनानोमोन। मनि साहाया सोमाव सारग्रा फोरनो गाडी होनाइनि दाइआव हमजाफादोंमोन। बिथां बाइदिनो बै समनि टंला कलेजनि बेंगलि फरायसा अजित साहा आरो बिभुति आचार्यखौबो सोमाव सारनायाव मदद होफानाइनि दाइआव मंगलदै जेइलाव दानसेनि बांसिन जोबना दोनदोंमोन। जोबसालिआव हारसा पुलिस अफिसार सासेआ रन्जित बर'खौ दोखो दोखो बुग्लिसे बुग्लिना बिथांनि आथिंखौ सिफाइथारना होथारसिगौमोन सासे बर' पुलिस अफिसारा लावथिखौ सेनानै लाडामोनब्ला। ■

बर'नि खुगा मेथाइ बुथुमनाय आरो बेनि गोनांथि

—नन्देश्वर दैमारी



नन्देश्वर दैमारी (1955) : सल 'मा, सुंद 'सल' रायथाइ, खन्थाइ लिरगिरि। 'मन्जुबाला देबी' बिजाबा बिथानि गांसेल' सल 'मा। सुंद 'सल 'फोरनि मादाव 'बक्सिं', 'अबे नेनाय दालांआ बायप्रेबनायसो' बे गांनैया मख 'जाथाव। बिथानि नआ अम्बागामिआव। जिला बर' थुनलाइ आफादनि नेहाथारि आरो आफादगिरि मासिखौबो समाय होखांबाय।

बुहुमनि मोनफ्रोमबो हारिया मोनसे समाव मिथिंगाआरि मुगायाव राइजो जाबो नांदोंमोन। मिथिंगायारि मुगानिफ्राय दावगायै दावगायै सुबुं माहारिया दिनैनि महर लाफैदों। जेसेबां दावगानाय हारियानो जाथों, गुदिआव मिथिंगाजों लोबबा लाखिनानै राइजो जाबोनायलाय मोनफ्रोमबो हारिनि बेलायाव उनथिं नायहरोब्ला मिथिंगायारि आखल-आखु, महर-मुस्रि आरो हारिमुनि रेगा एबा मोनामनाय थाफादेरनायखौ दिनैबो मोनदां हायो।

बर' हारिनि बेलायाव बे रेगाया दाबो रोखासिन जानानै दड'। बुनो थाडेब्ला बर 'फोरा दिनैसिमबो मिथिंगायारि आखल आखुनिफ्राय आनञ्जायनानै फैजोबनो हायाखै। दैमा दैसा, हाजौ हायेननि सेर सेर राइजो जाबोनाय आरो दाबो बे बायदि मिथिंगानि गेजेरावनो राइजो जानो लुबैग्रा बर 'फोरा, दानि गोदान मुगानि बार हावाजों गेलेमफानो सोलोंदोंब्लाबो मिथिंगाआरि सानस्रिया बर' बिखा गोरबोनिफ्राय बेरखां बोनो नायगिरनायखौ बिसोरनि हारिमुनिफ्रायनो रोखा रोखा मोनदां हायो।

बै मिथिंगायारि मुगायाव राइजो जानाय समाव मिथिंगायारि आदब-खायदा, आखल-आखुजों गोरोब-फानानै खुगा खुगा खनबोनाय मेथाइफोरखौनो— 'खुगा मेथाइ' होत्रानै बुंनाय जायो। बैफोर मेथाइ फोराव बाहायनाय खौरां एबा बाथ्रायाव जैरे थागिबि आरो गुबै गोजाम सुबुंनि महर मुस्रि, हारिमुफोरा बेरखाडे

बिब्दिनो देंखो आरो खबामावबो आलादा मोनसे रोखोमनि आखुआ रोखा जानायखौ नुनो मोनो। गुसुडै बुडोब्ला मोनफ्रोमबो हारिनि खुगा मेथाया गावबा गावनि हारिनि गुबै हारिमु आरो समाजनि महर मुप्पिखौ बेरखांहोनो नाजायो।

बिब्दि मेथाया बर' हारिनि बेलायावबो दाम दड'। बेफोरनि फेरलेबसे फेरलेबसेआ एरै—

- 1) दाउखा हाय सिला हाय
दाउखा हाय सिलाहाय
दाउसा फिसा गैया।
औवा ख'बारु औवा ख'
जोंहा बारलांफाया
मोसादों खर' लानथ' थ'
- 2) ऐ बैराथी ललिया
नोंनि खिबु एल' एल'
गय खावनायखौ
जोंलाय जालिया।

गोदो गोदाय बर' फोरनि हाबायाव बारलांफा आरो बैराथीआ गाहाइ बिबान लाबोदों। हिन्जाव गोदान लाबोनायनि मोनफ्रोमबो हाबा फारिआव बारलांफा आरो बैराथी गैयाब्ला बे हाबाया बर' समाजनि गनाय जानाय हाबायानो नडामोन। फारसेथिं हिन्जाव गोदान मोनोब्ला हौवा गोदाननि नखरा हिन्जावसानि नखरनिफ्राय अमा बेदर गाननाय-जोमनाय बायदि बायदि दाबि खालामजानायनि अनगायैबो हिन्जाव गोदाननि गामि एबा समाजजों बायदि बायदि रावजों जंखाय जायोमोन। गोजौआव मखनाय मेथाया बे बायदि जंखायनायनि मोनफा मोनफा मेथाइनि सिरि।

ना बारलि
जा रोगां लों रोगां
फख्रिनि ना बारलि
आलासि उलासि बयबो
जानाय लोंनाय बाहारि

बर' फोरनि गामि होनोब्ला मोनसे समाव जेरैबो जेनिबो आंखाल गैयामोन। आलासि उलासि फैयोब्ला बाजार खालाम नांगौनि गोनांथि गैयामोन।

नआवनो मेगं थाइगं गय फाथै आरो फखिनि ना हमनानै आलासि सोंनो हानाय
जानाय लोंनायनि बाहारि बर' नखरनि सावगारिखौ बे मेथाया फोरमायदों।

ऐ मोनबारि
मा नागिरदों
गय दंफां सारि सारि
फाथै बिफां लारि लारि
बिखौनो नागिरदों।

मिथिंगा राइजोआव राइजो जानाय लेखा रोडै जाम्बिब्लाबो फिसाइ जनो
थाखाय बर' सिख्लाफोरा आवाफावाद्राय नडमोन। फिसाइ जनो थाखाय ओरै
बायदि हौवासा नागिरोमोन जायनि नखराव गय-फाथैनि बारि बागान दड'।
जायनि नखराव आलो गोजोनै संसार जानो हानायनि राहा दड'।

मुगासं
दरखं मोखांनि
मुगासं
बर' बोराइनि रावखौ
दसे खोनासं।

मुगासं बिफाड बेसेन गोसा बिफां नडब्लाबो बर' समाजाव मानोदि
बे बिफाड बेसेबा लोब्बा गोनां बेखौ फोरमायनाया गोब्राब। नखरफ्रोमबोनि
बारिआव मुगासं बिफाड थायोमोन बे बाथ्राया नाथाय थार। मुगासं बिफांनि
बन दान्नाया हुदा नडब्लाबो बे बिफांनि आंखाल गैयैलाय बन दान्नाय
खामानियाव बिफाड बाहाय जाबोदों। उदायद्रायनाय दंफां नडब्लाबो बेखौ
बर'फोरा न' लुनाय खामानियाव बाहायबोदों।

फारसेथिं मुगा लाथा एम्फौ फिसिनायाव बिफाड बेसेबा गोनांथार। मुगा
एम्फौनि फिथोबनिफ्राय खुन्दुं लुनानै जि दानानै लानाया बर'फोरनि हुदामोन।
ओंखायनो बे बायदि बेसेन गैयै नाथाय बेसेबा गोनांथार बिफांजों बर'
बोराइफोरखौ रुजुनाया बेसेबा ओंथि गोनां।

बोराइ सुबुड बेसेन गैया जानो हागौ नाथाय मुगासं बिफांनि बाहायथिया
बेसेबा गोनांथार बायदि। बर' बोराइनि बाथ्राफोराबो फंफ्रोमबो बेसेबा बेसेन
गोनां। ओंखायनो सेंग्रा-सिख्लाफोरखौ बोराइफोरनि बाथ्राफोरखौ खोनासंनो
थोन्दों। नडब्ला खैफोदाव गोम्लैनो हागौ।

बारि खनानि अलदर
अमुखा खसारिआ
जाहोआ जाहोबाय
अमा बुरैनि बेदर

थास' बिथंखौ बर'फोरा जैरै जायो अलदर बिथंखौबो मेगं जायो। थास'
बिथंजों अमा बेदर जानाय बायदि अलदर बिथंजोंबो अमा बेदर जाहोनो हानाया
बर' समाजाव बेसेबा मान गोनां।

बर' बिलोनि ना बारलि
ऐ नोंनि नयाउ
फिसा हिन्जाव
हरनायनि फारि

न'आव अमा थायोब्ला फिसा हिन्जाव बिलायनायनि खाबुआ जैरै थायो
फुखिआव एबा खाथिनि बिलोफोराव ना बारलि हमनानैबो फिसा हिन्जाउ
बिलायनायाव हेफाजाव मोनो।

बर' समाजाव बिबोनांखौ जंखायनो मोननायनि अनगायैबो बिबोनांजों
मोसानो रंजानो मोननायनि जैरै खान्थि दड'मोन बे बायदिनो गोसो जायोब्ला
बिबोनांखौ हाबा लानायनिबो जेबो बादा गैयामोन। ओंखायनो बिगुमै-बिबोनांनि
सोमोन्दोआ बेसेबा गोदै आरो अन्नायनि। उन्दैसिन बिबोनांखौ अननो मोननाया
सासे बिगुमैनि थाखाय बेसेबा खाफाल गोनांनि बाथ्रा। बे बाथ्राखौनो मेथाइजों
फोरमायनाय जायो औरै बायदि—

अ ... बिबोनां गदाय
आगै मोनबारी बिबारी
फै मोसानि सनाफोर जोंबो
सारि सारि ...।

बयबो फोथायो बे जुगआ खुलि जुग। खुलि मगाया जोबथा मुगा। बे
मुगायाव जेनिबो आंखाला नुजादों। ओंखायनो बर'फोराबो बे मुगाखौ आंखालनि
मुगा होनदों। खैदां खैफोदनि मुगा होनदों। बे मुगायाव सुबुं हारिआ
दावगानायनि राहाखौ मोनदां हायै आन्दायदों। ओंखायनो फोरमायदों औरै
बायदि—

अ... लोइ बर'फोर
मादिन जाखौ जोंहा

खोलि जुगावलाय
 जानानै लॉनानैनो
 खर' फुरलांबाय
 एसे मोजां जौसेरा
 बिखा सौलांबाय।
 फेरेंगा सेउ सेउ
 माइ सौनांगौ आयै
 आंहा
 माइरं खुनांगौ आयै
 आंहा
 दोम दोम सौलायगोन;
 माइ सौवाबोला
 माइरं खुवाबोला
 माइरं खुवाबोला
 दानो हौवा दाखुजों
 दोमा दोम सौजागोन
 आयै सौजागोन।

दाउज्ला गिसिबनाय लोगो लोगो सोरांनोब्ला फेरेंगा दाउआ सेउ-सेउ
 गाबो। बर' हिन्जावफोरा अब्लानो माइ-माइरं उवाल एबा दिंखिआव सौनो
 लायो। बे समाव सिखारनानै माइ-माइरं सौनो-खुनो रोडब्ला हौवाफोरजों
 बुजानायनि फाला जायोमोन। बाश्राखौ मेथाइजों फोरमायदों। लोगोसे बर'
 समाजनि सावगारि फोरमायदों।

दागाबसै आगै बिनानाव
 हारसा हुवानो हराखै
 बांगाल हुवानो हराखै
 (सिमसा हुवानो हराखै)
 बर' हुवानोसो राइजो जानोसो
 हरदोंमोन हरदोंमोन।

हाबायाव हिन्जाव गोदाना गाबोब्ला बे मेथाइखौ खननानै एबा सिफुंजों
 दामनानै हिन्जाव गोदानखौ बुरखायनो नाजानाय जायोमोन।

दागाबसै आगै बिनानाव
 हारसा हुवानो हराखै
 बांगाल हुवानो हराखै
 (सिमसा हुवानो हराखै)
 बर' हुवानोसो राइजो जानोसो
 हरदोंमोन हरदोंमोन।

हाबायाव हिन्जाव गोदाना गाबोब्ला बे मेथाइखौ खननानै एबा सिफुंजों
 दामनानै हिन्जाव गोदानखौ बुरखायनो नाजानाय जायोमोन।

नायनो बाबालाय
 आंनो खामप्लायबो
 नाड्ड होनो
 अनदोंबोला
 जुमाइ खुरैसे लाबो
 लोंहो फैदो।

बे मेथाइआ बर' खुगा मेथाइफोरनि मोनसे र'मान्ठिक मेथाइ। जौ लोंहोनो
 हानाया बर' समाजाव मोनसे मान होनाय खान्ठि। गोसोनि आंगोसिननो जौ
 खुरैसे लोंहोनो हायोब्ला सिख्लाफोरा बेसेबा गोजोननाय मोनोमोन। बेयो गोसो
 गोबोंनि अननायनि नेसोंन। जिरायनो खामप्लाइ होनो हायाब्लाबो जौ खुरैसेजों
 अन्नायखौ दिन्ठिनो हायो। बाश्राखौ बे खुगा मेथाइजों फोरमायदों।

बैसागो बोथोरा
 सफैलायबाय हाय
 आदामोन
 सफैलायबाय

गाज्जि दामोन हाय
 आदामोन
 गाज्जि दामोन
 गाज्जि दामोन
 जोंनि बालाबसे मोसानायखौ
 जोंनि रंजानायखौ।

बैसागो दानआव मिथिंगाया जेरै राजखुंग्रिनि महर लायो; बिब्दिनो सुबुंनि गोसोआवबो बे दानाव बेसेबा रंजानाय सोमजिहोयो। गोसोनि रंजानायजों सेंग्रा-सिख्ला, बोराइ-बुरै, गथ' गथाइ बइबो रंजायो, मोसायो। सिख्लाफोरा नाथाय अब्लाबो समजानि 'गाज्जि' मेगननिफ्राय गोजानद्रायाव थानो हायो। ओंखायनो बे समाव बालाबसे मोसानायखौ जाहाथे बिदा, एबा गिदिरफोरा गाज्जि मोना बेनि थाखाय मेथाइजों खावलायदों।

ऐ सानजारि गथ'
आंबो थांफानि रथ'।

बर'फोरा फारियै सानजाथिं आउगाय लांबाय थादों। गोदान हा नागिरनानै। बे मेथाइजों बेखौनो फोरमायदों।

अमानि आथेंआ थोंब्रै
हमनोबो नांगौ साब्रै
अमा खर'आ नायथाव
सबाइ मेगंजों जाथाव।

बर'फोरनि मादाव अमा बेदर आरो सबाइजों संनाया मोनसे रोखोमनि मेगं। जा मेगंखौ थारैनो गोथाव होनजायो।

गय दंफां सारि सारि
फाथै बिफां लारि लारि
बिनो बर' गामि ऐ बिनो बर'गामि।

बर' गामिब्ला गय दंफां, फाथै बिफां थानांगोन। बर'फोरनि बेयो मोनसे हारिमु।

दाउ मैना दाउ मैना
हाग्रा गेजेराव,
बानानै थादों आदा
साल बिफाडव;
गावनानै होदो आदा
बिखा गेजेराव

मैहुर होनायाव आखा आखा बर' समाजनि सिख्लाफोरा गावखौनो दाउ मैनाजों रुजुनानै बिखायाव (गोसोआव?) अत्राय होनो खावलायदों —मोजां मोत्राय सेंग्राखौ।

दंफां दाननो थांबोला
 बन दाननो थांबोला
 साल ज'रा माखु ज'रा
 लाबो लाबो आदा
 साबुराम मादा।

बर' सिख्लाफोरा दानाय लुनायाव बेसेबा आखा-फाखा। साल बिफांनि साल ज'रा आरो माखुजों जि दानो लुबैग्रा बर' सिख्लाफोरा मोजां मोत्राय सेंग्राखौ बन दाननो थांनाय समाव साल ज'रा माखु ज'रा लाबोफानो खावलायदों।

दाउखा हाबनाय नयाव
 सिला हाबनाय नयाव
 आंखौ दाहर आयै
 आंखौ दाहर

हाबा जानाय बेलायाव बर' सिख्लाफोरादि बेसेबा साग्रिद बेखौ बे मेथाइआव फोरमायदों।

थु खैना थु लरेद लरेद
 नोमा नोम्फानि
 माइ बान्दारा
 नौनि नंलिया।

हाबा जानायनि उनाव बिमा-बिफानि माइ बान्दारादि हिन्जाव गोदाननि नड; ओंखायनो बेखौ साननानै हाबानि समाव लरेद लरेद हान्थिनानै होवा गोदाननि न'फासैं आउगायनो बुरखायनाय देंखोजों खननाय जायो।

बैफोर खुगा मेथाइफोरा बर' खुगा मेथाइफोरनि फेरलेबसेल'। मोत्रैसो बिदिन्थिल'। बे बायदि खुगा मेथाइफोरा बर'फोरनि गेजेराव बायहाजार दड'।

गोदोनि बोखावजायै ग'वालपारा, कामरुप, दरं, लक्षिमपुर, सा कासार बायदि बायदि जिलाफोराव बैफोर खुगा मेथाइफोरा गावबा गावनि ओनसोलारि मिथिंगाजों, समाजजों गोरुबफानानै आलादा आलादा महरै मोनहासयै समनिफ्रायनो खुगा खुगा सोलिबोबाय थादों।

बैफोर खुगा मेथाइफोराव बर' हारिनि थानाय जायगानि मिथिंगा फारिया, मख'जानायनि अनगायैबो, हारिनि आबाद माउनाय, हारिनि हाबा खुंनायनि नेम,

धोरोम फोथायनायनि खान्थि, समाज बेंनायनि खान्थि, बर' सेंग्रा सिख्लानि गोसोनि सान्नाय बायदि बायदि मोनफ्रोमबो बिथिड बेरखांदों। बर' सुबुंनि गोसोनि सानबोलाउरि आरो बर' समाजनि हारिमु जेरै ना गुरनाय, मैहुर होनायनि हुदा, आइजें हेबनाय सोलो, गाननाय-जोमनाय, दानाय-लुनायनि सोमोन्दै फोरमायनायनि अनगायैबो हारिनि गुबै सिनायथिजों लोगोसे गोदोनि बर' राइजो आरो राजा-महाराजानि जारिमिनफोरा रोखा रोखायै हाबनानै थानायखौ नुनो मोनो।

ओंखायनो बेफोर खुगा मेथाइ फोरखौ रंजनाय मोसानायनि मेथाइल' बुड लासिनो बर' हारिनि मोनफा-मोनफा दलिल होनोब्ला बांद्राय बुंनाय जानाय नड।

बर'फोरहा लिरनाय जारिमिन गैया। जारिमिननि आंखालाव बर'फोरा दा गुबुन हारिनि सिगाडव खुगा सिनो जा बायदि गोहो मोनाखै बिब्दिनो हारिखौ फोजाखांनाय, बेंनाय आरो दैदेन्नायाव आस'खान्दा जानानै थानो गोनां जाबोदों।

बर' हारिया दायो राजखान्थि, समाजखान्थि, रांखान्थि आरो धोरोमआरि बेलायाव गुबुन हारिनि सिगाडव गावनि सिनायथिखौ दिन्थिनो हादोंब्ला आरो बेनि थाखाय हारिनि मोनसेल' आखुआरि दालाइआ मैखोम बाहागो लादोंब्ला बेनो जादों हारिमु। हारिमुनि सेर-सेर गुबुन मोनसे दालाइ, बेसेबा आखाफाखा सोमो नांथाव बर'फोरनि हारामुदआ बर'फोरखौ दा गोदानै दाफिन्नाय आरो फोजाखांनायनि गाहाय बिबानखौ रुजुनबोदों।

गुबुन हारिनि मेथाइफोराव हारिखौ फोजाखांनाय, दाफिन्नायनि जा लाहार-फाहार नुनो मोनो; बर'फोरनि खुगा मेथाइफोरावबो बिब्दि फोजाखांनाय आरो दाफिन्नायनि इसारा होबोदों।

गुबुन गुबुन समाव गुबुन गुबुन हारिजों दावहा नांनानै नाखरेबजानाय हारिखौ खोमथा महर होनो थाखाय मा बायदि सोलो लानो नांगौ, खौसे जानांगौ बेफोरखौ खुथारै खाउलायबोदों।

बर'नि गिबि रेकर्डिं खालामनाय रुंसारि नीलेश्वर ब्रह्मनि—

'हनै सानजाहा सोरां साना फैगौ

हनै सानजाहा सोरां बोगौ ...'

बे मेथाइखौबो खुगा मेथाइनिनो गुबुन मोनसे महर होनोब्ला बर' हारिनि जुनै बे मेथाया थारैनो गोबां ओंथि गोनां।

बर 'फोरनि अखरांआव सोरां साननि सिमांखौ बे मेथाया रोखा खालामदों। सोरां सान नुजानाय लोगो-लोगो हारिखौ उन्दुनानै थानायनिफ्राय फोजानायनि बिबुंधि बे मेथाया लाखिदों।

बे बायदिनो हारिनि इउन जोलैफोरनि थाखाय लामा दिन्थिनाय आरो इउननि मोजां-गाञ्जिनि इसारा होनायनि बिबानखौ गोबां बर 'खुगा मेथायफोरा रुजुनो नाजानायखौ नुनो मोनो।

नाथाय दुखु गोनां बाथ्राया जाबाय—बै बायहाजार खुगा मेथायफोरखौ रेकर्डी खालामनानै एबा 'स्टाफ नटेश्यन' लिरनानै दासिमबो बुथुमनानै दोनधुमनाय जायाखै। जायनि जुनै दिनै बेफोरो बावनायनि गोबोंआव गोमालांजोबनो हमदोंसै।

दा बर 'फोरा बेसेबा दावगाबाय। थानाय बर 'लेण्ड सोमाउसार नायनिफ्राय बे दावगानाया गासैबो बिथिंजायनिफ्राय बांसिन्निफ्राय बांसिन जाबोदों। हारि दाउगानायजों लोगोसे हारिमुआबो दाउगाबोदों। बहुमनि गुबुन हारिनि गेजेराव जैरे गोखै सोलाय-सोल' जानो हमदों; बिब्दिनो बर 'फोरनि हारिमु हारामुदआबो सोलाय-सोल' जानायखौ नोजोराव गोग्लैदों। इलेक्ट्र 'निक मुगानि जुनैनो खना खनला थानाय बर 'फोराबो दानि मुगाजों गोरुबफानो सोलायफानो खाबु मोनबाय। बर 'मेथाइ-दामनाय देनायफोराव सोनाबआरिनि गाबआ गलाय मोन्देर जाजोबबाय।

बर 'राउआ दिनै बहुम फरायसालिनि दरखं गाहैबाय। बहुमनि गुबुन गुबुन दावगानाय रावजों, समानै आगान सुरफानो सोलो मोनबाय। इलेक्ट्र 'निक मुगाजों मोगामोगि जानानै गोदान मुगानि गोदान गोदान सोलो, गोदान गोदान सानन्निनि बारहावाजों आगान सुरफानो, सोलोंनो खाबु मोनबाय। बिब्दिनो गोजामखौ नागारनानै गोदान गोदान देंखो खबाम आरो बाथ्राफोरा बर 'मेथायफोराव जायगा मोनबाय।

बर 'हारिनि समाजआ जैरे दावगादों बर 'मेथायनि मासिआबो दा गोदोनि बै खुगा मेथाइनि सिरिआवनो गोग्लैसोनानै थायाखै।

सोनाबआरि देंखो-खबाम, बाथ्रानि स्टाइलफोरा बर 'मेथाइफोराव बांसावनो हमदोंसै। लोगो लोगो बर 'नि गुबै देंखो, खबाम, सानन्नि आरो दामनाय-देनायफोराबो गोमानो हमनायखौ नोजोराव फैदों।


बेयो थार दि, बे बायदि बोहैथिआ सोलिबाय थायोब्ला बर'नि अंगुबैआ बर' मेथायआव आरो बारा गोबाउ थावरिनो हानाय नंलिया।

ओंखायनो बैफोर मेथाइफोरखौ दा बुथुमनानै उननि जोलैफोरनि आखायाव दोनथुम लांनायनि सम नुजाफैदों। जा मेथायफोरा हारिनि अंगुबै जारिमिन, अंगुबै समाजखान्थिनि बिथा, अंगुबै धोरोम फोथायनाय, अंगुबै देंखो आरो खबामखौ फोरमायनो हायो; बैफोर खुगा मेथायफोरखौ उन जोलैनि आखायाव होलांनो हायाब्ला दानि बर' सुबुं जानानै जों बयबो दायनिगिरि जानानै थानांगोन।

बे बिबाना दानि बर' सानसुमै, लिरगिरि, मेथाय खनगिरि फोरनि बिबानखौ रुजुननो गोसो खालामाब्ला हारिनि रेगाया गोमा लांनो हागौ। ओंखायनो बर' गामि गामि गिदिंनानै खना-खनला थानाय बोराय-बुरैफोरनिफ्राय दानो बेफोर खुगा मेथाय-फोरखौ बुथुमनानै दोनथुमनायनि राहा खालामनाया हारिनि जुनै मोनसे बाख्जायजाथाव खामानि जागोन। ■

बिहुराम (बैसागु) बर' आरो रौता ओन्सोलाव बिथांनि मावखिन्थि नायनि गोहोम

—रखेश्वर ब्रह्म



रखेश्वर ब्रह्म (1957) : थुनलाइ मावथि। जिला बर' थुनलाइ आफादनि बारग' नेहाथारि आरो आफादगिरि। बिथांनि नआ रौतायाव।

रोमै रोमै खोनानो मोननाय बादिब्ला जोंनि रौता ओन्सोला समनि फाखनाव मोनसे समाव शंकरदेब फोसावलांनाय “बैष्णव” धोरोमाव बारस्लायलांनो हमबायमोन। गावनि हारिनि आसार खान्थि फोरखौ नागारनानै शंकरि भक्तीयाफोरनि खाथियाव “शरण” लानानै “शरणीया” जानो ओंखारबायमोन। रौता सारिआलिनि खाथि-खाला थानाय गामीफ्राव “नामघर” लुसावनाय नुबायमोन। दाब दाब बर' गामीफ्राव “नामति दोलो दानाय नुबायमोन। जाबादाजा निमानि रावखौ एंगारनानै हार्सा राव “असमीया” रावखौसो गाव-गावनि न'खरफ्राव बाहायनो हमबायमोन। गावनि बिमानि राव राइलायोब्ला गाव-खौनो—गाव मुगैजाग्रा राव आरी होननानै गोसोआव लाजिनाय सम सौफैबायमोन।

नाथाय, दिनैनि मुगानि रौता ओन्सोलनि महर—मुश्रीजों बै समनि महर मुश्री खौ रुजुनानै नायोब्ला जोंबोरैनो सोमो नांनो गोनां एबा लाजिनो गोनां। जोंनि मुलुगनि महर—मुश्रीआ जेरै अराय समनि थाखाय रोखोमसेयै थाफेरा, थिक बेबाइदिनो रौता ओन्सोलनि महर—मुश्रीआबो समनि फाखनाव सोलाइबोनो हमनायसै। मोनसे समनि धोरोम सोलाइनो नाइगिरनाय साननाय आरो गावनि हारिखौनो नागारनानै गुबुन हारि महरै सिनायथि होनो नाजानाय गोसोफ्रा बुब्लिनि सिनायथि होनो नाजानाय गोसोफ्रा बुब्लिनि दाहाराव गोजानाव जोगार हरजानायसै।

जानो हागौ जे समाव बर'फोरनि गोसोआव धोरोम एबा गावनि समाजखान्थिनि सोमोन्दै गल-गफं साननाय सोमजि दोंमोन, बै समावनो बिथां बैसागो बर' आबो 1940 माइथायाव सिकनाटिनि "बेसिमारी" गामीयाव जोनोम लादोंमोन। नाथाय, बै समाव बेसिमारी ओन्सोलाव "मारखि" बेरामनों गोबां सुबुंफ्रा थैनानायनि थाखाय रौता सारिआलिनि खाथिआव थानाय बालिसिआ गामीयाव बिथांनि बिमा—बिफाफ्रा खाखोयो। बिबदिनो बिथाड बालिसिआ गुदि फरायसालि, भक्तपारा गेजेर फरायसालि आरो मेट्रिक आनजातखौ दलगौं गोजौ फरायसालिनिफ्राय सानखान्थि आव लेटार लानानै सेथि खलबाव उथ्रिदोंमोन। बेनि उनाव मंगलदै कलेजनिफ्राय फारिहै I.Sc. आरो B.A. आनजातखौ उथ्रियो।

बिथां बैसागो बर'नि गोसोआव गोजौ फरायसालिनि फरायसा समनिफ्रायनो गावनि हारिनि सोलोंथाय एबा समाज जौपानायनि बागै गाबखानायखौ नुनो मोनो। मानोना बिथाड गाव गोजौ फरायसालियाव फरायबाय थानाय समनिफ्रायनो फरायसालि बन्ध थानाय समफ्राव गामियाव फैंयोब्ला मेल खुंलायनानै गामिनि सेंग्राफोरखौ सोलोंथाय लाथारनांगौ एबा फरायसालिआव हाबथार नांगौ होननानै गले गले बुंलाडेमोन होननानै मिथिनो मोनो।

1967 माइथायाव B.A. आन्जादखौ उथ्रिखानायनि उनाव Danda Saharia High School आव फोरोंगिरि महरै हाबामावो आरो बे माइथायावनो बिथांनि नारा-नाथार नाजानायाव 72 नं भालुकमारि जंघल गुदि फरायसालियाव रौता प्राइमारी बर' थुनलाइ आफादखौ दाफुंनाय जायो। बे साननिफ्रायनो बिथांनि हारिखौ मोजां मोननाय, गावनि बिमानि रावखौ मोजां मोननाय बाश्चाफोरा रोखा नुजाथिनो हमो। बुंनो थाडेब्ला बैसागो बर' आनो दरं जिलानि (बोखावै समाव) सिगां बर' थुनलाइ आफाद गायसनगिरि। मानोना, जों मिबथिनायाव दरं जिलायाव सिगां सिगां बिथांनिनो नाजानायाव रौता प्राइमारी बर' थुनलाइ आफादा थानाय 1967 इं माइथायनि 16 नबेम्बराव गायसन जाग्रोदोडे।

बैसागो बर'नि मावनाय—दानायनि गोहोमा जोंनि रौता ओन्सोलावल' थाबथा नानै थायाखै। फारिहै जिला बर' थुनलाइ आफाद आरो उनाव दुलाराय बर' थुनलाइ आफादावबो गोहोम गोख्त्तै हैदोंमोन। बेनिखायनो बिथांआ थांनाय 1968 माइथाय निफ्राय 1980 माइथायसिम मंगलदै जिला बर' थुनलाइ आफादनिबो नेहाथारि महरै सायख' जानानै दैदेनलांलांनादोंमोन। बिबदिनो थांनाय 1971 माइथायनिफ्राय 1990 माइथायनि जुन दाननि 20 अक्टसिम

दुलाराय बर' थुनलाइ आफादनि सम सम नेहाथारि, सम सम ले: आफादगिरि महरै सायख'जानानै गावनि हाबाफारिफोरखो गोसो होथाबनानै मावलांदोंमोन। बिथां बर'आ मंगलदै जिला बर' थुनलाइ आफादख्रौ नेहाथारि महरै दैदेननाय समावनो जिलानि गुदि फरायसालिफोराव बर' बिजों थिसननायजों लोगोसे जोंनि रौता दिहिंनि गुदि फरायसालि फोरावबो बर' बिजोंख्रौ थिसन फानाय जायो। दरं जिलायाव बर' बिजों थिसननाय समाव बिथाड जोबोद दुखु—जाला सहायनो गोनां जादोंमोन। बर' रावख्रौ दरं जिलायाव बिजों महरै थिसन खानायनि उनाव दाब दाब जायगाफ्राव मेल खुंबायनानै बिथांआ गोसारहोनो नाजालांदोंमोन।

बिथां बर'आ मावनानै गालानाय हाबाफोरनि मादाव जय भद्र हागजेर फरायसालिआबो अराय समनि थाखाय मख'जाथावना जानानै थालांबाय।

बिथांआ दुलाराय बर' थुनलाइ आफादनि गोबां हाबाफोराव नांथाबनानै थानो गोनां जानायाव गोबां बिजाबफोर लिरलानानै गालानो मोनासै बिथाड लिरलानाय बिजाबफ्रा जाबाय 'गिबि बिथाय' आरो 'आसार'।

धोरोम फोसाबनाय एबा फोसाबनाय फारसेथिंबो बिथां बर'आ गोसो होदोंमोन। गाहायै बाथौ धोरोम फालिनायनि आसार खान्थिफोरख्रौ साबस्रांहोनो नाजादोंमोन।

बिथानि जीउआ गोरलै निफ्रायनो दुखु जालाजों बुंफबनायमोनब्लाबो सानसेबो बेफोर बाथ्राफोरख्रौ गावनि खुगाजों थैनायनि सिगांसिमहालागैबो बुंफोरनाय खोनानो मोनाखिसै।

बिथाड गाव थानानै थानाय समाव सम सम बुडोमोन "बर'फोरनि थाखाय राइजो मोननांगौब्ला राजनीति दोलोजों मोननो हानाय नड। बर' राइजोख्रौ बर' राव एबा बर' थुनलाइनि गेजेरजोंसो मोननो हागोन" होननानै।

बिथां बैसागो बर'नि मावनाय-दांनाय साननाय—ह'नाय, गावनि हारि—राव थुनलाइख्रौ मोजां मोननाय नेसोंनफ्रा आथिखालनि सोलोंसाफोरनि गोसोआव गोलैथों बेख्रौ मिजिं लाखिनाय जाबाय। ■

बाला हामायाव थरथिंसे दै बर' समाज फोसाब नायनि बागै

—परेन दैमारी

परेन दैमारी (1955) : बिथाड रौता ओन्सोलनि सासे थुनलाइ मावथि।

भुमनि बिखायाव सुबुं फोलेरनि गेजेराव दाब-दाब जायगा आरो हारि लाना गावबा गावनि समाज आरो हारिमुवा गुबुन गुबुन जायो। समाजआ जादों—सुबुं फोलेरनिनो मोनसेहान्जा एबा हारिया दतसे हादत एबा जायगायाव जायगानि मिथिंगायारि आब हाबाजों गोरोबनानै जयै गावजोंगाव थाज्लाइनानै राइजो जायो, संसार जायो, गावसोरखौ दैथायनो रावनिबो जेबो खहा जाया जासे मोनसे थि आसार खान्थि दाना लायो आरो फोथायो गोदोनि नेसोंनखौ लानानै दानि आरो इयुननि जोलैनि जौ गानायनि सोरजिलु सानो ह'यो बे आखुवानो मोनसे हारिनि समाज खान्थि। गुबुन फार्से मोनसे समाजआव थानानै हारिंसिंङै एबा ज'यै रावजों-भावजों गावनि समाजनि आसार-खान्थिखौ दिन्थिफुंनाय आखुआनो जादो हारिमु। रायज्जायनाय होनज्जायनाय, जानाय लोंनाय, मावनाय दानाय, दानाय लुनाय, गात्राय जोमनाय, देनाय, थैनाय थानायनि सान खुंनाय, मागो-बैसागो खुंनाय बायदिफोराव हारिनि हारिमुवा बेरखाडे मोनसे समाजआव था-थानानै गावनि समाज हारिमुखौ गोबाना लाना सुबुं-सोदोमश्रीजों गोरोबनानै गावजों लोगोसे नखरखौ फसंथाय होनो नाजानाय बिखान्थि आनो जादों बै समाजनि रांखान्थि आयदा। समाजआव थानाय मोनफ्रोम नख'रानो समाजनि गुदि रांखान्थि फसंथाय। मोनफा नख'रनि जौगानायानो, बै समाज, हारि आरो हादतनि जौगानायनि नेसोंन। बिखायनो समाजनि खान्थिजों रांखान्थिआ अराय सरजाबफानाय। सोलोंथायनि गोहोमाव गोजौ सात्राय होनायनि थाखायनो जायो, रांखान्थि नारसिननायनि थाखायनो जाथो एबा गुबुन माबाफोर जाहोननि थाखायनो जाथों गुबुन गुबन हारिनि समाज आरो हारिमुवा गोबां एसेयै सोरजिलु फोसाबनायनि बागै आगान सुरबोगासेनो दं। बुंनो थाडेब्ला समाजनि जौगानाय मोनसे हारिनि सुबुं सोदोमश्रीनि जौगानायनि सायावसो सोनारो।

सा-सानजा भारत हादतनि मंग'लियान फोलेरनि मोनसे गिदिर हानजा "बड" एबा "बर'" होत्रा मिथि जानाय बे हारिहाबो गावनि सथं समाज-हारिमु दं। राजा-राइजो गोमा जाबायब्लाबो आरो मालाइ हारिजों थगाय जानाय, सोबख' जावथाबो जोंनि गोगोम समाज हारिमुनि थाखाय हारि महरै सिनायथि होनो हादों। बे हारिनि समाज सोदोमस्री, राव हारिमु फोसावनो फेहेरनो आरो इयुन जोलैनि रैखाथायनि थाखाय गमा मायैनो दखरसे नखर हादतनि गोनांथिखौ रावबो नेवसिनो हाया आरो बिखौ गोजौ रावै हारिमुयै, समाजै-रांखान्थियै आखल्यै सिबिनो सोरजिलु समाज फोसावनो साखाफारा खानायनि फर सफैबाय। नाथाय जों जोंनि समाजनि मबे आयदाखौ माब्ला आरो बोरै फोसावनो? समाजनि आय आसार खान्थिजों सोलिब्ला जोंनि समाज हारिमुनि खहा खालामग्रा आसार खान्थि आरो फोथायनाय फोरा जोबसाडे। गुबुन गुबुन हारि-माहारिनि गेजेराव माखासे गात्रि आसारखान्थि आरो फोथाय नाय फोरा समजों लोगोसे लासै लासै जोबलानाय एबा फोरावजाबोनायखौ नुनो मोनो। धोरोमनि मुडै मानसि बोलि होनाय (दानथारनाय) रान्दी हाबा (जुलि) लायै, फिसाइ थैब्ला थैफानाय (सतीदाह), सीना सिख्लाफोरा गावसोरनि आथिंखौ स्रें जंलिबबै समाइ होनो आथिं आखबनि मोदोमखौ फुंनो हायै बादि दुरुं एबा सिजों गोरायै सिख्ला जानायनि आगोलाव फानखबना लानाय बायदि खान्थिफोरा गोमोरलांबाय। बिब्दिनो बर' सुबुं समाजनिफ्रायबो धोरोमनि मुडै दाव-अमानि बोलि होनाय, जब्रा फाहामनायनि मुडै-मोदाय दावदाय सिबिनाय, हाबानि (जुलिनि) मुडै लामा दब्रा निफ्राय दों दों हिन्जाव बोंनाय बायदि गात्रि आसारखान्थिफोरखौ नागारनो हमनायजों लोगोसे राव-हारिमु बायदिआवबो सोरजिलु फोसावनाय बागै आगान सुरबोनाय नुनो मोनबाय। नाथाय बेवनों जोंनि फोसावनाया थुंगेब्ला जौगानायाबो थुंगेगोन। जोंनि समाजहारिमुनि नागारहायै खान्थि महरै गनाय बोनाय माखासे हुदा फोराखौ, जाय हुदाफोरा समाजनि रांखान्थि दावगानाय बादिआव हेंथा सोमजिहोनो हागौ बे बायदि आसार खान्थिफोरखौ फोसावनो नाजानाय मुगानिनो थिन्नाय। फोसाब जाथाव गोबां आयदा दंब्लाबो बेवहाय मोनसेल' आयदानि बागै फरायग्रा फोरनि गेजेराव दिन्थिनो नाजानाय जाबाय।

जौ :— सावरि-बादालि, मावनाय दांनाय, हाबा-हुखा, मोदाय-दावदाय सिबिनाय, मागौ बैसागो खुंनाय, आलासि सोंनाय बायदियाव जौखौ बाहाय बोदों। जौवा जोंनि संमाजाव औरै बायदि रोदा सुब्रे बायदि बिखौ गोलैयै

बुफोरनो गोब्राब जाबाय। दिनै जौवा जौनि हारिनि सायाव मोनसे गिदिर जेंना एबा साव महरै नुजाथिदों।

आलासि सिबिनायनि मुडै गावनि जाखिबाहागी आलासि खौ खिब्रेद हासुब्रेद जाजासे लेफे लेफे जौ फेहोना मोदोम मेलेम आरो सम खहा खालामना होनाय बायदि आरो सम खहा खालामना होनाय बायदि आसार खान्थिआ दानि सोदोमश्री गोनां मुगायाव बेसे गोजौ समाजनि सुबुं सोदोमसि होत्रा सिनायथि होनो?

मागो बैसागोनि मुडै—जौ लोंना जौ फेना बस्ता गिजि, सि गिजि गात्रा जोमना फाखा-बिखा गाब फुत्रा लामा द्रबायाव बायदि फाव दिन्थिला बायनाया जों जौनि हारिमुखौ समायसिन होनो नाजादों?

जौनि माखासे गोरों गोरा भद्र समाजनि सुबुंफोरा खना खनला हुरा हुरा 'खाना' एबा 'पार्टि मुडै आन्दोआव जौ लोंनो सर' खालामदों जायखौ नुनानै गामिनि लावदुम, फेरखाव मोनबादि सेंग्राफोराबो सान हर मिथिया जासे 'खाना' आरो 'पार्टि' खुंनो सोलोंबाय आरो 'पार्टि' निफ्राय नयाव फेना बिमा बिफा नडब्ला बिदा फंबायजों बाश्रा दानथे लायनाय एबा खाबु मोनोब्ला क्यारेटनि थालिम होफैबाय। गुबुन मोनसे सोमोनांथाव बाश्राया बेनोदि—आबादआरि जोबोत मावथि होत्रा मिथिजानाय बर' फोरनि माखासे सुबुड दिनै जौ फात्राय बादि गात्रि हुदाजों नखर सामब्लायनाय फेलेंनाजादों। सान बेसे जौ फात्रानै नखर सामब्लायनो आरो साबसे गुबुन हारिआ जौ लोडे? गिदिं गिदा बै फानजारिनि मैहुरा जोंनो जाफिनो। जौ लोंना हा-हु फात्राय, नखराव दावराव लाबोनाय, थैनाय बायदि दालाम जौनि गेजेराव जानायखौ नुनो मोनो।

जौवा जौनि हादरनि आयननि बेरेखा धोरोमनि बेरेखा, समाजखौ गुबुले खालामग्रा, देहानि, नखरनि, हारिनि खहा लाबोग्रा, सम फोजोबग्रा बायदि गात्रि आखुजों साथिफबनाय मुवा। बे बायदि गात्रि मुवानि गोजानावथानाया, समाज हारिमु आव लोब्बा लाखिनो त्रगारनाया सांग्रां समाजनि सांग्रा सुबुंनि खामानि। बिनि खायनो दिनै बिग्रायारि गोसोजों जांखि खानाय लाबोनो नाजादों माखासे सांग्रां हान्जाया जौनि हेंथायै जायनि थाखाय जौनि समाज सोदोमश्रीया, मुलुगनि राज उलाफादआव गोजौ जायगा मोत्रो हायो। बेनि थाखाय जों बयबो जयै खौसेयै गावजों गाव हारिनि मानरैखानि थाखाय हे फाजाब होज्लाय नांगोन।

बर' माहारि दानायाव रबिसन्द्र कसारीनि बिहोमा

—बिपुल बसुमतारी



बिपुल बसुमतारी (1943) : हरिशिंगानि एदेनबारि
गामिआव बिथानि न'। फोरोंगिरि मावना आजिरा लाबाय।

रबिसन्द्र कसारीनि खौरांखौ गोसोआव लाबोब्लानो Anne Morrow Lindbergh नि फंसे बाथ्राखौ गोसोखाडे। बिथाड बुंदोंमोन—"Only when a tree has fallen can you take the measure of it. It is the same with a man." बर' बिमानि गोर्बोआव उजिनाय हारिनि जिउ रबिसन्द्र कसारीनि खोथायावबो बे बाथ्राखौनो बाहाय जायो। जायफोर मेलेमगोनां बर' फिसानि दैदेननायाव एबा नाजानायाव बर' हारिआ दिनै गोदान महरै सिनायथि होना नै दावगा बोनो हमदोंसै बिथांमोननि गेजेराव रबिसन्द्र कसारीआबो सासे। जाय समाव गुबुन हारिफोरा बर' राव आरो हारिमुखौ जुजाइ बादि सानदोंमोन बे समावनो कामरुप जिल्लानि पश्चिम बरभाग मौजानि केहेरुवा मुनि गामि दाबसेआव बांला 1308 माइथायनि शाउन दानाव रबिसन्द्र कसारीआ जोनोम मोनो। मिथिनो मोननाय बादिब्ला, बिथानि बिफानि मुड साज राम कसारी आरो बिमानि मुंडा रुमाइ कसारीमोन। 1925 खू: आव बिथाड नलबारी नोगोरनि गर्डन हाइस्कुलनिफ्राय मेट्रिक आन्जादखौ उथ्रियो आरो बेनि उनाव गुवाहाटिनि कटन कलेजआव नाम लिरो नाथाय, न'खरनि बिथाथिफोरा मोजां नडैलाय, रांखावरिनि आंखाल जाना फैनायाव बिथाड कलेज फरायनायनि सिमांखौ एसेयावनो दोन्थ'नो गोनां जायो। 1935 माइथायनिफ्राय 1936 सिम बिथाड हरिशिङ मिसन एम.इ. स्कुलनि गाहाइ फोरोंगिरि बादियैबो खामानि मावदोंमोन।

बे लिरथुमनि लिरगिरिआ 1968 माइथायाव गुवाहाटीनि District Library आव खुंनाय Greater Gauhati Bodo Students' Union नि गेवलां आफादआव बाहागो लानो सुबिदा मोनदोंमोन। बे गेवलां आफादआव गुबुन गुबुन आलासिफोरनि गेजेराव मानिनां सतीश सन्द्र बसुमतारीबो दंमोन। बिथांनि खुगानिफ्रायनो बै गेवलां आफादआव खोनानो मोन्दोंमोन। बिथांनि खुगानिफ्रायनो बै गेवलां आफादआव खोनानो मोन्दोंमोन दि 1929 माइथायनि नबेम्बर दानाव बृटिस सरकारनि थिननायाव भारतआव फेनाय साइमन कमिसनखौ भारतनि गुबुन गुबुन राइजो-राजाफोरा नाजावनानै लायाखैमोनब्लाबो, बै समनि लेखा गोरों बर'फोरनि गेजेराव जायफोरा गावखौनो बर'फोरनि थान्दै होन्नानै दाबि खालामदोंमोन बिथांमोना साइमन साहेबखौ लोगो हमनानै गांसे मेम रैण्डाम होदोंमोन। बै मेम रैण्डामाव बे खोथाखौ रोखा रोखायै बुंनाय जादोंमोन दि बर'फोरा आसामनि हाजोफोराव थानाय हारिफोर बादिनो मोनसे गुबुन हारि। बर'फोरानो आसामनि थागिबि हारि। बे हारिआ गावनि राव आरो हारिमु दड'। गुबुनारि फोरनि नारसिन नायाव बे हारिआ लासै-लासै गावनि राव आरो हारिमुखौ खोमानो हमनायनि लोगोसे हा-बिथाखौबो खोमालांनो हमदोंसै। बेनिखायनो सरकारआ बर'फोरनि रैखाथिनि थाखै गोख्रोडै मोनसे आयेन दानो लाहार फाहार लानो नांगौ। साइमन कमिसननो होनाय मेम रैण्डामआव जाय गोरों-गोरा बर'फोरा सही खालामदोंमोन बिथांमोना जादों सतीशसन्द्र बसुमतारी, रुपनाथ ब्रह्म, मदाराम ब्रह्म, जादब खाख्लारी आरो रबिसन्द्र कसारी। बिथांमोननि बे हान्जायानो 1948 माइथायाव दिल्लीयाव थानानै बै समनि गोहो-गोरा आरो मेलेमगोनां बि. के. भाण्डारी मुनि सासे एम.पि.खौ लोगो हमनानै आसामनि हाजोआरि फोरखौ जेरै—Scheduled Tribe नि List आव खोख्लैदों, बे बादिनो बर'फोरखौबो Tribal नि List आव सोनो नांगौ होन्नानै रोखा-रोखा बुंनानै फोरमायहोनो हानायावसो बर'फोरा दिनै बे सुबिदाखौ मोननो हादों। नडब्ला बर'फोरा दिनै मा जागौमोन बेखौ रावबो मिथिस'नाय नडमोन। मानाव गेदेर सतीश सन्द्र बसुमतारीया बुंनाय बादिब्ला दिल्लीआव थानाय बै समनि मिरु सरकारनि गाहाइ-गोराफोरा बर' हारिखौ S.T. लिस्टआव खोख्लैनो अजद खालामदों। बिथांमोननि साननाय बादिब्ला बर'फोरा असमीया फोरनिनो मोनसे बाहागोसो। बेनिखायनो आसामनि हाजोआरि फोरा मोननाय सुबिदाफोरखौ बर'फोरा मोत्राय नड।

बे समाव रबि सन्द्र कसारीआ जोबोद नाजानानै बर'नि जारिमिननि लोगोसे बिथांमोना मा बादियै साइमन कमिसननो मेम रैण्डाम होदोंमोन आरो मा दाबि खालामदोंमोन गासै खौरांखौ फोरमायहोनो हानायावसो बर'फोरखौबो Scheduled Tribe नि List आव थिसन्नानै होयो। अब्लाथ' बर'हारि दानायाव रबिसन्द्र कसारीनि बिहोमाया जोबोद गोनांथार।

1929 माइथायावनो दरं जिल्लानि बेंबारीआव आसाम सरकारा फसंनाय Dispensary आ 1948 माइथायाव अर नांनानै जोंब्लावनायनि उनाव आसाम सरकारा बे Dispensary खौ दिखाना लांनो नायगिरदोंमोन। नाथाय बै समाव मानिनां रबिसन्द्र कसारीनि दाबिनायावसो बे Dispensary खौ सरकारा हरिसिड ओन्सोलाव लाखिनो गोनां जायो। बेंबारीआव सुबिधा गोनां सरकारी हा मोनैलाय बे Dispensary खौ 1950 माइथायाव हरिसिडव दैखानानै लाडे। बे गासै खामानिफोरा रबिसन्द्र कसारीनि दाबिनायावनो जाफुंदोंमोन।

1926 माइथायाव रबिसन्द्र कसारीनि नाजानायावनो कामरुप जिल्लानि रडियाआव “सदौ असम बड़ो छात्र सन्मिलन” आरो “सदौ असम बड़ो महा सन्मिलन” खुंनाय जादोंमोन। रडियाव जानाय बे मोत्रै सन्मिलनआव आसामनि गासै जायगायाव थानाय बर'फोरा नुजाफैनायमोन। बे समनिफ्रायनो बर'फोरनि गेजेराव दावगालांनानायनि मोनसे गोदान बारा बारो। बर'फोरा दि असमीया नड बे खोथाखौ फोरमायहोनो थाखै बिथाड बर' राव रोडै बर'फोरा बुजिनायबादि असमीया रावजों फंसे बाथा बुंदोंमोन—“असमीया मानुहक आमि हारसा बुलिहे कउँ। तेउँलोके यदि जोरकै आमाक असमीया बुलि कब बिचारे तेनेहले देखुन आमि बर'सकले हासाहि हब लागिब। आमिनो केनेकै हासा ह'म? आमार मात-कथा, पिन्धा-उरा आरु खोवा-बोवा हारसा सकलकतकै सम्पुर्ण बेलेग”।

दिनै जोंनि गोरों-गोरा आरो फरायसाफोरनि नाजानाय आरो सोमावसारनायनि गेजेरजों फोरमान होनो हाबाय—बर'फोरा असमीया नंथारा होन्नानै। बे खोथाखौ आथिखालनि असम साहित्य सभानि आफादगिरि मानिनां होमेन बरगोहाजिआबो मानिना लाबाय। बेनिखायनो बिथाड 1989 माइथायनि मे दाननि “सुत्रधार” मुंनि लाइसिआव सुजुगिरिनि आयदायाव एरैबादि लिरदोंमोन—

“यि बड़ो सकलक आमि आदि आरु अकृत्रिम असमीया बुलि कै गौरब करिछिलो, सेइ बड़ो सकले अबशेषत प्रमाण करिहे एरिले ये तेउँलोक तथाकथित असमीयार लगत सम्पर्क बिहीन एटा स्वतन्त्र जाति।”

बेनिखायनो दुलाराय बर' फरायसा आफाद, बर' थुनलाइ आफाद आरो दानि दावगाबोनाय सेंग्रा-सिख्लाफोरा बर'नि बीर जोहोलाव रबिसन्द्र कसारीखौ हाजासे मान होनो नांगौ। मिथिनो मोनो दि, 1937 माइथायाव आसामाव सार छादुल्लाया आसामनि गिबि मन्त्री जाबाय थानाय समाव बिथाडनो बर' हारिनि सासेल' एम.एल.सि. मोन। सार छादुल्लाया बिथांखौ 'बड़ो टाइगार' होन्नानै गाबन्नियोमोन लाइनो। बिथांनि मन्त्री सभाया गोगोम जाथों सान्नानै "बड़ो टाइगार" नो मोनसे बिबान होनानै मन्त्री सभायाव लाफादेरनो सानदोंमोन, छादुल्लाया। नाथाय उदां गोसोनि सुबुं रबिसन्द्र कसारीया बिथांनि लिंहरनायखौ खोना सडाखिसै।

1952 माइथायाव जानाय Assam नि General Election आव Udalguri समस्तिनिफ्राइ MLA बाइदियै गसंनो थाखै रबिसन्द्र कसारीआबो नाजादोंमोन। नाथाय Nomination Paper आव सही खालामनायाव गोरोन्यि खालामनायलाय बिथाड election गेलेनो हाया जायो।

दुखु नांथाव बाश्रा दि बेनि उननिफ्रायनो समाजनि खामानि फोराव बिथाड नुजानो बानाय जानाय बादि जालानायाव लासै लासै बिथांखौ हरिसिड ओन्सोलनि गोरों-गोरा फोरानो बावलांनो हमनायसै। 1956 माइथायाव बिथाड सिलडव मोनसे खामानिआव थांनाय समाव सिलंआवनो जिउ गारो। बिथांखौ सिनाय मोन्नाय गोरोंगोराफोरा बिथांनि गोथै सहखौ सिलंआवनो सतकार खालामो। बिथांनि बाइ-बाहागि आरो हरिसिड ओन्सोलनि राइजोफोरा बिथांनि गोथै सहखौ मान होनो मोनाखिसै।

बे बाइदिनो बर'नि सासे गोरों-गोरा बीर सुबुं, जायखौ सार छादुल्लाया Boro Tiger मुं होदोंमोन, हरखाबै बे बुहुमनिफ्राइ अरायसाननि थाखै गोमोर लांबाय। ■

बर'नि गथ' बुरखायनाय खुगा थुनलाइ

—नगेन्द्र गयारी

नगेन्द्र गयारी (1960) : अदालगुरि दिहिंनि बिथाडा सासे लिरगिरि, थुनलाइ
मावथि। बिथाडा सासे फोरोंगिरि।

गोदोनिफ्राइनो बर'हारिनि गेजेराव गथ' बुरखायनाय मेथायफोरा खुगाजों
खुगा सोलिबोगासिनो दं। बे बर'नि गथ' बुरखायनाय मेथायफोरा जारिमिना
मोनदांस' हायैनिफ्राइनो आबै आबौ मोननि खुगाजों खुगा सोलिबोबाय थार्दों।
गथ' बुरखायनाय मेथाय खुगा थुनलायाबो मोनसे हारिनि राव थुनलायखौ गेदेर
आरो गेरेमसा खालामो। बयनिबो हारि-हारिसा आरो रावथुनलायनि गेजेराव
गथ'बुरखायनाय खुगा-थुनलाया जोबोद भाण्डारि होयो। गुबुन गुबुन हारि
हारिसा फोरनि गथ'बुरखायनाय हुदा आरो मेथाय फोरा गुबुन गुबुन चुनो मोनो।
बे गथ'बुरखायनाय मेथाय आरो हुदानिफ्राइबो मोनसे हारिनि हारिमुखौ मिथिनो
हायो।

गोदो गोदायनिफ्राइनो बर'फोरा दैमा-दैसा सेर-सेरआव ग्रोम ग्रोम आलो
गोजोनै राइजो जाबोगासिनो दं। बिसोरनि जीउनि थानानै थानायनि गुबै राहायानो
जार्दों आबाद। आबाद मावनानै जीउ खांनायाव बर'हारिआ न'खरनि साफ्रोमबो
हाल एवनाय-माय गायनाय, खोथिया फुनायाव हिन्जाव हौवा बाहागो लायो।
नाहामैहा थानायनि गेजेरजोंनो बर' हिन्जावफोरा गथ' गथायफोरखौ फेदेर
बोगासिनो दं। गथ' गोरलैफोरखौ बानो, लाखिनो आरो बुरखायनो ब'खालि
आरो खामानि मावनो थाखाय रुवाथि लानाय हुदाया गोदोनिफ्रायनो सोलिबोगासिनो
दं।

बेबादिनो गथ'फोर बुरखायना लाखिग्रा ब'खालि आरो साफ्रोम
बर'हिनजावफोरनि खुगायाव सोलिबाय थानाय माखासे मेथायफोरखौ गाहायाव
होनाय जाबाय।

अखाफोर अखाफोर
मा नागिरदों?

बिजि खानन्दा नागिरदों।

बिजि खानन्दाखौ मानो ?

....

....

अखोरां सायाव दानथारहैनो।

गमामायैनो सान हाबनाय लोगो लोगो अखोरांनि बिखायाव रिथि रिथाव महरै नुजाथि फैयो हाथखि, अलंबार आरो अखाफोर गोदोनिफ्रायनो अखाफोरखौ लानानै बर'फोरा खनथाय, मेथाय सुजुबोगासिनो दं। मोनाबिलिआव गथ'बुरखायनो थाखाय जोंथि गावदां अखाफोरखौ आसि दिनथिनानै गोजौनि मेथायखौ मिलौहाब आरो गोरोबनाय देंखोजों गारां बोब्ला गथ'आ सिरियै सानबोलावरि जायो।

बर' बिमाफोरा गावनि खुदियाखौ थुखैनय समाव गथ'फोरा इनायनो गाबो। नाथाय थुखै खांनानै मोनसे गोदै रावजों गथ'खौ बुरखायनो नाजायो।
जैरै—

सिद सा सिद सा

दाउखा दालां

सिला दालां

लांदां देरलां।

बिदि होननानै आफाखं मोननैआव हमनानै गोजौआव दिखांब्लानो खुसि जानाय नुनो मोनो।

बेबादिनो गोबावसम खुदियाफोरखौ बुरखायनानै लाखि नांगौब्ला मेथायनि हेफाजाबै गथ'नि आखायखौ (खुग्लुबनानै) आसिफोरखौ मोनफा मोनफा थुनानै खनो—

आइसनि बाइसिनि

दावराय बाइसिनि

नोलोबारी, गुर गुनदे, गुरगुनदे

हाल बारी ... बारी थेला गारि

हाल माल सिलिं सरायगत

माब्लाबा माब्लाबा नेवथुनाबो खुसि खालामनांगो जायो। जैरै—गथ'नि आखायनि आसि गेजेरखौ हमनानै आसिखौ गावनानै गावग्रा मानसिआ बुडो—

आ... मि... मि... थुस थुस

आ... मि... मि... थुस थुस

गथ'आ एरैबादि खुसि जागोनदि जेन' मावजिआनो फैथारबाय सानो।
आरो गेदेरफोरा बुंवावगोन—“ओंखिखौ मावजिया जालांबाय। दानिया माखौ
जाबावनो? थौ खांखाय खन' हैदिनि।” बिब्दि होननानै गथ'नि आखायखौ
हमनानै बुडे—

आलि दान... दान

आलि खो खो

औरैबो लामा गैया

एरैबो लामा गैया

थ' थांखाय खन' हैदिनि

जगल'..... जगल'.....

आफाखंआव मेवथुनानै खांखायखौ मोनगोन आरो बुंगोन—

बाथोन दे ... दे ...

धिं थ' धिं थ'

होन्नानै—“न' आफायाबो जादो, न' आयाबो जादो, न' नोंबो जादो,
आंबो एसे जानोसैदे” बिदि मख'नानै फोजोब। बर'हाबिया ओंखि गैयाब्ला
खांखाय बाथोन जोंनो दाबोरसे ओंखाम जानाय हुदा दं। आबादारि जीउआव
बे हुदाया गोरोबफानानै थानाय नुनो मोनो।

इंलिस रावथुनलायआवबो बिदिनो जों गथ'बुरखायनाय मेथाइ खनथाइ
गोबां नुनो मोनो। बेफोरनि मादाव खन्थाइगिरि Lord Tennyson नि
खनथायाबो मोनसे। जेरै—

Sweet and low, Sweet and low

wind of the western Sea.

Low, low breath and blow.

wind of the western Sea

... ..

... ..

Father will come to thee son.

Rest, rest on mother's breast.

बेयाव जों सोनाबारि हादतनि सुबुं जीउ खांनायाव लैथो दावबायनायजों लोगोसे, बेफार फालांगि थादेरनाय नुनो मोनो। अदेबानि बे खनथायाव, खनथाइ गिरिआ गथ'खौ बिमाया माब्रै उन्दुहोनो हागोन बेखौ फोरमायदों। खनथायाव लैथो, गोजोन बार, अखाफोरनि जोंलारिफोरखौ लानानै बिमाया मेथाइ सुजुदों।

बिदिनो असमीया थुनलायावबो "निसुकनि गीत" एबा गथ'बुरखायनाय मेथाइ गोबां दं। हरनि समायना मिथिंगा महरै अखाफोरनि गोजों महरखौ लानानै मेथाइ खननाय खोनानो मोनो।

जरै—

जोनबाय... ए... एति तरा दिया
एति तरा नेलागे दुति तरा दिया।
पात नाइ सोत नाइ किहतकै दिम।
हालधीया चराये बावधान खाय।
साउदर पुतेके नाव मेलि जाय।

मिथिंगानि गोजोंथिखौ लानानै मेथाइ खननायनि अनगायैबो हराव गोजोंथि जोंग्रा एमफौ एनला फोरखौ लानानैबो गथ'बुरखायनाय मेथाइ खोनानो मोनो। मोनाबिलि जानाय लोगो लोगो सांग्रेमा एमफौफोरा जोंब्लिद माब्लिद महरै खोमसि हराव बिरबाय बिरबाय गिदिंबायो। बे समाव गथ'फोरखौ बुरखायनो थाखाय सांग्रेमाखौ दिन्थिहरनानै एमफौ-फोरखौ हमनो नाजायो आरो मेथाइ खनो :

सांग्रेमा सांग्रेमा
गंगार थाइसिब जानोब्ला
फै... फै...

आखायजों आखाय खेबलायनानैबो गथ'बुरखायनाय हुदा नुनो मोनो। जरै— गथनि आखाय बिखुंआव खेबनानै बिनि सायाव बे बिनि सायाव बे खेब्बावनानै साथाम साब्रैसोनि आखायआव खेब्बावनानै मेथाय खनो—

आदि दिगा बलांगा
थामफै दंग'रा...
थिमा बिदै जावजा
दाउला बेहा खि बहा
अ... ल' ल' ल'।

आथिखालाव दावगानाय मुगाआव गथफोरखौ गेलेहोनो एबा गोजोनहोनो थाखाय गोबां पुतला एबा मुसुखा महर बोनाय सावगारि दंसै। नाथाय बर' बोराय बुरिआ गावनि आखाय एबा आसिफोरखौ दिन्थिनानैनो गथ 'फोरखौ खुसि गोजोन होनो हानाय गोहो दं। जैरै— गेदेर मानसिया गावनि आखायखौ साननायग्रा आरो आखायखौ हेबनानै बंगोन।

थांखु लुबै लुबै

दाब दाबदालि (खेब-2)

होन्नानै बोराय बुरिफोरा माबा माबि जाथिनानै एबा थांखु सोबथिनानै आखायखौ हेबनानै फारनैथिंजायबो आसिखौ लुगै लुगै फाव खालामो। एखनब्ला आसि थायसेखौ (दिन्थिग्राखौ) सोमाव सोमाव सोंगोन—नाखौ जानो ना एमबुखौ जानो? अब्ला आसि सोमावग्राया दिन्थिग्रा आसिखौ लाखोमानानै आसि बिमाखौसो दिखांना होयो। बे समाव गथ'आ मिनि गाग्लाबनायनि देंखोनि बाना बोयो।

बेनिखायनो बयबो गनायनानै लाथार नांगोनदि खुगा थुनलायासो मोनसे हारिनि रावथुनलायखौ गोगोम गेरेमसा खालामो। बर' रावाव गोबां खुगा थुनलाइ दं। जैरै—खुगा मेथाइ, माखासे बाथ्रानि भाव आरो बोसोन खोन्दोब आरो सल'बाथाफोर। खुगा मेथाइफोरखौ आरोबाव गुबुन गुबुन बाहागोआव राननो हाबावो— जैरै— लाउखार मेथाइ, हाबानि मेथाइ, जोहोलाउ मेथाइ, गथ'बुरखायनाय मेथाइ आरो गेलेनाय मेथाइ। बाथ्रानि भाव आरो बाथ्रानि बोसोनफोरा बर' रावाव गोबां दं। सल'बाथानि फुंखायाथ' बर' थुनलायाव गोमो हाबथावना। रावना रावनिनि सल'बाथा, दाउ रिंगावनि सल', बायदि सल'बाथाफोरा बर' खुगा थुनलाइनि गोबां आथिखालाव गोबां बर' सुबुंफोरा बर' राव थुनलाइनि बिदै सोबग्रा आरो ध्यानआव-थाग्रा बर' थुनलाइगिरि गोबां ओंखारबाय। बर' खुगा थुनलाइनि सायाव गोबां रायथाय, लिरबिदां आरो सानलाइसि नुजाथिबाय। बर' खुगा थुनलायनि बाहागो बाथ्रानि भाव आरो बोसोनथिनि मादाव मुश्री सुकुमार बसुमतारिनि बर' बोराय बुरैफोरनि खुगानिफ्राय बुथुमनाय "बर'नि बाथा भाव" बिजाबाबो गांसे। ■

सिमां

—गनेश चन्द्र मोसाहारी



गनेश चन्द्र मोसाहारी (1960) : अदालगुरिनि सासे थुनलाइ सिबियारि। बिथाडा काजियामाटि गोजौ फरायसालिनि गाहाइ फोरोंगिरि।

सिमां होत्राया जाबाय मोनसे खेंफोर हायै गान्थि देबेर माबेर। मोजांयै खुलिनो रोडेब्ला गेवगोन रोडब्ला देबोर नांसिनोसो। थामहिनबा सिमांखौ मोजाडै Study खालाम नानैसो बिनि जाहोन आरो जाथाय हमनो हायो। खायसे सिमाड मोखथां मुलुगनि लुगैनाय हाबाखौ (Desires) जाफुं होनाय होत्रानै फोरमाय थियो। फ्रयद साहाब आबो बिखायनो सिमांखौ बुंदोंमोन "It is fulfilment of supressed desire of man". बिथानि बि बाश्रायाबो जोगार जाथाव थाव नंद्राया। नडब्ला जों मानोथो बिबायग्राया सिमांआव रंजा जाखाडे ? सेंग्रा सिख्लाफ्रा रंगिना संगिना मानो सिमां नुयो ? जाय नाखि मोकथां मुलुगनि गमा (Real) खौनो फोरमायनो नाजायो। बिफोर सिमाड सिमां नुग्रानि बेसेबा गोजान थाबायनो गोनां लामानि दिग Direction खौ फोरमायो। जों हमसो हायैयाव बे सिमांनि ओंथिखौ खेर खेराया। जाहोनाव सिमांनि दिन्थिनाया (Indication) मोकथां पुरियाव मानसिनाव नुजाफैयो बिफोरनि गोबां दिन्थिथायजों मुलुगाव नुनो मोनो। खोनानामोनो जों आमेरिकानि गिबि president लिंकना गाव थैनायखौ माब्लाबानो सिमांआव नुनानै थाखादोंमोन। थामहिनबा सिमांआव बिनो सोरबा आमेरिकानि president आ थैबाय होत्रानै फोर मायदोंमोन। गमा मा बिथांआ सानथामसोनि उनाव थैबायबो। सिमांनि नंगौ फोरमायनायखौ जों एखमब्ला एबा खायसे सुबुंआ खेरखेराया जेरै हादुंगोरा जुलियास सिजार बिथां हादुंगोरानि बिब्दि काल पुर्नियाआ सिमांआव सिजार बुथार जानायखौ नुनानै बागदाव खांनानै फिसायखौ दोनै नों बाहेराव दा थांथार, दा थांथार" होत्रा

खुथार खुथार आरज गाबदोंमोन। नाथाय सिजारा सासे हादुं गोरा। गोहो बोलो दडे थोजासे मोदोमाव साधारण बिनि हिन्जावनि खोथायाव बियो थाबथानो हायो। बिनिखाय कालिपुर्नियाखौ बुंगार बायसो दुगानो "Caesar shall forth : the things that threatened me never look by my back, When they shall see the face of caesar, They are vanished. बे दिनाव नाथाय सिजारनि गोथै सह, आरो न'आव गिदिंबोनायसै।

बेफोर जाबाय—जों थि हायि समाव unconscious जोंनो फोरमायनाय गिथावना एबा रंजाथावना pleaset or dreadful जाथाय। नाथाय जों बांसिन गिनां गौआनो जाबाय दानि जोंनि मोकथां मुलुगावनो नुनाय (unconsciousness) सानथ्रहायि सिमां फ्रा बेलाय मा बाइदि सिमां? जोंनि गोसोआव बयनावबो सॉलु सोमजियो नाथाय सानफाबो जों बे सिमांखौ नुवाबानो थानो हायो। जाब्ला जानो हागौ। बियो गावनि सिमां (individual) एबा हारिनि एबा मालायनि (social)। गाव गावनिखौ पाख खालामनानै आबुं खालामनो हायो। नाथाय social निया एबा हारिनि सिमांआ जाफुंनाया गोब्राबथार। बिखौ बोथ्रोदनो हायै अन्थाइजों समान गैया।

आं बे जोंनि social सिमांखौसो [consciously] सावरायनोनै फोरमायनो सान्दों। हारि हादोत सुबुं माहारि राव आरो समाज बेफोर जाबाय हारिनि गामबारी थामप्लायव जायगा मोनग्रा जिनि (pillar) जाय जाति एबा समप्रदाया बिफोर जिनिखौ जोथोन लानानै आलो आलो दोन्नो रोंदों एबा हादों बेफोर हारियासो मुलुगाव अराय जोंनानै दं मुलुगनि जारिमिनखौ बोदलानानै नायबानो नुगोनदि—बिफोरनि (pillar) माबा मोनसे खोहायावनो जे गब्लंजों दै सिडव ना गलांनाय बादि मोनसे जातिया, जोलैआ गलां जोब्बाय। हारिनि थाखाय मुलुगाव साफ्रामबो गोसो मोदोम जीउ होनानै मावनो नाजानाया गाहाम। नाथाय गलिनि गासिबो मोसौआनो मै बोनो हाया। दैदेनगिरि (leader) दैदेनजाग्रा (leaded) आरो गेजेराव थाग्रा (observer) मानसिनि समाजाव दंखायो। बिनि गाव बबे थाखोआव मिथिरोडेब्लासो गाव जे सासे मावथि बिखौ हमनो हायो।

बिफोरजों लोगोसे मोत्रैसो जारिमिनारी मेहेर गोनां (genious) जिनि स दंआवो बिसोरखौ मोनसे माहारिनि आयना बुंब्लाबो बारा बुंनाय जानाय नड। बिफोर जाबाय थुनलाइ राव आरो हारामुद। बेफोर मोनथामा जेब्ला गोजौआव थानानै (developed) बयखौबो नायदावहोनो हागोन होनब्लानो बबेबा हारि माहारिखौ सोदोमश्री गोनां (civilised) बुंगोन।

होनब्ला जों बर'आ सोदोमश्रीनि बेसेबां जांख्लाआव मोनहैयो बिखौ सान्रो हासिगौ (justify) थुनलाया जाबाय हारिनि गहेना (ornaments) रावआ बिनि जीउ (movement) आरो समाज आरो हारिमुआ बिनि गात्राय जोमनाय (beauty) बिफोरनि मोनसे खहाब्लानो हारिखौ लंथंथं (necket) नुनो मोनो। बिनिखायनो बिसोरखौ आयना बुडे। जायनि गेजेरजों मोनसे हारिनि मोहरखौ सा सा नुनो मोनो।

जोंनि माहारिनि खाम्फाफोरखौ जाय जेरै हागौ एरै दैखंनो, बश्रीनो आरो फोसाबनो गोदान सुबुंनि गोदान समाज जीबित गोनांथार। नाथाय जों बे गोदान सुबुं (next generation) नि गोदान समाजनि सानबोलाउरिखौ नायहरब्ला ग्रं ग्रं हाखोर बादि नुहरलायदों। दिनै जोंनि बर'हारिनो थाखाय अलखद सम। जोंनि सिमाड फारि गाखोनो हमबाय। जोंनि गोदान समाजनि सुबुंफ्राबो बारा नायफिना नायफिना जाबाय। गावनि आयड'ल'जिखौ लानानै बइबो मुखुब। गावनि सानसुमै गोसोजों हारिखौ बायखोनो, धैर्य हमनो सम गैया मानो?

बर' हारिनि Social Pattern आ सानस' हाया। बइनिखुइबो साबसिन (?) राइजो जाग्रा होत्रानै मुंदांखा। नाथाय समाज होत्राया सानफ्रामबो समान थाया। जों बर'फोरनि Land lord, Land lord नि, जोगारनि बाथ्राफोरा। दा गोदोनाय बर'नि समाजखौ गुबुनै सोरजि फिन्नो जों सिमां नुदोंमोन। राजखान्थि, समाजखान्थि (?) नि बनजारखौ ब्ला ब्ला लागायनानै बिनि सोरांजों बर' माहारिनि समाजखौ मुलुगनो दिन्थिनो हास्थायदोंमोन। नाथाय बर'नि बे बनजारा लामा गेजेरावनो खामजोबनानै हायाव जलदब गोगलैबाय। बर'नि मुलुगा दाबोरसे खोमसि जाबाय। खोमसियाव लामा आन्दायनानै खेंखायनो हमबाय। सिमांखौ बर'फोरा जिसिबां होसोदों सिमांआबो जोंखौ नागारनानै खारनो हमदों। दानि जोंनि बर'नि समाजखौ नायोब्ला restless नुयो। बहा जोंनि हारि दिखांनायनि नेसोंन? बहा जोंनि धोरोम? (मालायनिया साबसिन?) हारि दैखांनायनि बबेयाव दडे सेंग्रा गोसो गाव गावनिखौल' जाफुंहोनो थाखाय बिखानि गुदाम खेवनानै खामि हारा दिन्थिलायगोन। दंनायमानि right (?) wrong formula बाहायलायगोन। जोंहा बिफोरबादि गोहो दडमोनब्ला दिनै बर'नि सिमांआ मानो थेर-बेथेर जाखो? मानो जोंनि सिमांआ जोंनाव उल्टासो जुफिखो?

मानसिआ उदै बुंजासे ओंखाम मोनजाबानो जाया। हारिनि समाजाबो गांनाय उखैनायथायो। बिनि बागै बर' सुबुड मावनांगौ गोबां बिबान दडे।

रावबा, साहित्यआ, हारिमुआ दुलाराय मुलुगनि बर' मानसि फोरखौ खौसेनि दौलेंजों खाजबनो हादोंमोन। बिनि गोरा गान्थिजों हारिनि रेल इन्जिनखौ गावनो सालायनानै हारिखौ आवगायसिन लांनायनि सिमांमोन। नाथाय गोबां Technical deficiency (?) जानाय लाय जॉनि रेल compartment आ बबेबा जायगायाव गाखोलांबाय आलाय-सिलाय, लेथेर-फेथेर जाबाय। खायसेबा लाजिनानै हाग्रायाव एब्रेबाय। खायसेबा दुखुनि गोलाउ हांमा सुरबाय। आरो खायसे ख'नायाव थानानै मान खारिग्रा जाबाय। हारि दैखांनायाव criticism आ जोबोत गोनां नाथाय बियो जानांगौ नारखोनायसो दुखु नांथावदि जॉनि critic फ्रा गोदोना सेरथेयोसो। बर'नि critic फ्रा बुंनो थाडेब्ला It is a man who knows the way only but doer not know how to drive the car.

हे अबं गसाइ जों आरो बेसे सिमां नुबावनो। एसे जोंखौ मोजां सिमांखौ आबुं खालामदो। जों बेसेबां थैबावनो जालायाव गोगलैबावनो जोंनो सिमांखौ जाफुंहोनो खर'याव मोजां मेलेम होदो। जों बइबो गिख'-नोर्जिया जानांबाय। मानोना cowards die many times before his death. ■

बर'राव थुनलाइ जौगानायाव खैराबारि दालाइ थुनलाइ आफादआ मावबोनाय बिहोमा

—लिउ राम बर'

लिउ राम बर' (1957) : खैराबारि देउरियापारायाव बिथानि गामि। बिथाड फोरोंगिरि साख्रि मावो।

बर'राव थुनलाइ जौगानायाव बुंगाराव आरो खुगा थुनलायनिफ्राय लिरनाय थुनलाइ बादियै महर होनायाव गाहायै बिबार अलंबार, बायसेश्रा लायसिनि लिरगिरि आरो सुजुगिरि मनखौ सिगां गोजौ मासि होग्रोनांगोन। बेराफारसेथिं बर'राव थुनलाइ जौगानायाव 1952 माइथायनि 16 नबेम्बरनि गोथार स्वानाव बासुगामियाव जोनोम मोननाय “बर' साहित्य सभानि” मावबोनाय खामानि फ्रानो साफ्रोमबो बर'साफोरनि सिमान जानो गोनां। दुलाराय बर' साहित्य सभाखौ थुनलाय सिबिनाय हाबाफारियाव गुबुन गुबुन जिल्ला साहित्य सभानि सिडव थानाय दालाय आफातफोरा जेरै बादि मदत होबोदों बेबायदिनो दरं जिल्ला बर' साहित्य सभानि सिडव थानाय जौनि खैराबारि दालाय थुनलाइ आफातआबो आथिखालसिम गोख्रोडै मदत आरो हेफाजाब होबो गासिनो दं।

दरं जिल्लानि सा-सोनाब हदाबाव थानाय खैराबारियाबो गंसे फिसा सोहोर। बे अन्सलाव, थागिरिया बर'फोरनो बांसिन ब्लाबो बेवहाय माखासे गुबुन हारि-हारिमानि सुबुंफोरबो दडे। बे सोहोरसानि मुड माब्रै खैराबारि जाखो बेलिबो माखासेखौ ओनथाय जों बर' बोराय-बेंथ फोरनि खुगानिफ्राय मिबथिनो मोनो। माखासे सुबुंफोरनि बादिब्ला बे अन्सोलाव गोदोआव गोबांझाहारजों बुंफबना थानाय जायगामोन। बेफोर झाहार दंफानि गेजेराव नाथाय बांसिन दंफां आनो खैरो दंफांजों बुंफबनाय मोन। जिहेतु, बे जायगायाव बर'फोरनि थागिरिआनो बांसिन जेब्ला गासैथिंबो खैरो दंफांजों साग्लोबना थानायलाय जायगानि मुंखौ खैराबारि होत्राय जायो। नाथाय जायखिनि जायगाखो लानानै दिनै खैराबारि बुंडे बे दिनै प्राय 400 बोसोर सिगांआव खैराबारि नडमोन। मानोना बर' रावनि बादिब्ला खैरोआ जादों जाथिसे दंफां आरो बारि होनब्ला

सरसनश्रायै जों झाहार खोनो बुजिनो हायो। बेनिखाय जों साननो हायो बर' मुं खैरोझाहारनि फ्रायनो सोलायना खैराबारि जायो।

बेफोर जिखियानो जाथोंसै। आंनि बे रायथायनि गुबै आयदाया जादों खैराबारि ओन्सोलाव बर'राव थुनलाय जौगानायाव खैराबारि दालाय थुनलाइ आफातआ मावबोयनाय बिहोमानि बागैसो एसे सावरायनो लानाय जादों। थांनाय 1970 माइथायानो मंगलदै जिल्ला बर' साहित्य सभानि बिथोन बादियै खैराबारि बियाब आरो गुबुन गुबुन बियाबनि बादियै 'खैराबारि दालाय बर' थुनलाइ आफात दानाय जायो। बे आफादखो दानो थाखाय गिबिआवनो इं 18/10/70 अक्ट'खालि 2 नं रडगाँव गुदि फरायसालियाव खैराबारि ओन्सोलनि राइजो राजाखो लानानै मोनसे गेवलां मेल हांखायनाय जायो। बे मेलआव जिल्ला थुनलाइ आफातनि बै समनि माखासे बिबानगिरि आरो सोद्रोमा फोरबो हांखायना लाबोनाय जादों मोन। मेलआव बाहागो लादोंमोन जिला आफातनि बै समनि नेहाथारि रुंसारि बिहुराम बर' आरो आफादगिरि मानगोनां मुश्री धनेश्वर सर्गियारिआ आरो बिथांमोननि अनगायैबो गोबां सोद्रोमाफोरा बे मेलआव बाहागो लादोंमोन। बे मेलआवनो बिथां मोनआ बर'राव थुनलायनि सोलोंनाय आरो बेनि गोनांथिनि सायाव गोबां फोरमायथिजों राइजो राजा फोरनि सिगांआव बुंसारनाहोदोंमोन। जिहेतु बै समाव जोंनि खैराबारि ओन्सोलाव बर'राव सोलोंनायनि आरो राय नायनि सायाव बर' राइजो राजाफोरआ गोथौ फोथायनाय गैयामोन। बै दिन खालिनो बिथां मोना जोंनो बिमानि राव मानो नांगो बिमानि रावजों गथ'साफोरा सोलांथाइ लायोब्ला मा-मुलाम्फा जागोन, थुनलाइ गैयै हारिखौ मा-हारि होनो बिफोर बादि खोथाखो राइजो राजाफोरनि सिगांआव बुंसारना होयो। बिथांमोननि गोसो गोथौ बुंफोरनायाव हेफाजाब होनो जोंनि खैराबारि बर' राइजो राजाफोराबो बिमानि रावखो फोजोंनो थाखै बाजल'खांना बै सान खालिनो गोरों गोरा आरो राइजो राजाफोरखो लानानै 'खैराबारि-दालाय बर' थुनलाइ आफात मुंनि मोनसे आफात दानाय जायो। बे आफातनि बिबानगिरि आरो सोद्रोमाफोरनि मुंखो फारियै रायखांनाय जाबाय। (1) मुश्री दुर्गाधर कसारि, गिबि आफातगिरि (सेनियालपारा), (2) मुश्री बलोराम बर', नेहाथारि, गुरिहाटि, (3) मुश्री नबीन स्वर्गियारि, गिबि लेडइ आफातगिरि, महलियापारा, (4) मुश्री भद्र कान्त रामसियारि, रांगिरि, महलियापारा, (5) अगा राम कसारि, सोद्रोमा, सिमुलुबारि, (6) कबिराम कसारि, सोद्रोमा देउरियापारा, (7) कामिनि बसुमतारि, सोद्रोमा, तराबारि, (8) गोलोक

सहरिया बर', निखिरिया, (9) मुश्री धनेश्वर बर', सोद्रोमा, साबुकधरा, (10) मुश्री बाहु राम बर', सोद्रोमा, मालदांपारा, (11) मुश्री चन्द्रमल बर', सोद्रोमा, निजसिनाकोना।

बिथांमोननि अनगैयबो बै समाव खैराबारि ओन्सोलाव बर'राव थुनलाइ जौगानायव माखासे गोसो गुदुं सुबुंफोरनि होथाय फोरखो जों बावगारनोहाया। बिथां मोनानो जादों फारियै (1) लम्बोधर बर', बटामारि, (2) महिधर कसारि, घोगापारा, (3) फणिधर डेका, खैराबारि, (4) मुश्री बिपिन सन्द्र बसुमतारि, माजरसुबा, (5) मुश्री ईश्वर सन्द्र बर', निजसिनाकोना, (6) मुश्री समला बर', सिडिमरि, (7) मुश्री धनोराम बर', भोलाबारि, (8) मुश्री गाफख' बर' जालुकबारि, (9) मुश्री गुणिराम कसारि, बगरिबारि, (10) ललित चन्द्र बर', सेनियालपारा, (11) मुश्री बन्धुराम कसारि, सेलाइमारि, (12) सना राम बर', धुलाबारि, (13) मुश्री उमाकान्त बर', सिमलुबारि।

आधिखालाव जों बिथांमोननि होथाय आरो मावबोनाय फोरखो खैराबारि दालाय बर' थुनलाइ आफातआ अरायसम बावलांनो हानायनड खैराबारि दालाय थुनलाइ आफादखौ दानाय उनाव बिथांमोननि नाजानायावनो खैराबारि बियाबाव बर'राव थुनलाइ फेहेरनो आरो जौगालांनो हादोंमोन। थांनाय 1970 माइथायआनो खैराबारि ओन्सोलाव साबुकधरा गुदि फरायसालि, बैनारा गुदि फरायसालि, माहारा कसारिपारा गुदि फरायसालि, माजरसुबा गुदि फरायसालि, आरो साटगिरि गुदि फरायसालिफोराव बर'राव थिसननाय जायो। आधिखालाव गासै खैराबारि ओन्सोलनि बर' गामि फ्रावनो बर' रावनि गुदि फरायसालि जाजोबबाय। 1970 माइथायनि फ्राय आधिखालासिम खैराबारि बियाबाव गाहायआव होनाय बर' गुदि फरायसालिफ्रा असम सरकार जों गनायना लाजाबाय फारियै मुं फोरखो रायखांनाय जाबाय। साबुकधरा गुदि फरायसालि, बैनारा गुदि फरायसालि, माहारा गुदि फरायसालि, माजरसुबा गुदि फरायसालि, साटगिरि गुदि फरायसालि, 2नं रडगाँव गुदि फरायसालि, सेनियालपारा गुदि फरायसालि, सारें जनता गुदि फरायसालि, बगरिबारि गुदि फरायसालि, कुहियारकुसि गुदि फरायसालि, महलियापारा गुदि फरायसालि, सिडिमरि गुदि फरायसालि, उमानन्द गुदि फरायसालि, गुरिहाटि गुदि फरायसालि, सिनाकोना गुदि फरायसालि, सिमलुबारि गुदि फरायसालि, पुब सिनाकोना गुदि फरायसालि, मालमुरा गुदि फरायसालि, देबागुरि गुदि फरायसालि, घोगापारा गुदि फरायसालि, कावैमारि जुनियर गुदि फरायसालि, देउरियापारा गुदि फरायसालि, मरडदल गुदि फरायसालि, 1नं

बटामारि गुदि फरायसालि, देहानपारा गुदि फरायसालि गुदि फरायसालि, देहानपारा गुदि फरायसालि, राजालामा गुदि फरायसालि, आमराकना गुदि फरायसालि, बिफोरनि अनगायैबो Mixed medium सरकारजों दासिमबो गनायजायै गुदि फरायसालि, फोरनि मुंफोरखोबो होनाय जाबाय। देवानपुखुरि गुदि फरायसालि, बिनापानि गुदि फरायसालि, सोनायपारा गुदि फरायसालि, खागारा जुनियर गुदि फरायसालि, बामुनझार गुदि फरायसालि, आटेलिया गुदि फरायसालि, दुधगरमाखा गुदि फरायसालि, धोपगुरि गुदि फरायसालि, 2नं रौमारि गुदि फरायसालि, घोरामारा गुदि फरायसालि।

बर' बिजोंनि सरकारजों दाबो गनाय लायि भेन्सार गुदि फरायसालिनि मुंफोरिखोबो रायखांनाय जाबाय।

बगरिबारि मायनावश्री गुदि फरायसालि, उलुबारि गुदि फरायसालि, कुहियाकुसि आइपुखुरि गुदि फरायसालि, कटरा गुदि फरायसालि।

खैराबारि बियाबाव गिबियाव बर' बिजोंनि गेजेर फरायसालि थिसननाय जायो सारें एम.इ. स्कुलाव बेनि उनाव आलादायै बर' बिजोंनि गेजेर फरायसालि "अलंबार गेजेर फरायसालि गायसननाय जायो आरो सिनाकोना गेजेर फरायसालियाव बर'राव थिसननाय जायो। बिफोर गेजेर फरायसालिफ्रा सरकारजों गनाय जाबाय। आथिखालाव खैराबारि बियाबाव गोबां बर'बिजोंनि गेजेर फरायसालि दं नाथाय दासिमबो सरकारा गनायना लायाखै फारियै बे गेजेर फरायसालिनि मुंफोरखोबो रायखांनाय जाबाय, बड'फा हिन्जावसा गेजेर फरायसालि, कुहियारकुसि गेजेर फरायसालि, रौमारि अखाफोर गेजेर फरायसालि, गुरिहाटि आदर्श बिद्यापिठ गेजेर फरायसालि, 1नं बटामारि गेजेर फरायसालि।

गोजौ फरायसालिनि मादाव बर' बिजोंनि अलंबार गोजौ फरायसालिखौ गायसननायजायो। नाथाय दासिम्बो सरकारजों गनाय जायासै। बेनि उनाव सिनाकोना गोजौ फरायसालियाव बर'राव थिसननाय जायो।

जौसिन फरायसालि खैराबारि हायार सेकेण्डारियाबो बर' बिजों (MIL) थिसन जाबाय। नाथाय दिनै सिमहागै आयदाफोरोंगिरिनि साखीया सरकारजों गनाय जायाखै। जौमासिन फरायसालि खैराबारि कलेज आवबो बर'रावनि MIL थिसनाय जाबाय। खैराबारि बियाब गोबां बर'रावनि फरायसालि जादोंब्लाबो बिफोर गासैबो सोलोंथायनि आंखालखो सुफुं जोबनो हायाखै।

दुलाराय बर' थुनलाइ आफातआ थांनाय 1974 माइथायाव "र'मान हांखो" समावसारनाय हाबाफारियाव जोंनि खैराबारि दालाय थुनलाय आफातआ गोख्रों बाहागो लादोंमोन। दुलाराय बर' 1974 माइथायनि सेप्टेम्बर दाननि 18 अक्ट'निफ्राय ब्लक अफिस फोराव सत्याग्रह पालन खालामनो लानाय सोमावसारनायाव थांखि बादियै 18 अक्ट'निफ्राय 21 अक्ट' सेप्टेम्बरसिम सत्याग्रह खालामो आरो बेयाव खैराबारि दालाय बर' थुनलाइ आफातनिफ्राय सा 399 सेंग्रा सिख्ला, फरायसा फरायसुलि, बोराय बेन्थ मोनआ पुलिसजों खाजायो। सत्याग्रह समावसारनायआव आसाम सरकारा जेबो खालामियाव फिन 27 अक्ट' सेप्टेम्बरनिफ्राय गोजौ, गेजेर फरायसालि फोराव पिकेटिं खालामनाय जायो। आरो बै सानखालि जोंनि दालाय आफातनिफ्राय गोबां फरायसा फरायसुलि, सेंग्रा, सिख्ला बोराय बेन्थ फोरखो हमना माखासे ट्राकआव थिसन्नालाना मंगलदै जेइल सिम जेब्ला लांबाय थायो अब्ला निसाहाटखोला जायगायाव गंसे ट्राकनि दाला गुगानायाव ट्राकनिफ्राय गोग्लैना गोबांआनो नोरजिया जादोंमोन। बिथांमोननि मादाव देवरियापारा गामिनि मुश्री फणिधर बसुमतारि आरो बिथांजों मुश्री भबेन नार्जारि, नागासुबा बिथां सानैयानो गाज्रियै नोरजिया जायो। खायफानि मुं मिबथियैआव मुखनोहानाय जायासै। सोमावसारगिरि मोनखो गिबियाव मंगलदै जेइलआव जोबना दोनो। नाथाय जेइलआव थोजायैआव गोबां खोनो दलगौव थांनायाव लाडे आरो खायफाखो तेजपुर जेइलसिम लानानै तेजपुर जौबथे सालियाव जोबना दोत्राय समाव गोबां समावसारगिरि फोर। गाज्रियै बुजादोंमोन। बेनि मादाव निज सिनाकोना गामिनि मुश्री दिलीप बराहि बिथांआनो गाज्रिसिन नोरजिया जानोगोनां जायो खाइफानि मुंखो मिबथियैआव मख'आसै। सोमावसारगिरि फोरखो जेबो जाहोन गैयाब्लासेनो आसाम सरकारा खानायलाय बाश्राखो दुलाराय बर' साहित्य सभाया साननो गोनां जायो आरो फिन नबेम्बर दाननि 18 अक्ट'निफ्राय समावसारनाय जाफिनो। बे समावसारनायाव म'खनो गिनांदि 25 नबेम्बरआव सारें एम.इ. स्कुलाव थाखौ होबथानाय हाबाफारियाव सारें (बोरिपारा) गामिनि गासै सा 19 सुबुंआ पुलिसजों खाजायो आरो मंगलदै जेलआव 15 सान जोबथे जायो आरो खैराबारि ओन्सोलनि गुबुन गुबुन निफ्राय सा 30 सुबुंआ बै स्वान खालि पुलिसजों खाजानो गोनांजायो। बेबायदिनो र'मान हांखो दाबि खालामनाय सोमावसारनायाव खैराबारि ओन्सोलनि राइजो राजा फरायसा सेंग्रा सिख्ला बोराय बेन्थ' मोना हाजासे दुखु दाहा सहायना सोमाव सारनायाव बाहागो लादोंमोन।

थांनाय 1987 नि मारसनिफ्राय जागायनाय दुलराय बर' फरायसा आफातनि आलदा हादोत दाबिनाय सोमावसारनायखो दुलराय बर' साहित्य सभाजों लोगोसे जोंनि खैराबारि दालाय बर' थुनलाइ आफातआबो (moral support) होबोनाय जायो।

मख' जाथावदि बर'राव थुनलाइ जागायनायै आथिखालसिम खैराबारि दालाय बर' थुनलाइ आफातनि सिडव गोरों लिरगिरि, खन्थायगिरि जोनोम मोनबोगासिनो दं। जैरै थांनाय 1978 मायथायाव मुश्री पिथु राम बर'नि गोमसार लाइसि खैराबारि रिजुनेल क्लाबनि हेफाजाबआव गिबि ओंखारो, 2 थि आव मुश्री अनिल सिं गयारिनि दैदेननायाव आरो थामथियाव मुश्री हंस धर बर'नि दैदेननायाव ओंखारो। मुश्री नन्द राम बर'नि 'सानश्री', खैराबारि बर' फरायसा आफातनि हेफाजाबआव "फुंखा" रादाब बिलाइ, बड'लेण्डनि रेगा, मुश्री धनी राम बर'नि "बाथौ खान्थि" मुश्री लोमश्राव दैमारि आरो बिरेन बर'नि "मन्त्रि बंगलानि जारिमिन" मुश्री निपेन बसुमतारिनि "हांमा" आरो खैराबारि बर' थुनलायआरि आफातनि फोसावनायाव बर' थुनलायआरि लाइसि जोमैराणि आरो गोबां लिरगिरिनि बायदिसिना लिर बिदांफ्रा गुबुन गुबुन लाइसि खौरां लाइफ्रावबो सेफखां जानानै दड'।

आथि खालाव बर'राव थुनलाइ जौगानायाव गुबुन गुबुन थुनलाइ आफातनि बिहोमायानो थोजासे नड। बेनि अनगायैबो जोंनो नांगोन माखासे लिरगिरि, खन्थायगिरि, रायथायगिरि, थुनभावथिना लिरगिरि। बेफोर गासै गोनांथि फोरखौ सुफुंनो हागोन दानि फरायसा फरायसुलि मोनासो। बेखायनो आं मिजिंथियो दि बर'राव थुनलाइ जौगाहोनायाव इयुननि जोलैयानो गोसो मोदोमहोना बिबान लागोन। बेबायदिनो गुवारै आरो गोथौवै सान्नानै नायोब्ला नुनो हायोदि बर'राव थुनलाइ जौगानायाव खैराबारि दालाय बर' थुनलाइ आफातआ मावबोनाय बिहोमाया बाडय बुंजायो आरो जोबोत देतगाथाव।

बर' साहित्य सभा देरहाथों।

बर' राव गेवलांथों।

बर' माहारि जौगाथों — ■

आसामनि राजखान्थियारि अलखद आरो बर'फोरनि खैफोद

—गजेन हाज'वारी

गजेन हाज'वारी (1961) : बिथाड दरं जिला बर' फरायसा आफादखौ दैदेनखांबाय। लोगोसे मोनसे समाव बि. ए. सि. नि इ. एम. बो जाखांबाय। अदालगुरि माइदांगुरिनि थागिरि बिथां हाज'वारीया आथिखालाव टंला गोजौसिन फरायसालिनि आयदा फोरोंगिरि।

बइबो मिथिखानाय बाश्रादि भारत हादतया उदांश्री मोत्रायनि उत्रिफ्राय बर'फ्राबो आसामनि थागिबि माहारि थानायलाय आसामनि राजखान्थियारि बिलोयाव गुबुन गुबुन महारिजों लोगोसे दुगैबो फादों आरो मोजां गात्रि बिनि बिदैखौ सोबनो मोनफाबोदों। आगु समाव सर्वभारतीय राजखान्थियारि दोलोआ गासै राइजोखौ खुंबोनो खाबु मोत्रायाव गासै भारत नाडैनो मोनसे हादत आरो आखु सोमजिदोंमोन आरो हादतनि फासैं अत्राय सुबुं आरो माहारिनि गेजेराव गोरोबलायनाय गोसोया गोबां सोमजिदोंमोन। फासैंथिं हादतनि बिफा महात्मा गान्धिया फोरों लांनाय सान्ति आरो अहिंसानि मोन्थोरा हादतखौ गोबाव सम सान्तिथै, निजोमै खुंलांनो हानायाव मदत खालामदोंमोन। बै समाव हादतनि गोबां मानसिया सोलोंथाय आरो बिज्ञाननि स्वोरांखौ थाबैनो मोत्रो हानायमोनबा सुखु गोजोनखौ मोत्रो हासिन गौमोन आरो निखाउरिया थानाय नडामोन। हादतखौ उदां खालामनानै गोदान सरकारा गोबां हादोत जौगानायनि हाबाफारि लादो मोनाब्लाबो हादतनि सुबुंफोरखौ सोलोंथाय होनाय रांखान्थिनि अलखतखौ होखारनो नाजानाय आरो लेथेर फेथेर जानानै थानाय समाजखौ गोदानै फोसावनायावनो बोथोर हगारनो गोनां जादोंमोन। फासैंथिं 1962 माइथायाव सिन हादोंदजों आरो 1972 माइथायाव पाकिस्तानजों दावहा होनो गोनां जानाय बोथोरा भारत हादतखौ रांखान्थियारि बिथिंआव गोबां अलखतयाव लाबोयो। दावहानि गेजेरजों एबा दावहा जोबनानै थानायनि उनाउबो गोबां हादतखौ फोसाबनायनि खाबु मोन्दोंमोनब्लाबो मावफुनो हायाखिसै हाददनि सुबुंनि गेजेराव सोलोंथायनि आंखाल, संबिधानिक आरो गनतन्त्रनि फासैं सुबुंनि एसेल

ज्ञाननि जाहो नाव । संबिधाननि आइनफोर, गनतन्त्रनि फिथाइ शोदोबधिफोरा बिनिखायनो हादत खुंनायनि राहा जायालासिनो हादद खुंगिरिफोरनि व्यक्तिगत सम्पदबादिसो जाहैयो । बै बेबस्थानि सायाव बिब्दि आवसारि आखु दिन्थिबोनायनि जाहोनाव गनतन्त्रनि फार्से फोथायनाय आरो संबिधाननि फार्से गंग्लायनाया आंखाल जाबोदों । जायनि हाथाय हादत खुंगिरि आरो राइजो-राजाजों जेबो सोमोन्दो आरो हेफाजाब गैयै जाबोनो हमदों । बिनि गोखा फिथाइ आरो गिथाव महरखौ गासै हादतनि नौ नारिफ्रा एसे उनाव ब्लाबो मोनजादों आरो आथिखालनि राजखान्थियारि, रांखान्थियारि आरो समाजखान्थियारि गुल्लाय-गुजाय महरबो बिनिनो फिथाइ । दा बियो हादतनि बइनिखुइबो देतसिन जेंना आरो हेंथा ।

भारतबर्षनि राजखान्थियाव आसामनि नौ-नारिफ्राबो समानै बाहागो लाबोनाइनि जाहोनाव हादतनि राजखान्थियारि अलखत आरो रांखान्थिनि लोरबांथिखोबो समानै सहाय बोनादों । अदेबानि बिनि गेजेरजों माखासे दाउगानायखौबो मख'नांगोन । बे दावगानाया नाथाय मोजोमसे गोजौ थाखोनि माहारि आरो सुबंनि गेजेरावनो बेंखन्नानै दंमोन । हादत जौगानाइनि मुडव बै थाखोनि सुबुंफोरा गासै खाबु खौनो लानो हादोंमोन आरो उनहालागै सासन खान्थि रांखान्थि आरो राजखान्थि गासैयावबो बिसिनि आखाया गोख्रों जायो । बे गोहोमथिया जेब्ला राव हारिमु आरो समाजखान्थियाव द्वामैनो नुजायो अब्लासो उन्दै थाखोनि सुबुंफ्रा हुस फैखाडे अब्लाबो खर दैखांनो बोलो गैया । मानोना गनतान्त्रिक बेबस्था बादियै बिथांमोनहा बे नेवसिनायखौ उदांश्रीनि बान्था आरो अनसुला सरकारनि बोर बादियै गनायनानै लाबोनादों । उदांश्रीनि उनाव एबा गिबियाव जाय माहारिफ्रा सोलोंथाय, समाजखान्थि, आरो रांखान्थियाव दावगानो खाबु मोनबोदों बिथांमोनहानो हादोतनि बिगुमा जाबोदों आरो राइजोफोरनि सासन खान्थियाबो बिसिनि आसि जोंनो सोलिबोदों । आथिखालाव राजखान्थिनि गोहोजोंनो सासन खान्थिखौ हमथानानै लाखिनो हादोंब्लाबो गोदोयाव नाथाय सासननि बिबानाव थानाय सुबुंफोरा गोबां गोहो गोरामोन । बिथांमोत्रि थिन्नायाव गोबां खामानि मावनाय जालांबाय, जाय खामानिफोरा मख'जाथाव गोजौ थाखोनि सुबुंफोरखौ फारफ्रोमथिंबो जौगाहोनायाव मदत खालामबोदों । बे आखुवा दिनैसिम सोलिगासिनो दं जेराव आसामनि अनसुला सरकारा मदत खालामबोदों । मदत खालामबोदों आसामनि राजखान्थिजों लोर्बा लाखिबोनाय गुबुन गुबुन उन्दै उन्दै हारिफोरखौ दैदेन बोनाय दैदेन गिरिफोरा ।

बेव आसामनि हायेनारि ट्राइबेलफोरखौ बिथा खालामनानै राजखान्थि गेलेबोनाय सरकारजों आखाय हमफानाय बिथां मोनहाबो दायनिफ्राय बारग'नायनि लामा गैया।

ट्राइबेलफोरनि मुडै भारत संबिजित होथायफोरा आसामनि ट्राइबेरफोरखौ मा बाइदि नेवसिबोदों बिनि बिदिन्थिफोरखौ एसे मोजाडै बिजितनानै नायब्ला नुनो मोनो।

1) बियो रोखादि ट्राइबेलफोरखौ जौगाहोनायनि मुडव आसामाव दानानै होनाय ट्राइबेल एसेम्बलनि रिजार्भेसन सिटफोरखौनो थोजासे गनायबोदों। बिनि अनगायै गुबुन ओन्सोलफ्राव सेरखाय बेरखाय गोसारनानै थानाय ट्राइबेलफोरखौ जौगाहोनायनि मोनबो हाबाफारि सरकारा लाबोयाखै। रिजार्भेसन सिटयाव गोग्लैयि ट्राइबेलफोरनि जीउ खानाय राहाफोरखौ नुयोब्ला मोदै हुगारा लासिनो थानोहाया। बे ओन्सोलनि ट्राइबेल सुबुंफोरनि हाल सालखौ नुयोब्ला बिसोरदि रांखान्थियारि समाज खान्थियारि बिथिं गादब जादों बेखौ रोखायै नुनाय जायो। राव हारिमुआबो बिजों लोगोसेयैनो गोमालानो गोनां जादों। बर' आरो गुबुन ट्राइबेलफोरनि फार्से नोजोर हायोब्ला बे रोखा जायो। राइदि फान्दाइनाय आरो गोदबजानायजों बिसोरो गावनि आंगो राव हारिमु रांखान्थि, गासैखौबो खोमानानै लानांदों। बेव गोथौ राजखान्थियारि खैसारि दं। जायखौ इंराजफोरनि भारतखौ सासन खालामनो बाहायनाय बोखावनाय आरो सासन खालामनाय खान्थिजों रुजु जायो।

2) जेराव एसेम्बलि सिटखौ ट्राइबेलनि रिजार्भेसन हिसाबै गनायथि होदों बेव राइजोनि दैदेनगिरि महरै बिसायख'थिजों सायख'जानाय बिथांमोनहा ओन्सोलनि एबा गासै राइजोनि ट्राइबेलफोरनि रैखाथि आरो बिसिनि जौगानायनि गोबां मावनो हानाय गोहो दंब्लाबो बेफोर गोहोखौ गासैखौबो खोमानानै लाजोबदों। बिनि जाहोना गाहायै ट्राइबेल समस्टिनि दैदेनगिरि महरै गाव गावखौनो बिथांमोनहा सिनायनो रोडाखै आरो सरकारजों आखाय हमफानानै बिथां मोनजोंनो खामानि मावफानाय, सालाय फिदिं फानानै बाथ्रा बुंनो सोलोंनायफ्रानो। फार्सेथिं दैदेनगिरिया बर' एबा ट्राइबेल जायोब्लानो ओन्सोलनि ट्राइबेलफोरनि हाबा मावगोन फान्नाया बर'जों लोगोसे ट्राइबेलफोरनि खैफोट लाबोदों।

3) गोबां ट्राइबेल रिजार्भेसन समस्टिनि अनगायैबो गोबां एम.एल.ए. समस्टि दंबायो जेराव ट्राइबेलनि सुबुं अन्जिमाया गुबुनफोरनिखुइ गोबांसिन

जागोन। बे ओन्सोलफ्रा गुबुन माहारिनि दखलाव थाहैनाय लोगो लोगो रिजार्भेसन कोटानि मुडै मिरु सरकार आरो राइजो सरकारनिफ्राय मोत्रो गोनां रांखान्थि आरो गुबुन गुबुन सुबिदाफोरखौ मोत्रो हायाखै। आसामनि हायेनारि ट्राइबेलफोरनि फार्से बे खैफोदखौ जाबसिन्नानै होनाय जादों आसाम सरकारनि अफिसार केरानि, महरिफोरजों सुजु जानाय सुबुं अन्जिमा सान्नाय खान्थिनि गेजेरजों। उदांश्रीनि सिगां इंराजफोरनि दैदेन्नायाव सोलिबोनाय सुबुं अन्जिमा सान्नाय खान्थिया गेबेडैनो दंमोन। नाथाय उदांश्रीनि उनाव ट्राइबेल हारिफोरखौ नाइनो बानाय हान्जाया सरकार दानायलाय बिथांमोत्रि थिन्नायबादि ट्राइबेलनि सुबुं अन्जिमा सान्नाय खान्थियाव गोबां गोरोन्थि थालाडे। जायनि थाखाय लाख लाख ट्राइबेलफोरखौ खोमानानै गुबुन महरै दिन्थिनाय जादों। बे ट्राइबेलनि सुबुं अन्जिमाखौनो बिन्दो खालामनानै गोबां ट्राइबेल एलेकाखौ रिजार्भेसन सिट महरै लाखिनाय जायो आरो गोबां खौनो दानगारनायबो जायो। जाउनाव ट्राइबेलनि मुडै सफैनाय गोबां सुयोग सुबिधाफ्राबो गोमालां जोबो।

4) ट्राइबेलनि मुडै जायफोर फसंथान सरकारा दानानै होदों बेफोर फसंथानफ्रा जायगा मोन्दों ट्राइबेल रिजार्भेसन सिटखौ बिन्दो खालामनानैसो। बिनिखाय गोबां रिजार्भेसन सिटयाव गोगलैयि जायगानि ट्राइबेल ओन्सोलफ्राव मोनबो जौगानाइनि राहा गैया।

5) गोबां ट्राइबेल एलेकाखौ दि रिजार्भेसन खालामनाइनि जुक्तिखौ सरकारा दिन्थिनाय बादिब्ला ट्राइबेल सुबुं अन्जिमाया खमायनायनि थाखाय। नाथाय ट्राइबेलनि सुबुं अन्जिमाया मात्रै खमायखो? गुबुन माहारिया मानो खमायदिया? बेओ मोत्रैसो खैसारिया जाबाय बै ट्राइबेल एलेकायाव गुबुनारि सुबुंखौ सरकारा बिथा होदों आरो लोगोसे गुबुन ट्राइबेल नडै सुबुंफोरखौ जायगा होदों आरो गोसो बादियैनो ट्राइबेल सुबुं अन्जिमाखौ हुखुमोतनाय जादों।

6) हायेनारि ट्राइबेलफोरखौ खोमानो आसाम सरकारनि मोनसे खैसारिया जाबाय ट्राइबेलफोरनि खौसेयै राइजो जानायखौ गोदाव सोराव खालामनो, ट्राइबेल माहारिखौ खोमानानै गेदेमा हासा माहारि दानो आरो भारत संबिजितनि मोनथायफोरनिफ्राय गोजानाव लाखिनो थाखाय सासननि सुबिदानि मुडव एबा सासन खान्थिखौ राइजो राजानि खाथियाव लांनो आरो सासन गोहोखौ गोजोनथाव महरै फेहेरनायनि जुक्तिजों गोदान गोदान जिल्ला, महकुमा आरो पन्सायतफोर दानाय। बे दाथायाव ट्राइबेल मैखोम ओन्सोलफोरखौ औरैबादि

मेलेमजों नोजोर लाखिनाय जादों जाहाथे ट्राइबेलनि नेरसोनखौनो बै एलेकायाव दोत्राय जाया।

7) आसाम सरकारनि आरोबाव मोनसे खैसारिया जाबाय ट्राइबेलफोरनो अराय समनि थाखाय हा-हुनि बिगोमा जानायनि गोहोखौ होया लासिनो बै ओन्सोलफोरखौ हय हाग्रामा ओन्सोल महरै नडब्ला ग्रेजिं ओन्सोल नडब्ला खुनुरुखुमै आबाद मावनानै जानो हानाय गोहो होनाय। बिनि जाहोनानो जाबाय बर'फोरनि गोबां हाखौ सेनाय आरो बे आयदायाव सरकारनि आइन राहायानो हानायनि गोहोखौ लाखिनाय। जाउनाव गोबां ट्राइबेलफ्रा गावनि हायावनो फामुवारि थानांदों। सरकारा ट्राइबेलफोरनो अराय समनि थाखाय हा-हुखौ रेजिस्टर खालामनानै होयिनि जाहोना बै हा-हुखौ लानानै जाहाते ट्राइबेलनि मुडै मोनबो.रांखान्थियारि सुजोगखौ आवग्रिनो हाया आरो सोलोंथायनि फसंथान फोरखौबो जाहाते गायसत्रो हायो ट्राइबेल ओन्सोलफोरखौ रैखाथि होनायनि मुडव जा ट्राइबेल बेल्ट आरो ब्लक दानायजों लोगोसे बिनि सायाव आइन दानानै होदोंमोन बेफोर जेबो हांखोयाबो गैयि बाइदि जाबाय। दा बै एलेकाफोरखौ दानगारनानै ट्राइबेल नडै जायगा महर होनाया सरकार आरो शासन खुंगिरिफोरनि अरायसम सात्राय बाथ्रा। जुक्तिया जाबाय बै ओन्सोलफ्राव आइनया लुबैनाय बादि ट्राइबेल सुबुं अन्जिमा गैलिया। बेफोर सानश्रीया ट्राइबेल सुबुंफोरनि थाखाय बेसे गिथाव सानब्लानो मोन्दांङे गिबियावनो मख'नाय जादोंदि गासै राइजोफ्रावनो मयध भारतीय राजखान्थियारि दोलोया सासन खुंबोनाय समाव सरासनश्रायै हादोदजों लोगोसे राइजोफ्रावबो राजखान्थियारि बारहुंखाया गोजोनैनो बारग' लांदोंमोन। आसामाव आरो बिब्दि बारहावया साबसिन बावमोन। सासन खुंगिरि फारियाव हारि माहारिखौ लानानै गोबां सात्रायाव फाराक दंमोनब्लाबो सरकारनि फार्से गंग्लायनाया बइनिफ्रायबो दंमोन। अदेबानि फार्से गंग्लायनाया बइनिफ्राइबो दंमोन। अदेबानि सरकारनि हबाफारिफ्राबो बुंनो थाडेब्ला जौगानाय गाहाम बान्जायनाय आरो हारि बेरेखा नडमोन। गासै हारि बावआरि, धोरोमारि सुबुंफोरखौनो बजबनानै लानो हादोंमोन। गुबैयै कंग्रेसनि आमोलाव भारत हादतजों लोगोसे 1977 याव जेब्ला जनता दोलफैयो होमब्लानो आसामनि राजखान्थियारि आबहावाया मुथा मुथि गोजोनैनो दंमोन। जेराव आसामनि हायेनारि ट्राइबेलफोराबो गोगोमैनो बाहागो लाबोदों। बिनि उनाव गोदानै आरोबाव कंग्रेसयानो गासै भारतखौ सासन खालामो। 1985 सिम

आसामनि ट्राइबेलफ्रा आसामनि राजखान्थियारि लोब्बा लाखिबोदों आरो हेफाजाब खालामबोदों।

1989 माइथायनिफ्राय थगायनाय असम फरायसा आफातनि गुबुनारि होखारनाय सोमावसारनाय समाव आसामनि मा गिथाव बाथाव बारहावआ बेव बर'फ्रा थोंजोंयै बाहागो लायाखैब्लाबो बिनि जा खहा बेखौ गासै आसामनि सुबुंजों लोगोसेनो बर'फ्राबो मोनफादों। गुबैयै सोलोंथायनि बेलायाव बर'फ्राबो गोबां खहा सहायनादों। बे सोमावसारनाय समावनो भारत सरकारा जाबसिन्नानै होनाय आसामनि बिसाय खथिया आसामनि राजखान्थियारि बारहावआखौ गुबुंले खालामो। बे परिस्थितिति बांसिन खहाखौ सहायनाडे बर'फ्रा बे बिसायखथिनि समावल' गहपुराव 30,000 बर'फ्रा न-बां सावजोबजायो। सा 150 बर'फ्रा जीउ होनाडे। थेलामारा जहामारिफ्रावबो 9000 सा बर'फ्रा न'बां सावजायो। गोबां जीउ गोमायो। सुख' हायै धोन दौलत सिलिंखार जायो। आसामनि राजखान्थियारि दाड-बाजिनि बर'फ्रा नाबाइदि बोलि जानांबोदों बेनि हुखुमोतनो हायै बिदिन्थि जानानै थासिगोन। बै समनिफ्रायनो बुंनो थाडेब्ला बर'फ्रा आसामाव असमीया फोरजों लोगोसे राइजो जानायखौ गोब्राब नुहरो।

1989 माइथायावनो आसाम नागा सिमानि दैयां रिजार्थ ओन्सोलाव 5000 बर'फ्रा नाड फाड नागा हारिजों दानथार जानाय जाथाया आसाम सरकारनि राजखान्थियारि खैसारिमोन। गोसो जोयोब्ला बे सुबुंफोरखौ सरकारा रैखा खालामनो हागौमोन। न बां गोमाजानानै आलाय सिलाय जानाय बर' सुबुंफोरखौ जानाय लोंनाय आरो थानाय जायगा थिक खालामनानै होनायमोनब्ला जाथाय जाखानायनि उनावनो गोबां बर' सुबुंड जीउ गोमाबावनाय नडमोन। सैथो बाथ्रादि, गोबां बर'फोरा हाग्रा बंग्रा खार-खोमा बाइनानै मोसा लखानि आदार जादोंमोन आरो खाइफाया जानाय लोंनायनि आंखालाव हाग्रामा गेजेराव थैनायखौ थानानै लाइनो गोनां जादोंमोन। आसामनि गोबां जायगानि असमीया हारिनि मानसिफ्रा रिफिउजिफोरनि मुडव लांखानाय जाग्रा मुवा फोरखौ हरखाबै न-बां साव जानाय मानसिफ्रा बर' मानसि जानायलाय लाबोफिनो। बिनिखुइ दुखु नांथावना बाथ्रा आरो मा थाबावनो हागौ? गावनि आंगो सरकार थानायमोनब्ला बिथांमोननि रैखाथिनि गोजोनथाव राहा लानो हागौमोन।

1986 माइथायाव असम गन परिसद दोलो मुडै राजखान्थि हान्जाया आसामनि सासन गोहोखौ आखायाव लाबोयो। बुडब्लाबो जागोनदि असमीया

हारिनि स्वार्थखौ रैखाथि होनो सोमावसारबोनाय फरायसा आफातया गोदान राजखान्थि दोलो मुडै गोहो बोलोजो गोलोन्दां जानानै सरकार दानो खाबु मोननायाव बै स्वार्थफोरखौ लानानै हाबा माउनायाव मुखुब जायो। असमीया हारिनि बै खाथिनि मोनफ्रामबो हाबा फारियानो बुंनो थाडेब्ला ट्राइबेल बर' माहारिनि बेरेखाजोब। बर' माहारिनि दावगानायखौ हेंथा होनायानो बुंनो थाडेब्ला असमीया हारिनि स्वार्थखौ रैखा खालामनाय बुंजागौ। असम गन परिसद दोलोया बिसायखथियाव देरहानानै सरकार दाजेन्नायनिफ्रायनो बर' आरो गुबुन ट्राइबेलफोरनि बेरेखा हाबा मावजेत्रो आसामाव लायो। असमीया रावखौ गासै सोलोंसालियावनो कमपालसरि फरायनांगौनि बिथांखि लानाय ट्राइबेल आरो बर'फोरखौ बेदखल होन्नानै हाग्रा एबा रिजार्थ ओन्सोलनिफ्राय मैदेरजों न बां गाखेबनानै होथारनाय आसाम सरकारनि साखि बाखियाव हासा रावखौ इन्टारभिउनि मिडियाम हिसाबै जाबसिन्नानै होनाय ट्राइबेलफोरनि सायाव रेसम आइन बाहायनायनि गेजेरजों दानाय लुनायाव हेंथा सोमजिहोनाय भुमयाव आसाम सरकारनि पुलिस हान्जाया जिनैसा बर' आइजोफोरनि सायाव जिनाहारि खालामनाय दुलाराय बर' फरायसा आफातनि गनतान्त्रिक सोमावसारनायाव रोजा रोजा दायगैयै बर' सुबुं फोरखौ जेलाव जोबनानै दोन्नाय, लकआपआव बुग्लिनाय गामि गामि raid खालामहैनानै गाव थारनानै गारबोनाय पुलिस हान्जायानो बर'फोरनि न बांफोरखौ सावनानै सेव हांगार खालामनाय बायदि जाथायफ्रा बर'फोरखौ फोजोबनायनि गोथौ थांखिमोन। बे सोमावसारनायखौ दप्तायनो थाखाय गपुराव सानथ्रौहायै बर'फोरखौ जीउ फोजोबनाय न, बां सावग्लुंनानै अरुणासल हाजोआव खारखोनानै थाहैनांनाय उदालगुरि, मंगलदै, खैराबारि, लाइलांपारा, उरां ओन्सोलफ्रावबो एलेखानि उतखारिया आसाम सकारनि मन्त्रिफोरनि दैदेनगिरिफोरनि थिननायावनो जाजोबदोमोन।

पि.टि.सि.-ए आरो निरेन सैनारि गंगा रामसियारिनि दैदेन्नायाव जा आबसु मुंनि फरायसा, आफात दानाय जादों बे आफातया आसाम सरकारजों लोगोसे आरो पुलिसफोरजों बरपेटा, नलबारि, सोनितपुर जिल्लानि गोबां बर' सुबुं आरो नखरफोरखौ सिलिंखार खालामो। बेफोर जाथायाबो ए.जि.पि. नि आमोलाव बर' फोरनि मुडै होनाय बान्था। बड'लेण्ड हादोतनि सोमावसारनायखौ दफथायनो थांनानै आसामाव ए.जि.पि. सरकारा जा राजखान्थियारि अलखत आरो आइन आबुनि जेंना नुजाफैदों बै समनि गासै खहाखौ गुबुन फोरजों लोगोसे बर'फ्राबो द्दामैनो सहायनांदों।

गदायैब्लाबो ए.जि.पि. नि आमोलाव आइन आब्रुनि बेलायाव गोबां अलखत सौफैयो जेब्ला सरकारा गावसोरनो माखासे हादोत बेरेखा आरो आइन बेरेखा थिउरिया आफातफोरखौ आदार होना नै आलो आलो फेदेरबोयो। बिनि गेजेराव आलफा मुंथि थिउरिया हान्जायानो आसामनि आबहावाखौ गिथाव महर लाहोयो। बे आफातनि सिगि सखो खालामनायाव आसामनि रांखान्थियारि हालसाल नोरजिया जाबोनो लागै हमो। बे आफातया गोबां माहारियारी बेलेबेजे सोमजिहोनायनि अनगायैबो राजखान्थियारि बार हावयाव गोबां सोलाय सोलो लाबोयो। माहारिनि गेजेराव फोथाय लायनाया सेंबोयो, आसामनि साहा बिलायनि इन्डास्ट्रीज फोराव बिनि गात्रि गोहोमा साग्लोबसारो। आसामनि उद्योगफ्रा बन्द जानायनि लामायाव सफैयो। बेसातफोरनि दामा आशा खालामथाय बांलांनो हमो। जाउनाव आसामनि रांखान्थिनि गिलित बिबानखौ निखावरिनि अन्जिमानि सुबुंफ्रा रुजुत्रो गोनां जादों। आसाम सरकारनि मदतजों जेब्ला बै हादोत बेरेखा संबिधाननि बेरेखा आफातफोरा बेआइनि खामानिफोरखौ मावबाय थायो अब्ला मिरु सरकारा बारा गोबाव नेना नै थायालासिनो गोख्रै असम गन परिसद सरकारखौ सिफायनानै राइजोयाव हादतगिरिनि सासनखौ जाबसिन्नानै होयो। आइन आब्रुनि बाथ्रा आरो बेआइनि माखासे हाबाफोरनि हेंथायै राहा लानो हादतगिरिनि सासनखौ आसामनि बेलायाव गोनांथि जादोंब्लाबो बिनि जाहोनाव जा गनतान्त्रिक बार हावाखौ होबथानाय थागोन बिनि फिथायखौ आसामनि नोगोरारि फोरजों लोगोसे बर'फ्राबो गनायफानो गोनां जानाया दुखु नांथाव बाथ्रा। दा बाथ्राया जाबाय बर'फ्रा बेसे सम आसामनि राजखान्थियारि अलखतनि बोलि जानांगोन? गोबां हारि माहारिजों बुंफबनाय ट्राइबेल बेरेखा बर' बेरेखा उतखारि गनतन्त्रखौ सिनायरोडि सरकारनि सिडव, राइजोनि सिडव बर'फ्रा बेसे गोबाव मोदै हुगार बावनांगोन? ■

बर' खन्थाइ-मेथाइआव ख्रिस्टियान धोरोमनि बिहोमा

—सिमसन दैमारी



सिमसन दैमारी (1959) : हरिशिंगायाव बिथांनि न'।
हरिशिंगा गोजौसिन फरायसालिआव फोरोंगिरि मावो।

मोनसे हारिनि थुनलाइनि गिबि बाहागोआनो जादों खन्थाइ आरो मेथाइ।
मानोना सुबुंआ राइथाइ-थुनलाइ सोरजिनायनि सिगाडउनो—सोदोमस्रिनि
जांखोलायाउ आगान होजेननाइनिफ्राइनो गोसोनि रंजानाइखौ, सुखु-दुखुफोरखौ
मेथाइनि ख'बामजों लुलिनानै-देंखो होबोदों, रोजाबबोदों-खुगा-खुगायै, गोसोनि
सानस्रिफोरखौ मोनथि होबोलायदों बिजों-बि।

बर' थुनलाइनि जोनोम जारिमिनखौ बुरखांनो थाडेब्लाबो जों—खन्थाइ
आरो खुगा-मेथाइखौनो मोनग्रोयो। जा समाव बर' माहारिहा गावनि लिरनाय
बिजाब गैयामोन—बै समावबो बर'फोरनि गेजेराव खुगा मेथाइफोर सोलिबोबाइ
थादोंमोन, खुगा-खुगायै।

बिथां गुनेशर मोसाहारीनि बादियैबोला—बर' खन्थाइखौ सरा-सनस्रायै
मोनथाम मुगायाउ रात्रो हायो।

1. गिबि मुगा, 2. गेजेर मुगा आरो 3. गोदान मुगा (थुनलाइ बिजिरनाय)

गिबि-मुगाखौ बिथाड 1884 निफ्राय 1924 माइथाइसिम हमदों। बे
मुगाखौ एन्देल मुगा (Rev. Sidney Endle नि मुडै) बो बुंनइ जायो।

बर'-माहारिनि थुनलाइ जौगाथायनि खन्थाइ-मेथाइआव ख्रिस्टियान धोरोमारी
फोरनि बिहोमा गोबांथार होत्रनै बुंनो हायो। बबेखानि, बर'राव थुनलाइनि गोरलै
(Infant) अबस्थायाउ बे ख्रिस्टियान धोरोमारी फोरानो गाहायै खन्थाइ-मेथाइ

सोरजिनाइ-रोजाबनाइनि गेजेरजों बर' रावनि थुनलाइआव-खन्थाइ-मेथाइ फोरखौ बेसेबांबा गोजौ मासियाव दैखां बोदों। नाथाइ दुखु-नांथाव दि, बर' हारिनि गेजेराव जारिमिन लिरगिरिनि आंखालाव माहारिनि जारिमिननि नेशोंन गोमाबोनाय बादि बे हारिनि राव-थुनलाइनिबो जारिमिननि आंखालाव बे ख्रिस्तियान धोरोमारी फोरनि बिहोमा फोरा-बबेबा ख'नायाउ एरसोनानै दड'-बुरखांनाइनि आंखालाव।

बे गुसुं लिरबिदांनि गेजेरजों आं—बै बबेबा ख'नायाउ एरसोनानै थाखोमानाइखौ संनानै दिहुन्नो नाजादों। नाथाइ, आं बेनि सोमोन्दै गोबां मायाबा रोंगौ एबा बुरखांना दिन्थि जोबनो हागोन बे नड। थारै बुंनो थाडेब्ला—बेनि सोमोन्दै आं जोबोद एसेल' मिथिगौ। जा मिथियो बेनिखुइ गोबां बाथ्रा एरसोनानै दंबाउवो। आं मिजिंथियो गोरोंगोराफोरा—बेखौ बुरखांगोन आरो हारिनि राव-थुनलाइखौ गोजौसिन थाखोआव लांबावगोन।

गोजौआव मख'बोनाइ—मोसाहारिनि खन्थाइ मुगा राननाइ बादियैबोला—गिबि मुगायानो बर'राव-थुनलाइनि—खन्थाइ-मेथाइनि उजिजेननाइ मुगा। जा समाव बर' हारिआ गावनि लिरनाइ—गांसेबो बिजाब गैयामोन—बै समावनो बर' रावनि खुगा मेथाइफोरखौ J.D. Anderson आ बुधुमनानै "A collection of Kachari Folk tales and Rhymes" मुडै 1879 माइथायआव साफाइना दिहुननाइ मोन।

नाथाइ बर' रावआव ख्रिस्तियान धोरोमनि बर' खन्थाइ-मेथाइनि सोमोन्दै नाइनो थाडेब्ला जों नुहरो—जा समनिफ्राइ बर' हारिनि गेजेराव ख्रिस्तियान धोरोम फोसाव जाबोदों-नाजाव जाबोदों, बै समनिफ्राइनो बे हारिनि ख्रिस्तियान फोथायग्राफोरा इसोर सिबिनो गोबां मेथाइ सुजुबोदों। बे सुजुनाया जिगुजौ जौथायाउनो गोबां जौगाखांदोंमोन।

Dr. R. N. Mosahary नि "Origin and growth of Christianity among the Boros of Assam : A Historical survey" आव बिथाड मख'दों —बर'फोरनि गेजेराव गिबिथाराव "American Baptist Mission" आनो गुवाहाटीआव 1843 माइथाइआव मावखुली फसंजेन्नानै गाहाम-रादाब फोसाव जेनो। बै समनि—बे मिसननि दैदेनगिरि Rev. Barker नि नाजानायाउ 1849 माइथायआव गुवाहाटी बापटिस्ट गिरजायाउ "Aphinta" मुंनि सा-कामरुपनि झारगामिनि सासे बर' सेंग्राया बापटिस्मा लायो। बिथांखौनो गिबि बर' ख्रिस्तियान होननानै मोनथिनाय जायो। बेनि उनावनो सा कामरुपनि

पारकिजुलि, गवालपारानि गौरां ओन्सोलनि गोबां बर 'फोरा ख्रिस्टियान धोरोमखौ नाजावो, आरो बिथांमोननि गेजेरनिफ्राइनो इशोर सिबिग्रा गोबां रैसुमै देंखोनि मेथाइफोर सुजुनाइ जायो। बे मेथाइ सुजुनायनि बांसिन खामानिफोरा 1850 निफ्राय 1900 माइथायनि गेजेराउ जाफुंदोंमोन—आरो दासिमबो सोलि गासिनो दड'।

बै समनि मेथाइ सुजुगिरिफोरनि मेथाइफोरा बांसिना नो—थार गुबै बर' देंखोनि—आरो बैफोरनि बांसिनानो दासिमबो बर'नि गिरजाफोराव रोजाबजाग्रा।

बिथांमोननि गेजेरनि सासेआ जाबाय—आंगन सिं मोसाहारी। जायनि मेथाइफोराव बांसिनावनो बेरखांदों बर' हारिखौ अननानै फोजाखांनाइआ, नुजादों बर' हारिनि मिलौदो देंखोआ। बिथानि दोंसे मख'जाथाव मेथाइआ जाबाय : (धोरोमनि बर' मेथाय/ख्रिस्ट'नि बर' मेथाइ/बर'नि रोजाबनाइ बिजाब, आरो मेथाइ बिजाब फोराव साफाइ जानाइ)

'आफा इशर, खाउलाइयो जोडे,

उसाउ-बादाउ जानाइआव

अननानोइ नंगौआव खाज'ब।

जनमनिफ्राय मोनबाइ जों बर'नि नामखौ,

मुगै जाबाइ जोडे रोडै रायै खाइ।

दाउसा माउरिया बादि जुब्रा

जानांबाइ जोंलाइ।

आलांबाखाइ इशरखौनो लाहां गारहां,

उदाया सानजाबाइदों बर'नि खौरां।

जानो-लोंनो मोनब्लाबो गोजोना

आइखां-बाइखां।

इशरनियाउ खाउलाइदो, गोथां थासान्दि,

आनदाइनाइ फिसाखौनो बियो मोनफिनथों।

अब्ला जों गोमानाइ सान्तिखौबो

मोनफिनथारगोन।'

बेनि अनगायैबो बिथानि सोरजिलु गोसोजों बर' थुनलाइआव ज'गायनाय बर' देंखोनि गुबै मेथाइफोरा गोबां थार 'दड' बेनिनो मोननैसोआ जाबाय,

1. इशरा नाइबाइ, इशरा नाइबा/जों फाफिखौदै, जों फाफिखौ।
2. गाउनि माउनाइजों आं मोन्दों मानो होनखो/नोडे मानो होनखो।

3. जिसुआ दिनै सारि जाबाइ/फाफिखौ बोखांनो।
4. गोनांखौ हागौ जिसुआ फोजोबनो/गोयैआव जाखांफिन होनो।
5. सान्दा बुंल्लानो गोसो खेंखा/बिदि दामोन नों हामनाइ नड।

बाइदि बाइदि गोबांथार दंबाउयो। जायगानि आंखालआव बे सुंद' लिरबिदांआव बेफोरखौ गमायैनो मख' जोबनो हाया। बेनिखाइनो सुंदयै सिनायथि फोरल' होनो नाजानाय जाबाय।

बिथांनि अनगायैबो बै समनिनो गुबुन गुबुन मेथाइ सुजुगिरिफोरा जाबाइ :

कालिसरण गयारी :

- i) इसरानो दादों खांदों/अनदों फेदेरदों,
- ii) बइखौबो दाग्राबि/बइखौबो खांग्रा बि,
- iii) बिबै बिबौखौ मा सान्दों/बिमा बिफाखौ मा नंदों? बाइदि बाइदि।

बेबादिनो गोबां सुजुगिरिफोर दड' जायफोरनि मेथाइ सुजनाइआ नैजिजौ जौथायनि सिगाडउनो एबा गिबि बाहागोआव जादोंमोन आरो बर' राव थुनलाइनि जौगानायाउबो गोबां बिहोमा होबोदोंमोन। बिथां मोननि गेजेरनिनो मख' जाथाव सानैसोआ जाबाय : Gausdal & Dorkanto, मिनाराम बसुमतारी, सुलेन बसुमतारी, मिहिर नार्जारी, देबिस्री मोसाहारी, आलिचरण बसुमतारी, A. Kristiansen, G. Crofts, जुसेफ दैमारी, भबेन्द्र नार्जारी, जुहन बसुमतारी, सुसिन्द्र बरगयारी, L. Skrefsrud, दरखान्त गयारी, सिमसन शइकीया, बाहादुर गयारी, मोनबाइदि आरो गोबां थार दंबाओ। दरं, पारकिजुलि, गौरां, बंगाइगाव, ग'वालपारा (आगोलनि) आरि ओन्सोलनि गोबां इसर सिबिग्रा इशरनि फिसाफ्रा मिलौदो ख'बामनि बर' ख्रिस्टियान मेथाइफोर सुजुनानै गालांदों। गुबै बर' देंखोनि मेथाइ सुजुनाइनि अनगायैबो बिथांमोना बर'नि गोदान देंखोनि मेथाइ, अदिबासी देंखोनि मेथाइ, आरो इराजी रावनिफ्राइबो गोबां ख्रिस्ट'मेथाइफोर बर' रावआव राव सोलाइ-लांदों।

गिबि बर'ख्रिस्टियान मेथाइ बिजाबआ र'मान हांखोआव "बर'नि देंखो" मुडै 1920 माइथायआव मोन 56 मेथाइजों साफाइजादोमोन। बे बिजाबखौ गौरां मिसननिफ्राइ—दरकान्त गयारी आरो रेभारेन्ड गौसदेलनि नाजानायाउ दिहुननाइ जायो।

बेनि उनाव, 1930 माइथायआव मोन 60 मेथाइफोरखौ लानानै हिन्दी हांखोआव "धोरोम साननायनि माला" मुडै सोनाब बेंगल ओन्सोल बर'फोरनि गेजेराउ ख्रिस्टियान बर' मेथायनि बिजाब ओंखारो।

1931 माइथायआव दरंनिफ्राइ असमीया हांखोआव “असमीया उ बर’ भासार धर्मगीत” मुडै गांसे मेथाइ बिजाब दिहुन जायो।

नाथाइ बेफोरनि सिगाडवनो 1870 माइथायआव सोनाब बेंगलनि सासे म्लेस (बर’) सेंग्राया Rev. Conrad Bechtold नि दैदेननायाउ गिबि बर’ रावनि ख्रिस्टियान मेथाइ दोंसे बांगाली हांखोआव सुजुयो। लिरनाइ महर मोननाइ इश’र सिबिनाइनि गिबि बर’ ख्रिस्टियान मेथाइआ जानो हगौ बेनोमोन!

बेनि अनगायैबो—इयुनथिं असमीया हांखोआव ग’वालपारा ओन्सोलाव “ध’र’मनि बर’ मेथाय” आरो र’मान हांखोआव “ख्रिस्ट’नि बर’ मेथाइ” मुडै दरं ओन्सोलाव दिहुन जायो, आरो बे बिजाब फोरा दासिमबो सोलिगासिनो। बबेखानि थारै नाइनो थाडेब्ला बे मेथाइ बिजाबफोरा बर’रावनि थुनलाइआव मोनफा मोनफा माइलनि खुन्थिया बादि; बे रावनि थुनलाइनि आवगायनायखौ अराय समनि थाखै रोखा रोखायै नेरसोन महरै दिन्थिबोदों।

सिगाडव बुंबोनाय J. D. Anderson (I.C.S.) नि बर’खुगा मेथाइ फोरनि जथाइनि उनावनो—बर’ हारिनि सोमोन्दै, बर’राव, थुनलाइ, धोरुम आरो हारिमुनि सोमोन्दै बेखेवनानै लिरनाय गुबुन मोनसे बिजाबआ जाबाय, 1911 माइथायआव साफाइ जानाय Rev. Sidney Endle नि The Kachari. बिथाड बर’ हारिनि सोमोन्दै लिरनायनि अनगायैबो बर’नि दोनैसो सल’बाथाबो बर’-इंराजी रावआव बे बिजाबआव लिरदों। बेनि अनगायैबो बिथां एन्देलआ माखासे बर’ ख्रिस्ट’ सिबिनाय मेथाइफोरबो सुजुनानै गालांदों। बिथांनि सुजुनाय बै मेथाय फोरजों सिनायथि जानायनि सिगां, आं बिथांनि सोमोन्दैसो फंनैसो रायथिग्रोनानै बर’ हारिनिफ्राय बिथांनिसिम मान बावहरनो गोसो खालामबाय।

सिदनी एन्देलआ 1841 माइथायआव इंलेन्डनि Totnes मुंनि थाउनियाउ जोनोम मोननायमोन। बिथाड Totnes Grammar School आव Rev. James Powney नि सिडव सोलोंथाइ लानाइमोन। उन्दै बैसोआवनो "Church of England" नि सिडव थानानै गावनि हादोरनि बाहेराव थानानै इशरनि गाहाम रादाबखौ हैनो गोसोआव थांखि लानायमोन। बे थांखि बादियैनो बिथाड 'Canterbury' नि "St. Augustine's College" आव सोलोंथाय लायो। बेनि उनाव "Church of England" नि दैथाय हरनायाउ बिथाड 24 बोसोरनि सेंग्रा बैसोआवनो 1864 माइथायआव गाहाम रादाब फोसावगिरि महरै बर’फोरनि गेजेराव Tezpur आव थाफैयो। 1865 माइथायआव कलकतानि बै समनि बिसपनि गेजेरजों Ordination मोनो। 1869 माइथायआव बिथाड

दरंनि साहाबागान एरियानि ख्रिस्टियान फोरनि गेजेराव सेपूलेइन्नि बिबान मोनो आरो Kachari Mission नि थाखै गाउखौनो हगारसारो। बिथाड इराजी रावनि अनगायैबो एखे समानैनो असमीया आरो बर' रावखौबो बुंनो-बुजिनो हायोमोन। बिथाड गोबां गामिफोराव बांसिन आर्थेंजोंनो थाबाइना थाडेमोन। गोबां गामिनि बर'फोरा अनूनानै बिथांखौ "गामिनि ब्राइ" मुं होदोंमोन। बर'फोरनि गेजेराव बिथाड गावखौनो हगारसारना होदोंमोन—बे हारिनि जौगाथाय, जिउमा, देहानि जौगाथाय आरो उथिबोफुनाय गथ'फोरनि सोलोंथाइनि थाखाय। गामिनि बर' हाबा, गोदान जानाय, मेल, जथुमाफोराव बिथाड जेब्लाबो हांखाइ जानाय, बराय जानाय, आरो मान होजानायमोन। J. D. Anderson आ बिथां एन्देलनि The Kachari नि Introduction आव बुंलांदों—"When Mr. Endle approached a Kachari village during one of the prolonged preaching tours, which were to him at once a duty and the keenest of pleasure he was always greeted with a joyous and often noisy welcome'.

बिथां Endle आ बर' गामिफोराव गोबां स्कुल न'फोर फसंनाइमोन। नाथाइ बर'फोरनि गेजेराव बिथांनि मख' जाथावसिन खामानिआ जाबाय दरंनि बेंबारिआव गिबि बर' मन्दलि फसंनानै गंसे गिरजा न' लुखांनाइ। बे गिरजाखौ 1873 माइथायआव लुखांदोंमोन। बे गिरजा न' आरो मन्दलिआ दाबो दड'।

बिथाड 1875 माइथायआव Miss Sarah Ewbank Chambers खौ हाबा खालामो। नाथाय, 1895 माइथायआव एन्देलखौ हारसिं खालामनानै अबथिरा रुंसारी जालाडे।

गोबां हेंथानि गेजेरजोंब्लाबो—बिथांनि मुंदांखा—Manual of the Kachari language आ Assam Secretariate Press जों 1884 माइथायआव सेबखांजायो। बिथांनि जिउनि मिजिंआ जेब्लाबो बर'फोरनि गेजेरावनो थानाइ आरो बेयाउनो जिउ हगारनायानो मोन।

"It was Mr. Endle's repeatedly expressed wish that he might end his life and be laid to rest among "his Kacharis". (J. D. Anderson)

नाथाय बे सिमाड जाफुडसै। देहानि गोबां सैसोनांनानै मावखुबनाय आरो बेरेखा सैसो हायैआव 1905 माइथायआव बिथाड गावनि बायगिनाय देहाखौ फोसाबना—इसे गोख्रों खालामफिननो इलेन्दआव थांफिनो, —नाथाय गोबाव

बर'फिसा फोरखौ गारना गोजानाव थानो गोसोआ मानियासै। 1907 माइथाइआव बर'फोरनि गेजेराव फैफिननाय समावनो डिब्रुगड़ खाथियाउ अरायनि थाखै— बे बहुमखौ नागारनानै थाडे। नाथाय बिथानि मावनाय खामानि फोरनि गेजेरजों—बर' फोरनि गेजेराव अरायनि थाखै थानानै थागोन। मानोना बर'राव-थुनलाइनि खन्थाइ-मेथाइनि गिबि मुगायावनो—(थामहिनबा जा मुगाखौ एन्देल (Endle) मुगाबो बुडे) बिथाड गोबां बर' रावनि इश'र सिबिग्रा (ख्रिस्टियान धोरोमनि) मेथाइ सुजुनानै गालांदों। बेनिनो माखासेआ जाबाय :

1. अ-आफा आइ-आदा आगैफोर
प्रभुनि बाहेरे रैखिया खालामा।
अजा जानानै बाइलोम जाब्लाबो
गाउगाइनि जाथियाउ गुरु जाब्लाबो।
प्रभु जिसु ख्रिस्ट'आ हत्य गुरु
गासैबो गुरुखौ गारनानै फाइदो।
देश बिदेशआव थाबाइब्लाबो
खाम उखैब्लाबो दै गांब्लाबो।
लामायाव रैखिया खालामग्रा
बिनो जोंनो सुखु होनो हाग्रा।
दान दखिना होब्लाबो
थाख दोर्बि होब्लाबो।
जिउ मोदोमखौ प्रभु जिसुआ होबाइ
बिनिखाइ प्रभुवा नामाइदों।
नोंगौ जिउदों इसरखौ खुलुमदो
स्वर्गनि सुखुखो प्रभुवा होगोन॥

गुबुन मेथाइ फोरा जाबाइ—

2. स्वर्गनि इश'रा फिसाज्ला सासेखो जगतआव थिनहरनाइसै,
3. अ' आदा-आगैफोर थुदो थांदोनि,
4. हाइ आंनि गोसो/थैनाइ बोथोरा जोंनियाव सफैगोन,
5. बाहाइ औरैनो दिन थाडे,

बाइदि बाइदि गोबांथार। बिथानि अनगायैबो बिथांमोननि फोरोंनाइ आरो थुलुंगायावनो दरं ओन्सोलनि (बेंबारिनि—साखाथि-फाखाथिनि) गोबां बर' फिसाफोरा बै समाव जिसुखौ जिउनि बासाइगिरि होननानै सिमान लानाइ जों

लोगोसे—गोबांथार इशर सिबिग्रा बर' मेथाइफोर सुजुनानै गालांदों। बर' रावनि थुनलाइखौ मोनसे गोजौ मासियाउ दैखांनानै गालांदों। बिथां मोननि बे सुजुनाय गोबां बर' मेथाइ फोरखौ लानानै SPG नि गेजेरजों 1931 माइथायआवनो "असमीया उ बर' भासार धर्म गीत", (अमरीशा ओ द'ब' भासाब धर्मगीत) मुडै साफाइनानै दिहुननाइ जायो, आरो जायगानि बर' मन्दलि फोराव रोजाबनो बाहायनाय जायो। बे बिजाबआव बर' मेथाइ सुजुनानै भान्दारी जगायनाय मख'जाथाव सानैसोआ जाबाय—

1. जाकुब सिं दैमारी : बादगाउ,
2. रेभा: केनन स्टिफान दैमारी : खासिबारी (अद्ला)
3. सिमन दैमारी : घाग्रापारा
4. ड० जेम्स सुनी मोसाहारी : मान्टिकिरि, आरो गोबां दंबाउओ।

बिथांमोन सानैसोनि सुजुनाय आरो 'असमीया उ बर' भासार धर्म गीत' मेथाय बिजाबआव साफाइ जानाइ मोननैसो मेथाइ फोरा जाबाइ—

जाकुब सिं दैमारी :

- 1) राजा जिसु फाइनाइ, 2) हाज'गरा गरा, 3) हाइरी धनवन्त, 4) जाकुबा-जाकुबा, 5) जंफर नामा नामाया, 6) हाइरी मन हाइरी, बाइदि बाइदि।

रेभा: केनन स्टिफान दैमारी :

- 1) राजा दरबार सेसआउ प्रभुआ फाइगोन,
- 2) प्रभु जिसु अधिकार जिउ आत्मानि, बाइदि बाइदि।

ड० जेम्स सुनी मोसाहारी :

- 1) फाइदो आदा आगैफोर।

सिमन दैमारी :

- 1) बिया जानाइनि उनाव/मेगन मोखेब मोखेब दाखामबाय, आरि।

बेफोरनि अनगायैबो बे बिजाबाव थानाइ मेथाइ फोरा जाबाइ :

- 1) थु-थुद' दायुद नोगोराउ/थु थुद' बैतलेहेमाव,

2) बाइलुम हाबा माउयै माउयै बोरायलांबाय, बाइदि गोबां मेथाइ फोरा बर' ख्रिस्टियान समाजआव गोबां जांखुथाय लाबोदोंमोन। बेन्नो 'बाइलुम हाबा माउयै माउयै' मेथाइखौ ग्राम'फन रेकर्डबो खालामनाइ जानाइमोन। ख्रिस्टियान धोरोमनि बर' मेथायनि गिबि रेकर्डआ बेनोमोन जानांगौ। बै आयदायाउ रोंगौसा

फोरनि बिजिरनाय फोरमायनाय मिजिंथिनाय जाबाय। मानोना बे रेकर्ड दिहुननायनि गेजेरजों बर' मेथाइनि जौगानाया आरो आगानसे दाउगानो हादोंमोन। बेनो, बे गोदोना-आन्दाइना थानाइ बर'नि राव-थुनलाइआव मोनसे माइलनि खुन्थिया महरै नुजाथिदों।

बे 'असमीया उ बर' भासार धर्म गीत' आव साफाइ जायै, बै समनि आखाइजों लिरनाइ अबस्थायाउनो थानाइ माखासे मेथाइफोर दंबाउओ। बेफोर बै समनिफ्राइ दासिमहा लागै गुबुन गुबुन फरब आरो गीरजा फोराव रोजाब-जाबोदों। बेफोरनि मोननैसोआ जाबाइ—

1. रेभा: पौल धेरा नार्जरी : नखरां सानि हाथरखिया फुराउराउ; (1953)
2. सिमन थिकुरा दैमारी : जिसुनि खाथियाउ फाइ, फाइदे;
3. सिमन दैमारी : एँ गोदोर धोनिया-धोरोम सोंहैनाइआ;
4. जेम्स बेंगा दैमारी : दाउला केक्रेके फुं सोराडव;

बाइदि मेथाइफोरा दासिमबो ख्रिस्टियान समाजआव समानैनो मुं दांखा। बेबाइदिनो मिलौदो देंखोनि बर' गारांनि गुबुन मेथाइ मोननैआ जाबाइ,

'आफा इशरखौ बाउगारनाननैसो थानाइफोर, फाइफिन्दो
इशरा लिंहरदोंसै ... नोंसोरनि फाफखौ खेमा होनो।
ओ फंबाइफोर हामिखौ गारनानै
मामार फाइनानै खेमा लाफाइ
हाबाब हाबाबलाजि गैया गैया गिनाइबो गैया,
मा मोखांहै नुजाबाउगोन प्रभु जिसुआ फाइफिनबोला।'

आरो—

“फाइबाइ मान्से राजा, जनम जाबाइ राजा,
हाइरी गोदान बागान खुलिनानै होफाइ बाइरी।”

बेनि उनावनो बर' ख्रिस्टियान थुनलाइनि खन्थाइ-मेथाइआ गेजेर मुगायाउ हाबहैयो। गेजेर मुगाया गोग्लैयो 1920 निफ्राइ 1952 माइथायसिम। बे मुगानि गेजेरावनो 1920-1930 सिम बिबार मुगा आरो 1930-1950 सिम अलंबार मुगाया थिस'न जादों। बर' ख्रिस्टियान धोरोमारी फोरनि गेजेराव गाहायै बै समावबो गोदान गोदान मेथाइफोर सुजुबाइ थानाइ जादोंमोन आरो थाखानाइ धोरोमारि बर' मेथाइ बिजाब फोरखौ फेहेर लांबाइ थानाइ जादोंमोन। बे मुगायाउनो धोरोम बिजाब बाइबेलखौबो बर' रावआव दानस्लाइनो लानाइ जायो। Rev. Axel Kristiansen नि नाजानायाउ 1937 माइथायआवनो गोदान

र'दाइआ (The New Testament) बर' रावआव राव सोलाइ जायो। बेनि उनाव, Rev. H. Holvalshrud आरो मागुराम मोसाहारीनि नाजाथाबनायाउ गोजाम रदायनि गांसे बिजाब "गीतफोर" (Psalms) आ 1961 माइथाय आव बर' रावआव 3000 गां बिजाब साफाइ जायो। बेयो गांसे खन्थाइ-मेथाइनि बिजाब। बे बाइदियैनो —बाइबेलखौ बर' रावआव राव-सोलाइनाइ लोगो लोगो बाइबेलआव थाखानाइ गोबां गुबुन गुबुन खन्थाइ मेथाइ फोराबो बर' रावनि महर मोनो।

बर' राव-थुनलाइआव बेनि उननि मुगायानो जादों गोदान मुगा एबा आथिखालनि मुगा। आथिखालनि मुगाखौ एबा गोदान मुगाखौ थुनलाइगिरिफोरा 1952 माइथाइनिफ्राइ उनथिंनि समफोरखौ लाबोदों।

गोदान मुगायाउ बर' ख्रिस्टियान थुनलाइआ गोबां जौगाखांसिननो खाबु मोनो। मानोना बे मुगायाउ बर' ख्रिस्टियान फोरा मेथाइ सुजुनानै —देंखो होना—रोजाबना—मेथाय बिजाबफोर साफाइनानैल' थायाखै।

गोदान गोदान लिरगिरि फोरखौ थुलुंगा होनो गोदानै सुजुनाइ गोदान लिरगिरिफोरनि मेथाइ फोरखौ बुथुमनानै रोजाबग्रा बर' मेथाय बिजाबनि महर बो होनो नाजाबोदों। बेनिनो गांसेआ जाबाय, 1985 माइथाइआव "दरं जिला ख्रिस्टिय थुलुंगा आफादजों साफाइ-जानाइ गोदान बर' ख्रिस्टियान मेथाइ बिजाब 'फै जों रोजाब दोनि'। बे बिजाबआव मिलौदो देंखोनि मेथाइ सुजुनानै बिहोमा जगाइग्रा सानैसोआ जाबाइ—करनेलियास बसुमतारी, तपेशर दैमारी, अनिल दैमारी, जुरन बसुमतारी, बलेन सम्फ्रामारी, हिरेसन दैमारी, उमेश दैमारी, बिनुद दैमारी, प्रसेनजित खाखलारी, मंगलसिं हाज 'वारी, दिंमिन खाखलारी आरि मोन।

बे बिजाबआव सुजुनानै लाबोजानाय गोबां मिलौदो देंखोनि मेथाय फोरनि दोंसेआ जाबाय—दिंमिन खाखलारी सुजुनाय नैबे मेथाया :

'सोरजिगिरि आफा इशोरा
सफैसिगौ जोंखौ लांनो जोमैनि र'थआव
मोजां गाज्री बासिनानै सोरगोआव लांगोन।

आयो-फाफिफ्रा नोरोकनि अराव,
इशोरनि फिसाफ्रा सोरगोफुरियाव,
बिनिखाइनो-मेगन खेवदो
सिरिमोनदो बर' फिसाफोर।

सा खोला सानजा-सोनाब
दाउसेन दाउला हाजो हाला,
बे दिनाउ जोबनांसिगोन,
गासैबो संसारनि गात्री।

बेनि अनगायैबो मुगायाउनो गोबां बर' ख्रिस्टियान मेथाय बिजाबफोर
ओंखारबाउओ। बेफोरनि गानैसोआ जाबाइ—टुकराझार ओन्सोलनिफ्राइ “जिउनि
फुंखा”, उदालगुरिनिफ्राय “नखरांनि स्रां/सोरां लामा; इसोरा जों जों लोगोसे”
आरि।

गोदान मुगायाव बर' ख्रिस्टियान फोरनि खन्थाइ-मेथाइआव जगायनाय—
गुबुन मोनसे बिहोमा जाबाय बर' मेथायनि केसेट (Audio Cassette) फोर।
1985 माइथाइआवनो दरं जिला ख्रिस्टिय थुलुंगा आफाद (DDCEU) नि
गेजेरजों गिबिबारनि थाखै जायगानिनो दामग्रा-देग्रा-रोजाबग्रा फोरखौ लानानै
“जिउनि देंखो” मुडै गंसे बर' ख्रिस्टियान केसेट दिहुनजेनो। बेनो आगान
सुरजेननाइ। बेनि उनाव दासिमहालागै दरंनिफ्राय DDCEU/DBCYE नि
दैदेननायाउ गोबां बर' मेथायनि केसेटफोर ओंखारबाउओ। बेफोरनि मोननैसोआ
जाबाय फारियै,

1. जिउनि देंखो (1985), 2. जिउनि लामा (1986), 3. रिसार
(1987), 4. सोरां (1989), 5. देतसिन राजा, 5. दैथुन, 7. फुंखा, 8.
इमानुवेल, 9. ख्रिस्टमास, 10. गल्डेन इयुथ बाइदि बाइदि गोबांथार।

बेबायदिनो, ओजों बंगाइगाउ, टुकराझार, गुवाहाटी आरि सोनाब
ओन्सोलनिफ्राइ दासिम दिहुन जानाइ बर' ख्रिस्टियान मेथाइनि केसेटफोरनि
गनैसोआ जाबाइ—

1. जायन, 2. अनूनाइ, 3. गोजोन, 4. जिउनि देमफु (2 Nos.), 5.
मिजिं, 6. बाखनाइ रोजाब, 7. सख'जानाइ जारिमिन, 8. सिबिनाइ, 9.
अननाइनि मुडै, 10. निजोम, 11. सैथो लामा आरि ... गोबां दंबाउओ।

बे फारिलाइ फोरखौ नाइबोला जों नुयोदि, बर' ख्रिस्टियान मेथाइनि केसेट
फोराबो उनफिननानै थायाखै। माहारिनि रावथुनलाइनि अलखदनि समावबो गोबां
मेथाइ रावथुनलाइनि अलखदनि समावबो गोबां मेथाइ सुजुनानै—देंखो होनानै—
केसेट बानाइना मेथाइनि गेजेरजों बर' थुनलाइ जौगानायाउ बिहोमा जगायबोदों।

दानिया जों नाइदोनि बे बर' ख्रिस्टियान मेथायफोरा मा मा आयदा फोरखौ
लानानै सुजु-जानाइमोन। बर' ख्रिस्टियान मेथायनि फारिखौ नाइयोबोला

गमामायैनो सोमो-नांथाव । मानोना बे मेथायनि आयदाफोरा जिउनि नांगौ गासै
दिगनि बाहागो फोरखौ थाउनि होजोब बोदों । बेउनो मोन्सैसो आयदा फोरखौ
मख'नाइ जाबाय :

1. इस'र आफाखौ बाखनाइनाइ मेथाय,
2. आफा इस'रनि गुन,
3. इस'रनि मोन जि आज्ञा,
4. आफा इस'रनि अननाइ,
5. आफा इस'रनि हेफाजाब,
6. गोथार बिसा जिसुनि जोनोम,
7. जिसुनि अन्नाइ आरो मावनाय,
8. जिसुनि मुं बाखनाइनाइ,
9. जिसुजों लोगो लानाइ,
10. जिसुनि सैनाइ आरो थैनाइ,
11. जिसुनि सिखां फिननाइ,
12. जिसुखौ आनजाद लानाइ,
13. जिसुनि फैफिन्नाइ,
14. जिसुजों बासाइ जानाय,
15. जिसुनि लिंहरनाय,
16. गोथार जिउ,
17. गिरजायाउ खुलुमनाइ,
18. गोथार बाइबेल,
19. फुंबिलिनि मेथाइ,
20. मोना बिलिनि मेथाइ,
21. देउबार साननि मेथाइ,
22. फोरबुनि भ'जनि मेथाइ,
23. बापूतिस्मानि मेथाइ,
24. ख्रिस्ट'नि मन्द'लि,
25. ख्रिस्टियान जिबननि बिनाइ,
26. गोसो फिन्नाइ,
27. गोदान जोनोम,
28. गाउखौ ग'थाइनाइ,
29. जिसुनि हाबा माउनाइ,

30. फोथाइनाइ आरो बर्सा,
31. जिसुनियाउ बिनाइ,
32. गोसो गाबफिन्नाइ,
33. अन्ज्लाइनाइ,
34. रंजानाइ-बाख्नाइनाइ,
35. हाबानि (बिया) मेथाइ,
36. सौरगो गाहाम जायगा,
37. गोदान बोसोरनि मेथाइ,
38. खेजुर फर'बनि मेथाइ,
39. बिदाइनि मेथाइ,
40. फोजा खांनाइनि मेथाइ,
41. गोथै फ'बनाइनि मेथाइ,
42. दानहोनाइनि मेथाइ,
43. ज'ब्रानि थाखै मेथाइ,
44. बिमानि थाखै मेथाइ,
45. गाहाम रादाब फोरसाउनाइ,
46. इस'रनि बोर,
47. ख्रिस्टियान नांग्राफोर,
48. जोहोलाव फोरनि मेथाइ,
49. एदेन बागान,
50. फाबनि फिथाइ,
51. गाहाम लाउखार,
52. हाद'दनि थाखै मेथाइ,
53. फोरबुनि बिनाइ,
54. हारिनि थाखै मेथाइ,
55. ट्रिनिटि
56. एदभेन्ट,
57. एपिफेनि,
58. क'रास मेथाइ, बाइदि बाइदि।

बेनि उनाव जों नाइदोनि बे गोबांथार आयदानि मेथाइफोरा मा मा देंखो
जों सुजु जादों। थामहिनबा, बर'-ख्रिस्टियान मेथाइफोराव मा मा देंखो हाबनानै

दड'। बिजिरनानै नाइनो थाडेब्ला, बर' ख्रिस्टियान मेथाइफोरा गाहायै मोनबा देंखोजों सुजु जादों। बेफोर जाबाय,—

1. बर'नि देंखो : बे देंखोनि गोबांथार मेथाइ दड'। बे मेथाइ फोरआ बर'नि मिलौहाब गुबै देंखोनि गारां जों बोजानाइ, रोजाब जानाइ। बेनिनो दोसेआ जाबाय-मागुराम मोसाहारी सुजुनाय मेथाय,—

“जोडे लामा आन्दाइनायाव लामा दिन्थि,
गोथां इस'र नों
अ' आफा नोडे नडबोला जोंहा बोलो गैया,
लामायाव जों जों लोगो जादो
र'सा नांनाइआव सोरगोनि
जिउनि जानो होदो
अनख' इस'र नों!” ...

बे बादिनो बिथांनिनो बर' देंखोनि गुबुन दोसे मेथाय,

“आंनियाव फैदो मानसिफोर,
आडे नोंसोरखौ लामा नाइदों।
अ' जिउआव हाउरीया गांनानै थानाइफोर,
आंनियाव फैदो, गोथांखौ नोंसोरनो आं होगोन।”

आरोबाव बिथां कालिसरन गयारीनि बर' देंखोनि दोसे मेथाया जाबाय,—

“बइखौबो दाग्रा बि, बइखौबो खांग्रा बि
बइखौबो अनग्रा बि, बोलोग्रा इस'र बि।
गोसो होसोनानै हान्थु स्रं ख'राइदो
आखाइ ख'बज'बनानै खुलुमदो,
बै दाग्रा इस'रखौनो।” ...

2. बर'नि गोदान देंखो : गोदान मुगानि सुजुनाय गोबां मेथाया गोदान देंखोनि। बे देंखोनि दोसे मेथाया जाबाय, हिरेस'न दैमारी सुजुनाय नैबे—

‘गोदान मुगानि जों गोदान जोहोलावफोर
ख्रिस्ट'नि हाबा माउगोन—
गोदान मुगानि जों गोदान सिखोलाफोर
स्रांखौ फोरसाउ लांगोन—
जोडे दाउगा लांगोन ...।’ ...

3. इंराजी गारांनि देंखो : इंराजी रावआव सुजुनाय ख्रिस्ट 'सिबिनाइ मेथाइ फोरखौ बर'आव राउ दानस्लाइनाइ जादोंब्लाबो बै मेथाइफोरनि देंखोआ गुबै इंराजी देंखोआवनो थालांदों। बे बाइदि राव सोलाइ जानाइ गोबां मेथाइ फोरबो बर' रावनि ख्रिस्टियान मेथाइफोराव दड'। बेफोरबो बे रावनि थुनलाइआव बिहोमा जगाइबोदों। बेनिनो दोंसेआ जाबाय S. K. Hine नि मुंदांखा मेथाय, "How great Thou art" जहन बसुमतारी आरो आगनसिं नार्जारीनि बर'आव दानस्लायनाय मेथाय। बेनो जाबाय—

'आंनि इस'र, जेब्ला आडो नुथारो
 नोंनि बोतिया नांनाइ माउनाइखौ,
 हाथ'रखि साउ सोगोमनाइ रावखौ खोनादों
 नोंनि बोलो हादतआव नुजादों।
 बिनिखाइनो आं नोंखौ बाखनाइयो
 आंनि इस'र नोडे गेदेत,
 बिनि खाइनो आं नोंखौ बाखनाइयो
 इसर नोडे बेसे गेदेत।' ...

4. अस'मिया देंखो : अस'मिया रावनि मेथाइफोरखौ बर'आव दानस्लाइना
 —अस'मियानि गुबै देंखोआवनो खननाइ मेथाइफोर। जेरै—

'लक्षीराम बरुआ' नि सुजुनाइ गुबै अस'मिया मेथाइ "सोन'रि ज'ख'ला"
 नि बर'आव दानस्लाइनाइ मेथाइ—

"स'नानि जाखोला जिसुआ लुबाइ यै—
 सोरगोनि लामा होबाय।
 फोथाइग्राफोर थांनो जिसुनि साइखंजों
 सोरगो राइजोआव हापनो।" ...

5. आदिबासि एबा मोन्दारी देंखो : बे देंखोनि मेथाइफोरबो—एसे खम
 बिबाडैब्लाबो बर' ख्रिस्टियान मेथाइआव दड'। जेरै—

'गाहाम दिना सानफ्रोमबो
 जोबलांदोंसै,
 मिथिरोड जों बइबो
 माब्ला दिनाव थैलांगोन—।
 गले गले जिसु लिडे
 जोंखौ बोखांनो थाखैनो

बियो फापनि जामिन जाबाइ
गाउनि थैखौ होनानै ... ।' ...

दानिया जों फैदोनि बर' थुनलाइनि खन्थाइ बिफानआव (मेथाइ नड) बर' ख्रिस्टियान फोरनि बिहोमाखौ इसे नाइबिजिरनि। खन्थाइ बिफानाव बर' ख्रिस्टियान धोरोमनि बिहोमाखौ नाइनो थाडेब्ला गेजेर मुगायाउनो गोग्लैनाय नुनो मोनो। मानोना 1920 माइथायनि सिगां जेबो बर' ख्रिस्टियान लाइसि (Magazine) ओंखारखैमोन। नाथाइ जा समनिफ्राइ बर' ख्रिस्टियान लाइसिफोरा ओंखारनो हमबाइ आरो सरासनम्रायै ब्लाबो ओंखारबाइ-थाबाइ—बै समनिफ्राइनो बर' ख्रिस्टियाननि गेजेराउ सानैसोब्लाबो खन्थाइगिरिनि जौनोम मोनबाइ। आथिखालसिम ओंखारनाय बर' रावनि ख्रिस्टियान लाइसिफोरा जादों फारियै— 'फुंनि हाथ'रखि', (1994, गौरां मिसन हाल्लुगाव; दानफानिगिबि लाइसि) जिउ दिड, (बोसोरारी लाइसि, टुकराझार); जिउनि फुंखा (बोसोरारी लाइसि, DBCYF, हरिशिंगा); जिउनि स्रां (बोसोरारी लाइसि, गुवाहाटि); दैमु (बोसोरारी लाइसि 2001 DBCYF, हरिशिंगा); The Golden Harvest, (Souvenir, 2000 DBCYF, अदालगुरि) बाइदि बाइदि।

बै लाइसि फोरखौ बोरलानानै नायोबोला—गोबां गोदान खन्थाइगिरिफोरनि खन्थाइफोरखौ मोननो हायो। दासिम गोजौआव मख'बोनाइ लाइसिफोराव फोसाव-जाबोनाइ खन्थाइफोरनि गेजेराव मख' जाथाव खन्थाइ दोंसेआ जादों— नैबे रायथाय लिरगिरिनिनो खन्थाइ—“जिउनि स्रां”

खन्थाइनि सिरिनैसोआ जाबाइ—

'सानथ्र' हायै सुबुंफ्रा हनै
जिउनि ज'लंगा हरना
रंजानाइ नाइगिरदों,
सिनाइ हायैआव दुखुनि खाम्फाखौसो
ज'लंगा जिब'जासे बुथुमदों!
हाजार हाजार मानसिआ
खोमसिआव हान्थिदों,
बाइ हाजारा दिनै बे बाइदियैनो
बेउनो जिउ खोमादों! ...

...

खाइसेबा गात्रीखौनो
 मोजां आरो थार सान्दों,
 सिमांखौनो हनै
 दिनै मोक्थां नंदों। ...
 मोगन थानानैबो नाइनो रोडै
 मेलेम थासेआवबो साननो हायै,
 अलसिया फोरा हनै
 बैफोरआवनो गले-गले आन्दाइदों। ...
 गाउ-गाउखौनो देदगा-दुगा
 उदैं गेसाउफ्रा मालाइखौबा
 हनै बेसे मेगन जागा-जागा,
 थेउबो सानो आंसो सुबुंखौ अनदों!" ...

बेनि अनगायैबो गुबुन सासे राफोत् खन्थाइगिरि 'उइलसन दैमारी'नि दोंसे
 ख'नथाइआ जाबाय—"नोंसोरो जोहोलाव सिखोला" बे खन्थाइनि सिरिनैसोआ
 जाबाय—

"अखाफोर दानसोरां, निजोम हराव

आरो—

फागुन बोथोरनि बोदोर बाउलि बुब्लिआव
 लाइमोन बैसोनि बिबारि सिमां ...

 खोमसिजों राइज्जायै राइज्जायै—
 रिगि-रिगां हाबिलासजों 'कालबारि' लामा एरखेनाइ
 आगान सुरदों नामा—गोमागोन नामा माब्लाबा
 नैबे रैरुप हाइनारी बुहुमाव?" ...

गुबुन सानैसो खन्थागिरि आरो बिथांमोननि खन्थाइनि मुं फोरा जाबाय :

मामनि मोसाहारि (2 नं सापखाइटि) : मिथिंगानि महर।
 सिमांसा दैमारी (कालबारी बा: गी:) : हाबिलास।
 बिनुद दैमारी (2 नं सापखाइटि) : मोजोमसे जिउ।
 बिजिता सरगियारी (माइदांगुरि) : थार-लोगो।

बाबिलन बसुमतारी (सरुनगाउ) : जोनोम फुरि।
 अपुरब' बसुमतारी (बादागामि) : आंगोलोगो।
 तुतुमनि बसुमतारी (2 नं सापखाइटि) : गोजा थै।
 मनुज बसुमतारी (बादागाव) अन्नाइनि बिबार।
 जुमि दैमारी (2 नं सापखाइटि) : बासाइगिरि।
 मनदीब बसुमतारी (भुरासुबुरी) : जोनोमगिरि।
 नन्दैश्वर दैमारी (झकरा) : सोरबियो।
 बिजुवेल दैमारी (फासिया) : थुलुंगा।
 आन्दिय बसुमतारी (भुरासुबुरी) : समाइना बागान।
 खगेन बसुमतारी (खैराबारी) : जोमै।
 जुलियास दैमारी (भुरासुबुरी) : जौमोननि दाउहा।
 अजित ब्रह्म (फुहुराबारी) : फाफि।
 शशीन दैमारी (भुरासुबुरी) : सोरनि थाखै।
 पदमिनि नारजारी (अन्थाइबारी) : दुखुनि देंखो।
 स्वरन' मौसाहारी (जायन बाइबेल कलेज) : जिउमानि फुंखा।
 धिरेन्द्र दैमारी (भितर स'नाइ) : जिउ दिडा।
 बिनु दैमारी (स'नाइ बाथाबारी) : अन्सुली बिमा।
 बाइदि बाइदि गोबां।

बिथांमोननि बैफोर खन्थाइ सुजुनाइनि आरो लाइसि फोरजों फोरसाउ जानायनि गेजेरजों गमामायैनो बर' राव-थुनलाइनि खन्थाइ बिफानाव गोख्रों बिहोमा जगाइबोदों।

गोजौआव बिजिरनाय—बुंबोनाय बाश्राफोरखौ नाइनानै नुनो-मोनबायदि—बर' राव थुनलाइनि गोरलै समनिफ्राइनो—बे रावखौ आलो-आलोयै फेदरनायाउ गोबां बिहोमा ज'गायबोदों बै गुबुन हादोरनि सोनाबारी ख्रिस्टियान मिस'नारीफोरा। बिथां मोननि गेजेरनिनो Rev. Sidney Endle, Rev. A. Kristiansen, Rev. J. Gausdal, F. Horwood, L. Skrefsrud Rev. H. Holvolshrud, Rev. Besie Wrengren आरि मोना बेसेबा गोजान हादोरनिफ्राइ फैनानै बर' हारिनि गेजेराव थानानै बे गोदोना थानाइ बर' राव-थुनलाइनि गुबै बर' देंखो फोरखौ बुरखांनानै सोलोंनानै—बर' रावैनो मेथाइफोर सुजुनानै मोनसे गोख्रों दैखुन्थि गालांदों। बिथां Rev. Besie Wrengren आ बर'फोरनि गेजेराव थानानै बर' मुं दाउश्री देलाइ लानानै मुंदांखाबो जादोंमोन। गोबाड बिथांखौ बे मुडैसो मिथिदोंमोन।

बे हारिनि राव थुनलाइनि मेथाइ बिफानखौ गंसे मख' जाथाव गोजौ मासियाउ दैखांना गालांदों। बिथांमोननि सैसोनाइ आरो मावखुबनाइखौ जों बर'-माहारिआ दा-गोसो खांनानै मान बाउनाया बे हारिनि गेदेमा-गोसोनि नेरसोन दिन्थिनाय जागोन।

मानोना बिथांमोननि नाजानायाउनो बे बर' राव-थुनलाइनि लिरथुम बिजाब महर गोयै समावनो बै मेथाइ फोरखौ-सुजुनानै, बुथुमनानै—बिजाब महराउ साफाइनानै बे बर' थुनलाइखौ गोगगोम गोख्रों जानायाउ-गाउनि आधिंआव गसंना थानायाउ मैखोम बिहोमा जगाय लांदों। दा बेफोरखौ—जों बुरखांना, बुथुमना, फोजोमथाइना लाखिनांगोन, फेहेरनांगोन। बर' राव-थुनलाइखौ जा ख्रिस्टियान खन्थाइ-मेथाइफोरा थांना थानाइ आरो जौगानायाउ मदद होबोबाय—बेफोरखौ बुरखांजोबनानै राखिनाइ आरो गोदान गोदान खन्थाइ मेथाइफोर सुजुनानै बे बर' राव-थुनलाइखौ गोजौसिन थाखोआव लांनाइआ—बे हारिनि उन-फिरिनि साफ्रोमनिबो माउफुंनांगौ मैखोम बिबान! ■

बर' सल'मा थुनलायाव चित्तरन्जननि बिहोमा आरो नोजोर

—चिनन नाज्जारि

चिनन नाज्जारि (1971) : रौता दिहिंनि बर'बाजार गामियाव बिथां नाज्जारिया जोनोम जायो। आथिखालाव बिथाड कलागुरु बिष्णु प्रसाद राभा जुनिय'र कलेजाव फोरोंगिरि मावगासिनो दड।

बर' सल'मानि जोनोमा जादोंमोन 20 जौथाइनि गेजेर बाहागोआव। देराबो दुइआबो आब्रा महरैनो दड'। साबम्रानोबो रोंजोबै जानानै दड'। दिनैसिम गोबां सल'मा लिरगिरिफोरा नारानाथार सल'मा लिरबो गासिनो दड' आरो फरायग्राफोराबो फरायबोगासिनो दड'। सोरबाबा लिरदों राव थुनलाइखौ दावगाहोनो, सोरबाबा गाव गावखौ थुनलाइ मुलुगाव मुं थिसननो, सोरबाबा लिरदों दावगालु मुलुगनि महर मुस्रिखौ सोलाय होनो; सोरबाबा नाजादों समाजनि थार गुनखौ फोरमायनो, सोरबाबा लिरदों बादायनाय सुलुयै बिहोमा होलांनो बायदि बायदि हाबाफारिजों। बेफोर हाबाफारिया थारैनो मा बेखौ फरायग्राफोरासो बुंलायनो हासिगोन। दा नाथाय बर' थुनलाइनि मुलुगाव बयनिखुइबो बांसिन बिबांनि सल'मा लिरदों बर' सल'मा थुनलायाव गिबिसिन मुं थिसननायजों लोगोसे बर' सल'मानि लामा दिन्थिगिरि मुडै मोनथि जानाय मुस्रि चित्तरन्जन मोसाहारिआ। बिथाडनो बर'नि गिबि सल'मा 'जुजाइनि अर'खौ (1962) साफायनानै दिहुनजेनो। बिनिफ्रायनो जागायजेनो गिदिर फिसा बर' सल'मा ओंखारनायनि दाहारा (trend)। बिथाड 17 बोसोर बैसोनिफ्राय लिरनायनि हाबाफारिखौ लानानै दिनैसिमबो गावनि कलमनि बिलिरनायखौ दाबोनो बोखाडखै। बिथांनि बर' सल'मा थुनलायाव बिहोमा होनाया खम नंलिया, गिदिर फिसायैब्लाबो गावनि रोंगौथि, सानमोन्दांथि आरो समाजारि नुथाइफोरजों गोरोब होनानै समाजनि सावगारिखौ सल'माफोरनि गेजेरजों आगर एरबोदों।

मोसाहारि बिथांनि सल'फोरखौ सल'मानि सारिआव लाबोजोबनाया गोब्राब। फारियै सुंद'सल'मा (novellets) बाहागोआवसो सरजाब जायो। इ.एम. पस्टारि नि बायदियैब्लाबो सल'मा जानोब्ला गासै 150 बिलाइनि खम

जानो मोना। बे फारसे नायबोला थारैनो सुंद' सल'मायाव खोख्खै जाथावना। गाहाम सल'मा जानोब्ला माबा मोनसे जाहोन (subject) थालाय नाड। नांगौ खालि मोजां हुदा (style), बिदिन्थि (pattern), प्लट (plot), खबाम (rhythm), सोदोब/राव (tone), आसि दिन्थिनाय (points of view)। दिनैसिम गांफा गांनै सल'माखौ आबुं सल'मा महरै गनायथाव जादों। मोसाहारि बिथाड 1962 मायथायाव गांसे सल'मा लिरनायनि उनाव रावबो बर' लिरगिरिआ सल'मा सोरजिनो हायाखैमोन। 10 बोसोर बिथाडबो जिरायथ'नानै आरोबाव गोख्रों जानानैसो थानाय 1972 माइथायाव गोदानै गांसे गोदान आबुथिखौ लानानै सोलायसुला समाजनि आखुथाइजों गोरुब होनानै 'बिखाया गावो खुगाया गेवा' सल'माखौ सोरजियो। बिथानि दिन्थिनाय लामाजोंनो 1976 माइथायाव मन'रन्जन लाहारि बिथाड गांसे मानगोनां बर' समाजारि सावगारिखौ लानानै 'खारलुं' सल'माखौ लिरजेनो। बिनिफ्रायनो दिनैसिम गोदानै फैनाय लिरगिरिफोराबो बोसोराव गांफा गांनैयैब्लाबो लिरबोगासिनो दड'। नाथाय मोसाहारि बिथानि बिहोमाया गुबुननिखुइ आलादासिन। बिथाड बोसोराव गांनै गांथाम गाहाम सल'मा सोरजिनाया गोरलै बाथा नड। दिनै बिथाड एसेबां गेवा खामानिखौ मोगथाडव जाफुंहोनो हादों। बिथानि लिरनाय सल'मा फोरनि मुंखौ फारियै होलांनय जाबाय। फारियै—जुजाइनि अर (1962), बिखाया गावो खुगाया गेवा (1972), गार्लस हस्टेल (Vol. I 1981), Vol. 2 (), Vol. 3 (), गोरुन्थिनि उनाव (1981), आं निलिमामोन (1982), फुलमति (1983), आं नेनानै थागोन (1985), सरमिस्टा (1985), नौनि मेगनानो आंनि मेगन (1985), अन्थाइनि मोदै (1987), कल गार्ल (1988), सुजाता (1988), बिलोगो (1988), मोदै (1988), उन दाहा (1988), जिउनि लामायाव (1988), दाउखानि बाहा (1992), खिथिर (1993), लेहाइनाय बिबार (1993), गोमानाय दाइरि (1994), गलाप बिबारनि सु (1994), बारिख'नानि बिबार (1994), कामें दैया बोहैबाय थायो (2000), जौनाय सेरेगानि गाहायाव (2000), रमान्सनि निजोरा (2000), गां फुजानाय दाउ (2003), दुखुनि लैथो बारै (2002), थानाया बारा गोजान नड (2002), नों फैगोन होन्नानै (2002), सुजाता, दैसारि दै सेराव, बनस्रि, नौनि थायसे मेगना आंनि, बारसे बिबार माथाम बामब्लेमा, बिबारजों दासुनाय,हाबानि आस्थाम, नोंखौ मोनाबा, गोसोआ मोनसे मन्दिर, दाहा।

मोसाहारि सोरजिनाय गासै सल'मायानो समाजारि सल'मा। दिनैसिम गांसेल' सल'मा 'जेथो'खौ डिटेकटीभ सल' महरै गनायथाव। फारियै सल'माफोरनि बिलिया (theme) गासैबो मोजां अनलायनायनि (love theme)। बिथानि सोरजिनाय सल'फोरखौ फरायनानै नोजोर बोनो हागौ जे बिथानि लिरनायनि style आरो pattern फोरा गांसेखौ नायोब्ला गुबुन गांसेजों गोरोबहां नुयो जेबो गुबुनथि गैयि बायदि (stereo type)। मोसाहारिनि गिबिसिन सोरजिनाय सल'मा 'जुजाइनि अर' आरो 'बिखाया गावो खुगाया गेवा' गांनै सल'माखौ नायनानै सल'मागिरिनि दावगानायखौ जोबोद गोख्रों नुहरदोंमोन। नाथाय उननि माखासे सल'माफोरनि गेजेराव गासैबो लिरनायनि हुदा आरो बिदिन्थिफोरा एखे जादों। 'जुजाइनि अर' सल'मानि गेजेरजों सल'मागिरिआ आलाइसि आरो अजयनि मोजां मोनलायनायखौ मुलुगनां मोजां मोनलायनायजों रुजुदों। नाथायबा सल'नि जोबनायाव 'आलाइसि'आ जिउ थानानैब्लाबो जिउगैयि बायदि बबेयाव थांखो आद्रा थानाय बायदि जादों। सुंद' सल'नि बायदिसो गोनो गोथोआवसो फोजोबहैदों। बिथानि नैथि सल'मा 'बिखाया गावो खुगाया गेवा' सल'मायाव गोदान मुगानि समाजारि सावगारिखौ बेरखां होदों। गासै आखुनि राव, साननाय हनाय आरो आखुथाइ आरो थानायफोराबो गोदान। नाथायब्ला सल'आ हिर'-हिर'इननि मोजां मोनलायनायजों नो जोबहैदों। सल'नि दावगान (developed or climax) सिम सल'आ खहाब गोनां जादों। जोबनाय फारसे माबा आद्रा थानायखौनो मोनदां हैदों। जेराव सान्तिआ गाव मोजां मोननायखौ फोरमायनो थाखाय अजितनो मेगननि कर्निया सिन्थाय होना उनाव गावनो खानि जाना बिदाखौ खोमाना लानानै गासै सम्पतिनि उईलखौ अजितनि बिसि कल्पनानो होदों। बिनि उनावथ' अजितनि गोसोआव माबा मोनसे सोलायनाय एबा अनखांनानै फंनैसो बाश्रा बुंगौमोन बेखौ नाथाय सल'मागिरिआ गोथांहैनो खुगा मुथेनानै फोजोबथारदों। बेयावहायनो सल'नि बेसेना खम जाहैनायखौ मोनदां हादों। बेफोर सल'खौ नायोब्ला एबा आखुखौ नायबिजिरोब्ला थारैनो मोनदाडे दा मुगानि सुबुंनि आखुआनो गावखौ लानानै दुगानाय (individualism) जायनि जाहोनाव सान्तिया एसेबां मोजां खामानि मावसेयावबो फंसेबो अननाय राव मोनफिनैनि मोजाडव फैंनांगौमोन नाथायबा गाज्जि फार्सेंसो थांनायखौ नुनो मोन्दों। सुबुंनि गाननाय जोमनाय लाइ-लथर, दाजेम फोराल' जौगादों नाथाय मानसिनि आखुआ सोलायाखै। बेखायनो बुंदों—

"Human nature's the smae in all ages. The primitive caveman lies deep in all. Civilization pooh! A mere ve neer. You cannot

alter fact" (Page-152 Aspect of Novel, Fester E.M.) मोसाहारि बिथाड बिखाया गावो खुगाया गेवा सल'नि जोबनायाव मानसिनि आखुखौ सोलायनाय फैयो ना फैया बेखौ फोरमायख' जोबनो हायाखैसै।

चित्तरन्जन बिथानि सल'माफोराव आथोनारि उदां आखु दिन्थिनायबो दड'। नाथाय बिथानि सल'आव जेबो आथोनारि उपद्रुब (sexual chaos) गैया। मोजां मोनलायनायनि गेजेराव जानाय आथोनारि दावराव दावसिखौसो नुनो मोनो। माखासे सल'माफोरा आथोनारि दावराव दावसिजों जोबनायखाय सल'नि माना थाहैयाखै। सल'मानि जोबनाय फारसे मरेलिटि थाहैनाया गोनां। बिथानि माखासे सल'माफोर फारियै—गार्लस हस्टेल, कल गार्ल, बारिख'नानि बिबार, गां फुजानाय दाड, जोंनाय सेरेगानि गाहायाव फोरानो गाहाइयै मख'जाथाव। बिथांखौ इराजी सल'मा लिरगिरि डि. एडडस लरेन्सबो बुंजागौ। लरेन्सनि लिरनाय फोराबो जोबोरैनो आथोनारि। बिथानि मख'जाथाव आथोनारि दावराव दावसि गोनां सल'फोरा गाहाइयै The Rainbow and Lady Chatterley's Lover। बिथाडबो 19 बोसोर बैसोनिफ्रायनो लिरजेननाय सासे मुलाम्फा गोनां सल'मा लिरगिरि।

मोसाहारिनि सल'मायाव हिर' हिर'इन फोरनि मोजां मोनलायनायानो गहाइ मुवा। भिलेइनबो थायो—बिसोरो हिर' हिर'नफोरनि मोजां मोनलायनायनि हेंथा, बिमा बाथुल, गोरोन्थि बुजिलायनाय हयथ' मानिबा दुसमन। फार्सेथिं बिथानि माखासे सल'माफोराव आथोनारिनि फार्से जेबो हेंथा गैयि समजानि सल'फोर बायदि नुनो मोन्दों। बिथानि जाबायदि सोरजिनाय माखासे सल' "Can lure the teenage" साफ्रोमबो फरायथावै best selling novel फोर बायदि। बिथानि सल'माफोराव दालाइ प्लट आरो दालाइ आखुथाइ दानायाव लोरबां नुदों। माखासे सल'मायाव मोननै सुंद' सल'खौ सरजाबना होनायफोर बायदि जादों। जोबनायाव जेबो गोरोबथाखौ मोनहैया। बिथाड गांफ्रोमबो सल'मायावनो समाजारि सावगारि बेरखांहोनो नाजादोंब्लाबो समाजारि मोगथां सावगारि एरखांनायाव मिहि नोजोर सानमि थानाय गोहो आरो इयुन नोजोर थानायनि सिनायथि होनो हाजोबाखै। माखासे ragic-comedy सल'फोराव माखासे जालानि गेजेरजोंबो हिर' हिर'इनफोरा सुखुयै राइजो जाहैनो मोननायबो दड' बिथानि आखुफोराव psycho-analysis मोननो थाडाखै। प्लटफोरा रमान्टिसिजिम जोब। जेबो नेरसोन गोनां आखु गैया आरो गासैखौबो स्लि आखुआवनो नुनो मोनदों। बिथानि सल'फोरा फरायनायाव खहाब गोनां जादों।

खारलुं आरो टाइपिकेल आखु

—राजेन्द्र कुमार बसुमतारि

राजेन्द्र कुमार बसुमतारी (1969) : बर'बाजार (रौता) ओन्सोलनि सासे
थुनलाइगिरि, बिजिरगिरि आरो लिरगिरि।

सल 'मागिरिआ बामोनकुरा गामिनि सोमोन्दै माखासे टाइपिकेल (typical)
सोद्रोमाफोरखौ सुथाबफादों आरो बिसोरनि गेजेरजों बामोनकुरा गामिनि
जारिमिना गाहायाव होनायबादि बेरखांदों।

बामोनकुरा गामिनि जारिमिन लिरनो थांब्ला रानस्रेमनि मुड्ड सिगां फैग्रोयो।
गामिनि जोबथारनायाव रानस्रेमनि न'। न'नि सानजाहा दुब्लिआव लांनाय जामफै
फिसा फिसा दोंथामसो दं। साखान्थियाव गामिनि सरक। फारसेया थांदों
सोलाइबिल सिम। फारसेया भुटियापारा (सट' बामुनकुरा) सिम थांदों। न'नि
सौहादिं जिं जिं उवा सुबा; सेर सेर गरखाय। खोलाहा मैगं थायगं गायग्रा
आबाद थिलि। बेखौ बारब्लानो गामिनि दुब्लि। सानजाहा सौरा न'। बेनि
खनायाव माइबाख्रि। खोलाहा बोराइ-बुरि उन्दुग्रा सेवबानि न'मा। सोनाब
थिंजाय ओंखामसंग्रा न'। साहा गहेलनि थाखाय लुनाय न'। इनजुरा सुनै
फुननाय। दैखरा खोला सान्जा खनायाव। सोरगिदिं सेखार। जिं जिं गइ बिफां;
सोनाबथिडै बांसिन। जखायब्रैसो दं। गइ बिफाडाव फाथैबो मानलादों। रानस्रेमनि
सोनाबथिडै सानजारि आरो खोमा गोलाउननि न'। रानस्रेमनि बैसोआ बाजिसेनि
बांबाय। बोराइदब जाबाय। खानाइ खंख्रि हां; गोसोम। खुजा खुदब-दब, देहानि
भाज। आइथेंनि आसिफोरा खेंखा-खेंखा गुवार। उन्दैनिफ्राय जुथा गानफेरैखाय
बिनि आथें मोननैआ मोखांथिडै देबदों। देहाया बिना बारा थाग्रा नड। नाथाय
बिनि सेहेराया गाथाम गुथाम गोरा, सोमब्ला ब्ला। बिसि गावजेड गुफुर जारां।
खानाया गयरि जाथि, लावा सुड। सिख्ला बैसोआव बिमायानो नायनो
मोजांमोन। सेहेरायाव आखल-आखुआव, आरो मोदोमनि गाबाव बिसि
फिसाइनि गोरोबनाय गैया। रानस्रेमा गुरै; गोख्रै राग जोड नाथाय राग जोंब्ला
बियो गिलु बालु मुस्रि लायो। गोसोआव खेंखा-खेंख्रि गैया। थों गोथों। बियो
मालायख्रौ हिंसा खालामा, मालायनि इनाय साना। मावथि नाथाय हावरिया।

गावजेड रांखिनि गुरगुजिया; बियो एखनबा गमथि, अखनबा रां रां सांसां। गोसो मोजांब्ला मिनिबाला बाला। गोसो गात्रिब्ला गोमजोर राखां-खां। फिसाइखौ गासिबो दायनिगिरि खालामो। मानोना बियो एसेबां हिन्जाव नायनाय उनाव रांखिनि जंखिनिखौसो मोनफ्लांबाय। बाराद्राय बासिख' बासिख' हिन्जाव नायब्ला उनाव रांखिनि जंखिनिखौ मोनमारो। बेनि थाखाय रानप्रेमा बिथाबारि आरो गायग्रा हा ज' जथायनानै बिगा बाजिसो मोन्दोंमोन। बाजि बिगानि मादाव फानै फानै आरो बन्दग होयै-होयै दा बिगाबासो ल'सै। रानप्रेमनि फोलेराव मात्रै सोद्रोमा; गाव बिसि गावजे, फिसाज्ला गहेल आरो फिसाजो फेनथेब। फेनथेबनि आनजाया बोसोरनैसो बारबाय सकखायाव थैनाया। फिसाजो फेनथेबआ न'आव गैया। माहाजोननियाव बान्दि बैहैदों। रानप्रेमनि संसारा थेलेबलेबब्लाबो आंखालगोनां। बियो जिउनि गेजेर मोननानै बारबाय नाथाय सुदेमा मा जिराद बेखौ बियो दासिमबो आन्जाद लानो मोनासै। थानानै थानायनि दावहायाव बिनि देहा गेरेबबाय। नाथाय बिनि फेरनांग्रा गोसोआ दाबो गेरेबाखै।

बिब्दिनो बामुनखुरा गामिनि जारिमिन लिरनो थांब्ला रानप्रेमनि मुड सिगां फैग्रोयो। बिनिफ्राय जारिमिननि बिलाया हार्सिंडै गांफा गांफा गेवलाडे। बामुनकुरा गामिनि सान्जा सोनाब लिं लिं गोलाउ। गामिनि खोलाहा माइ गायग्रा दुब्लिया लेरगारि सायथिं लिं लिं गोलाउ। साहाथिडै गामिनि खर'निफ्राय बिजौसिम दहला आरो बेनि साखाथियाव सानजा सोनाब पि: डब्लिउ: डि: रोड आरो बेनि साहा दभाइगामि। गामिनि सरकआ गेजेरजों सिंखावनानै सानजाहा पि: डब्लिउ: डि: रोडजों लोगो लादेरहैदों। गामिनि सोनाबफार्से जैमा दैमाया दिंग्राय दिंसि खोलाहा बोहैलांदों। गामिनि मानसिफ्रा बे दैमा दैसाखौ बानदो थेनानै जामफै जावनानै गामिसानि दोहोलाव खोख्लैनानै गामि गेजेर गेजेर जामफै दोंथाम जावनानै खोलाहानि दुब्लिबारिआव दै लांदों। दैमा बान्दो थेयै समाव बामुनकारा गामिआ ओंखाम रसा नाडेमोन। अखानि दैजों माइ गायोमोन। अखमबा बोसोराव गायनाय समाव अखा हायाबा एबा खरान होयोब्ला दुब्लिफोरा खारां खाथां रानखांनानै थायोमोन। जेइ बोसोरनिफ्राय गामिनि सोद्रोमाफोरा थैखौ दै खालामनानै सान-हर हा खोनानै दाउ-फारेउ आरो बोरमा बोलि होनानै दैमाखौ थेबथिंनानै दुब्लियाव दै लानो हादों बे बोसोरनिफ्राय बामुनकुरानि सुबुंफोरा ओंखाम रसा नाडखिसै। नोलोबारि बान्दोआ गामिनि सोनाब खर'आव नोलोबारिखौ थेनानै सोनाबनि दुब्लिआव दै लाडे। दहलानिफ्राय लाबोनाय मोनसे जामफैआ सब्रामनि बिथा बारिजों

थानानै दुब्लिआव दै फोसारदलानानै दोरदोरा आरो मोसोदानसोम बिलोजों थानानै सोलाय बिलोआव गोग्लैहैदों। गामिनि सानजाहा आरो मोनसे बान्दो दंबावो मुड दानगारनाय। बे दानगारनाय जामफैआव गामिनि खुदियाफोरा दैलाडव हरदम दुगैयोमोन। दादुरानि बिफा सिदारु बियो जोबोद रागा खरामोन। बिनि न' जिंनि गरखायाव खुदियाफोरा जाफाव जुफाव दुगै हैब्ला 'साला पाजि' होननानै होखां हरोमोन। अब्ला खुदियाफोरा 'दादुरा बिफानि खिफिनाया सिलायसे गुबुं बुं' बुडै फोरलाब फोरथाब खारलाडेमोन।

बामुनकुरा गामिया मब्ला उजियामोन बेखौ दा रावबो बुंस'नो हालिया। जाय मानसिफ्रा बे गामिखौ गिबि नबथि गायसनदोंमोन बिसोर मा लांखायावनो हा जानानै बै समताजों मिसिलांबाय। बे गामियावनो बेसेबां मानसि जोनोम लानानै सुखु दुखुजों राइजो जानानै थैलांबाय बिनि जारिमिनखौ सोर लिरथुमनानै दोनदों? थैनानै थानायनि गेजेराव बे गामियावनो सासे बोराइ दंमोन। मुड देंग्लाय। आबौ काहा हाय; महेमनि बिफा बाथुल। जोबोद सादा-बुसा मानसिमोन। बाथा दोंफ्रोमबो हा-हा-हि-हि मिनिग्राखाय बिखौ मानसिफ्रा 'काहाहाय' बुडेमोन। बियो सानफ्रोमबो बेलासे समाव मोसौ होसननाय सिगां गामि बोराइ गाखेंनि बिसि देवबारिनिफ्राय जौ बिनानै लोडेमोन। जौ लोंखानानै-हाहाहाई हाहाहाई, मिनिनानै फालोनि मोसौफोरखौ गलियाव होसननानै खाहैयोमोन। बे गामियावनो दड'मोन सासे जाम्बा लला। मुड खदाल। गामिनि हालमाजिमोन। सादा-सिदा गोगो गोसोनि मानसि। हार्सा रावखौ रोडमोन। सानसेखालि खदालआ माबा हाबा लानानै दिकियाबारि बांगाल गामिआव थानदोंमोन। बियो बेजाय दै गाडे। सासे बांगालनि न'आव थानानै दैखर खाथियाव गसनानै बालथिं बिहरासै—थाफुं थुफुं थफलुं आसेना माव? नख'रनि बांगाल हिन्जावफोरा बियो मा बिदों बेखौ बुजिनो हायाखिसै। बे समावनो सासे बांगाल हिन्जावआ बालथिं लानानै दै खावनो फैयासै। बालथिंखौ आसि थुनानै खदालआ बुडसै—एइथुयै एइथुयै माव। अब्लासो बिनि बिनायखौ बुजिनानै बांगाल हिन्जावआ बिनो बालथिं होयो। आरो सानसेखालिनि बाथा। खदाला दिकियामारिआव हांसो बायनो नागिर हैदोंमोन। हार्सा रावयै हांसोखौ मा बुडे बियो मिथिया। बियो सासे बांगालनि न'आव हाबना सोडसै थें दाफला दाफिल गाब आसेना माव? नख'रनि मानसिफ्रा रावबो बुजिनो हायासै बियो मा जिराद बिदों। बयबो गल' नायना थायो। खदालआ आखाइनि फावजों

बुजायो नाजायो। थेउबो रावबो रावबोआनो हमनो हाया। उनाव गाब गाब होननानै मासे हांसोआ उसुंसेराव थानाय हाखरनिफ्राय सिस्लायाव फैयो। खदालआ एइथई-एइथई बुंनानै दिन्थियो। गामिनि सोनाब जिडव खदालनि न' जिहं-फाहं देरा। बियो गामसा सुरि गानग्रामोन। गस्लाया इन्दिसि सुरिनि जांलाब हाब गस्ला। बाथ्रा बुंन्ला आरो मिनिबा खुगा खनाजों खुदै र' गलायोमोन। जोबोद माहि आरो गोथों मानसि। हालमाजिनि बेथन बाबद खांनाय माइजों थोब्ले-माब्ले संसार बेडोमोन। हावरियाब्लाबो बिनि गोसोआ हावरिया नडामोन। मालायनि इनाय सानामोन। बे बादि गोसो सोलेरनि खदाला अबथिरा दुब थैनानै दैमासेरनि गोथैसालिआव माब्लादि जुगामि उन्दुहैखो बेखौ उदिस मोनस्लाबाखिसै।

खदालनि न'नि साखाथियाव आरो सासे अलसियाब्रोम मानसि दंमोन। बि जादों मालिबुसा। हा-हु जा एसे दंमोन बन्दक होयै होयै बियो निखावरि जायो। रांखावरियाव निखावरिब्लाबो बिनि गोसोआ मोनसेथिडै दोहोनि मोन। बे जादों गान बाजोना। सेंग्रा समनिफ्राय जात्रा, मेथाइ, आरो दामनाय-देनायाव जोबोद राब दंमोन। बे मालि बुसाआनो खोमथा (मेथाइ आरो फाव) नि गाहाइ दिन्थिगिरिमोन। खोमथाखौ थाख्रिफालाबो बुडोमोन। थावख्रिबादि गिदिं गिदिं मोसानानै मेथाइ खनै खनै फाव दिन्थिनायखाय बे फावथिनाखौ 'थाख्रि फाला' बुडोमोन। मालिबुसाआ जात्रा गावननि अस्तादमोन। जौगां खुदब दब मालि बुसा। गाननाय सिआ बिना जोबोद मैला थारमोन। धुतिखौ फैखोनानै खिबु नुहां-हां थेबनानै लायोमोन। हारमनियाम, दुखि तब्ला, जथा बेफोर बिनि अराय लोगोमोन। जेब्ला बियो जात्रायाव हारमनियामनि गत दामनो हमो बियो गासिबो बावजोबोमोन। मेगन थायनैखौ मोसेबनानै तालजों खर'खौ बायदेम बुदेम खालामनानै बियो हारमुनियामजों कनसटि दामब्ला नायग्रा खोनासंग्रा राइजोफ्रा एंखोर एंखोर आखाइ खब खब खबोमोन। गावनि बायदब लुहें नायाव सान-हर रिहारसल जायोमोन। अखनब्ला रावबो फैयाब्ला गाव हारसिडैनो थालिम खालामोमोन। जिउनि लोगो हारमुनियामा थैनाय समसिम बिनि खर' साखाथियाव दंमोन। बिनि थैनायनि उनाव निजोम हर हराव बिनि न'निफ्राय हारमुनियामनि गत आरो कनसार्ट रिखांनानै ओंखारोमोन।

दारेन बसुमतारिनि (बर'नि गिबि फावथिनागिरि) निलाम्बरखौ सिगां फावथिना दिन्थियो बामुनकुरा गामिआवनो। बे फाललायाव खेलथें (बियो थैबाय) गल' अनन्त आरो तरन मोना साख्रि जादोंमोन। थप्सा, थिबाव, हंला,

खरदे, गोलदां, माथा आरो बांगाल बिसोर गासिबो फावथिनायाव एकटिं खालामदोंमोन। बांला फावथिनानिफ्राय बर' रावआव दानस्लायनानै जात्रा फोरोंग्रानि गेजेराव ल'सननि मुड्ड सिगां। फावथिना जागायजेननाय सिगां एबा सिन (Scene) नि गेजेराव ल'सना हिन्जाव महरै नर्थकि मोसाना दिन्थियोमोन। खाथिखाला आरो गोजान गोजान गामिफोराव जेराव हाबा बेवहायनो बामुनकुरा फावथिना पार्टिआ बायना मोनोमोन। नाथाय गामिनि हाबायाव बिन्याखाता गामिनि अस्ताद बिनेसनि पार्टि आरो गइबारि बिलनि अस्ताद मति बांगालनि पार्टिखौसो बांसिन जायगा होयोमोन।

सासे सेंग्रा दंमोन मेथाइ बाजोनायाव जावलिया। मुड्ड साटार्जि। बिबो जोंखिल्लिखौ नागिरनो थानायाव हासिमारा रेलस्टेसनाव बारहुंखायाव न'नि थिं गोग्लै सिनजानानै अबथिरा दुब थैयो।

बामुनकुरायाव आरो सासे टाइपिकेल मानसि दंबावोमोन। बियो जादों गार्ग्रेनि फंबाइ मति साटार्जिनि बिफा। बियो हाल खदाल दैयामोन। बियो खोलाहानि इनजुर गैयि लान्दां न'आव मोनसे गुवार गोलाउ तक्ताखौ फार्सेथिडै दुरुजों खाखो दावनानै आरो फार्सेथिडै उवाल सायाव थिखांनानै तक्ता सायाव उन्दुगलांबाय थायोमोन। हुरा-हुरा गोलाउ खाथायाव माबा माबि लिरबाय थायोमोन। बियो धुतिखौ थाफ्लिसिम फैद्लानानै गामसा गांसे लानानै मोदोमखौ बुस्त्रिबाय थायोमोन। मोनाबिलिबाथाय गार्ग्रेनि दैख'राव हुलु-हाला घन्टा मोननैसो दुगैबाय थाग्रामोन। हजों बिहामजो जानायफोरा लाजिनानै दैख'राव दै लायनो मोनैलाय संफुनाय ओंख्रैयासो खामग्लुंलायोमोन।

बिब्दिनो पिकुलार टाइपनि मानसि बामुनकुरा गामिआव जोबनो गैयामोन। दाबो जोबनो गैया। बिसोरनि गेजेराव गहेलाबो सासे। जाय सुबुड्ड दाबसे जायगायाव थिरै थाथेरनो हाया। एखनबा दरं एखमबा मिमां एखनबा बाइदिआव बेरायदिंग्रा। गार्ग्रेनि मुंखौबो बामुनकुरा गामिनि मुंलानायाव मख' थारनांगौ जायो। बियो गामिनि ब्राइ। बारा बाथा बुड्ड, नंगौखौल' बुडे। बैसोआ बिना द'जिसो जाबाय। खानाया गेजेर गेजेर मोनबाय, हाथाइआ खावसे गबाय। दोहोरोमसुला हरदम आहुति सावग्रा। नांलायनाय बुलायनाय, हा-हुनि गलमाल, मोसौ खावनाय, हिन्जाव लानानै ग्रेंग्रे-गुंग्रे जानाय बैफोरनि सालिसायाव बर' आरो बांगालफ्रा बिखौनो बिजिरगिरि खालामो। बिनि राय होनायाव मोननै पार्टिआ खुसि जायो। बिनि उनाव लेसानि मुं लाजायो। जाय मानसिआ मालायनि इनाय खालामनो थानायाव गावनिसो बांसिन खहा जादोंमोन।

बिब्दिब्ला सल 'मागिरिनि आंगो गामि बामुनकुरानि माखासे टाइपिकेल आखुफोरखौ 'खारलुं' सल 'मानि गेजेरजों फारि फारि सुथाबफानानै दोनदों आरो बे आखुफोरनि गेजेरजों खारलुं सल 'माया गोमजोरसिन जानो खाबु मोनदों। गांसे मोजां सल 'मा जानोब्ला आखुफोरनि गेजेरजोंनो बै समनि समाज, आसार-खान्थि, थानाय-जानाय बाइदि आदबफोरखौ रोखायै हमनो हानाय जादों। गाहाइयै गहेलनि आखुनिफ्राय नुनो मोनो बै समनि सुबुंफोरा दाबसे जायगायाव थाथेरनो रोडमोन। एसे-एनै दुखु मोनोब्लानो नख 'रखौ गारना खारनाय हुदाया बारामोन। ■

गासै बिथिंआव बर'फोरनि गेजेराव जांख्रिथायनि गोनांथि

—धीरेश्वर बर' नार्जि



धीरेश्वर बर' नार्जि (1949) : कलाइगावनि साहा नं 2
आमगुरि गामिआव बिथांनि जोनोम। बिथाडा सासे सुंद 'सल',
सल 'मा, रायथाइ-मेथाइ लिरगिरि। बिथांनि 'जोथि', 'जीउ
गाग 'लांनाय सान'—सल 'माफोरा सामाजिक सल'नि।

मोनसे जौगानाय माहारि दानो बेसेबांदि हेंथा, जेंना, सु बारग' नांगौ
बिनि बिसान थाया। रोजोबथाव फोलेर आरो गियाननि बेरफुनाय जायाब्ला
हारिनि जौगानायनि बाश्रा फैया। जांख्रिथायारि सुबुं गोसोआ सिरिखाडा।

“गासै बिथिंआव बर'फोरनि गेजेराव जांख्रिथायनि गोनांथि।” बे
आयदाया फंसे बाश्रायावनो बुंनो थांब्ला जोबोद गोब्राब। गुबैयै बिनि मोखथां
बिथिंनि बाहायथि बाश्राफ्रा। मोनसे जांख्रिथायनि गोनांथि माब्ला जानानै फैयो?
हारिनि गेजेराव जांख्रिथायनि गुनारि आखुफ्रा मा मा? जांख्रिथायनि थाखायारि
(objective) बिथिंफ्रा मा मा जानो हागौ? गासैबो बिथिंआव जांख्रिथाय होनब्ला
बिनि बेंखना बेसेबां गुवार जागोन? बिफोर बिथिं बिजिर बिजिर नायथौनो
गोनां बाश्रा। आं बायदि सासेनि थाखाय बिफोर हाथाव नडा।

1760 निफ्राय 1830 सिम इंलेन्डनि उद्यग जांख्रिथाय, 1917 नि (25
Oct.) रुसियानि अक्तबरनि जांख्रिथाय, 1789 नि फरासि जांख्रिथाय, 18
जौथायानि आमेरिकानफोरनि उदांमिनि जांख्रिथाय, 1688 नि इंलेन्डनि गोरवमय
एबा थै दान होनाडै जांख्रिथाय, भारत उदांमिनि जांख्रिथाय बायदि खायफ्रा
मख 'जाथाव मुलुगनि जांख्रिथायनि सोमोन्दै फरायनो मोनदों। बिफोर गासै
जांख्रिथायनिनो सोरबा सासे एबा दोलोसे मानसिया गिबि बिबान लानानै
दैदेननाय मोन। बिफोर गुबैयै राजखान्थियारि जांख्रिथायब्लाबो रांखान्थि,

समाजखान्थि, दोहोरोम खान्थि, थुनलाइ बिफोर आयदायावबो खेंस्लायैब्लाबोदि गोहोम खोख्लैनायमोन बि थार।

आथिखालाव राइजो थाखोआव पान्जाबा green revolution खालामना देरहानायनि बाथ्राजों मिथिदों। बिब्दिनो आसामावबो राजखान्थि आरो रांखान्थियारि उदांमिनि जांख्रिथाय सलिबाय थानायखौ जों नुदों। मुलुगनि एसेबां मानि जांख्रिथायनि बाथ्रा मिथिनाय आरो फरायनो मोनफेरनायनि उनावबो बर 'फोरनि गेजेराव रांखान्थि, उद्यग, आबाद, फालांगि, थुनलाइ, सोलोंथाइ, दोहोरोम मोनसेबो बिथिंआव जांख्रिथायारि बिथिं सोमजियासै बि सानग्रंनो गोनां। जांख्रिथायनि गिबि बिथाया जादों सोलोंथाइ। गियाननि गोसारनाय जायाब्ला जांख्रिथायनि बाथ्रायानो फैया। गासै बिथिंआव जांख्रिथायनि गुदिखोथा साननाया बर 'फोरनि थाखाय आथिखालजों गोरुबदों सानब्लाबो गोबां गोबाव जालांबायखा।

जांख्रिथायनि जाहोन मा जानो हागौ एबा जांख्रिथाय मानो गोनां जानानै फैयो बिनि सोमोन्दै Plato आरो Aristotle आ गुबैयै "संबिजिद सोलायनाय आरो हादोरनि सोबख'नाय" बे मोननै खौनो गुबै जाहोन होनदों। जायनि थाखाय हादोराव जांख्रिथाय जायो। बिथांमोननि बाथ्रानि सायावनो सोनारनानै जों बुंनो हागौदि मोनसे हारिनि गेजेराव जांख्रिथायनि गोनांथि बेफोर जाहोननि थाखायनो नांगौ जानानै फैयो—

- 1) मोनसे हारिया उसुंनि गियान गोनां हारिनि रुजुनायाव खम गियान गोनां जानानै फरायना थालांब्ला।
- 2) मोनसे हारिनि राव-हारिमु गुबुननि जखायाव उन थालांब्ला।
- 3) मोनसे हारिया गुबुन मोनसेजों गोबां बिथिंआव (जेरै—राजखान्थि, रांखान्थि) सोबख' जानानै थाब्ला।
- 4) मोनसे हारिनि evolution आ गोबां बोसोर लानानै जोबोद natural जानानै थाबोला, हारिखौ माबा मोनसे गोदान ideology जों दाफिननो सानखोब्ला। आरो
- 5) गुबुन गुबुन जाहोनफोर।

दिनै बर' हारिनि साफ्रोमबो सोद्रोमाया गोबोंजों थार ओंथियाव सानदांना मोननांगौमोन 20 जौथायनि मुलुगाव थांनानै थानो थाखाय जों बेसेबां रोंखा-राखा, जुग्य। गावनि हारिया बेसेबा उन थालांखो बिनिनो मिजिं जोंहा गैया। बिनि थाखायनो बे जांख्रिथायनि बाथ्रा लाबोनो गोनां जादों।

जायनि थाखाय जांख्रिथाया माबा मोनसे बिस्लाय एबा alternative एबा सोलायनाय लाबोनो नाजायो बिनि थाखाय जांख्रिथाय लाबोग्राफ्रा नोजोर लाखिनांगोनदि जाहाथे बे सोलायनायाव (1) बयहाबो मुलामफासो जाबाडे खहा जाबाड।

2) जांख्रिथायारि फोरनि थि मोनसे थांखि थानांगोन आरो मा राहाजों जांख्रिथायखौ लाबोगोन बिनि मोनसे रोखा मिजिं थानांगोन।

3) जांख्रिथायनि ओंथि बि नड दि गोदो, दा आरो इयुन मोनथाम बिदिन्थाव जानो हायै माबा मोनसे गोदान दानाय। बिनि थाखाय सोदोमस्रिनि नांथारगौ बाहागोखौसो एरैबायदि सोलायनो नाजा नांगौदि जाहाथे बे हारिनि सोदोमस्रिनि जारिमिना गोमालाड।

4) जांख्रिथाया मोनसे हारिनि जीउआव गागो एबा बिसेस बिसेस आयदायाव उदांसि लाबोनो नाजायो। गिख' आखुजों उदांसि लाबोनो हाया। बिनि थाखाय जांख्रिथायारि फोरनि गोसोआरि गोहो थानांगोन। लोगोसे बिखौबो मिथिना लाखानांगोनदि गोहो गोनांफ्रा माब्लाबा गोहोखौ नाड-फाड बाहायग्राडे। बिनि थाखाय जांख्रिथायारिफ्रा बहा गोहोखौ बाहाय नांगौ, बेसेबां बाहायनांगौ, मा बोरै बाहायनांगौ रोंथार नांगोन।

5) जांख्रिथाया जाहाथे हारिमुखौ सोलायना अहारिमुनि फार्से लाड बिनिबो नोजोर लानांगौ।

6) जांख्रिथाया सानि नड, सिंनि जानांगौ। गोसो-बिखा, आखल-आखुवै। सानि एबा गोसोज्लिद गोनां जांख्रिथाया जेबो रेगा खोख्लैनो हाया। सोलायनाइ लाबोनो हाया, गासै मावनाया फैमाल जायो।

Psychology नि heridite influence, मेन्डेलनि theory दिनै रावबो गोरोन्थि होनना बुंग्रानो हायाखै। बबेखानि दोहोरोम बिजाब फोरावबो फिसाज्ला-फिसाजो फोरनि जिउआव बिमा-बिफानि गुण, गियान, आखल आरो गोसोआरि गोहोम गोलैयो होनना मिथिनो मोनो। बि गुदि खोथानि आगान होनानै गोहो गोनां, जांख्रिथायारि हारिनि गोजोर बिथा दानो मोनसे साग्रिद गोदान फोलेर दानायाव आं बांसिन नारसिननो लुबैयो। आरो बेनो जागोन जांख्रिथायनि गिबि रादाय। बे रादायनि सिंआव जों गाहायनि बिथिं फोरखौ मानिथारनांगोन।

1) बर' हरिया गोदोनिफ्राय आला-दिड राइजो जानायनि फोलेरारि हुदाखौ गारथार नांगोन। गोदोआव आबौ-आबैमोना दैलाडव बोसोरनि दाननै, दानथामल' आबाद मावनानै जा मोननायमोन बिजोंनो थोनायमोन। बिनि थाखाय बोसोरनि उफ्रा समफ्राव मैहुर खालामनाय, ना गुरनाय, हाग्रा-बंग्रायाव था, फिथाइ-सामथाइ मैगं-थाइगं बुथुमनाय बायदि साधारन हाबाफोरखौ मावनानै आला-दिड, अलसिया राइजो जानायमोन। आरो बे आखला फोलेरनि मोदोमाव दिनैबो दं। आथिखालावबो बर'फोरनि गेजेराव हाबा मावनायखौ सुबुंनि नांथारगौ गुण महरै आजावाखै। रावबो मावथि आखालखौ जिउआव देरहानायनि गुदि रादाय होननानै लायाखै। जों मावथि आखलाव सर' जानांगोन आरो गावनि मावनांगौ हाबानि बिबान 100% (जौसे जौ खोन्दोखौनो) रुजुनो हाथार नांगोन। बे मावथि हरिमुखौ जों उननि फोलेरनो होलांनांगोन।

2) नैथियाव जोंनि हरियारि जानाय-लोंनायखौ जों नांथारगौनि खाथिरै थाबै एसे सोलाय-सल' खालाम खानांगो। जोंनि हरियारि हुदा जौ बायदिसिना फेनाय मुवा आरो गोबां बेदर जानायखौ जों गारभ्राबथारनांगोन। जौवा जैरै सान-गोहो-मेलेम, मोदोमनि खहा खालामो बेदराबो रज' गुण एबा मोदोमारि सुखु लुबैग्रा आरो अहं एबा दुगा गुण बांहोयो। रज' आरो तम गुण दावगानायनि हेंथा। बिनि थाखाय मोनसे सत्व गुण गोनां फोलेर दानो दिनैनो जानो गोनां बिमा-बिफा आरो समाजा रज' गुण गोनां मुवा-बेसादनिफ्राय गोजानाव थानानै फोलेरनि थैखौ सोदांनाया गोनांथार।

3) दोहोरोमा मोनसे हरिखौ रासिनै खौसे खालामनायावल' नड, बोसोनथियारि आखल दानायावबो मदद खालामो। बर' फोरनि गेजेराव दोहोरोमखौ गोथौवै सिबिनाय मानसिनि बिसान जोबोद एसेल'। दोहोरोमाव फोथायनाय थानाय मानसिफोरनि अबंलावरियाबो फोथायनाय थायो। बिनि थाखाय दोहोरोमसुला मानसिफ्रा फाफ हाबा, हिंसा, इनाय बायदि गात्रि हाबानिफ्राय एसेब्लाबो जानगारना थायो। बिब्दिनो बिसोरहा बोसोनथियारि आखला दाजायो। दोहोरोमसुला मानसिफ्रा अबंनि खाथियाव बरसा लाखिना गावनि हाबायाव मुखुबना थानो थुलुंगा मोनो। दोहोरोम फोथायनायनिफ्राय मोननो हानाय गुणफ्रा जोंनि उनफोलेरनि थाखाय गोबां बिथिंआव नांथारगौ जानानै फैदों। मानोना बोसोनथियारि आखल गैयै हरिनि दावगानायबो गैया।

गोदान आखल गोनां फोलेर दानायाव heridety influence नि फार्से नोजोर लाखिनानैनो बेफोरखौ मखनाय जादों। गोदो शास्त्र बिजाब फोरावबो

बिमा-बिफानि आखल-आखु गथ 'गथाया मोनखानायनि बिदिन्थि नुनो मोनबाडे । जैरै महाभारताव बिसित्रबीर्यनि खाथियाव बिमाफोरनि जा हालोद जानायमोन थि बिब्दि हालोदावनो धृतरास्ट्रआ मेगन नुयै, पान्दुआ लोरबां, बिदुरा गियानि जानानै जोनोम जादोंमोन । अर्जुननि फिसाज्ला अभिमन्युआ बिमा सुनद्रानि गोर्बोआव थानाय समाव चक्रबेहुवाव माबोरै हाबनांगौ बिखौल' मिथिनायमोन, नाथाय ओंखारनायनि बाश्राखौ मिथियाखैमोन । जायनि थाखाय बि चक्रबेहुवाव हाबनानै ओंखारनो रोडैलाय थैनो गोनां जानायमोन ।

मोजां फोलेर दानायनि बेलायाव बिब्दिनो गोबां सास्त्र बिजाबनि बिथोन जों मोननो हायो । मालाय हारिनि बिफोर बाश्रा जिउआव मानिनानै साबसिन फोलेर दानो हायोब्ला बिनिफ्राय बर'नि दोहोरोम, राव, हारिमुनि मा खहा जानो ?

आं सानदांना मोननाय बायदिब्ला सास्त्रनि बाश्राफोरनि सैथो दंथारो । सासे आखल मोजां, गुण गोनां गथ' मोननो बिमा बिफाफ्राबो बिथांखि गोनां बायदियैनो गावनि फोलेरखौ दानांगौ ।

Astrology आवबो गथ' गोर्बोआव लानो दान, बार, तिथि एबा खलब, नक्षत्र आरो समनि बिथोन होनाय दं । संसारनि मानसिफोरनि आखल, आखु, जिउआव देरहानाय, जेननायनि जाहोन बिफोर सान, बार, नक्षत्र, समनि गोहोम होननानै बुडे । बारबेला, कालबेला, कुलिकबेला, कालरात्रियाव मावनाय गासै हाबानिनो बिथाया बिष गोनां जायो । गुबुन फार्से माहेन्द्र आरो अमृत य'गआव मावनाय हाबाया मोजां फिथाइथायो होनना astrologyया बुडे ।

बिब्दिनो य'ग तत्व फरायब्ला मोदोमनि मा हालोदाव जानाय लौनाय, गोदान हाबा जागाय जेन्नाय, देरहासाद जानो थांखि लानानै हाबा मावनांगौ, मोदोमखौ बेराम-आजारगैयै खालामनो, गोसोनि बोलोबांहोनो, गोसो हमथानाय गोहो बांहोनो हायो बिनि बिथोन दं । गथ' गथाय जोनोम होनायनि बेलायावबो बिमा-बिफानि मोदोमाव अपतत्व आरो पृथिबी तत्वनि गोहोमनि बाश्रा दं । ब्रह्मसार्य तत्वआवबो बिब्दि गोबां बिथोन जों मोननो हायो । गोदो गोदाय भारतारि य'गि फोरनि बिफोर बिथोन गनायना सोलिब्ला मोखथांआव मोजां फिथाइ मोननायनि अनगा हारिनि हारिमुनि जेबो खहा जाया होनना सानो आं ।

नांथारगौनि खाथिरै बेयावनो आं आरो फंसे बाश्रा बुंनो लुबैदों । जौनि जुलि जागोदानफोरनि थाखाय आथोन बिगियाननिफ्रायबो मोजां-फोलेर दानो

खायफा बिथोन मोननो हागौ। बियावनो आथोन बिगियानाव मोननो हानाय शिवआ बिसि पार्वतीखौ फोरोंनाय बाश्राखौ मख'नाय जाबाय। शिवआ पार्वतीखौ फोरोंनायदि सान दाइन, जि, जिनै आरो जिब्रै खालि बिमाया गथ गोर्बोआव लाबोला मोजां गुण, आखल गोनां होवासा जोनोम जायो, बिदिनो सानगु, जिसे, जिथामआव बिमाया गोर्बोआव लाबोला मोजां आखु, मेलेम गोनां हिन्जावसा मोनो।

बाथौ दोहोरोमावबो मोनसे जोबोद गोसो होनो गोनां फोरोंथि दं "दावखायालाय फुराखै, दावबआलाय सोमाखै, लैथोनि दैयालाय उल्थाहै बोहैयाखै।" दावखा जानानै जोनोम जाब्ला जेब्लाबो दावखानि गुण गारनो हाया। दावखानि गुण लानानै सोरबा गथ'आ संसाराव फैदोंब्ला बिखौ हुखोमोरनो हाया। जेरै—लैथोनि दैखौ सा फार्से उल्थाहै बोहै होनो हाया।

हारिनि जिउ दाहारखौ मिथिंगायारि आखुजोंनो सोलिबाय थानो होवाजासे गुबुन हारिमु सोदोमस्रिजों फेरमारिनो हानाय बायदि गोसोआरि गोहो खामायनो जोंनो मोनसे मोजां फोलेर नांखागोन। बे बाश्राखौ दिनैनि गासै बिमा-बिफा आरो बिगोमाया मिथिखाना मोनसे रोजोबथाव बिथिं सोमजि होनांगोन। अब्लासो बर' हारिनि गेजेराव गासै बिथिंआव उन थालांनाय बाश्राखौ मिथिखांना हारिनिजिउआव जांख्रिथाय मोनसे सिंनिफ्राय गावजों गाव सोमजिगोन। बिनि अनगा बोलोजों एबा खायफा मानसियाल' जांख्रिथायखौ लाबोनो बाब्राब लायब्लाबो फिथाय थायनाय नड। ■

मुलुग जिउआरि आरो सुबुंनि दावगानाय बिथिंआव डारउइननि सानसि

—बिनु दैमारी

बिनु दैमारी (1969) : अदालगुरिआव बिथानि न'आ। दासान्दै बिथाड
अदालगुरि कलेजाव फोरोंगिरि मावो।

डारउइननि सुंद' जिउ खौरां (Biography of Darwin) :

सार्लस डारउइन (Charles Darwin, 1809-1882) 'आ 1809 माइथायनि 12 फेब्रुवारीआव इंलेन्डआव जोनोम लादोंमोन (बिथानि जोनोम सान आरो बोसोरा Abraham Lincoln जों समान) डारउइनआ दाउनि बिदै, एमफौ-एनला आरो अन्थाइ आरो दाउनि आखुथाइफोरनि सोलोंथाइ लानायाव गोसो गोनां सासेल' आगोमा गथ'मोन। नाथाय बिथाड फरायसालिनि सोलोंथाइआव लोर्बा (Dull) मोन। बिथांखौ गीर्जानि धोरोगुरु जानो थाखै केमब्रिज आव दैथायहरदोंमोन। नाथाय बिथाड थाम बोसोर थानायनि गेजेरावनो केमब्रिज मिथिंगागिरि (naturalists) फोरजों सनदेरदोंमोन। बिथाड सासे गांफिननै एम्फौ (Beetle) नि मैहुर खालामग्रा नि मैहुर खालामग्रा आरो गोबां गोदान हरिसा (species) नागिरग्रा जादोंमोन। बिनि उनाव डारउइननि गासै जिउ-आनो मोनसे गेबें नोजोराव गोग्लैनायसै। 1831 माइथायआव Cambridge University निफ्राइ graduation लानाइनि उनावनो भुम फरायसालिनि मुंदांखा botanist जायो। बिथाड सासे मिथिंगागिरि (naturalist) हिसाबै (1831-36 मा: आव) Dr. Henslow आ 1831 माइथायनि 27 डिसेम्बर डानआव थांखिलायो। "H.M.S. Beagle" मुंनि जाहाज गंसेआव इंलेन्डनि बोरिमानिफ्राय 5 बोसोर हमना खोला आटलान्टिक आरो प्रशान्त लैथोमानि माखासे द्वीप फोरखौ नायगिदिडे। बेफोर दै-लामाजों हान्थिनाय (voyage) आ डारउइननि थाखै आरो गासै मुलुगआवनो जोबोद बेसेन गोनांमोन। बिथानि सानश्रहायै जिउआरि (animals) बुथुमनाया (लैथोनि जोबोद फिसाथार जीउआरि— tiny sea-animal फोरखौ लाफानानै) आरो सोमोनांथाव दंफां-लाइफांफोर, करेल

(coral) फोर आरो जिबि अन्थाइ (fossil) फोर, आरो बिथांनि नोजोरा सोमोनांथाव बालाहामानि लाइफां (desert plants) फोर, गोजू हाग्रामा ओन्सोलफोर, गुबुन गुबुन रोखोमनि दाउफोर, गिदिर-हारिनि खासेव (tortoise) फोर, गिदिर हारिनि लामा-खान्दाइ (lizard) फोर, बायदि बायदिखौ सेन्ट जेग' द्वीप (St. Jago Island), ब्राजिल, खोला-आमेरिकानि थि बाहागोफोर, निउ-जिलेन्ड आरो अस्ट्रेलिया फोरा डारउइननि गोदान सोलॉग्रा (study) थावनि जायो। 1836 माइथायनि जोबनायाव Beagle मुंनि जाहाजाव गोबां नेसॉन (specimen) फोरखौ लानानै इलेन्डनि Cape of Good Hope (मोजां आसानि खंखर) सिम गिदिंबोफिनो। बिनि उनाव डारउइनआ बिगियाननि खोथाफोरखौ गांबा-बिजाब (volume) आव लिरनो 20 बोसोरनि गोनां जायो। बिथांनि गोलाव समनि खामानि, न'आव फिसिनाय जिब-जुनार आरो दंफां-लाइफांनि आबादफोरनि सायाव नोजोर होनाय, माखासे बिगियाननि फोसावनाय बिलाइ (Science News) फोरनि गुवारै study खालामनाय आरो बिथांनि रोखा सात्राया जोबथारनायाव बिथांखौ फारि जौगानाय खान्थि (theory of evolution) आव लामा दिन्थियो। Alfred Russel Wallace (1823-1913) मुंनि सासे मिथिंगागिरि (naturalist) सेंग्राआ डारउइनजों लोकोसे जिउआरिफोरनि गेजेराव थानाय रोखोमखौ गोसो होना नायो। बे गोसो होना नायथिंनायनि सायाव बिथा-खालामना, 1859 माइथायआव डारउइना मुंदांखा बिजाब 'हारिनि उजिनाय' (Origin of species) रनसायो। बे बिजाब 'हारिनि उजिनाय' आ बुहुमनि गोबां मानसिखौनो ग'साइ (God) आरो धोरोम (religion) खौ गिनाय-खुलुमनायाव उसु खुथु खालामदोंमोन। मानोना बे बिजाबाव मानसिआ मोखानिफ्राइसो फारिसोलायबोनाय होत्रा दिन्थिदों। नाथाय बिथांनि खान्थिआ फोरमायो दि, जिब सोलायनाय सोमोन्दै मुंदांखा 'मिथिंगारि सायख'थाय (Natural Selection) बुंथिथाखौ दैखाडे। बिनिखायनो, बिथांनि बे बुंथिथाखौ "Darwinian Theory" गुबुनफार्सेथिं Darwin-Wallace theory of evolution होत्रा मोन्थि जायो। डारउइनआ 73 बोसोर बैसोआव 1882 माइथायनि 19 एप्रिलआव जिउ नागारो।

गोदान हारिनि सोरजिनाय मिथिंगारि साइख'नायनि बाहागो लानायखौनो सरासनस्रायै डारउइनिजम (Darwinism) बुडे।

डारउइननि सानसि :

1. फिसा जागिनाय थाजोबा (Prodigality of Reproduction) : जिबआ जेसेबां अनजिमानि फिसा जोनोम होयो एसेबां अनजिमानि जिबआ थांना थाया। बिदिन्थि हिसाबै, सालमन नाया मोनसे बोथोरावनो 28,000,000 बिडै (फिसा) जायो। थिग बेबादिनो जिबनि मादाव मैदेरनि फिसा जोनोम होनाय बिबांआ बयनिखुइ खम। बैदेरनि गड़ बैसोआ 100 बोसोर। बेनि मादाव मासे माखुन्दि मैदेरा मा 6 ल'फिसा जोनोम होनो हागौ। जदि गासैबो मैदेरा थांना थायो अब्ला सायाव बुंथिनाय हाराव 750 बोसोराव 19,000,000 मैदेरनि जोनोम जागोन। नाथाय थारैनो एसेबां मैदेर थांना थाया। आरोबाव बेबायदिनो फांसे बिफांआ जेसेबां बेगर जायो थारैनो एसेबां थांना थाया। जायनि जाहोनाव बहुमाव जिबनि अनजिमाया समानैनो थाफ्रामो।

2. जिउनि दावहा (Struggle for Existence) :

थांना थानो थाखाय गोनां जानाय आदार आरो थाग्रा जायगानि थाखै मोनफ्रोम जिबआ गुबुन गुबुन रोखोमै दावहा नांनो गोनां जायो। थांना थानो थाखै खालामनाय बे दावहाखौ 'जिउनि दावहा' बुडे। डारउइना बे दावहाखौ मोनथाम बाहागोआव बाहागो खालामदों—

क) गावहारि दावहा (Intraspecific Struggle) : एखे हारिनि जिबफोरनि गेजेराव आदार, थाग्रा जायगानि थाखाय बादाय लायो (competition)। जायफोर जिबआ बे नांलायनायाव बासायना थायो बिसोरसो बहुमाव थांना थानो हायो।

ख) गुबुन-हारि दावहा (Interspecific Struggle) :

गुबुन गुबुन हारिनि गेजेराव थांना थानो थाखाय बादि नांनायखौ गुबुन हारि हावहा बुडे। बिदिन्थि हिसाबै मोसा मासेआ गांसो हारि जिबि (मै, सेसा बाइसेथ्रा) खौ आदारनि थाखाय मैहुर खालामो; गुबुन फासैयै गांसो हारि जिबिफोरा मोसानि आखाइनिफ्राय गावखौनो रैखा खालामनो नाजायो। बेबादिनो गुबुन गुबुन हारिनि गेजेराव थांना थानो लारियै दावहा नांबाय थादों।

ग) आबहावानि लोगोआव दावहा (Struggle with environment) :

जिबआ आबहावानि लोगोआव दावहा खालामो। गोबांद्राइ अ'खा, अ'खा-हाथारै, बरफ गोग्लैनाय, जोबोद बिदुं, अरगें हाजोनि बेरफुनाय, बांग्रि मावनाय, दै बाना आरिनि हेंथानिफ्राय बारगना थांना थानो थाखाय जिबआ दावहा नाडे।

3. रोखोम (Variation) :

रोखोमा मिथिंगानि आसार-खान्थि आरो जिब-जुनार, दंफां-लाइफां मोनप्रोमबो हान्जानि आखु दिन्थियो। बबेबा मोत्रै जिबआ महर, आखुआव थार एखे नड। बबेखानि एखे बिमा-बिफानि गथ'आबो एखे नड। जिबनि बे फारागखौनो रोखोम बुडे। रोखोम हिसाबै गुबुन गुबुन जिबआ गुबुन गुबुन मोनथाइ, गुबुन गुबुन गोहो आरो बायदिसिना सुबिदा असुबिदाजों जिउ दावहायाव बारस'नो।

4. गोहो गोरानि जौगाथाय (Survival of the Fittest) :

जिउनि दावहायाव देरहानानै जायआ थांना थागोन बेयो सोनारो बबे रोखोमनि जिबनि दावहा खामनायनि सुबिदा आरो गोहोआ बांसिन बेनि सायाव। आदार बुथुमना लानो थाखाय, सुथुरनिफ्राइ गावखौनो रैखा खालामनो हाजासे जायनि सोलेरनि दाथाया सुबिदा गोनां, आबहावानि हेंथाखौ सहायनो हाजासे जायनि जिउ खामानिफोरा सोलिनो हागौ, बोइफोर जिबआसो जिउ दावहायाव थिखिना (देरहाना) थानो हागौ आरो फोलेरखौ बांहोनो हागौ। गुबुन रोखोमनि जिबफोरा थिखिनो हायैलाइ फारियै थैनायनि लामायाव गोग्लैयो आरो बोइफोरनि अनजिमाआ खमि लांना फारियै गोमा लाडे। मिथिंगानि नेमाव बिसोरो तांना थानायनि मोन्थाइ गैया। मिथिंगायाव मोन्थाइ गोनांफोरासो थांना थायो। मिथिंगानि नेमानो जाबाय मोन्थाइनि जौगाथाइ (Survival of the fittest)।

5. मिथिंगारि साइख'नाय (Natural Selection) :

गोरोबनाय रोखोमाव जिब फोरा गोदानै फिसा जागिनो ज'ग्य जायो। जौगाखांनाय रोखोमफोरा बंस' (generation) नि उनाव बंस' थांनानै थागोन। गोदानै फिसा जागिनाया, आबहावायाव जिउनि दावहा होनानै गोरोबनाय आखुथाइजों रोखोम दिन्थियो। जदि सोरबिथिं (आबहावा) नि अबस्थाआ एखेयैनो थायो अबल गोगो रोखोमा बंस'नि उनाव बंस' सोलिबाय थागोन। बेखौनो सोलिबायथानाय साइख'नाइ बुडे। गुबुन फार्से, थि सोरबिथिंनि अबस्थाआव बंस'फोरा मिथिंगायाव साइख'जायो जाइफोरा जौगानाइ रोखोम जागोन।

6. हारिनि उजिनाय (Origin of Species) :

सोलिबायथानाय साइख'नाइनि फिथाइआव, थि रोखोमनि रोखोमफोरा ज'थै थायो। मिथिंगानि-साइख'नायनि थाखैनो गोबां फोलेरफोरा गोदानै फिसा जोनोम होयो जायनि जाहोनाव गिबि (गाहाइ) फोलेरजों समान जाया। बिनिखाइनो गोदान हारिसा (species) आ उजियो। सोरबिथिंनि सोलायबायथानायावनो रोखोम जायो। जेब्ला हारिसाया दाबसे गोजान जायगायाव थाडो अब्ला बिसोरो गुबुन सोरबिथिंजों गोरोबो। बिदिनो मिथिंगायाव सोरबिथिंनि सोलायनायाव गोथाडै (living) थानाय रोखोम रोखोम जिउआरिफोरा गुबुन गुबुन हारिसानि जोनोम होयो।

डारउइननि सानमिआव मोजां गाजि बिजिरनाइ (Criticism) :

मेण्डेलनि फोलेर फारिनि बुंफुरलुफोरा (Mendel's Laws of heredity) डारउइननि मिथिंगारि सायख'थाय (Natural secection) खौ गोखोडै सोंखारिदों। गोदान मुगायाव, फोलेरफारिनि गियानजों गोबांआनो डाइउइननि मिथिंगारि सायख'नाय सानमिखौ फोसाबदों। डारउइननि बे फोसाबनायइखौनो "Neo-Darwinism" बुडे। Neo-Darwinism नि बादिब्ला, रोखोमफोरा जिन (gene) एबा क्र'म'ज'मफोरा उननि फोलेरसिम जाहैयो। देहा-आखुथाइ दैदेनग्रा खालामग्राफोरा थारैनो जिबि-जिबिखिनि क्रम'ज'माव थानाय माखासे अणुल'सो। बे अणुफोरखौ जिन (gene) बुडे। जिबिनि फिसा जागिनायनि समाव बे जिनफोरा जोला-बिबिखि आरो इसिं जिबिखिनि लोगोआव गथ'गथाइसिम थाडे। बिफा आरो बिमानिफ्राइ मोन्नाय गुबुन गुबुन रोखोमनि जिन ज'जानायनि जाथाया गथ'नि देहा-जाखुथाइफोराव नुजायो। ■

बर' समाजाव जौ : मोनसे नोजोर

—बीरेन्द्र स्वर्गियारी



बीरेन्द्र स्वर्गियारी (1972) : कलाइगाव बेंखननि 2नं माकेलिकान्दा गामिया बिथांनि जोनोम जायगा। बिथांहा सुंद 'सल' आरो खन्थाइआव राफोद आखाइ दड'।

गिबियाव जौखौ सोर, माबोला, मानो दिहुन जेननाय एबा बाहायजेननाय बे बाथ्राखौ फंसेयै फिननो गोब्राब। नाथाय जारिमिननि सं दानोबोला मिथि हागोनदि सुबुं माहारिया जौखौ बाहायदोंमोन फेनाय बेसाद हिसाबै रंजानाय आयदाफ्राव। गोदो गोदाय हाग्रानि जिउ खुंनाय समाव मानसिआ मैहुरखौनो थांना थानायनि गुदि राहा-लामा महरै जेब्ला लानांदोंमोन अब्ला मैहुराव मोनबोनाय थोजासे आदारखौ रंजा बाजायै जानो जुनै अरनि सोरगिदिं रंजाना मोसादोंमोन। आरो बै समावनो मेंगिनाय देहानि बाथ्राखौ बावगारनो जुनै बिसोरो फेनाय बेसाद (जौ) बाहायदोंमोन होनना जों मिथि हायो। अबोला मिथि हासैदि हाग्रामायारि जिउ खुंनाय समनिफ्रायनो जौआ सुबुं माहारिजों लोब्बा गोनांखा। जानांगौ बेबादिनो समनि फाख'नाव सुबुं माहारिआ जौखौ गोबां खामानि एबा आयदायाव बाहायबोदों जायफोरखौ सुबुं समाजनि गोनांथार एबा नेम खान्थिखा होनना दानि जोलैआ साननो गोनां जानानै थाबाय। थिग बेबादिनो बर' समाजावबो जौखौ गुबुन गुबुन खामानि, आयदाफ्राव बाहायबोदों जायफोरखौ 'बियो बर' समाजनि नेम' होनना बुंनो गोनां जाबाय।

गोदोनि बर' समाजाव जौखौ गोबां खामानिआव बाहायबोदों जायखौ बर'नि नेम होननांदों। गोदोनि बर' समाजाव जौखौ बाहायनाय माखासे आयदा फोरा जाबाय—

1. जेउजा खामानिनि बेलायाव :

क) सानै सुबुंहा गोसो-गोरोबनाय एबा महर मोखांनि खौसेथि थायोबोला गावजों गाव बिसिगि आरो बिलोगो खाज्जलायनाय नेम दं बर' समाजाव। राइजो राजाखौ साखि दोननानै थुरसि गुबैयाव गय फाथै जरा थाखा थायनै, फालि गोथार लानानै सोलाय सोल' खालामना, अराय थैस' थांस'नि लोगो गनायना लायो। बे गोथार खामानियाव राइजो-राजाखौ साखि दोननायलाय राइजो-राजानो जौ जरासे होनानै बिसिगि एबा बिलोगो सानैबो खुलुमझांना सन्मान खालामो। बे नेमखौ बर'फ्रा साब्रि सारनाय बुडे।

ख) बुहुम बिखायाव जोनोम मोननाय गासैबो सुबुंहा गावनो नांगौबादि, गाबजिरनो मोननाय बादि बिदा-फंबाय, बिब'-बिनानाव थाजोबा। बे बेलायाव जायफोरा जोनोमाव बिदा-फंबाय, बिब' बिनानाव गैजाया; बैफोर बादि सुबुड समाजनिनो साबजानाय सोरबा सुबुंखौ बिदा-फंबाय, बिब' बिनानाव एबा खायफाया बिमा-बिफाबो लेंज्जलायनाय नेम दं बर' समाजाव। बेबादि लेंज्जलायनायखौ गोदै लेंनाय बुडे बर'आव। बेबादि गोदै लेंज्जलायनाय बेलायाव राइजो राजाखौ साखि दोननानैसो सोमोन्दोखौ जुरिनाय जायो। बे खामानियाव राइजो राजानो सोमोन्दो खाग्राफोरा जौ जरासे होनानै खुलुमझाडे। दाब दाब जायगायाव जौ जरासेजों लोगोसे साहा फिथाबो होनाय नुनो मोनो।

ग) जुलि एबा हाबा : गोथार जुलिनि आयदायाव बर' समाजनि सुबुंफ्रा गोबां आयदायाव जौखौ बाहायनाय नुनो मोनो। जायफोरखौ बर'समाजनि एंगार हायै नेम होनना बुंनो गोनां। (1) हिन्जाव (गोदान) नायनो थांबोला हौवानि बिफा एबा बिगोमाया गइ बेदांसे, फाथै माखासे, गाइखेर थिंख्लि, सिनि थफ्ला, जौ जरासे, सानैसो लोगो लानानै हिन्जाव नखराव आवगाय लाडे। बेबादि हिन्जाव सोहैनाय बेलायाव हिन्जाव लोगोनि राइजो राजानि सिगाडाव गावसोर लांनाय जौ जरासे, गयफाथै जरासे, थाखा थायनैसो बान्थायाव (बाथा) गथायनायनि उनावसो खुगा खेवो गावसोर थांनाय एबा नखराव नुजाहैनायनि थांखिखौ।

2) हिन्जाव नखरजों जेबो रायफोरथि गैया लासिनो हिन्जाव गोदान जागोनखौ लांखा बायब्ला एबा दोनखार लांखाबायब्ला हौवानि बिफा थामहिनबा बिगोमाया सानैसो राइजो, जौ (बथल) जरासे, गइ-फाथै आरो साहा सिनि लानानै हिनजाव नखराव हाजिर जाहैनो गोनां जायो। बेखौ बर' समाजाव दाय मारिनाय एबा दाय सुझाहैनाय बुडे।

3) हिन्जाव गोदान जागोना हौवानि नखराव थांखा बायब्ला बिब्दि हुदाखौ बर'फ्रा हिन्जाव खारसननाय बुडे। बेबादि हिन्जाव खारसननायखौ हिन्जाव नखराव रादाब हैनो थाखाय हौवा नखरा जौ बथल जरासे, गय-फाथै माखासे आरो साहा-सिनिबो लानानै थांनाय नुयो। बेबादिखौ बर'फ्रा खबर हैनाय एबा खबर फैनाय (हिन्जाव नखरथिनिफ्राय) होननाय जायो।

4) दाब दाब जायगायाव हिन्जावखौ नायहैखांनायनि उनावसो फिन खेबसे हिन्जाव नखरसिम थांनानै जुलिनि खालारखौ थिग-थाग खालामनाय नुनो मोनो। बे बेलायावबो जौ जरासे होनानै हिन्जाव लागोनि सानैसो राइजोखौ साखि दोननानै जुलिनि खालारखौ खानाय नुनो मोनो आरो बेखौ खाथा खबर बुडे।

5) खायफा-खायफा गामियाव हिन्जाव गोदान नखराव जुलिनि सायनासालि सिडव राइजो राजानि नोजोरनि गेजेरावनो हौवा गोदाना गाव लांफानाय दाउज्ला दाउ मासे, जौ बथल जरासे, गय फाथै जरासे होनानै बिहाव बिखुनजोखौ खुलुमो। बेनि ओंथिआ जाबाय बिहाव बिखुनजोनाव गावनि हिन्जाव जागोनखौ बिनाय। अबोलासो बिहाव एबा हिन्जाव बिगोमाया हिन्जावसाखौ हौवासानि आखायाव गथायना होयो।

6) गुबुन गुबुन गामियाव हौवासानि नखराव जुलिनि सायना सिडव नखरनि बाथौ मोन्दोब सिगाडव लाबोगोदान हिन्जावखौ लाफाना, खुलुमहोना दाउज्ला-दाउजु जरासे हाथारो। बे दाउ बेदरखौनो जरासे जौजों हिन्जाव गोदान लागोनि आफादाव (सायना मोखां) जिरायनाय हिन्जावनि बिगोमा मोननो लोंहोनाय-जाहोनाय नुनो मोनो। बे नेमखौ साब्रि जानाय बुडे।

7) दाब दाब गामियाव नुनो मोनो खायफाया जुलि खालिनो, खायफाया जुलिनि उनावसो हिन्जाव बिफानाव निरिख बस'हैयो। बे निरिख बसनाय नेमआवबो जौ जरासे, गय फाथै जरासे, थाखा थायनै आरो गोथार फालि गानै बान्थायाव होना हिन्जावनि बिमा-बिफाखौ खुलुमना सन्मान खालामो। बै साननिफ्रायनो हिन्जाव गोदानखौ फुरायै हौवा गोदाना मोननायनि मोनथायखौ मोनो।

9) बर' समाजनि दाब दाब गामिफोराव जुलि नखरनो सहाय-सारथि हिसाबै गामिनि गासै नखरा मैगं थायगंजों लोगोसे जौ फिथाइ थायसे एबा बथल जौ गनै हैनाय नुनो मोनो हाबाखालिनि उन-सिगां सानाव।

10) गोदोनि गेवलां जुलियाव सायनासालि सिडावनो दै फुदुंना गामिनि सानै राइजोआ दाबखा राजाखौ फिथेनाय (सिरनाय) नुनो मोनो। आरो बै जौखौ सायनासालि सिडाव जिरायनाय राइजो-राजा, आलासि फोरनो थालिरनि दनायाव रानना होयो।

11) गेवलां जुलि खालि ओंखाम संग्रा फोरनो गय-फाथै माखासे, थाखा थायनै आरो सोबग्रा-जाग्रा थांखु-सिगारेट गथायना होखायो हाबा नखरा। आरो राइजो राजानो ओंखाम जाहोखांना मोनायाव संग्राफोरनो जौ फिथाय थायसे आलादायै होनाय नुनो मोनो।

12) दाब दाब गामिनि हाबाथिलिआव बेन्ड दामग्रा फोरनोबो आलादायै जौ फिथाय थायसे एबा जौ बथल गनै होखानाय नुयो।

13) गेवलां जुलिनि अखानायै खामानि दामानि मावग्रा फोरनो, आलासि-खुरमाफोरनो गामिनि राइजो-नखरा हैनाय जौखौ लोनो होनाय जायो। लोडै जायै उनावसो बिसोरो सायना सिफायो।

14) दै रोगाग्रा सिख्लाफोरनो गाव गाव गामिनि खान्थिमथै माखासे रां, गय-फाथै आरो जौ जरासे होनानै हौवा-हिन्जाव गोदाना खुलुमस्राडे आरो बिसोरनाव निमाहा बिनानै बिसोरखौ जुलि नखरा बिदाइ होयो।

15) आथिमंगल सिफायनो थांनाय समावबो दाबदाब गामियाव हौवा-हिन्जाव गोदाना गय-फाथैजों, जौ जरासे होथारनांगौ सिख्ला लोगोनो। आरोबाव गामिनि नेमबादियै राइजो-राजा, ज' जाफैनाय गथ' गाथाय फोरनो साहा-मुरि होनायबो नुयो हौवा गोदाननि आखायजों। आरोबाव लेंहर जानाय गोजाननि बाय-बाहागिफोर थाफैब्लाथ' जौवै बेदैरै फिसा हाबायानो जाबावो।

16) हरखाब हिन्जाव सासेआ खारसनफैनाय, खावना लाबोनाय थामहिनबा हरखाबै सेंग्रा-सिख्लाखौ फिसा-फिसौ जुलि होनांगौ जायोबोला हाथासुनि हाबा एवा हाथासुनि खुरनायजोंनो फोजोबनाय जायो। बे हाबायाव जेबो रंजा बाजा गैया। बेयाव खालि जौ जरासे, दाउ जरासे होनानै सानैसो राइजोखौ साखि दोनना ओंखाम बोथिसे जाहोब्लानो जाबाय। गोसो जाबोला बै लिंजानाय हौवानि सेंग्रा लोगोफ्रा दाबिनानै जौ सेरेब लोनाय नुनो मोनो।

2. मोदाइ-दावदाइ सिबिनाय बेलायाव :

बर' समाजाव गोबां रोखोमनि मोदाइ-दावदाइ सिबिनाय जायो। बैफोरनि गोबां मोदाइनो नखरा एबा राइजो राजाया जौ बाउनाय नुनो मोनो। बेनि अनगायैबो मोदाइ मोन्थोर रायसनग्रा थामहिनबा देउरिनो जौ होनानै खायफा

नखरा निदाननिफ्राय बारग' हागोननि मोन्दांथि सोमजिनायजों लोगोसे देउरिनिसिम मावनांगौ खामानि खौ फोजोबनाय बादि मोनो।

क) बोलि बाथौ सिबियारिफ्रा बाथौ मोन्दोबनि सोरबा सासे मोदाइनो जौ अफ्रि (बिगाब) बाउफानानै मोदाइखौ सिबिनाय नुयो। लोगोसे ओंखाम संग्रा ननि खनायावबो दाउ मासेजों जौ थायसे बाउना मोदाइ सिबिनाय जायो।

ख) दैन मोदाइ, हाग्रानि मोदाइ, बारि खनानि मोदाइ फोरनो खायफानि समाजाव सोरबा सिबियारि नखरा जौजों लोगोसे गाजि-प्रसाद, बिबार, बिबारमाला दाउ एबा दाउदै बाउनाय नुनो मोनो।

ग) खेराइ सिबिनाय बेलायावबो खायफा खायफा मोदाइनि मुडै गामिनि गासै राइजो राजाया जौ बाउनायजों लोगोसे गाव-गावसोरबो लोडे गरदसेब्लाबो।

घ) नखरनि गेदेमा सुबुड बोराइ-बुरैया थैना थांबायब्ला बिसिनि मुडै मागो-बैसागो दमासि आरो गुबुन गुबुन फोरबोफ्राव जौजों लोगोसे फिथा-सौराय बाउनाय जायो। बे बाउनायखौ गोथिसि (गिथि) बाउनाय बुडे। बर'फ्रा फोथायनाय दंदि थैना थांनाय सुबुंनि सोलेरा दाउखा-सिला जानानै नखरखौ नायलांफैयो आरो गोथिसि बाउनायखौ जालांफैयो।

ङ) सिबराय (सिव फुजा) फोरबोआथ' फेनायनिनो फोरबो होनना सिबिग्राफ्रा बुडे। बे फोरबोआव थां-गान्जा, घतुवानि अनगायैबो मैखोमै जौ बाउनायजों लोगोसे लौंनाय जायो। फेनाय बेसाद लौंनायजानायानो बे फोरबोनि गाहाइ बिथा।

च) बर' समाजनि बांसिनानो आबादखौ थांना थानायनि लामा हिसाबै मोन्दों। बेनिखाय कार्तिक गासा साउनानै लोखि माइनाव बरायनाय, लोखि फुजा फोरबो फालिनाय नुनो मोनो। बे फोरबोआव दाब दाब जायगानि सिबियारि फोरा मोदाइ एबा लोखि माइनावखौ बाउखांनानै जौ लौंनाय नुनो मोनो।

छ) आमथि सुवा फोरबोआवबो बिमा कामाख्यानि मुडै फिथाइ सामथाइ बाउखांनानै सिबियारि एबा सिबिनाय नखर, राइजोफ्रा जौ लौंनाय नुनो मोनो बर'नि समाजाव।

3. रंजाथाय फोरबो एबा आयदायाव :

क) गामिनि बर' मानसिफ्रा आबादारि जानायलाय दुब्लिनि आबादनि सायावनो थांना थायो। फुस दानाव गामियारि मानसिफ्रा गाव गावनि आबाद

थिलिनिफ्राय माइ-सबाय बाइदि बेसादखौ बुथुमना लाग'नो हायो। बेनिखाय मागो फोरबोखौ बर'फोरा जानाय लोंनायनिनो रंजाथाय हिसाबै फालियो। बे फोरबोयाव गामिनि गासै नखरानो गाव मावनाय आबाद-फिथाइनि नेरसोन दिन्थिना फिथा-सौरायनि अनगायैबो जौ लोंहोयो राइजो राजानो।

ख) गामिनि आबादारिफोरा बैसाग दाननिफ्राय दुब्ब्लिनि खामानियाव ओंखार लांनो थाग थियारि जायो; जान्जि खाफ्रायो। दुब्ब्लियाव ओंखार लांनायनि सिगां रंजाना लाखानोबो साग्रिद जायो। बेनिखाय बे दाननि गिबि सानथिं रंजाथाय फालिनायखौनो रंजालि बैसागो (बैसागु) बुंनाय जायो। बे फोरबोआव राइजो राजाया गासै नखराव हाबै-हाबै बोसोरसेनि थाखाय गाहाम अनसायनाय, बोर होलाडे नखरखौ। राइजो राजानि बे बादि बोर आरो गाहाम (अनसायनायखौ मोननानै नखरा जोबोद गोजोनग्लायो आरो राइजो-राजानो जौ जरासे, (थायसे) गय-फाथै आरो फैसा इसे गथायो साबायखर हिसाबै।

ग) दाब दाब जायगायाव बर'फोरा खालि फुजा, दिवालि, फोरबोखौ जौ बेदर जानानैसो रंजाथाय फालिनाय नुनो मोनो। खायफा बादियाथ' बेखौ बेदर-जौनिनो फोरबो होननाबो बुडे।

घ) ओंखाम गोरलै फोरबोखौ गामिनि बर' आबादारिफ्रा गाजा-गोमजा फालिनाय नुनो मोनो। बेयाव मायरं गोरलैनि जौजों मायरं गोरलैनि ओंखाम खब'से जाहोयो गामिनि राइजो एबा मोसौ लाउखार फोरनो। बे फोरबोआव जौनि मासिया गोजौ आरो गेरेमसा महर मोनो।

4. साउरि बादालियाव :

क) गामिनि आबादारि जानायलाय बर' समाजनि मानसि फोरा बोथोरजों लोगोसे गासै खामानिखौ मावलांनो गोनां जायो। खायफा एरवुथा (नखराव रावबो गोयै) मानसिफ्रा (हौवा) हाल एवनाय, खोथिआ फुनाय, माइ हानाय, नारा हानाय साउरि एबा गाथा (फाला) जालायग्रा नेम दं। बेबादि साउरि-गाथायाव खायफाया दुब्ब्लियावनो आरो खायफाया खामानि फोजोबना नआव जौ लोंनाय, ओंखाम जालायनाय नेम दंखायो बर' समाजाव।

ख) सम सब्ला, गासै बोसोरावनो न ओलाबनाय, हा खोनाय-जावनाय, बन सिननाय आरो गुबुन गुबुन खामानिनि फाला बदल साउरि जालायो बर' समाजनि मानसिफोरा। बेफोर बादि साउरिआव साउरि नखरनिफ्राय जौ लोंनाय नेम दंखायो बर'फोरनि गेजेराव।

घ) गामिनि बर' आइजोफोराबो माइ गायनाय, खोथिआ फुनाय फाला बदल खालामज्जायो। बिदिखौ आवाइ लायनाय बुडे। सि थोरनाय, खोथिआ फुनाय आवाइ फोराव साहा-सिनिजों सोलियो नाथाय माइ गायनाय आवायाव दाब दाब गामियाव जौ लोज्जायनाय नेम दं।

5. गुबुन समाजारि खामानिआव :

क) बर'फोरा गथ' गोरलै जोनोम जाबोला खाथि नखरनि बुरैसा आइजोखौ लेंनानै गथ'नि नारि (उथुमै) हाहोयो। बे नारि हाग्रा आइजोखौ बिजिनि बुरै बुंनाय जायो। नखरा गथ'नि उथुमैआ सिरि खांनायनि उनाव, गोदान मानसि नखराव मोननायनि खुसिजों बिजिनि बुरै आरो लोगो लेवा सानैसो बुरै फोरखौ जौ थायसे लोंहोयो, ओंखाम बोथिसे जाहोयो। बे खामानिखौ दै सारनाय ओंखाम एबा बुरैफोर रायनाय बुडे।

ख) खायफा जुलि जालांनाय आइजोआ गावनि बिमा-बिफा, बिमाय, बिबै-बिबौ एबा गावखौ फेदेरनाय, सोमोन्दो गोनां सोरबा मानसिनो अमा जाहोहैनाय नेम दं बर' समाजाव। बिब्दि नेमखौनो अमा जाहोनाय बुडे। बे अमा जाहोनायाव अमा जाहोजाग्रा गामिनि मानसि एबा बाय-बाहागि फोरनो जौ गर'से आरो बेदर खाजि जाहोयो।

ग) सोरनिबा नखराव बेमार-आजारफोर जायोबोला गामिनि बर'मानसि फोरा थोंजों अजा (कबिराज) नो जारा-फुखा खालामहोनाय नुनो मोनो। बेबादि जारा-फुखा खालामनाय अजानो जब्रा नखरा जौ थायसे, दाउ मासे हैनाय नुनो मोनो मान हिसाबै। आरो जुदि जब्राया गोसा थारब्ला बिखौ हर नेग्रा थामहिनबा दांनाय बिलिरनाय खालामग्रा खाथि नखरनि मानसि फोरखौ लेंथुमना जौ लोंहोना ओंखाम बोथिसे जाहोना नै निदानाव मदद मोननायनि साबायखर बाउनाय बर' समाजाव नुनो मोनो।

घ) सोरबा नखराव बाय-बाहागि एबा आलासि फैगोननि रादाब मोनोब्ला आलासिनि मुडै जौ संना दोननाय बर' समाजाव नुखायो। आरो हरखाबै (रादाब गैयाजासै) नुजाफैनाय आलासि, खुरमा बुन्दानो जौ होनो मोनस्लाबाब्ला नखरा आलासिखौ 'राननांबाय, अमासि जाथारबाय बाइदि' बाथ्रा बुंनानै आलासिखौ बिदाइ होनाय नुनो मोनो।

अबोला जों नुनो मोनोदि जौआ गोदोनिफ्राय दिनै सिम बर' समाजाव सुबुंनि बायहाजार खामानियाव बाहाय जाबोदों। बैफोरनिनो खायफा बाहायथिआ

(नेम) आथिखालाव एंगार हायि नेमनि महर लाबाय। सुबुंनि उजि जेननायनिफ्राय थैना थानायनि उनावबो बाहायजानाय खायनोथ' गोदो ABSU नि हांगामायाव (1987-93) V/F आ जौ होबथानाय समाव खायफा बर' बोराइफोरा बुदोंमोन 'जौआ बर'नि थै फिसौफोर; नोंसोर बेखौ माब्लाबाबो फोजोबनो हानाय नडा।'

जौनि मोजां आरो गात्रि बाहागोफोर (गोहोम) :

सासे सुबुंनि जिउआव मोजांजों लोगोसे गात्रि हुदा एबा आखु थाफानाय बादि जौनि गोहोमाबो मोनसेल' (फारसेल') नडा। बेनिनो मोजां बाहागोफोरा एरैबादि— क) जौ बानायनोब्ला गिबियाव नांग्रोग्रौ एमाव (बाखोर)। बे एमावखौ मिथिंगायाव मोननाय माखासे बिफां-लाइफां (मोखाना बिलाइ, खान्थाल बिलाइ, आनारस बिलाइ गोबां) निफ्राय खालामनाय जायो। बैफोर बिफां लाइफांनि बिदैआ सुबुंनि देहायाव आर्युबेदिक मुलैजों समान खामानि होयो। बिनिफ्राय बुंजायोदि जौआ सुबुं देहानि मोनसे रोखोम मुलै बादि।

ख) सुबुंनि जिउवा अराय दुखु दाहाजोंनो बुंफबखानाय। नाथाय जौआ दुखु होखारनो, बावगारहोनो हायो। आरोबाव दुखुनि जायगायाव थरथिंसेब्लाबो गोजोन लाबोना होफैनो हायो। जाउनाव दुखारु मानसिफोरा जौनि मदद लानाय नुनो मोनो।

ग) हुदायाव गफबनाय मानसिफोरनि खर'आव जौआ मोजां साननो हानाय गोहो लाबोना होफैयो। जाहोनाव गिदिर गोलाउ खन्थायगिरि, लिरगिरिफोरा जौ लोंनाय नुनो मोनो।

जिसिबां मोजां गुन थाब्लाबो जौआ गासैनिबो समाजाव, गासैबो सुबुंनि नोजोराव मोजां मुवा हिसाबै गनायना लाजायाखै। बबेखानि जौ लोडि मानसिफ्रा, समाजा जौ लोंग्रा सुबुंखौ एबा जौखौ मुगैनाय, गन्थं हमथेनायसो नुनो मोनो।

जौनि गात्रि बिथिंफोरा जाबाय :

क) जौआ मेगननि नुथाय, खोमानि खोनानाय आरो गोसोनि गोथौ साननो हानाय गोहोखौ खमाय होलाडे। बेनिखाय जौ फेनाय सासे मानसिखौ थब थब बावगारनाय, गोसा गोसा रायज्लायनाय नुनो मोनो।

ख) जौआ सुबुंनि देहाखौ फारफ्रोमथिंनिफ्रायबो लोरबां खालामो। जैरे जौ लोंबाय थाग्रा (मदारु) नि थैनि खारथाया खमायलाडे। बिखा-समप्लखौ अरग्लिनानै केनसार, टि.बि. बायदि बेराम जानाय नुनो मोनो। लोगोसे सुबुंनि जिउवाबो (आयु) खमाय लाडे।

ग) दाब दाब हादरनि टिकेट बुधुमनाय, सना-रुफा एबा रां-दौलद बुधुमनाय बादिनो जौनि हास्थायनाया (Law of Demand) खमाया लासिनो बांलांबायसो थायो। जाहोनाव जौ फेनाय सासे मानसिखौ जौनि हाबिलासखौ थुंगेनाय नुआलासिनो बांलांबाय थानायसो नुयो।

घ) जौ लोनाय हुदायाव गोग्लैनाय सासे मानसिआ मोजां -गाञ्जि बिजिरनो हायै जाहैयो मोनसे समाव। जाउनाव गाञ्जि, नेहाद बाश्रा रायज्जलायनाय एबा खामानि मावनो लानायबो नुनो मोनो जौ लोंग्रा मानसिखौ।

ङ) जौनि गोहोमा लोंग्रा नावल'दि गोग्लैयो बे नड। बिनि नखर, खाथि नखर, समाजआवबो खेंसालिया भाबै गोग्लैयो। आरो बै सुबुं, नखर, समाजनि थासारिखौ गोजोन गैयै खालामो।

च) जौ लोनाय हुदायाव गोग्लैगुबैनाय सासे मानसिया जौ मोनलोडबा थानो हाया जायो। जाउनाव जौ लोंनो थाखाय गावनि हा-हुखौबो फाननानै, बिसि-फिसानि खुगाखौ दोनथ'नानैब्लाबो जौ लोंनो गोनां जानाय नुनो मोनो।

बेल'नड, जौआ बाहायनायनि थाग्थियारि गोयैयाव सुबुं, समाज आरो हारिनि सायाव गोबां खहा लाबोयो जायफोरखौ रायखां थ्रनो हाजोबा।

आबहावा नायनानै :

बर' समाज एबा बर' माहारिनि बाश्रा बुंनो थाडेबोला सरासनम्रायै भारत बर्षनि सोरगिदिं गोसारना थानाय बर' फोरनि बाश्राखौ गोसोखांनो गोनां जायो। नाथाय बे बेलायाव खालि असमनि थागिबिखौल' आसि दिन्थिनाय जाबाय। असमनि थागिबिफ्रा मोनजानाय आबहावाआ गुसु आरो गुदुंद्रायबो नड। नाथाय मानसिनि देहाखौ मोनसे गुदुं जखा लाखिनो जुनैसो खोब गुसु आबहावा गोनां जायगानि मानसिफोरा जौ लोंनो लायो। जैरै कानादा, सुइजारलेन्द, ग्रिनलेन्द फोरबादि बांद्राय गुसु हादोरनि मानसिफोरा देहानि गुदुंथिखौ लाखिनो थाखाय जौ लोंनो गोनां जायो। थिग बेबादिनो जौनि असमनि सोरगिदिं थानाय रायजो, जैरै मेघालय, मनिपुर, मिजुराम, नागालेन्द, अरुणासल, फोरनि मानसिफोराबो देहानि गोनांथिनि थाखाय जौखौ लोंनो गोनां जायो। नाथाय असमनि आबहावाआ गुसु-गुदुंनि गेजेरावनो गोग्लैयो। बेनिखाय असमनि बर'फोरल' नड, गासै हारिनि मानसिफोरानो जौनि गोनांथि थानायखौ नुहरा।

आथिखालनि बर' समाजाव जौनि बाहायथि आरो बिनि गोहोम :

गोदो महात्मा गान्धीनि असहयोग सोमावसारनाय समावनो बर' हारिनिफ्राय खर' दिखानो हानाय कालि चरण ब्रह्म मोननि दैदेनायाव बर' सुबुंखौ जौनिफ्राय जानगारनो एबा जौखौ होबथानाय नुनो मोनो। बिनि उनावबो जौनि गात्रि आदब आरो बाहागोफोरखौ नुनानै माखासे आइजो आफादफ्राबो बाहागो लाबोदोंमोन जौ होबथानाय बेलायाव। बेल' नड फरायसा आफादनि सोमावसारनाय बेलायावबो V/F आ मैखोमै होबथादोंमोन जौखौ। नाथाय जौनि रोदाखौ बुखुना गारनो हायाखिसै दिनैसिम बर' समाजनिफ्राय। थेवबो बेखौ रायखानांगोनदि फरायसा आफादनि हांगामानिफ्राय जौनि बाहायथिखौ गोबां बेलायाव एंगार बोनो हाबाय आंगोथार साननाय माखासे हाबाफारिनिफ्राय। थेवबो बिनि बाहायथिखौ फोजोबनो हायाखै, खायफा बाहायथि आयदाखौ एंगारनो हायाखै, देनांबो हानाय नड जानांगौ।

दानि जोलैनि बर' फोरनि गेजेराव जौनि बाहायथि (खामानि फोरनिफ्राय) खौ होबथानो हाबाय थिग, नाथाय आथिखालाव जौआ ड्रागस्निसो महर लाबाय। दानि बर'फोरा हाबा-हुखायाव जौ लोड थिग, नाथाय गुबुन नखराव थांना जौ गेलेनखौनो रिजार्भ खालामना दोनखानाय नुयो खायफाखौ। मागो बैसागोआव दुलाराय गामिनि राइजो राजाया जौ लोंनो गारबाय नंगौ नाथाय सानैजों साथामजों सेखुना जानाय मा नायनो? बर'नि बायदि फुजा फोर्बोफ्राव जौ बाउनो गारदों नंगौ नाथाय मैहुराव मोनबोनाय ना-बेदरजों जौनि पार्टि जानायखौ नुवालासिनो थाया दानि बर'फोरनि गेजेराव।

गोदोआव सरासनम्रायै बोराइ-बुरैफोरखौसो जौ लोंनाय नुनो मोनोमोन। नाथाय दानि बर' समाजाव इसे उलथा महरसो नुसै। गोलै-गोलै फरायसा आरो सेंग्रा सिख्लाफोरानो बिमा बिफानि मेगनाव हाद्रि सारना जौ-सेरेब बायना लोंनाय नुनो मोनसै। सानैजों साथामजों लोगो नांना जौ बायना लोंनाय, लोगोफोरनि सिगाडव गोबां जौ लोंना 'हौवासा' (पुरुषत्व) नि गोहो दिन्थिनाय फोरखौबो नुआ लासिनो थाया। बेफोरनिफ्रायनो मिथि हादांसैदि जौआ दानि समाजाव द्रागस् बादि साग्लोबनो हमदोंसै। ■

थुनलाइनि महरसे

—भवानि बाग्लारि

भवानि बाग्लारि (1964) : अदालगुरि दिहिनि सासे गागि लिरगिरि। बिथाड
अदालगुरि एम.इ. फरायसालिनि फोरोंगिरि।

मिथिंगानि हाजार धोनखौ लानानै खन्थाइगिरि, राइथायगिरि, थुनलाइगिरि
अंखारि आखायाव कलम दैनानै, रैसुमै राव दैखांनानै मिलौहाब खालामो सुबुंनि
गोसोखौ थाजिम आरो गोजोन। माहारिआरि हारिनि गेजेरावबो दडे सानश्रहायै
रुजुलायनानै खन्थाइ सुंद' मेथाय, जायखौ मिथिंगानि जिउ एबा धोनजों
मानसिया मानसिजों रुजुनानै खनो, जायखौ सुबुड थुनलाइ होन्नानै मख'यो,
जायखौ मानसिया खन्थाइ मेथाय होन्नानै बुडे। जाय समाव ऋसि मुनिफ्रा
भारतनि समायना मिथिंगा रुपआव गब'हाबनानै, बिनि महरगिरि—अबंलावरिनि
सिम साबायखर आर'ज मेथाय खनदोंमोन, अब्लानिफ्राइबो मेथाया सोमजिदोंमोन।
गुबुन फासैं थुनलाइखौ जोनोम होनायसै बे आर'ज मेथायनिफ्रायनो।

हाजार बिजार बोसोर, मुगा आरो जोबलांबाय हाजार बिजार मानसिफ्रा
हाजार बिजाब मेथाय खनलांबाय। खायफा थालांबायबो, खाइफाबा गोमालांबाय,
खायफाबा गोदान गोदान दिहनो गोदान मुगानि गोदान मेथाय, जेराव थायो
सुबुंनि दुखु-सुखु, मिथिंगानि धोन, बार, अखा, हाजो-हाला, दैमा-दैसा दंफां-
लाइफां सान अखाफोर, बेयावनो थुनलायनि आखाय। बे थुनलायानो सुबुं
जाथायनि बान्दार।”

बिब्दिनो मानसिनि खुगायाव बेरखांनाय सुंद' मेथायफोर जैरै—

ओवासिं बारिनि दावसिन फाखाया

गां फारसे गैया, गैया—

गैया गैमारथारा।

दावसिन मासेआ गां फासैं गैयाब्ला बिरनो गिदिंनो बेसेबांबा जाल्ला मोनो,
नायनो साबै मिनिजाथाव गोहोगोलोन्दा जायो। मानसिआबो लोरबां, जेब्ला
बबेबा धोहोन एबा मुवा बेसादनि खहा आरो थोयै जाबोला। बेखौनो मोजां
मोन्नानै रोजाबो मेथाय रन्सायनानै मेथायगिरि रंजासुला रंजासुलिफ्रा मिथिंगानि

समजों गोरोबफानानै रंजाथाव बोथोरफ्राव एबा बबेबा पबर्फ्राव, मानसिनि
गोसोबो सुदेम देमग्लायहोनो, दुखु दाहानिफ्राय बावहावहोनो।

दैमा दैसाया जिरि जिरि
खि खि सामु खिंखिरि,
मुजि होयो, हायना थिनो—
स'नानि जिन्जिरि।

सान्श्रहायै दैमा-दैसानि नेहाद उन्दै साम' खिंखिरिफ्रा गिदिंबायो लिरबाय
बायो हाब्रुनि सायाव गोबां सिनायै हांखो। बिखौनो खनसायोब्ला मोनो हाबायाव
गोनां समाय होनाय, स'नानि समान जिन्जिरि। बेखौनो लानानै नांथाबो फालांगी
जाथाय, देरहानाय जीउ खांनाय राहानि।

जुगुगु जुगुगु नांगोल मुथियाव—
बानानै दावथु गाबदों
सोरनि दिखार नांदों
मानि दाहा रादाब फोसावदों?

दुखु जाल्लायाव आरो, हांमा सुरो, जगमाव आखाय दैयो, उथिस'नो
हायै जिंगायाव माब्लाबा सुबुड। दावथुआबो गाबो खर' थिक्ल-थिक्ल जिंगानि
बिदिन्थि महरै, गुवार फोथार बारियाव, जेराव आबादारिनि दोत्राय नांगोल, थायो
बिहाबो मानिबा दाहा।

बार खोलो-खोलो बारदों
गोसोआबो थाजिम मोन्दों
बैसाग दात्रि बार हुंखायाव
गोसोआ बाग्दाव खांदों।

सोमो नांथाव बे गुवार भुमाव मानसिनि जीउवा अराय गोजोनजों नड,
नाथाय दाहारि। दुखु-सुखुआनो मानसिनि जीउनि लोगो होत्रानै माब्लाबा
रंजानायनि गेजेरजों, सुखुनि गेजेरावनो दुखुआबो नुजाथियो, अब्ला सुबुड
खाफालाव आखाय होनांगौ जायो।

बिदिनो सान्श्रहायै सुंद' खन्थाय महरै रोजाबनाय मेथाय दानो हायो।
गोदोनि आबै आबौ मोना थुनलाय, रायथाय माखौ बुडे मिथियामोनब्लाबो
बिसोर रोंगौमोन मिथिंगानि जीउ-धोनजों सुबुंनि जीउ गोरोबफानाय सुंद'
खन्थाय मेथाय।

थुनलायगिरि, खन्थायगिरि, मेथायगिरि आरो भावथिनागिरिफोरनि मिलौहाब राव आरो देंखो सुजुनायाव बे थुनलाय महरसेनि मेथाय-खन्थाय जौसिन मासिआव जायगा लागोन। जोंनि बर' माहारिनि बिखायावबो आथिखालाव गोबां मेथायगिरि देंखोगिरि, खन्थायगिरिफोर ओंखारबाय नाथाय थेउबो थोजासे नड, गोबां बर' सुबुं सानखोनि गेजेराव सान्त्रहानाय, नुजाथिनाया। अंखारबाय— अंखारगासिनो ओंखार बावगोन, बे फैगोन सरनिफ्राय। अब्लासो गोबां गोबांद्राय थानायखो सिनायथि होनो हागोन। ■

टंलायाव बर' गायेन आरो थियेटारनि गोहोम

—ग'पिन रामसियारी



ग'पिन रामसियारी (1968) : टंलानि सिडव थानाय बटाकुसि गामिआव बिथानि न'. बिथाड पष्ट अफिसआव साखि मावो।

टंला बुडेब्ला आथिखालाव मिथियै रावबो गैला। बियो आसाम हादरनि सिडव थानाय साहा दरंनि मोनसे फालांगि थावनि। टंला नोगोरनि सोरगिदिं बर' गामिफोरा मैखेमै साग्लोबनानै दड'। बबेखानि आथिखालाव नोगोर आवबो बर'फोरा द्लाम जाहैबाय। दा बाइदिआव टंला हालामआव बर'फोरा एवजानोनो थोया होत्रा बुडेब्ला बेयो नंखाय बुंनाय जागोन। बे नोगोरनिनो सिडव थानाय दाब-दाब बर' गामिफोराव गोदो-गोदाय फुजा-फोर्बो, हाबा-खेराय फोराव बर' गायेनफोरा खोब सोलियो मोन। आरो रांनि रादाय खानानै बे गामिनिफ्राइ बै गुबुन गामिआवबो गायेन गाहै लायोमोन। गोदोनि गायेननि भाव बिजाबफोरा दानि बाइदि सामाजिक नडमोन। जारिमिनारी एबा बुरन्जि मुलुकसोमोन। राजा-फोर्जा, सानथ्रि-गोरा गाहाय फोरखौ लानानैसो भावथिनाया जायोमोन। गोदोनि भावथिनाफोरनि जाथायआ बांसिनानो हादोद गाग्लोबनाय आरो हिन्जाव बोनाय। दावहानि हाथियारफोरा कामान, सिलाइ ग'ला बारुद नड। ग'दा आरो थुंग्रिजोंसो दावहा नांनायमोन। गोदो भावथिनाखौ फाल्लाबो बुडेमोन। बटाकुसि गामिआव रुंसारी अस्तात दारि गोजा आरो रुंसारी अस्तात राति गाब्रु बिथामोना 'बिलाम्बर' 'गोथैशाली' आरो आरसि फाल्ला जारिमिनारी भावबिजाबफोरखौ फोरोदोंमोन (1963-65 माइथाय)। इं 1970 माइथायआव रुंसारी अगेन बसुमतारीआ गाव सुजुनाय जारिमिनारी भाव बिजाब 'जयमती' खौ फोरोडे। इं 1978 माइथायआव मुश्री गंगाराम बसुमतारीआ गाड लिरनाय 'कलिजुगनि गोहो' सामाजिक भाव बिजाब फोरोडे। मुश्री ग'पिन रामसियारीनि दैदिनाय

आरो फोरोंनायाव बटाकुसि बिथाराइ स'सिअ' कालसारेल ससाइति Regd. No. 782 (1981-82) आ ब्रै बोसोर फुजा फोर्बोआव दिन्थि थिंग्रा मोनसे नाइजाब आफाद बेखेवओ। सामाजिक भाव बिजाब फोरा फारियै मुश्री ग'पिन रामसियारीनि (1) मायानि अत्राय। मुश्री बलेन गयारीनि (1) खाफालनि लिरनाय। मुश्री बिनुदसिं बर'नि (1) हिरा। आरो गोबां, (1982-85 माइथाय)।

टिकलौसुबा गामिआव इं 1966-67 माइथायआव रुंसारी अस्तात दारि गोजा आरो राति गाबु बिथांमोना (1) औरंजेब (2) हादरनि हांमा (3) दोहोरोमनि हांमा जारिमिनारी भावबिजाबखौ फोरोंदोंमोन। इं 1972 माइथायाव बे गामिनिनो रुंसारी रामसिं बर'आ रैसुमै 'नाइजाब आफाद' मुडै मोनसे गिदिंबायारी टिकेट दान्नाय (Ticket System) थियेटार गायसनो। नाथाय बिथांआ थाम बोसोरल' सालायनानै गाउनि थियेटारखौ थेम सिफायफिनो। बिथांनि थाम बोसोर आव लानाय मुश्री अनान्त बसुमतारी फोरोंनाय सामाजिक भाव बिजाब फोरा जादों फारियै—(1) गिबि बिहामजो (2) सरला (3) निखावरीनि मोदै (4) दिल्लीनि गाद्दी आरो गोबां मोन। इं 1978-80 माइथाय, बेलगुरि गामिनि रुंसारी नबीन बागलारी आ 'ज्ञानदा थियेटार' (नै फैसाली) बोसोरथाम सालायो। बिथांनि थाम बोसोरआव लानाय मुश्री बंसीधर बसुमतारी फोरोंनाय सामाजिक भाव बिजाब फोरा— (1) दासो (2) मिनुआ आंनि आरो गोबां। रुंसारी बागलारीनि उन बोसोर आवनो घिउनाला गामिनि मानाव गेदेत मुश्री पानिराम बर' आ बिफानि मुडै 'लेम बर' थियेटार' गायसनो (1981-85) बिथां आबो बा बोसोरल' दैदिंनानै ज्राब गारो। बबेखानि बिथांनि थियेटारआ बा बोसोर आवनो सदियानिफ्राइ संकस सिम गोबां मुं आरो बाखनाय जादोंमोन होनना बिथांआ फोरमायो। सामाजिक भाव बिजाब फोरा फारियै मुश्री ज'गेन बसुतारीनि (1) गोमोरनाय सिन्दुर (2) रिगुदामसा। मुश्री सेनिराम ब्रह्मनि (1) जीउनि जारिमिन। मुश्री ग'लक ब्रह्मनि (1) ग'साइनि फासि। मुश्री प्रबीन उजीरनि (1) सित्रलेखा। मुश्री नगेन बसुमतारीनि (1) जोमै आरो गोबां मोन। इं 1979 माइथायआव दौदिनिगामिआव मुश्री रबिन्द्र दैमारीनि फोरोंनाय आव रिगुदामसा आफादआ 'बहुमनि सिमां' सामाजिक भाव बिजाबखौ सोलोंदोंमोन। इं 1987 माइथायआव बे गामिनिनो मुश्री खौलाराम बर'आ 'आलाइ खुंग्री मुसुखा थियेटार' गायसनो। दुखुनि बाश्रादि बिथांनि थियेटारखौबो भावथिना मोजां मोनग्रा राइजोफ्रा बांद्राय बोसोर दिन्थिफुनाय नुनो मोनाखिसै।

बिथां लानाय भावबिजाब फोरा जादों फारियै मुश्री ग'पिन रामसियारीनि (1) लब' 87 (2) भावथिना दिन्थिनाया सोर?

मुश्री गंगा राम बसुमतारीनि (1) हादुंग्रा (2) औरैनो लस। मुश्री बावदा दैमारीनि (1) सत-बांसा। मुश्री बिजेन ब्रह्मनि (1) हांमा मिजिं आरो गोबां। जुग्रीपारा, बादली कान्दा, थाराइबारी आरो बगपुरी गामिआवबो बर' गायेननि आगान दड'। बेफोरनि अनगायैबो टंला हालामनि खायसे बर'गामि फोरआव मागो बैसागु फोर्बोआव गायेन, थियेटार सोलोंना दिन्थिनाय गोदोनिफ्राइ दासिम नुनो मोनो। मख'आब्ला जानाय नडादि, दानि बे बादायारि मुगायाव खौरांगासे भावथिनायाबो गायेन आरो थियेटारजों लोगोसे समान है मान दड'सै। मेल, जथुम, बोसोरारी जथुमा, कलेज, फरायसाली सपताह, रंजाली बैसागु खुंथाय हारिमु आयदा फोराव हाबा-फारि महरै लानाय जायो। बेखायनो जों गोग्गाहै बुंनो हायोदि, टंलायाव बर' गायेन आरो थियेटारनि गोहोम आ गोदो-गोदायनिफ्राइनो दड'। आरो इयुनावबो थाबाय थागोन। ■

भारत उदांसि दावहायाव बर' जोहोलावफोर

—लोमस्राउ दैमारी



लोमस्राउ दैमारी (1969) : खैराबारिआव बिथानि जोनोम। दुलाराय बर' फरायसा आफादनि गाहाइ नेहाथारि मासिखौ बिथाडा समायहोखांबाय। आधिखालाव बिथाडा बि.टि.सि.नि इ.एम.।

भारत हादरआ 1947 माइथायनि 14 आगस्ट खालि हरनि 12 बाजि सिम बृटिस राजानि सिडववो दंमोन। हरनि 12 बाजि एसे सिगां बृटिस राजाया भातनि सायाव थानाय गावनि गोहोखौ भारतआरी नौनारीनि आखायाव गथायना होनांनायाव 15 आगस्टनि हरनि से बाजिनिफ्राय थामहिनबा 14 आगस्टनि हरनि से बाजिनिफ्राय भारतआ उदांसि मोनो।

भारत हादरनि उदांसिया सानसे सात्रै एबा बोथोर मोनसे मोत्रैनि गेजेराव एबा गाव हारसिडैनो जानानै फैयाखै। बेखौ बृटिस सरकारा अन्नानैबो होआखै। 1857 माइथायनि सिपाइ बिग्राइखांनायनिफ्राय लाफानानै 1947 माइथायसिम बे गोलाव सम बिग्राइखांनायनि जाउनआवसो बृटिस सरकारआ भारतनो उदांसि होनांगौ जायो। बे गोलाव समनि नारा-नाथा जुजिनायाव रोजा-रोजा भारत आरो नौनारीफोरा गावबा गावनि बेसेन गोसा जीउखौ बाउनो गोनां जादोंमोन। सानस' हायै दावहारुफोरा जोबथेसालियाव थानानै दुखु-दाहा सहाय नाडे, पुलिस, मिलिटारी फोरनि जन्था, थखन आरो सिलायनि गुलियाव लेंग्रा, खाना, खंगा, नोरजिया जानांदोंमोन। खुदिराम, कुशल काँवर, भगत सिं मोनखौ गोदनायाव दौलें होनानै बुथारदोंमोन बृटिस सिपाइफोरा। महात्मा गान्धी, जवाहरलाल नेहरु, मौलाना आबुल कालाम आजाद, डः जाकिर हुसेइन, डः राजेन्द्र प्रसाद, बिजय लक्ष्मी पन्दिता, सरोजिनि नाइडु, बालङ्गाधर लिक मोनबायदि गियानि गेदेमा सुबुं फोरखौबो बृटिसफोरा फाटेक सिडव जोबथेना दोन्दोंमोन। अब्लाबो उदांसिनि दावहाया थाथ' आखिसै। सानफा एफा बारायलाडे, बारानिफ्राय

बारासिन जालांनो हमो। हादरनि उदांश्रीनि थाखाय साफ्रोम्बो भारतआरिआनो थैनोखौबो गया जालांदोंमोन आरो जेलाव थानांनाया गोब्राब बाश्रा नंलिया जानानै फैंदोंमोन। देदसिन गोनांसिन बाश्राया जादोंमोन माबोरै भारत हादरखौ बृटिस सरकारनि आखायनिफ्राय उदांसि खालामनो। 1921 माइथायनिफ्राय महात्मा गान्धिनि सैथो आरो हिंसागैयै (अहिंसा) खान्थिजों सोमाव सारनायाव बृटिस सासन गिरिफोरनि बिखा बिख्लोखौ सोमावग्लुंनायजों लोगोसे बिसोरनि सासनआ थेर-बेथेर जानांदोंमोन। जाउनाव 1947 माइथायनि 15 आगस्टआव बृटिस सरकारा भारतआरिफोरनो उदांसि होनांगौ जायो। फारसेथिडै महात्मा गान्धिनि अहिंसा खान्थिजों सोमावसारदोंब्लाबो माखासे भारतआ सोमावसारग्राफोरा उदांसिनि थाखाय हिंसानि लामाबो लाफा नांगौ जादोंमोन। बंग हादरसानि सुभाष बसुआ महात्मा गान्धीनि अहिंसा खान्थिखौ आजावनो हायैनि जातीय कंग्रेसनिफ्राय ओंखारबोनानै INA (Indian National Army) दायो आरो बृटिस साम्राज्यनि हेंथायै गिखंथाव दावहा जुजिदोंमोन। बिथानि बै “आजाद हिन्दु फौज” आ “दिल्ली चलो” दावहानि हाबाफारिजों बृटिस सासननि बेरेखायै थै-थां दावहा नांदोंमोन आरो बिसोरनि जुजिनायनि फिथायाबो फेलें थाडखैमोन।

बै भारत उदांसि दावहायाव, बर' फोराबो आनज्रायनानै थायाखैमोन। उदांसिनि दावहायाव माखासे बर' जोहोलाव-जोहोलावजो फोराबो थै-थां जुजिदोंमोन। बिसोरनि गेजेराव सानैसोनि मुंखौ मख'नाय जाबाय जाय बिथामोना भारत उदांसिनि थाखाय बृटिसनि हेंथायै जुजिदोंमोन—

ढेकियाजुलिनिफ्राय :

1. मनिराम कसारि
2. रतन कसारि
3. लैरेला कसारि
4. हाबां कसारि आरो

पातासारकुसिनिफ्राय : राउताराम बर'

दुखु नाथाव बाश्रादि बिथामोननि सोमोन्दै भारत उदांसि सोमावसारनाय जारिमिनाव मोजाडै लिरनाय गैया। बेनिखायनो बे रायथाइनि गेजेरजों भारत उदांसिनि सोमावसारनायाव मुंख्लं जालांनाय, साब्रै बर' जोहोलाव फोरनि सुंद' जारिमिनखौ सावरायनाय जाबाय।

मुंख्लं मनि राम कसारि :

मुंख्लं मनिराम कसारिआ 1887 माइथायाव दरं जिल्लानि अरां मौजानि गेलाबिल होत्राय गामियाव जोनोम मोनो। बिथानि बिफानि मुड जथा कसारि। थाखो थामसिम फरायनाय मनिराम कसारिया भारत उदांमि हांगामानि फार्से जोबोरैनो बोदोर जायो आरो जातीय कंग्रेसनि सासे सोद्रोमा जायो। ओनसोलनि लेखारोडि हालुवा-जाम्बाफोरनि गेजेरावबो खावलायदोंमोन कसारि बिथाड। मुंख्लं बिथाड ग'वा आरो नागपुराव जानाय जातिय कंग्रेसनि जुथुम्मायावबो बाहागो लाहैदोंमोन। 1942 माइथायाव बिथाड "मृत्यु बाहिनि" निबो सोद्रोमा जायो। बेनि उनाव सनितपुर (बै समनि दरं) जिल्लानि दाब-दाब जायगायाव थानानै दावहा नांनयनि सोलोफोरखौ सोलोंजाहैदोंमोन आरो राइजो राजानि गेजेराव बेफोरखौ फोरोंनानैबो होदोंमोन। बिब्दिनो बिथाड मोनसे हान्जा लानानै आरो "मावगोन नडबोला थैगोन" (Do or die) मोन्थोरखौ गोसोयाव गद लानानै लासै-लासै आवगाय लाडे 20 सेप्टेम्बरखालि थाम गाबनि फिरफिलाखौ लानानै आखायाव सिगां सिगां डेकियाजुलि पुलिस थानासिम। थांखिया बिसोरनि बे डेकियाजुलि थानायावनो फिरफिला गायसत्राय। आय' एसे अन्थाय बिखा। नायगार नायगार गावथारनयसै मनिराम कसारिखौ बृटिस सिपाइफ्रा। बिब्दिनो बिथाड मावगोन एबा थैगोन मोन्थोरखौ समायलानानै गावनि आगोमा जिउखौ भारत उदांमिनि दावहायाव बाउलांनयसै। बिथाड "42"नि "भारत नागार" (Quit India) सोमावसारनायाव थै-थां बाहागो लादोंमोन।

मुंख्लं रतन कसारि :

सोलोंथाय मोनि बर' बिमानि फिसा रतन कसारिआ हादरनि उदांमिनि थाखाय गाउनि गासैखौबो नागारजोबनानै भारत उदांमिनि सोमावसारनायाव मख'जाथाव भान्डारि होलांदों। दानि सनितपुर जिल्लानि बरगाव मौजानि सिडव थानाय से नं बरफुखुरी गामियाव 1892 माइथायाव मुंख्लं कसारिनि जोनोम जायो। महात्मा गान्धिनि दैदेननायाव भारत उदांमि हांगामानि सासे मोजां दाउहारु आरो माहारिआरि कंग्रेसनि गोखों सोद्रोमामोन। नखरनि बाय हजार आंखालनि गेजेरावबो मुंख्लं रतन कसारिआ माहारिआरि कंग्रेसनि खामानिआव नांथाबनानै थादोंमोन आरो जाइगानि सुबुंफोरनि गेजेराव हाबनानै उदांमिनि बाथा फोरखौ फोर्सोवनानै मानसिफोरनि गोसोखौ दुंखां होदोंमोन। बिथाड महात्मा गान्धिनि देदेननायाव जानाय "भारत नागार सोमावसारनाय (Quit India

Movement) आव जीउयै माहामै बाहागो लादोंमोन। बिनखायनो रतन कसारिया “मृत्यु बाहिनि” आव सासे गोख्रों आरो सांग्रां मावथि बादियै बाहागो लायो आरो हादरनि उदांसिनि थाखाय जायखि जाया खामानिखौनो मावनो आवगाय लाडे। बिथाड दाब-दाब जायगायाव थांनानै दावहानि आदब खायदा फोरखौबो सोलोंजाहैदोंमोन। “42”नि “भारत नागार” सोमावसारनायाव 20 सेप्टेम्बरखालि जेब्ला रोजा-रोजा सुबुंआ भारतनि मोनथाम गावनि फिरफिलाखौ ढेकियाजुलि थानायाव दैखानो फैयो अब्ला मृत्यु बाहिनिनि मावथि फोरा पुलिसनि हातियार फोरखौ सेख'नो नायगिरो आरो बेयावहायनो बृटिस पुलिस आरो मृत्यु बाहिनिनि गेजेराव दसे सम दावहा जालायो। बे समावनो 80 सा आइजो फोरा सानजाथिनिफ्राय फैनानै थानायाव हाबनो नायगिरो बोला 50 सा बृटिस पुलिसफ्रा बिसोरखौ लामायाव बेंथेयो आरो जैरै हागौ एरै बुद्ला-बुसि खालामनानै होस्रां हरनो नाजायो। आयजोफोरनि सायाव बिब्दि अगेन आखु दिन्थिनायाव रतन कसारिआ गंसे लावथि लानानै बृटिस सिपाहि फोरजों दावहा जुरियो। पुलिस फोरा रायजोफोरखौ बुहरोबोला रतन कसारिआ गावनि मोदोमावसो लावथिनि साजाखौ खोख्लैना लादोंमोन आरो अनागारि बृटिस पुलिस फोरनि अत्यासारनि हेंथायै थै-थां जुजिदोंमोन। नाथाय गाव हारसिडै बेसेबां बिब्दि दावहा होबाय थालायखो? जोहोलाव रतन कसारिआ उनाव पुलिसनि गाग्लोबनायाव गावनि आगोमा जिउखौ जायगायावनो बाउनो गोनां जादोंमोन।

मुख्लं लेरेला कसारि :

1920 मायथायाव मुख्लं लेरेला कसारिआ सनितपुर जिल्लानि सिडव थानाय ढेकियाजुलि मौजानि केहेरुखण्डा गामियाव जोनोम मोनो। जातीय कंग्रेसनि सासे गोख्रों सोद्रोमा लेरेला कसारिया 20 सेप्टेम्बर सानखालि भारत उदांसिनि सोमावसारनाय हाबाफारि बायदियै ढेकियाजुलि थानायाव माहारिआरि फिरफिलाखौ बिरहोनो थांनायाव पुलिसफोरजों दावहा नांनानै राइफलनि बेनेतजों नायगार-नायगार सुजानानै गोब्राब जखम खालामजायो आरो जखम जानाय लेरेला कसारिखौ उनावहाय बृटिस पुलिसफोरा हाजतआव लानानै थाडे आरो हाज'तआव फाहामनायनि जेबो राहा लायैआव 25 सेप्टेम्बरखालि हादर अनफावरी लेरेला कसारिआ अरायनि थाखाय जोबथा हां बोयो।


मुंख्लं हाबां कसारि :

मुंख्लुं हाबां कसारिनि न'आ बरगाव मौजानि सेनं बरफुखुरि (गलड) गामियाव जोनोम मोनो। बिथाडबो 20 सेप्टेम्बर खालि डेकियाजुलि थानायाव जेब्ला पुलिसफोरा सोमाव सारग्राफोरनि सायाव गुलि गावो अब्ला जोहोलाव हाबां कसारिनियावबो गुलिया नांफैयो। गुलि नांजानानै न'आवनो नोरजिया देहाखौ लानानै हाबां कसारिआ गोबां सान थांनानै थादोंब्लाबो फाहामनायनि जेबो राहा मोनियाव बिथाडबो अरायनि थाखाय बे संसारखौ नागार लाडे। बिथांखौ नाथाय मुंख्लं फोसावनाय जायाखैमोत्र। उनाव ओनसोलनि मानसिफोरा मोजां रोखोमनि फोरमान दिन्थिनायाव बिथांखौ सरकारानो भारत उदांसि हांगामानि मुंख्लं होत्रानै फोसावनो गोनां जायो।

बे बायदिनो पातासारकुसिनि रावता राम बर' (कसारि) खौबो सासे भारत उदांसि सोमावसारनायनि मुंख्लं होत्रानै जारिमिन बिलायाव मोत्रो हायो। बिथाडबो 1942 माइथायनि "भारत त्याग आन्दोलन" (Quit India Movement) नि समाव पुलिसजों गावथार जानानै गावनि बेसेन गोसा जिउखौ हादरनि उदांसिनि थाखाय दान होलांदोंमोन। मनिशंकर बसुमतारी, नर'पति बसुमतारी बिथां मोनाबो साफा-साफा भारत उदांसि दावहानि दावहारुमोन होत्रानै जो माखासे बिजाबफोराव मोत्रो हायो। बेनि अनगायैबो गोबां बर' फिसाफोरा भारतनि उदांसि सोमावसारनायाव गोबां जीउ खहा, बुख्रोब-सौखुब खालाम जानानै नोरिजया जानांदों। जायखौ जो जारिमिनाव मोत्रो हायाखै। सियान हारिनि जारिमिन लिरगिरिफोरा भारत उदांसि दावहानि बर' जोहोलाव-जोहोलावजोफोरनि मुंखौ दोनखोमानो लानायखौ नुनो मोन्दों। जानो हागौ जारिमिन बुरखांगिरि बिथांमोना गोसो होनानै संदाननो हायोबोला बेफोरनि थार गुमुखौ मोत्रो हागोन आरो जाय फोरखौ संनानै मोन्दों बिसोरखौ दिनै बुरखानानै जारिमिन बिलाइआव सनानि हांखोजों लिरनानै दोत्रांगौ। भारत उदांसि सोमावसारनायाव दि बर' फिसाफोरनि बर' जोहोलाव-जोहोलावजोफोरनि गोबां बिहोमा दड बेयो रोखा। ■

उइलियाम वर्दसवर्थनि खन्थायाव मिथिंगानि सावगारि

—लक्ष्मीकान्त रामसियारि



लक्ष्मीकान्त रामसियारि (1972) : आटेलिया गामिया
बिथांनि जोनोम जायगा। नाथाय आधिखालाव टंलायाव
अरायथा हिसाबै थानो लाबाय।

इंराजी थुनलाइ (English Literature) आव खन्थाइगिरि सिहाबै उइलियाम वर्दसवर्थ (William Wordsworth) खौ जोबोद गोजौ थाखोआव जायगा होनाय जादों। मानोना खन्थाइयाव मिथिंगानि सावगारि एरनानै बिथाड इंराजी थुनलायाव गोदान बारहावा लाबोदोंमोन। मिथिंगाया बिथांनि खन्थाइयाव जोबोद गुवार आरो गोगोम महर मोनो।

सावरायगिरि (Critics) फोरा बुंनो नायगिरोदि Wordsworth आरो Coleridge जों लिरजानाय "Lyrical Ballads" आनो इंराजी थुनलाइआव रोमान्टिक मुगा (Romantic Period) नि जोनोम हायो। 1789 माइथायआव "Lyrical Ballads" खौ सेबखांना दिहुनो। र'मान्टिक मुगानि खन्थाइफोराव बांसिनै नुजानाय आखुथाइफोरा (Characteristic) जाबाय खन्थाइफोराव मिथिंगानि गोबां महर आरो मिथिंगानि जिब-जुनारफोरनि थानाय। Romanticism नि खन्थाइगिरि बादियै बिथाड मिथिंगाखौ गोदान मेगनजों नायनो नाजादोंमोन। बिथांनि खन्थाइआव मिथिंगानि सावगारिया गोबां महरै बेरखांदों। बेखायनो गोजौ थाखोनि सावरायगिरिफोरा बिथांखौ मिथिंगानि गिबिसिन गेदेमा खन्थाइगिरि (First great Poet of nature) होत्रा बुंनो नायगिरो। Romanticism समनिनो आरोबाव सासे गेदेमा खन्थाइगिरि सेलि (Shelley) नि अनगायै गुबुन रमान्टिक खन्थाइगिरि फोरजों उइलियाम वर्दसवर्थ आ गंसे न'सिंआव जिरायनो हाया।

बेनि जाहोना जाबाय बिथाड मिथिंगाखौ (Nature) मोनसे जिउ थानाय जिबि हिसाबै सानो। अदेबानि मिथिंगानिसिम वर्दसवर्थनि बैसो बादियै खन्थाइफोराव बेरखाडे आरो जौगालाडे। सावरायगिरिफोरा बिथानि मिथिंगानि सिम थानाय सननायखौ मोन्थाम थाखोआव रानदों :

- क) थैनि एबा लाइमोननि मुगा,
- ख) इन्द्रियनि मोन्दांथि (Senses) नि मुगा आरो
- ग) सानबोलाउरि (कल्पना) आरो आत्मानि मुगा।

दा जों वर्दसवर्थनि खन्थाइआव बेरखांनाय मिथिंगानि गुबुन-गुबुन महरफोरखौ गोजौआव मख'बोनाय मोनथाम मुगानि बादियै सावरायगोन।

क) थैनि एबा लाइमोननि मुगा : लाइमोन एबा सेंग्रा समआव वर्दसवर्थआ मिथिंगानि सायाव नुजानाय समायना (Beauty) खौसो मोजां मोनदोंमोन। उन्दै समाव बिथाड समायना-रमायना मिथिंगानि गेजेराव देरदोंमोन। बेखायनो गुबुन सरासनस्रा (साधारन) लाइमोन गथ'फोर बादिनो बिथाडबो मिथिंगानि सानि महरखौसो नायनानै जोबोद रंजाखांदोंमोन। सेंग्रा समाव मिथिंगानिसिम वर्दसवर्थनि जा मोजां मोन्नाय दंमोन बे जेब्लाबो आत्मानि मोन्दांथि (Spiritual feeling) एबा गियान (Intellect) जों सोमोन्दो गैयामोन। बिथाड हाजो-हाला, दैमा-दैसा, बिबार बायदिखौ मोजां मोन्दोंमोन मोनसे स्वार्थ लानानैसो। बिथाड हाजो-हालाखौ मोजां मोन्दोंमोन दाड हमनाय फान (फान्दो) सानो थाखाय। दैमा-दैसाखौ मोजां मोन्दोंमोन बोर्सि बोत्रो थाखाय। आरो बिबारखौ मोजां मोन्दोंमोन मोदोमनायनि थाखाय, सानि समायना (Beauty) नि थाखायसो। थामहिनबा वर्दसवर्थनि मिथिंगानिसिम थानाय अन्नाया थार देहाजों सोमोन्दो गोनां (Physical) मोन। सेंग्रा समाव बिथाड मिथिंगानि फागला जाहोनाय महर मुश्रीखौ नायनानैसो रंजादोंमोन। बिथाड लिरदों—

In youth from rock to rock I went,
From hill to hill in discontent
Of pleasure high and turbulent
Most pleased when most uneasy.

(—आंनि गोसोआ जेब्ला जोबोद असान्ति जायो, होनब्ला आं हाजोनिफ्राय हाजोसिम थाबायसिनोमोन। आरो हाजोआ जोबोद असान्ति जाब्लासो आं जोबोद रंजाखांदोंमोन।)

ख) इन्द्रियनि मोन्दांथि मुगा (Age of senses) : बैसोरानाय एबा गेजेर बैसो (Middle-age) नि समाव मिथिंगानिसिम थानाय बिथानि साननाया जोबोद

जौगायो । सेंग्रा समाव थानाय मिथिंगानि फाग्ला जाहोनाय महर मुश्रीखौ मोजां मोन्नाया लासै-लासैनो बिथानि बिखायाव गोमोर लांबाय । बिथानि बैसोआ जेसेबांनो बारा (गोबां) जालांदों, मिथिंगानिफ्राय बिथांआ एसेबांनो गोदै मोन्दांथि (Sweet sensation) खौबो मोननो हमो । मिथिंगानि जायखि-जाया महर आरो सोदोबफोरा बिथांखौ जोबोद रंजा होनो हमबाय । बिथाड—"The Prelude" आव बे सोलायनायखौ फोर्मायाना नै लिरदों—

"The props of my affection were removed,
And yet own spirit ! All that I behold
Was dear, and hence to finer influxes
The mind lay open to a more exact
And close communion".

(—आगोलाव आंनि गोसोआव अन्नाय सोमजिहोनाय मिथिंगानि बे महरफोरा दायो आंखौ रंजा होनो हालिया । नाथाय आं दाबो मिथिंगाखौ जोबोद मोजां मोनो, मानोना मिथिंगायावबो जिउमा (Soul) दड' होन्नानै आं दायो हमदानो हायो । मिथिंगानि गासै महरखौनो आं मोजां मोन्नो हमबाय आरो बेनि थाखायनो आं मिथिंगाखौ आरोबाव गोथौहै बुजिनो हाबाय । आं दायो मिथिंगाजों जोबोद आंगो आरो गोथौ सोमोन्दो फाथिनो अरायबो नागिरो ।) "Tintern Abbey" निफ्राय आं आरोबाव खोन्दोबसे (Quotation) दैखांना होनो नायगिरदों—

"... The sounding cataract
Haunted me like a passion, the fall rock,
The mountain and deep gloomy woods;
Their colour and their forms, were then to me
An appetite ; a feeling and a love".

ग) सानबोलाउरि आरो आत्मा (Soul) नि मुगा : वर्दसवर्थनि उननि जिउआव बिथानि सेंग्रा आरो गेजेर बैसो (Middle age) नि समाव मिथिंगानि सायाव थानाय साननाया (Idea) फरासि जांखिथायनि (Rench Revolution, 1789-1793) उनाव मोनसे जोबोद गोथौ सोलायनाय (Change) फैयो । बिथाड मिथिंगाखौ आबुडै आध्यात्मिक भाबै (Spiritually) बेखेवनो (Interpretation) हमो । वर्दसवर्थनि "Point of View" आव जानाय गिबि सोलायथायखौ 'Nutting' मुनि खन्थाइआव नुनो मोनो । आरो नैबे 'Nutting' खन्थाइआवनो वर्दसवर्थआ मा आबहावाआव मिथिंगानि सायाव थानाय बिथानि

आगोलनि नोजोरा (Point of View) सोलायलांखो, बेखौ बेखेवओ।
वर्दसवर्थआ मिथिंगानि गासै बेसादखोनो आध्यात्मिक (Spiritual) नोजोरजों
नायनो हमो। थामहिनबा बिथाड सानोदि मिथिंगानि गासै बेसादावनो जिउमा
(Soul) थायो। "Tintern Abbey" आव बिथाड लिरदों,—

A spirit, that impels
All thinking thinkings, all objects of all thought
And rolls through all thing

(—मिथिंगाया जाबाय सात्रो हानाय आरो मानसिया सिनाय हानाय गासै
बेसादखौनो उतसा थुलुंगा होनो हानाय मोनसे जिउसा (spirit) आरो जिउमाया
गासै बेसादआवनो थायो।) बिथाड सात्रो हमोदि मिथिंगाया जाबाय आनान
गसाइ आरो आनान गसाइआनो जाबाय मिथिंगा। थामहिनबा बिथाड मिथिंगा
एबा आनान गसाइनि गेजेराव जेबो रोखोमनि फारागथि दड' होत्रा साना। बेबादि
सानथौ (दर्शन) खौ इंराजीआव Pantheism' बुंनाय जायो। Pantheism नि
मदद (Support) खालामग्राफोरा सानोदि आनान गसाइ (God) आरो मिथिंगा
(Nature) नि गेजेराव थानाय नेम-खान्थिफोरा थार आरो रोखोमसे। वर्दसवर्थआ
साननो हमोदि मिथिंगाया जाबाय आनान गसाइनिनो देहायारि (Physical)
महर। 'Tintern Abbey' आव बिथाड लिरदों—

"I have felt
A presence that disturb me with the joy
Of elevated thoughts; a sense sublime
Of something far more deeply interfused
Whose dwelling is the light of the setting sun
And the round ocean and the living air
And the blue sky, and the mind of man;"

वर्दसवर्थआरि मिथिंगानि गासै बेसादआनो जिउ दड' होत्रा सानो बेखौ
जों मोजांहे हमनो हायो, जेब्ला बिथाड लिरों—

"To every natural form, rock, fruit or flower
Even the loose stones that cover the high way
I gave a moral life, I saw them feel".

(—मिथिंगानि गासै महरखौनो, नांगौब्ला बे गोरा हायानो जाथों, एबा
फिथाइआनो जाथों, एबा बिबारानो जाथों, एबा राजा लामायाव (High Way)
होनाय फिसा-फिसा अन्थायानो जाथों, आं बेफोरखौ गाहाम-हामा (मोजां-

गाज्रि) सान्रो हानाय जिब होत्रानै सानो। आं बिसोरखौ सुखु-दुखु खालामनाय नुनो मोनो।)

फरासि जांख्रिथाय (French Revolution, 1789-1793) नि समाव सुबुं माहारिया सैनांनाय दुखु हादाफोरखौ नुनानै बिथानि मेगना गेवो। मानोना बिथाड फोरजाफोरनि (Common people) गोहो आरो मान (Dignity) खौ बै जांख्रिथायनि गेजेरजों हमदानो हायो। फरासि जांख्रिथायनि उनाव बिथाड मिथिंगानिसिम थानाय मोजां मोत्रायखौ सुबुं माहारिनि (Human being) सिम थानाय अत्रायजों खौसे खालामो। दायो बिथाड मिथिंगायाव खोनानो मोनो, "Tintern Abbey" आव बुंनाय बादि—

"The still sad music of humanity".

Romantism मुगानि मिथिंगानि खन्थायगिरिफोरा जेरै—कलेरिज (coleridge), बायरन (Byron), किटस् (Keats) मोनजों वर्दसवर्थनि गोरोबनाय मैयिनि जाहोना जाबाय बिथाड मिथिंगानि सानि महरखौनो एसेबां गोसो होआखैमोन, जेसेबां होदोंमोन बिथाड मिथिंगानि सिंनि गुनखौ। बिथानि मेगनाव मिथिंगाया नुजाथियो खान्थि (Law) आरो गोहो (Impulse) हिसाबै। अदेबानि सासे मानसिआ थांना थानो नायगिरोब्ला मिथिंगानि नेम (Rule) खौ मानिथारनांगोन आरो जिउआव थांना थानो नायगिरोब्ला मिथिंगानिफ्राय थुलुंगा एबा प्रेरना (Inspiration) मोनथार नांगोन।

आरोबाव वर्दसवर्थआ सान्दोंमोन—बिनिखुइबो साबसिन सोलोंथाइ (Education) नि बिजोंआ (Medium) जाबाय मिथिंगा। "The Prelude" आव बिथाड बुंदों— मिथिंगाया जाबाय बिथानि 'गिबिसिन आरो गेदेरसिन फोरोंगिरि' (First and Greatest teacher)। बिथानि जिउखौरांबादि एबा Autobiographical खन्थाइ 'Prelude' आव मिथिंगाखौ जोबोर गोजौ थाखोनि बिमा-बिफा आरो फोरोंगिरि बादियै दिन्थियो। माखौ गिनांगौ अरो माखौ गिनाड, माब्ला रंजानांगौ आरो माब्ला रंजा नाड बेफोरनि सोमोन्दै मिथिंगाया वर्दसवर्थखौ उन्दैआवनो सोलोंहोयो। मिथिंगाया मा बाइदि वर्दसवर्थखौ गाज्रि खामानियाव जायगा (आस्रय) होनायाव हेंथा होदोंमोन एबा 'अपराध प्रबनता' (Delinquency) निफ्राय बिथांखौ बासायदोंमोन, बिफोरनि गोबां बिदिन्थि (Example) बिथाड 'Prelude' आव होदो एरैबादि—

"I heard among the solitary hills

Low breathings coming after me, and sounds

Of undistinguishable motion steps,

Almost as silent as the turf they trod".

(—आं जेबोला निजोम हाजोआव थाबायथिडे होनब्ला आं मिथिंगाखौ लासै-लासैनो हां बोनानै आंनि उन-उन फैबाय थानाय खोनानो मोनो।) थामहिनबा खन्थाइगिरिया बेखौनो बुंनो नायगिरदोंदि बिथांखौ मिथिंगाया दैदेनगिरि (Guide) बादियै मदद खालामदों।

"The Tables Turned" मुंनि खन्थाइयाव वर्दसवर्थआ बिथांनि सासे बिजाब फरायनो मोजां मोनग्रा अदेबानि बिजाब-एमफौ (Book-worm) लोगोखौ बिजाब फरायबाय थानाय हुदाखौ गारनो खावलायो। बिथाड लोगोखौ मिथिंगानि खाथियाव थानो खावलायो। मानोना माखासे पन्डितफोराबो (Scholars) सासे मानसिनिआव एसेबां मोजां-गाज्जिनि आखु-सोलोंथाइ एबा Moral Lesson होनो हाया, जेसेबां बैसागु बोथोरनि दंफां-लाइफांनि बारि-बागाना होयो। बिथाड लिरदों—

"One impulse from a vernal wood
May teach you more of man,
of moral, evil and of good,
Than all the sages can".

(—बैसागु बोथोरनि दंफां-लाइफांनिफ्राय मोननाय मोनसे थुलुंगा आरो नोंथांखौ गाहाम-हामैनि सोमोन्द जेसेबां गियान होनो हायो, एसेबां गासै ऋषि-मुनियाबो होनो हाया।)

वर्दसवर्थनि खन्थायाव आरोबाव मिथिंगाया मोनसे समायना महरै नुजा हैयो। बे जाबाय बेराम फाहामनो हानाय गोहो एबा Healing Power, नाथाय वर्दसवर्थआ बुंदों—मिथिंगानि बे गुनखौ फिन सानखानानै (Realise-खालामनानै) नायोब्ला सासे मानसिया मिथिंगाजों spiritually सोमोन्दो लाखिनो नाजा नांगौ आरो मिथिंगाजों बे spiritual सोमोन्दोआ सम्भव जागोन होनब्लासो जेब्ला मानसिनि जिउमाया मिथिंगानि जिउमाजों खौसे जागोन। वर्दसवर्थआ बुंदोंदि बिथाड मिथिंगानि दद्र आखुनिफ्राय मोननै बेसाद मोन्दों, जेरै—हाबा मावनायनि थुलुंगा आरो गोसोनि दुखु फोजबस्रानाय मुलि। बिथाड 'Tintern Abbey' आव लिरदों—

"I will remember that those very plumes
Those weeds and te high spear-grass on that wall,
By mist and silent rain-drops silvered o'er,

As once I passed, into my heart conveyed
 So still image of tranquility
 So calm and still, and looked so beautiful
 Amid the uneasy thoughts which filled my mind,
 That what we feel of sorrow and despair
 From ruin and from change, and all the grief
 That passing shows of Being leave behind,
 Appeared an idle dream".

वर्दसवर्थआ मिथिंगाख्रौ जेब्लाबो सिलिंखार जाहोग्रा (Distroyer) बादियै दिन्थियाखै। बिथाड जाबाय Peace एबा सान्तिनि मददगिरि (Supporter)। बेखायनोसोदां, बिथानि खन्थायाव सोद्रोम (Polite), गोजोन आरो मिनिबाय थानाय मिथिंगाख्रौ जों नुनोमोनो।

'The silence that is in the starry sky
 The sleep that is among the lonely hill'.

—बेखायनो जों बिथानि साननायख्रौ 'एकपक्षीय' एबा One-sided होत्रा बुंनो हाया।

बेफोर जियानो जायाथों, इंराजी थुनलाइआव थानाय मिथिंगा-खन्थाइगिरि (Nature-Poets) फोरनि गेजेराव बिथाड बयनिख्रुइबो गोजौआव जिरायना दड'। मानोना बिथाडनो मिथिंगाजों सुबुंमाहारिनि सोमोन्दोख्रौ जोबोद गोहो-गोनां आरो मानिनोगोनां महरै गिबिसिन दिन्थियो।

जोबोद गोजौ थाखोनि मिथिंगा-खन्थाइगिरि बिथां उइलियाम वर्दसवर्थ (William Wordsworth) नि जोनोमा जादोंमोन लण्डननि साखाथिनि जायगा क'कारमाउथ (Cockermouth) आव इं 1770 माइथायनि 7 एप्रिल अक्तआव। वर्दसवर्थनि दाइन बोसोर बैसोआव बिमा आत्रे (Anne) आरो जिब्रै बोसोर बैसोआव बिफा जन वर्दसवर्थ (John Wordsworth) आ जिउ गोमायो। उन्दै समआव वर्दसवर्थआ जोबोद रागा गोसा आखुनिमोन। ■

मुलुगनांआरि सोमोन्दोआव थामथि मुलुग

(The Third World and International Relations)

—चण्डी राम बर'



चण्डी राम बर' (1976) : टंलानि सानजाहा पुरन्दियानि बेंखनाव थानाय बैग्रिबारि (बगरीबारी) गामियाव बिथाड जोनोम मोन्दोंमोन। बिथाड सासे फोरोंगिरि।

मुलुगनाड खान्थिआव हादोरनि राजखान्थि, रांखान्थि, उद्य'ग आदर्श, सोरखारनि खान्थिफोरखौ नायनानै मुलुगखौ गुबैयै मोनथाम बाहागोआव बोखावनाय जायो। जैरै—सेथि मुलुग, नैथि मुलुग आरो थामथि मुलुग। खान्थिनि आदर्शखौ फोथायग्रा आमेरिका हादोरनि दैदेननायाव साहा आमेरिका हादोर आरो सोनाब इउर'पनि फोरजाखान्थिआरि हादोरफोरखौ ज'थै सेथि मुलुग बुंनाय जायो। बिसोरो रांखान्थि आयदाफारि आरो उद्य'गाव धोनि। बेनिखायनो बिसोरखौ "जौगानाय हादोर" (Development Country) एबा धोनिबाद (Capitalist) बुंनाय जायो। बिसोरो "Private enterprise" खौ फोथायो। ओरैहाय स'भियेट रासिया आरो सानजा इउर'प हादोरफोरनि ज'थायखौनो नैथि मुलुग बुंनाय जायो। बिसोरो "समाजबाद" (Socialist) खान्थिखौ फोथायो। आरो अराइसम "Capitalist" फोरनि हेंथा। बेरा फारसेथिं एसिया, आफ्रिका आरो लेटिन आमेरिकानि जौगायि आरो जौगाहां हादोर माखासेनि जथायानो जाबाय थामथि मुलुग। बिसोरो रांखान्थि, उद्य'ग बायदिनि बेलायाव जौगायि। मख' जाबावोदि H.C. Law आरो J. H. Howe बायदि रांखान्थिआरि गोरों गोरा फोरनि बादिब्ला दा मोनसे ब्रैथि (Fourth World) मुलुग सायख'ना दिहुन्राय जाबाओ। थामथि मुलुगनिखुइ गोग्लैसोफिन्नाय हादोर माखासेखौ लानानै ब्रैथि मुलुगाव हादोरारि आफाद (U.N.O.) आ गासै गं 42 हादोर सायखनानै दिहुनदों। बेफोरनि गेजेराव दड' आफगानिस्थान, बांलादेश, भुटान, घाना, इथ'पिया बाइदि बाइदि।

थामथि मुलुग :

उद्य'ग जांख्रिखांनायनि उनाव मुलुगनि गोग्लैसोनाय ओनसोल जैरै— एसिया, आफ्रिका आरो लेटिन आमेरिका हादोरफोराव इउर'पनि गोबां हादरा फामु जाफैदोंमोन। बै हादोर माखासेखौ बिसोरो उद्य'ग गाहाइ हादर हिसाबै गायसत्रायनिखुइ आबाद गाहाइ हिसाबैसो लाखिदोंमोन। नैथि मुलुग दावहानि उननिफ्रायसो फामु जानाय खान्थिआ जोबनो हमो। एसिया, आफ्रिकानि हादोरफोरा गंसेनि उनाव गंसे उदांश्री मोनो। बिदि उदांश्री मोन्नाय ज'थायखौनो बुंनो थाडोब्ला थामथि मुलुग बुंनाय जायो। बे हादोरफोरा खोलानि बुहुम-दुलुरखाव (Southern Hemisphere) बाहागो एसिया, आफ्रिका आरो लेटिन आमेरिकायाव दड'। उनाव स'भियेट बेंखन (orbit) आव थानाय जैरै— अलबेनिया, जुग'स्लेभिया (Yugoslavia), र'मानिया (Romania) आरो किउबा हादोरफोराबो थामथि मुलुगाव जायगा मोनो। बेफोरबायदिनो फामुजों जेब्लाबो सासन खालाम जायि इउर'पियान हादोर नडै गंनैसो हादोरफोराबो थामथि मुलुग हादोरफोराव गोग्लैदों। थामथि मुलुगाव जों गाहाइ मोनथाम आखुथाय नुनो मोनो। गिबिआवनो बे हादोरफोरनि गासैबो हादोरानो थोंजों एबा खेंसालिया सामराज्यबादि हादोरफोरनि सिडव दड'मोन। नैथिआव बे हादोरफोरा एसिया, आफ्रिका आरो लेटिन आमेरिकायाव दड'मोन। थामथिआव बे हादोरफोरा मिलिटारि, रां-खान्थिआरि बायदि बायदि बिथिडव गोग्लैसोनायमोन। थामथि मुलुगनि हादोरफोरा रांखान्थिआव जौगायिआनो बिसोरनि मोनसे गुबै आखु।

थामथि मुलुगनि आखल :

1. थामथि मुलुगनि गोबां हादरफोरा बिसोरनि एखुथा समाज-रांखान्थिखौ बिथा खालामना गावसोरनि आदर्शफोरा थुलुंगा खांनाय। बेफोरनि मादाव न्याय, समानथि, राजखान्थि आरो रांखान्थिआव उदांश्री, modernisation, industrialization, समाजबाद बाइदि बाइदि गाहाइ खान्थिफोरखौ रोखाहै नुनोमोनो। बिसोरनि जेंनाफोरा एखे रोखोमनिब्लाबो बे हादोरफोरा एखे राजखान्थिआरि आदर्शजों थुलुंगा खांनाय नड।

2. थामथि मुलुगनि हादोरफोरा गोहो थुबुरनिफ्राय गोजानाव थायो। धोनि खान्थिआरि आमेरिका जुथुम हादरनि दैदेननायाव मोनसे गोहो थुबुर आरो साम्राज्यबादि स'भियेट रासियानि दैदेननायाव गुबुन मोनसे गोहो थुबुर जादों। बे मोननै गोहो थुबुरनि मोनसेआवबो लोबबा लायालासे मोननैजोंबो मोजां सोमोन्दो लाखिनानै गावसोरनि हारिमानि स्वार्थ आबुं खालामनो नाजायो।

3. थामथि मुलुगनि हादोरफोरा ग'ष्ठी निर'पेक्ष खान्थिखौ फोथायो। बिसोरो फामुआरि खान्थि आरो गुसु दावहा (Cold War) खौ हेंथा होयो। बहुमाव गोजोन थासारि गायसननायानो बिसोरनि गाहाइ थांखि। दावहा नांलाय-खमलायजों फोजोबा लाबानो सावरायना आरो गेजेराव हाबख'नानै हादोरफोरनि गेजेराव नुजाथिनाय गोसो-गोरोबलायैखौ फोजोबनो नाजायो। बिसोरो आरो गोरोबलायनानै थानायाव बोलो होयो।

4. थामथि मुलुगनि हादोरफोरा साम्राज्यबादी खान्थिखौ गोखों हेंथा होयो। मुलुगाव साम्राज्यबादी सोबख'नायखौ बन्द' खालामनाया बिसोरनि गुबै थांखि। बे हादोरफोरा हारि गोरोबै खान्थिनिबो हेंथा होयो। बिसोरो मिलिटारि, रांखान्थिआरि बायदि आयदायाव बोलो गैयैनि खाबु लानानै साम्राज्यबादी हादोरफोरा जाहाथे बिसोरखौ गावसोरनि सिडव लाखिनो हाया बिनि थाखाय थामथि मुलुगनि हादोरफोरा जेब्लाबो थियारि जानानै थायो। बिनिखायनो थामथि मुलुगनि हादोरफोरा खौसे जानानै हादोरारि आफादनि हेफाजाबजों गावसोरनि राजखान्थिआरि उदांश्री आरो हादर बोखावनायखौ रैखा खालामनो थाखाय नाजाबाय थायो।

5. थामथि मुलुगनि हादोरफोरा ज'यै ग'ष्ठी निर'पेक्ष आफादाव थादोंब्लाबो गावसोरजों गावसोर एबा बेजों बे गोबां नांज्लायनायखौबो नुनो मोनो। जैरै—भारत आरो पाकिस्तान, भारत आरो साइना, इजिप्त आरो इयामा, नाइजिरा आरो कंगु बाइदिनि गेजेराव सिमाखौ लाना नांज्लायनाय नुनो मोनो। जाथिखौ लानानैबो जैरै इरान आरो भियेटनाम आरो कुम्बोदिया बाइदिनि गेजेराव नांज्लायनाय जायो। बेफोर बाइदिनो जायेर, एंगुला, इथुपिया, स'मालिया, आलजेरिया, मर'क्को बाइदि बाइदि नि गेजेरावबो नांज्लाय-खमज्लायखौ नुनो मोनो। ज'दिउ बिसोर गावसोरनि गेजेराव नांज्लायदों थेवबो जों बिसोरखौ नेवसिनो हाया। बिसोरनि सोमावसारनाया गावसोरनि हादोरफोरनि गेजेराव रांखान्थिनि समानथाय आरो मर्ज्यदाखौ थुलुंगाखांनायाव गोबां बिहोमा दड'।

मुलुगनाड खान्थियाव थामथि मुलुगनि मावथाय एबा गोहोम :

थामथि मुलुगनि हादोरफोरा रांआरि आरो मान आरो बिबाननि थाखोआव लोरबां जाब्लाबो मुलुगनाड खान्थिआव बिसोरनि मावथाय फोरा मख'जाथाव। मुलुगनाड खान्थिआव बिसोरों मा मा खामानि मावबोखो बेनि मावबिजिरथि होनो गाहायाव नाजानाय जाबाय।

थामथि मुलुगनि हादोरफोरा फामुआरि खान्थिखौ बन्द' खालामनाय लोगोसे साम्राज्यबादीनि सोबख'नाय आरो हारि सायख' लायनायनि हेंथायै

दावहा होबोदों। बेफोर बायदि गाज्रि खान्थिफोरखौ गैया खालामनो हादोरारि आफादाव लोगोसे गुबुन आफादफोरावबो बिसोरो सोमावसारनायखौ फोसाव बोदों। बेसोरनि खौसेथि नाजानाय गेजेरजों गासै बुहुमआवनो सुबुंफोरनि गेजेराव जांखिथाय लाबोनां हादों। हारि सायख' लायनाय खान्थिआ, साम्राज्यबादीजों दानथे-बिदानथे जालायनायफोरा हादोर गंसेनिल' समस्या नड। बियो मुलुगनाडैनो बुहुमनि गोजोन थासारि दानायाव हेंथा होबोदों। बेयाव थामथि मुलुग हादोरफोरनि नाजानायवनो हादोरारि आफादाव बे हारि सायख' लायनायखौ दानथे-बिदानथेनि गेजेरजों गोहोम खोलैनो हादों। जाउनाव खोला आफ्रिका आरो र'दिसिया हारि सायख' लायनाय बिथा खान्थिखौ हादोरारि आफादा गोख्रों रावजों सोंखारिदों।

थामथि मुलुगनि हादोरफोरा गासै रोखोम साम्राज्यबादीनि बेरेखा। बिसोरो "National Movement" खौ फोथायो आरो मुलुगनि गोबां खना-खनलायाव गोसार होयो। जाउनाव फामुआरि खान्थिनिफ्राय उदां खालामनायाव देरहासाद जानो हायो। जैरै—थामथि मुलुग हादोर फोरनि हेफाजाबजों नामेबियानि सुबुंफोरा खोला आफ्रिकानि बेरेखायै दावहा होना देरहानो हाबोदों। बिसोरो मुलुगनाडैनो रैखाथिनि बेलायाव सुबुंनि थाखाय मोजां खामानि मावबोदों। सरासनम्रायै बिसोरो गावसोरनि सार्वभौमत्व (गासै मोनथाइ)मोत्रो थाखाय हाजासे खामानि मावदों। रांखान्थि बेलायावबो बिसोरो जौगानाय हादोरफोरजों जौगायि हादोरफोरखौ सोबख'नायनिफ्राय बन्द' खालामनायनि लोगोसे रांखान्थि सोमोन्दोआव समानथाय मोत्रायनि बेलायावबो नारा-नाथा नाजा गासिनो दड'। बिसोरो बिसोरनि एलेकायाव थानाय मिथिंगाआरि सम्पदनि सायाव आबुं सार्वभौमत्व मोनथाय मोत्रायनि थाखाय हादोरारि आफादाव दाबि दैखांडे। बे बिथिंनि सायाव बिसोरो गनायथाव फिथाइबो मोत्रो हायो। हादोरारि आफादनि General Assembly आव थामथि मुलुग हादोरफोरा बिसोरनि मिथिंगाआरि सम्पद बाहायनो मोत्राय दाबिखौ आबुंयै मदद होयो आरो 1974 माइथायआव A Charter of Economic Rights and Duties of States" मोनसे थांखि आजावनाय जायो। हादोरारि आफादनि बे थांखिआनो थामथि मुलुगनि हादोरफोरखौ गावसोरनि आथिंआव गावसोरनो गसनो हानायनि बिथा खालामना होयो।

थामथि मुलुगनि हादोरफोरा गोहो थुबुर मोननै हान्जानिफ्राय सोमजिथाव दावहा एबा नांलाय खमलायखौ होबथानो नाजायो आरो गेजेराव हाबख'नानै हादोरफोरनि गेजेराव नुजाथिनाय गोसो गोरोबलायैखौ फोजोबनो नाजाना

बुहुमआव गोजोन थासारि लाबोनो नाजायो। थेवबो बे बिथांखिखौ आजावदों, होमब्लाबो बिसोरनि गुबै थांखिया जादों गोखोंयै रांखान्थिआव दावगालांनाय आरो मोत्रै गोहो थुबुरनि मोनसेआवबो लोबबा लायालासे मोननैजोंबो मोजां सोमोन्दो लाखिना गावसोरनि हारिमानि स्वार्थ आबुं खालामनो नाजायो। बिसोरो हादोरारि आफादाव थाना गाग्लोबग्रा आरो गोजोन सिफायग्रा फोरखौ गोखोंडै सोंखारियो। सरासनम्रायै थामथि मुलुगनि हादोरफोरा बुहुमाव गोजोन थासारि दालांनायाव ब्रै बाहागोनि से मावथायनि बिहोमा होलांनो हायो।

थामथि मुलुगनि हादोरफोरा हादोरारि आफादखौ गोहो आरो ओंथि गोनां खालाम लांनाय बेलायावबो गोबां बिहोमा दड'। बिसोरो राजखान्थि, रांखान्थि आरो समाजआरि जेंना फोरखौ हादोरारि आरो मुलुगनाड थानाय दालाय दासा आफाद फोरनि गेजेरजों सुम्रांलांनो नाजायो। बिसोरो हादोरारि आफादनि गोबां राजखान्थि जेंनायाव गेजेरनि जाना मुलुग गोजोन लाबोनायावबो गोबां मदद होयो। रां आरो समाजनि बेलायावबो बिसोरो "Special Fund" आरो "Technical Aid Programme" नि फसंथान फसंनो हादोरारि आफादनि सिम नारसिनो। गुसुंहै बुंजायोदि हादोरारि आफादखौ फिथाइ गोनां आरो ओंथि गोनां खालामनायाव थामथि मुलुग हादोरफोरनि गोबां बिहोमा दड'।

थामथि मुलुगनि हादोरफोरा मोनसे "New International Economic Order" दानो नारसिननाय बेलायावबो गोबां बिहोमा दड'। बिजों बिसोरो मुलुग नाडै बेफार-फालांगि आरो रांखान्थिआव हादोरफोरनि गेजेराव समान बाहागो मोननो थाखाय हादोरारि आफादनि खाथिआव नारसिनो। गिबि बोसोर समाव गोबां गोहो थुबुर हादोरफोरा बिसोरनि नारसिननायखौ बारा गोसो होआखैमोन। बे खान्थिखौ बिसोरो गावसोरनि गेजेरावनो अराइसम लाखिनो हास्थायो। नाथाय जेब्ला थामथि मुलुग हादोरफोरनि गोहोआ बांबोयो, अब्ला हादोरारि आफादनि General Assembly आव बिसोरनि नारसिननायाबो गोबां बांबोयो। जाउनाव 1974 माइथायनि मे दानाव "NIEO" खौ गायसत्रो थाखाय हादोरारि आफादनि General Assembly आव मोनसे थांखि आजावनाय जायो।

जोबनायाव जों बेखौ बुंनो हायोदि थामथि मुलुगा मुलुगनाडै सोमोन्दो आरो बिहोमायाव मोनसे गोथौ गोहोम गारबोनो हादों। बे गोहोमा समनि खारथायजों गोरोब फानो हादों। ■

बर' समाजनि हाबा

—कमल कुमार बसुमतारी



कमल कुमार बसुमतारी (1966) : डिमाकुसिनि साखाथियाव थानाय गेरुवा गामिआ बिथांनि जोनोम जायगा। बिथाड सासे गोख्रों थुनलाइ सिबियारि आरो राफोद सुंद 'सल' - रायथाइ लिरगिरि।

बुहुमनि हारि माहारिफोरा मुलुगाव हाबा जानानै संसार जाबोदों, बर' माहारियाबो सा सान्जा भारतआव गावनि राव थुनलाइ, हारिमु, दोहोरोम आरो समाजनि नेम खान्थि फोरखो लानानै, आरो हाबानि नेमखान्थिफोरजों हाबा जानानै संसार जाबोदों। गुबुन गुबुन हारि माहारिया बर' हारिखौ गाग्लोबनानै बर' फोरखौ सेरखाय बेरखाय खालामदोंब्लाबो बर' समाजनि नेमखान्थि फोरखौ खोमा लांनो हायाखै। समाज बेंनाय, संसार जानाय, हाबा जानायनि नेमखान्थिया बर'फोरा आलदा दंखायो। हाबा लानाया बर'फोरनि मोनसे गेदेर खामानि। गासै मानसियानो हाबा जानाया मानसिनि दोहोरोम होत्रा बर'फोरा सानो। बर'फोरनि बाइदिब्ला हाबानि सोदोबथिया जाबाय—हाबा=हा+बा। “हा” नि ओंथिया जाबाय, हा, बुहुम एबा संसार। “बा”नि ओंथिया जाबाय बानाय, लानाय एबा बिबान लानाया हाबा=संसारनि बिबान लानाय। बिबाना जैरै बाइदि गिलिद संसार जानायाबो मोनसे गिलिद बिबान। बर' समाजाव बाइदि रोखोमनि हाबा दं। बिफोरो जादों—संनानै लायनाय हाबा, गोरजिया लाखिनाय हाबा, खारसत्राय हाबा, बोनानै लायनाय हाबा, दोनखार लांनाय हाबा आरो दंखा हाबनाय हाबा।

संनानै लायनाय हाबा :

दरा नखरा खैनाखौ संना नायनानै लायनायखौनो संनानै लायनाय हाबा बुडे। नखरनि मानसिया नायना फैखांना दराखैना खुसि जालायोब्ला बे हाबाया जायो। गोदो समाव बे हाबायाव खैना नखरा खैनानो स'ना रुफा, गात्राय-

जोमनाय आरो माब्रै-माबा अमा बिनाय हुदा दंमोन, नाथाय आथिखाल समाव बेफोर गोमा लांबाय। बेयो समाजजों गनाय जानाय मोनसे हाबा।

गोरजिया लाखिनाय हाबा :

गोरजिया लाखिनाय हाबाया मोत्रै रोखोमनि जायो। थाथारनाय आरो अंखार फिन्नाय। सोरनिबा नखरा फिसा हिन्जावनि अनगायै रावबो हौवा फिसा गैयाब्ला अराय समनि थानाय हिसाबै गोरजिया लाखियो। बिदि गोरजियाखौ थाथारनाय गोरजिया बुडे। बिदि गोरजिया थानाया हुवाया अराय सम हिन्जावनि नखराव थायो आरो हिन्जावनि दोहोन-सम्फथिनि बिगुमा जानो हायो।

सोरनिबा नखराव फिसाला थानानैबो मावनाय-दांनाय रावबो गैयाब्ला फिसानो नखराव रां खान्थि सहाय जानाय हिसाबै गोरजिया लाखियो। बिदि गोरजियाखौ अंखार फिन्नाय गोरजिया बुडे। बे बाइदि गोरजिया थानाया अराय सम हिन्जावनि नखराव थाया आरो हिन्जावनि नखरनि दोहोन सम्फथिनि बिगुमाबो जानो हाया। मोनसे सम थि खालामनानै उनाव हिन्जावनि ननिफ्राय अंखारना हुवानि नसिम थांफिनो।

खारसन्नाय हाबा :

खायसे हाबा जानो लुबैनाय सिख्लाया सेंग्रानि नआव हाबना थाहैयो। बिखौनो खारसन्नाय हाबा बुडे। बबेखानि बिदि हाबाया सेंग्रा सिख्लानि गेजेराव बाथा थाखा लायाब्ला जाया। बे बाइदि हाबाया खारसन्नायनि सानसे सात्रैनि गेजेराव दरा नखरा खैना नखरा लाबो खोमानाय होत्रा हमो। बे बाइदि हाबाखौ खैना नखरा समाजनि नेम खान्थि बायदियै दरानि नखराव हाबा होयो। नाथाय खारसन्नाय हाबाया बर' समाजजों गनाय जानाय मोनसे हाबा नड।

बोनानै लायनाय हाबा :

बोनानै लायनाय हाबाया बर' समाजजों गनाय लानाय हाबा नड। अब्लाबो बर' समाजाव बे हायाखौ नुनो मोनो। बबेखानि आथिखाल समाव बोनानै लायनाय हाबाया गोमा लांनो हमबाय। बोनानै लायनाय हाबाखौ खारसन्नाय हाबा बाइदिनो खालामनाय जायो, हाथासुनि खुरनाय हाबाजों।

दोनखार लांनाय हाबा :

बर' समाजाव दोनखार लांनाय हाबाबो नुनो मोनो। बबेखानि बिदि हाबाया समाजजों गनाय जानाय हाबा नड। सेंग्रा सिख्लानि गेजेराव गोसो

गोरोब लायखानाय थायोब्ला आरो हाबा जानायाव नखरनि हेंथा थायोब्ला सानैजों खारखोमा लानानै गुबुनाव हाबा जाहैयो। सेंग्रा सिख्लाखौ नायगिरना मोनोब्ला समाजा बिसोरनि सायाव गोख्रों साजानि राहा लायो।

दंखा हाबनाय हाबा :

दंखा हाबनायहाबाय बर' समाजनि गोदोनिफ्राय सोलि बोनाय हाबा आरो बे हाबाया समाजजों गनाय जानाय। सोरबा रान्दिया रुंसारि हुवानि दोहोन-सम्फथि आरो गथ' गथाय थानानैबो खामानि मावग्रा रावबो गैयाब्ला दंखा हाबा जायो। दंखा हाबनो नागिरनाय मानसिया रान्दिजों खोथा बाश्रा जायोब्ला, नेसोंन महरै रुफानि खावरि आखाइजों सोलायनानै हुवा हिन्जाव सानैबो बुंलायो— "दिनैनिफ्राय आं नोंनि, नों आंनि।"

दंखा हाबनो नायगिरनाय हुवाया राइजो राजानो ओंखाम भज' जाहोस्राना गावनि बिफानि सोमोन्दोखौ एंगारना न'निफ्राय बिदाय लायो। बाथौ सेराव आर'ज गाबना आरो मोन्थिना रायसन्ना खुगायाव नार्जि सावफलेना गारो। बिखौनो बर'फोरा नार्जि अरगारनाय बुडे। नार्जि अरगारनाय उनाव दंखा हमग्रा हुवाखौ बिफानि सोमोन्दोखौ गासै समनि थाखाय एंगारबाय होत्रा हमना लानाय जायो आरो बेनि उनाव दंखा हाबनाय हुवाआ बिफानि फारसे जेबो मोन्थाय थाया।

ओजों दंखा लाखिग्रा रान्दिआ अमा बेदर एबा दाव बेदरनिफ्राजा खुरैसे इसिन' (ओंखाम संग्रा न') नि दरखं मोखाडव दिनो। गावहा (रान्दिया) बिनि खाथियाव आगसि आखायाव मोनसे आलारि लानानै आरो आगदा आखायाव गंसे खारेव गन् लानानै बुनो जमफलाबायथायो। दंखा हाबनो नायगिरनाय हुवाआ मावजि बाइदि मेव मेव होन्नानै इसि न'नि सोरगिदिं खेबस्नि गिदिडे। खेफ्रोमावबो इसिननि लामाथिं हाबनो नाजायो। रान्दिया दंखा हाबनो नायगिरनाय हुवाखौ मावजि होखा रनाय बाइदि होखार हरबाय थायो। खेब द' गिदिं खानाय उनाव खेब स्निआव दंखाया दरखंमोखां मोनफैयोब्ला रान्दिया गावनि थैनाय फिसायखौ सोमोन्दो खालामनानै सोडे— 'आमुखा बिफासो नामा' (सिगां हुवानि थालानाय गावनि फिसानि मुंमखना) दंखा हुवाआ अब्ला "औ" होत्रा फिन होयो।

बिनि ओंथिया जाबाय—रान्दिनि सिगांनि फिसाइया बबेनिफ्रायबा गिदिना फैफिनबाय। रान्दि हिन्जावा रावबो गुबुन हुवाजों हाबा जानो सानाखै। दंखा हाबनाय हुवाआ इसिं नआव हाबना संना दिन्नाय बेदरखौ जायो। बे सानखालिनो बिसोरखौ हाथासुनि खुरनाय हाबा होनाय जायो।

बारलांफा आरो बैराथि :

बारलांफा आरो बैराथिया बर' हाबानि गाहाइ। बारलांफा आरो बैराथी गैयाब्ला बर' हाबाया जाया। बारलांफानि सोदोबथिया जाबाय 'बार+लांफा। बारा जाबाय बार, बोलिया। लांफाया जाबाय लोगोआव। बारलांफाया हिन्जाव थैजानाय हुवाआ जानो मोना। जायोब्ला दरा एबा खैना सासे थैयो होत्रा बर'फोरा फोथायो। बारलांफानि गाननाय जोमनाया गोजा जानांगौ आरो आर'नाइ लानांगौ। हाबानि गाहाइ बिबानखौ बारलांफा सानैया लाडे। हाबायाव बारलांफा सानैया हाब्रु एबा अमा खर' गाननानै मोसा नाडे। बिदिनो खैना नखरनि मानसिफोरा आखाइ खबै खबै मेथाइ खनो—

सोनबारिनि फाथै लावरि,
गोथां आवलिनाय फाथै,
बबे गामिनि बारलांफा,
गोदोनाव हमना लाना फै।”

बैराथिखौ बारजोबो बुडे। रान्दि हिन्जावा बैराथि जानो मोना। बिसोरनि गान्नाय-जोमनाया गोजा गाबनि। आखायाव मुथि आसान गानो आरो खोमायाव खिरा गानो। हाबा जायै सिख्लायबो खाफालाव थरनै सिन्दुर लायो। बैराथि सानैनि खामानिया जाबाय, सासेया गय खावनाय आरो गुबुन सासेया खैनानो गान्नाय, जोमनाय लानानै गानहोनाय। हाबानि गयखौ सिगां बैराथीया दाबा-खथारीजों सावग्रोयो। बिनि उनावसो गुबुना खावनो हायो। बैराथि गय खावनायखौ निन्दा होना अब्ला दरा नखरनि मानसिफोरा मेथाइ खनो—

ऐ बैराथि लुंलिया
नोंनि खिबु एल' एल'
गइ खावनायखौ
जोंलाय जालिया ॥

बैराथि फोरा गय खावबोला गय खिथु हासना खावनो मोना। बिदि खावबोला खैनाया रान्दि जायो होत्रा बर'फोरा फोथायो। बैराथिफोरा गय खान्दि रानब्ला ज'रा ज'रा रानो। खानसेल' रानबोला खैनाया रान्दि जायो होनना बर'नि गेजेराव फोथायनाय दं। बैराथिफोरा गय खावोब्ला सानि बिगुरखौल' गारना खावो। बेखायनो बर' खुगा मेथायाव मोनो—

ऐ जेथ आसारनि रेव रेवा हाय,
 औ आयै रेव रेवा हाय।
 जाबाइ लाहानि गय फाथैखौ
 जानायावनो जानायावनो,
 हाथायासो खेलाय लांबाय ॥

बेराथीफोरा खावनाय गइ बिगुरखौ जानला-मानला गारना गारबोया।
 बिखौ ज' खालामना दरानि न'सिन लानानै फैयो एबा खेनानि इसिं न'नि
 मुदायाव गारखोना गारबोयो। बैराथि फोराबो बारलांफाफोर बाइदि मोसायो।
 बर' फोरनि बाइदिब्ला बारलांफा आरो बैराथिफोरा मोननै जाहोननि थाखाय
 मोसायो। मोनसेया जाबाय-खैनाया बे साननिफ्राय बहुमनि सुबुं समाजनि संसारि
 जीउआव हाब्बाय। नैथियाव जाबाय-बारलांफा आरो बैराथिया बिखुडव हाबना
 मोसायोब्ला खैनाया हिन्जाव गथ' खांनो हायो।

बर'फोरनि नेम खान्थि बाइदियैब्ला खैनाखौ खोन्थामल' नायनो नांगौ।
 बे खनथाम खैना नायनायाव सिगां थांजेन्नायखौ हमनाय जाया। बे सिगां
 थांनायखौ बर'फोरा लामा एवनाय होत्रा बुडे। थामहिनबा संदानजेन्नाय। खनथाम
 खैना नायनाया जादों-गायथावनि खालार खानाय गयथाब एबा आसथाम
 गानहोनाय आरो हाबा।

गइथावनि खालार लानाय :

गइथावनि खालार खानायाव साबानिफ्राय साजिसिम मानसि थाडे।
 बेवहाय गइ-फाथै आरो जौ लाडे। नाथाय आथिखाल समाव जौनि जायगायाव
 साहा-सेनिसो लांनाय नुयोसे। नाथाय गय फाथैया थाथार खायो। गय-फाथै
 गैयाब्ला बर'नि हाबायाबो जाया। बर' खुगा मेथायाव दं-

गय देदेरे, फाथै सिनारि
 दावब' ख्रि सुनै, दावथु खर', हेना-दाबा,
 खाव रेगां खावबाय।
 जा रेगां जाबाय।

गइथाब एबा आसथाम गानहोनाय :

बे सानखालि दरानि मानसिजों लोगोसे राइजोफोराबो थांफायो सानै
 बारलांफा आरो बैराथिबो थांफायो। दरा एबा दरानि बिनानावा खैनानो

आसथामखौ गानहोयो बारो खैनानो खाफालाव सिन्दुर होनाय जायो। हाबानि जोबथा हाबाफारिखौ व्याबहायनो लानाय जायो। बै बारलांफा आरो बेराथिफोरा गय फाथै खैना नखरनि मानसि फोरानो रात्रा होयो।

हाबा :

आसथाम गानहोनायनि उनावनो हाबाया जायो। हाबा जानायनि सिगां खोनसे दरा नखरनिफ्राय हाबाखालि खबर लानो थाडे। हाबा खालि दरा बिगुमाजों लोगोसे बारलांफा आरो बैराथिफोरा सिगां बिबान लांफायो। बिबानखौ बानना लाडे आरो बिखौ बाथौ मोन्दोब खाथियाव दिन्हैयो। ब्यावनो खैनानि गान्नाय-जोमनाय आरो बाइदिसिना मुवाखौ दिन्थियो मुवाफोरा खम जायोब्ला बाथ्रा दानथे लायनाय व्यावनो जायो। मुवाआ खमजायोब्ला दरा नखरा बारगोनाय मोनसे खुगाफाव दं।

थेब-थेफारिया, थेब थेफायो।

गुमा दावराया हाबा जायो॥

बिनि उनाव दराया थाडे। दराजों गोबां मानसिफोरा थांफायो दराखो गेदआव आइथें सुना बामना लांनानै बाथौ सालिखौ खेबबा गिदिंन फजयो। व्यावनो खैनाखौ दिहुन्ना हाबा होयो। हाबानि उनाव खैना फैनोसै समाय गासै बाय बाहागिफोरखौ खुलुमस्रां बायो। व्यावनो गय थाइबा आरो फाथै गांबा मान होबायो। बेखौनो बर'फोरा "गइथाव" बुडे। खैना बिदाय होनायखौ बर' खुगा मेथायाव मोनो—

दागाबसै आगै बिनानाव
सिमसा हुवानो हराखै,
बांगाल हुवानो हराखै
बर' हुवानो राइजो जानोसो
हरदों आगै, हरदों॥

खैना नखरनि मानसिफोरा बिदाय होना बुंहरो—

बारि खनानि लाय अलदर
थांदों हाय खैना दलर दर।

हाथासुनि खुरनाय :

हाथासुनि खुरनायानो जोबथा हाबा। हाथासुनि खुरनाय हाबायाव बाथौनि एबा मोन्दोब सेराव लाइजौ गांसे बना, गय-फाथै जरासे होना आरो आलारि

मोनसे लगायना दरा-खैनाया खुलुमो । बे हाबायाव खैनायाराइजो फोरनो ओंखाम संना जाहोयो । ओंखामखौ खैनाया इसिं न'आव सडे । रात्राय समावबो खैनाया रात्रग्रोयो । बिनि उनावसो गुबुना रानो । ओंखाम जानाय समाव दराया इसिं न' खाथियाव जयो आरो खैनाया बिनोनो ओंखाम इसिं होग्रोयो । बिनि उनावसो गुबुनो होयो । हाथासुनि खुरनाय हाबानि उनावसो दरा खैनाया न'गंसेयाव थानायनि मोनथायखौ मोनो ।

आंथिमंला सिफायनाय :

हाबानि सप्ताह गांसेनि उनाव दरा-खैनाया खैनानि न'आव थांनायखौ आथि मंला सिफायनाय बुडे । व्याव दराजों सासे आरो खैनाजों सासे लोगो थांफायो । व्याव जेबो मुवा लांफानो होनाय जाया । दरा खैनाया गोसो बाइदिनो मुवा लांफानो हायो । दरा-खैनाया हर थाया । सानसेयावनो गिदिं फिनो । बे सानखालिसो खैना नखरा हाबानि राबा, आरो गेदेरफोरखौ सिफायो ।

बिफोरनो जादों गोदो-गोदायनिफ्राय बर' समाजाव सोलिबोनाय बर' हाबा । ■

Reference Books :

1. "Aspects of social customs of the Bodos" by—Dr. K. Brahma
2. 'भरेन नार्जिनि—“बड़े कछबी समाज आरु संस्कृति।”
3. 'धूपाराम वसुमतारीब— “बड़े कछबी बाथो धर्म आरु समाज संस्कृति।”
4. गीथार मैखुन— Vol-1.

बर' थुनलाइ बेनि जौगानाय आरो बर' फिसानि बिबान

—भजेन चन्द्र बर'



भजेन चन्द्र बर' (1960) : बर' बाजार (रौता) दिहिंनि सासे राफोद थुनलाइगिरि। आथिखालाव बिथाड बर' थुनलाइ आफादनि नेहाथारि।

बर' थुनलाइनि जौगानाय आरो जौगानायनि बागै बर' फिसानि मावनां बिबान सोमोन्दै सावरायनाय सिगां, मोनसे जौगासारनाय थुनलाइनि आखुथाइफोरनि बिथिंखौ सावरायग्रो नांगोन। बै जौगानाय रावनि गारबोनाय आगानफोरनि सेर सेर खज' होयोबोला नुनो मोनो दि, बहुमाव बाहायनाय आरो मावनाय मावफारिफोरनि मोनफ्रोमबो आइदानि सायाव लिरनाय, बिजिरनाय, बिजिरसंनाय (Research) बाइदि बाइदि बै राव थुनलाइनि बिजाबफोरनि गेजेरजों मोत्रो हादों।

मानसि सासेया थांना थासान्दियाव सोलोंनो गोनां गोबां बाथ्रा, आइदा दड'। बैफोरनि मोनफ्रोमबो बाथ्राखौनो एबा सोंलुखौनो बै राव-थुनलाइनि गेजेरजोंनो फरायसंनो हानायनि खाबु दड'। बेखाइनो बै थुनलाइनि रावारिफोरआ गुबुन रावनि बिजाबफोरनि सायाव सोनारनो गोनां जाया एबा फराय नाड। गाव-गावनि राव-थुनलाइनि बिजोंजों (गेजेरजों) फरायनो एबा सोलोंनो खाबु थायोबोला, गोलेँयैनो आरो थाबैनो आइदाफोरखौ बुजिनानै बजबना लानो हायो। गावनि बिमानि रावजों माबेबा मोनसे आइदानि सायाव बुंनंगौ जायोबोला जेसेबां गोलेँयै आरो रोखायै फोरमायनो हायो, गुबुन हारिनि गुबुन रावजों बुंनंगौ एबा फोरमायनो गोनां जायो, एसेबां गोलेँयै आरो रोखायै फोरमायनो हाया। गोब्राब जायो। बिदिनो गाव बिमा रावनि गेजेरजों जेसेबां गोखै, गोलेँ आरो रोखायै बुजिनो हायो, एसेबां गोखै, गोलेँ आरो रोखायै मालायनि रावजों फोरमायनाय

बाश्राफोरखौ बुजिनो एबा हमदांस'हाया। बिफोरनि फार्से नोजोर होयोबोला जॉनि गाव गावनि बिमा राव थुनलाइ जौगासारनाया बेसेबां गोनां बे बाश्राखौ सात्रांगौ जानानै फैयो। बिमानि राव रायज्जायनो गोरों जाखायोबोला आरो बिमानि रावजोंनो जोंनो नांगौ जानाय बिजाबफोर लिरनाय थाखायोबोला, जों जॉनि सोलोंनो गोनां आइदाफोरखौ गोलेँ आरो गोखैयै सोलोंनो हागोन आरो बैफोर आइदायाव आखा-फाखा जानानै खामानिफोराव उदाय गोरों जानो हागोन। दा बेफोर बादि जों सोलोंनो गोनां जायोबोला, जोंनो नांगौ जानाय आइदाफोरनि सायाव मोजां आरो रोखा गियानगोनां बेसेनबहरा बिजाबफोर मोत्रो नांगोन, अदेबानि लिरखानाय थानांगोन।

एसेखिनियाव बर' राव-थुनलाइनि बागै सावरायनो लादोनि फैदो। बड' साहित्य सभा एबा बर' थुनलाइ आफादनि बैसोआ मब्लाबानो बाजि बोसोर बाग्लायबाय। मानसि सासेनि बैसो आरो जिउखांनायजों रुजुयोबोला, बिनि बैसोआ गेदेर-गोलाउ, गोरों-गोरा जानानै संसार जाफुंनाय एबा ग्रोम ग्रोम राइजो बेंनायनि मुखुब सम। बे समाव संसार जानायाव गाव गावनि आंखालखौ हमदांनानै सुफुंनायनि राहा-लामा संनाय आरो इयुनजोलैफोरनि थाखाय गायसंनानै गालांनायनि बोलोगोरा सम। थामहिनबा, बर' थुनलाइनि महरआ फारफ्रोमबो दिगियावनो दावगासे दावगानानै गोदान-गोदान सोरजिनाय आरो बर'फोरजों राइजो जाजाबनाय गुबुन गुबुन हारि-माहारिनि सायाव गोहोम खोख्लैनो हानांगौनि सम जाथारबाय। बर' थुनलाइया दा बेखिनि आखुथाइनि आरो गोहोनि बिगोमा जानो हादोंना? ना हायाखै? बिखौ बिजिरना नायनांगौनि सम जाबाय। बिजिर नांथारसिगोन। बिजिरनांगौनि सम सथारबायबोला, बिजिरग्राफोरबो ओंखारथारनांसिगौ। बिजिरग्राफोरबो ओंखाराखै नड ओंखारबायबो, नाथाय थोजासे नड। बेनि मादाव माखासेया नाथाय दानख'थाइ नोजोरजोंसो बिजिरनो नागिरो। दावगाफुहांनाय बर' राव थुनलाइनि सायाव बिजिरनाया दानख'थाइ नोजोरजोंल' बिजिरोबोला, बियो बर' राव थुनलाइनि जौगासारनायाव मदद खालामनाय नड, अदेबानि जग्लायहोनायनिसो लामा दिन्थिगोन। बर' राव थुनलाइखौ फुथारनायनिसो बाहागि जागोन। बेनिखायनो बिजिरग्रा बिथामोनाबो दाजाबथाइ नोजोरजों बिजिरनानै गोरोन्थिफोरखौ एबा हाल' जाना थालांनाय जायगाफोरखौ सुफुंनानै बर' राव-थुनलाइनि फोथारखौ स्लिम-स्लिम सौग्रावनाडि लामायाव बोलांनायाव बिबान रुजुनलायनांगौ। अबोला बर' राव थुनलाइनि मासिआ हायनायनि सोलाय जौगानाय फार्से आगान सुरगोन। दासिम बर' रावजों

(लिरनाय महराव) जोंनो नांगौ जानाय मोनफ्रोमबो आइदानि सायाव लिरनाय बिजाब, बिजिरनाय बिजाब, बिजिरसंनाय बिजाब बाइदि बाइदि मोनजोबनो हानाय जायाखै। बिब्दि होन्नानै बर' रावआव जेबोआनो गैथारा, बे रावनि बिजोंजों (बर' बिजोडव) फरायबोला नांगौ गियानखौ मोनजोबनाय नड, दावगानाय नड बाइदि बाइदि सात्रानै बे बिजोंजों फरायनाय एबा फरायहोनायखौ ज्राब गारोबोला एबा गारहोयोबोला, बियो सासे बर' फिसानि गोथार बिबान जानाय नड, अदेबानि बियो बर' हारि-राव थुनलाइनि फार्से नायख्लेंनाय आखुथाइनि आखल जागोन, गावनि हारि-राव थुनलाइखौ मोजां मोनिनि आखलाव महर मोनगोन। गावखौनो गाव सिनाय रोडिनि आखल जागोन। बेनि ओंथिया बे नड दि, बर' बिजोडव फरायाब्लानो बियो बर' जानानै थालिया एबा बर'नि बेरेखा सानजागोन। गोसो थासेयावबो बर' बिजोंडव फरायनो एबा फरायहोनो हायिनि गोबां असुबिदा थानो हागौ। नाथाय खाबु थासेयावबो जायफोरा बर' बिजोडव फराया एबा फरायहोआ, बिसोरनि बेलायावसो गोजौनि बाथ्राखौ बुंनाय जादों। मानसिनियाव गोसो-बोलो आरो हारिनि राव-थुनलाइनि फार्से गोथार अनसायनाय थायोबोला, माखासे जेथो-जेंनाखौ सौसिनानैबो गावनि रावथुनलाइखौ फोजोमथायनायाव बाहागो लानो हायो। बेनि दिन्थि जोंनि मेगन सिगाडवनो नुगासिनो दड'। दिनै असमीया, बाडली, मार'वारी, पान्जाबी बाइदि बाइदि हारि-फोलेरफोरनि रावारिफोरनि फार्से नायनायसाय। बै रावारिफोरनि आखलखौ नायोबोला नुनो मोनो, बिथांमोना बुहुमनि खना-खनला जेरावखि थायाथों मानो, बिथांमोनआ गाव गावनि राव-हारिमुखौ बावलाड, बाहायगासिनो थायो। मालायनिखौबो मानियो एबा बजबो नाथाय बिदि होन्नानै गावनिखौ खोमाया एबा नागारा। हानाय बेलायाव गावनि राव-हारिमुनि गोहोमखौ मालायनियाव खोख्लैदेरोसो। बे बेलायाव बाडली रावारिफोरखौनो मख'जायो। बिथांमोनआ बुहुमनि जेरावखि थाया मानो गावनि बिमा रावखौ रायज्लायनो जेबोलाबो गारा। गुबुन रावारिफोरनि गेजेराव थाब्लाबो, गाव-गावनि नख'राव एबा गाव-गाव हारिनि एबा रावारिनि मानसिफोरनि गेजेराव लोगो मोनज्लायबोला, बाडली रावजोंल' रायज्लायगोन एबा रायज्लायो, रोंब्लाबो गुबुन रावजों रायज्लायो, गाव बिमा रावजों रायज्लायनो लाजिया। हानाय बेलायाव गुबुन रावारिफोरजोंबो गावनि बाडली रावजोंसो रायज्लायबावनो नाजागोन आरो गुबुनखौसो गावसोरनि रावजों रायज्लायहोगोन। बे जाबाय बाडलीफोरनि रावारि आखल। बेयो जाबाय गावनि

हारि आरो रावखौ गोथौ मोजां मोनग्रा आरो अनसायग्रानि दिन्थि। बे आखलखौ जौनि बर' हरिया सोलौनो गोनांथार। गावनि बिमा रावखौ गोसो गोथौयै मोजां मोत्रो आरो अनसायनो रौनांसिगौ। गुबुन रावारिफोरनि गेजेराव थाब्लाबो, थाथ'नाय समआवबो, गाव-गाव हारिनि गेजेराव लोगो मोनज्जायबोला, गावनि बिमा रावजौनो रायज्जायनो नांगौ, गाव-गावनि फोरमायलायनो गोनां मोजां बाथ्रा, रंजा-खुसि, दुखु-दाहा बाइदि बाइदिफोरखौ फोरमायनांगौ, अब्लासो गुबुन रावारिफोरआ बर'फोरहाबोदि बिमा राव दड' बेखौ रोखायै मिथिगोन। जौं सानैसोल' बर'आ गुबुन हारि-रावारिफोरनि गेजेराव, जौनि रावजौं रायज्जायबोला, गुबुनआ मिनिगोन, लासिसिं खालामगोन, बेबादि गोरोन्थि सानफ्लानायखौ ज्राब गारनांसिगौ। गावनि बिमा रावनि सायाव थानाय सन्देहखौ (गोरोन्थि सान्नायखौ) थारला गारनांसिगौ। गुबुन रावारिफोरआ सोलौनो बुंनो नागिरोबोला, बिथांमोनखौ गोसो गोथारै नांगौ आरो नंगौ सोदोबफोरजौं फोरौनांगौ। फोलानाय सोदोबफोरजौं एबा रावजौं गुबुनखौ फोरौनाड, गावनि रावखौ फोरौबोला, बिथांमोनआ बर'रावखौ रोडेबोला, जोडे गावनि रावजौं रायज्जायखोमा हानाय नड एबा फोरौनायनि मुडव माखासे नंखाय-गाज्जि सोदोब फोरौनानै, गोसो-गुदुं सोलौंग्राखौ गुबुन बर'फोरजौं रायज्जायनो नाजानाय समाव सौग्राव होयोबोला, लासिसिं खालामहोबोला, बियो नाथाय बर' रावनि फोथारखौ फेहेरनो-फुवारनो गारनानै फुसेबनायनिसो गाज्जि दिन्थि जागोन। बियो बर' रावखौ अनसायग्रानि आखल जानाय नड, अदेबानि बियो जागोन बर' रावनि बेरेखा सानग्रा, बर' रावखौ जिनाहारि खालामग्रा, हारि बेरेखा जोलैनि हांगार आखलनि दिन्थि। जौं नुनो मोनो, जौनि बर' हारिनि बर' राव गोरोखा नख'रनिफ्रायनो बर' राव रायज्जायना देरलानाय आरो बर' राव गोरोखा माखासे मिथिजानाय-मख'जाथाव बर' गेदेमाफोरआ, साख्खि मावनायनि मुंथियै, गुबुन रावारिफोरनि गेजेराव थानानायनि असिला लानानै गावनि रावखौ गाव-गावनि नख'राव (बर' रावजौं) रायज्जायनो गारनानै, नांजाबफानानै थानाय हारिनि रावखौसो (गाव गावनि नख'राव) एखे बिमा रावारिनि गेजेरावबो रायज्जायनो नाजायो, रायज्जायो, गाव-गावनि बर' फिसाफोरखौ गुबुन रावजौंसो बुंनो फोरोडे आरो जोबनायाव गाव-गावनि बर' फिसाफोरआनो बर' राव रोडि; बबा-बबि जायो। बिदिबोला बर' रावारि नख'रावनो बर' राव रायज्जायनो रोडि जालानायनि दाइखौ जौं सोरनो जाबसिनगोन? थाजाबनाय समाजखौ ना हारिखौ? बेथ' जानो हाया। बे

दाइआथ' बै नख'रखौ दैदेनग्रा नख'र बिगुमा, बिमा-बिफा, गेदेर गोलाउनिसो। गावनि बिमा रावनि सायाव गोथौ फोथायथि गैयि आखलनिसो दाइ। गाव-गावनि बिमा राव रायज्जायनायजों लोगोसे थाजाबनाय हारि-माहारिनि रावखौबो सोलोंनो आरो बुंनो हानाया सोरबा रायज्जायग्रा सुबुंनि गुवार आरो गेदेर गोसोनि दिन्थि, राव अनसायग्राणि आखल। बिदि खालामोबोला रायज्जायग्रा सुबुड गावहानो मुलाम्फा गोनांसिन जानोहायो।

बेनिखिनायावनो आरोबाव माखासे बर' राव रायज्जायग्रा, अनसायग्रा बर' फिसानि लोर्बा मावदिन्थिखौ रायखाडलासै थानो हायासै, रायखानांगौ जाबाय। जों गावखौनो गाव रायज्जायसडबोला (Self Criticism) रायज्जायसंगोन सोर? रायज्जायसंनो लानाय जाबाय। बर' राव रायज्जायनांगौनि मुडव रायज्जायनाय, बर' राव सिबिनांगौनि मुडव सिबिनाय, राव थुनलाइ सिबिनायनि असिला लानानै उदै सुफुंनानिल' खाबु लानाय सुबुं जोंनि गेजेराव मख'जाथाव अनजिमानि दिन्थि नागिरोबोला मोत्रो हागौ। रायखांबोला सोरनिबा सोरनिबा गोसो-मोदोमाव नांग्रहैनो हागौ। हारि राव-थुनलाइ फोथाना लाखिनायनि खाथिराव रायखानांबाय। जोंनि हारिनि गेजेरावनो एरैबादि बर' राव थुनलाइ सिबिग्रा सिबिसुला-सिबिसुलि दड' जाइ बिथाडा राव सिबिनायनि मुडव ओंखारबोनानै बर' राव थुनलाइ फोथारनि बाइदि बाइदि फसंथानफोरआव बिबान रुजुनो आरो फसंथानफोरनि हाबाफारिफोराव राव-थुनलाइ सिबिनायनि गोसो-बोदोर खालामथाव बिबुंथि लाखियो, नाथाय बिथानि उन उन थानानै बिथानि नख'राव हाबसंनाना नायोबोला, नख'राव थुनलाइ सिबिनायनि गोजोनथाव नेसॉन एबा आखल दिन्थिनाय नुनो मोनबाडा। सोरनिबा बेलायाव गावनि नख'रनि सोद्रोमाफोरखौनो थुनलाइनि फासै फेंनायाव देरहासार जानो हायिखौसो नुनो मोनो। बैफोर नख'राव बर' राव बाहायनो थाखाय मानिबा लाजिनाय आख'-फाख' नुनो मोनो। थारैनो गावनि राव थुनलाइनि फासै मोजां अनसायनायनि गोसो बोलो दंमारोमोनबोला, रोडिखौ रेंनो-सोलोंनो नाजानाय थानांगौमोन आरो नाजागौमोनबो। नाजायोबोला रोडिनि एबा हायिनि बाथ्रायानो थाया, लासैयैब्लाबो गावनि दखलाव लाबोनो हाहैगोन।

एसेयाव, बर' फोरोंगिरि सासेनि मावनां गिलिर बिबाननि सोमोन्दै सावरायनो लानाय जाबाय। बर' बिजोंनि फोरोंगिरि गेदेमा सासेनि बिबानआ जाबाय, फरायसालियाव बर' रावजों फरायसाफोरखौ फोरोंनाय, गियान होनाय, गोरोंगोरा खालामनाय। फोरोंनाय खामानिनि गेजेरजोंनो फोरोंगिरि सासेनि रोंगौथि, आखल-आखु आरो बिथानि मावदिन्थि गोहोमआ फरायसाफोरनि

सायाव गोग्लैयो एबा फरायसाफोरआ फोरोंगिरिनि आखलखौ सोलोडे। फोरोंगिरिआबो गावनो माबेबा मोनसे आदर्शनि गोहोमआव थायोबोला, बै गोहोमआ बिथांखौबो बै आदर्शनि लामाजों मावलांनो नारसिनो एबा मावनाय-दांनायनि गेजेरजों बेरखाडे आरो फरायसाफोरआबो गाव मिथियाजासे बै गोहोमनि बेन्दोडव हाबस'नो। बेखायनो फोरोंगिरि सासेआ जेबोलाबो मोजां आखलगोनां आरो गोहोमगोनां जानांगौ जानानै फैयो। बर'फोरआ सोलोंथाइनि फोथाराव उनावसो सुथि मोत्राय हिसाबै, बर' फोरोंगिरिफोरनि बिबानआ गुबुन दावगानाय राव-थुनलाइनि फोरोंगिरिफोरनिखुइ गिलिरसिन। बर' बिजोडव बर' हारिनि बर' फिसायानो फोरोंगिरि बिबानखौ मोन्दोंखाय, गावनि बर' फिसाखौ सोलोंथाइ आयदायाव जेसे हागौ मोजाडै दावखोहोनो नाजानाया गिलिरसिन बिबान लोगोसे राव थुनलाइनि फोथाराव गोजोमनायनि मोजांसिन खाबु। बे खाबुखौ फोरोंगिरिफोरआ खामानियाव बाहायनो नाजानाया गाहाम। फोरोंगिरिनि हाबाखौ मोनसे थांना थानायनि राहा साखि हिसाबैल' लायालासिनो हारि-राव थुनलाइ सिबिनाय आरो दानायनि गोथार बिबान हिसाबैबो लानांगौ।

बेखिनियावनो बर' बिजोंनि माखासे फोरोंगिरिनि लोर्बा आखलखौ रायखाडलासेनो थानो हायासै। बे आखलनि फोरोंगिरिआ बर' फिसा जानायनि खाबु लानानै बर' बिजोंनि फोरोंगिरिनि गिलिर बिबानखौ रुजुनबाय, नाथाय गावनो बर' राव आरो बिजोंनि फार्से गोसो गोथौ अनसायनाय आरो फोथायनाय गैथिलाय, फरायसालियाव फरायसाफोरखौ गोसो गोथारै फोरोड, फोरोंगिरि बिबानखौ साखि महरैल' लायो। रावनि फार्से गोसो गोथार अनसायनाय आरो फोथायनाय गैथिखाय, गाव बर' बिजोंनि फोरोंगिरि जासेयावबो आरो खाबु थासेयावबो गावनि गथ' गथाइखौ गुबुन बिजोडव फोरोडे अदेबानि थाजाबनाय बर' रावारि फरायसाफोरखौबो बर' बिजोंनि इयुनआ खोमसि होत्रानै फोलानानै गुबुन बिजोडव बारस्लायनायाव थुलुंगा होयो। बेफोरनि फार्से नोजोर लाखिग्रा, बर'-राव थुनलाइ मोजां मोनग्रा गेदेमाफोरआ बैफोर दिन्थिखौ होबथानायनि राहालाबोला, बैफोरबादि हारि-राव थुनलाइ अनपलाग्रा फोथायखेबस' फोरोंगिरिआ सिरि सिरि बर' राव थुनलाइनि बेरेखा आरो नाखेबग्राफोरनि सोलो लाफानानै, बर' बिजोंनिफ्राय गुबुन बिजोडव बारस्लायनायनि खाबु लाखोमायौ। बेनिखुइ दुखुनांथाव, लाजिनांथाव आरो मुगैथाव हाबा मा थानो हाबावगौ? रावनि सायाव बिबो मोनसे जिनाहारि नडना?

जोंनि गोसोआ जानांगौदि, जोंनि राव थुनलाइआ दासो दावगाफुदों, बेनि

दावगानायाव, बेनि आगानआ एफा-एनै दोरोद-दाराद जालांनो हागौ, बेखौ फोगोमलांनो फेंनो नाजानि। बेखौ जों दावखोहोनो हाबावनांगोन, हागोनबो। बेनि दिन्थिया जाबाय, बर' रावआ भारत हादरनि संबिजिरनि दाइन फारियाव (8th Schedule of Indian Constitution) थिसनजानाय। बर' रावारिफोरनि नाजानाय थायामोनबोला, बेयो दिनै बे जांख्लायाव गाखोनो खाबु मोन्नाय नडमोन। इयुन मिजिं—जोंनि रावआ बेनिखुइबो आरोबाव गोजौ मासियाव गाखो हाबावगोन। बेनि थाखाय जोंनो नांगोन गोसो गोथौ हारि राव थुनलाइ मोजां अनसायनाय। जोंनिनो सोरनिबा गोसो खनायाव हाबसत्रा थानाय, जायगा लानाय थलेर फोथायनाय, नंखाइ लाजिनाय, थारनडि गिनाय, बेफोरखौ गोसो गोर्बेनिफ्राय एरख'ना गारनांगोन, गारनो नांथारगोन आरो बर' बिजोंखौ गोथार गुवार गोसोजों बजबना आंगो खालामनांगोन।

राव थुनलाइ मोनसेया मोगथां गोथां जानानै थागोन, जेबोलासिम बै राव थुनलाइआ बै हारिनि साफ्रोमबो रावारिजों अनसाय जागोन, खामानि-दामानि, मावनाय-दांनाय, रायज्जायनाय, दामनाय-देनाय, मोसानाय-मुसुरनाय, रंजानाय-रोजाबनाय, फरायनाय-फोरोंनाय, लिरनाय बाइदि बाइदि फोरआव अरायबो बाहायजाबाय थागोन। अबोला बै राव थुनलाइ मोनसेआ थैलांनायनि बाश्रायानो सिखाड। बर' राव थुनलाइनि फोथाराबो बेबादि गुवार जानांगोन।

जोंनि बर'फोरनि गेजेरावनो माखासे जायगायाव बर' राव रायज्जायनाय हुदा गैयि जालांनानै, रायज्जायनो रोडि जालांबाय। बेफोरबादि जायगायाव बोराइ-बुरै थाखोया दासिम एफा एनै बर' राव बुंनो हायो। नाथाय हुदा गैयिनि थाखाय आरो नख'रनाडैनो रायज्जायनो रोडिनि थाखाय आख'-फाख' मोन्नानै रायज्जायिआवनो रायज्जायिआवनो नख'रनाडैनो बर' रायज्जायनिफ्राय दोरोद बोबाय आरो नख'रा बर' रावआ जायगा मोनि जालांबाय। आथिखालाव बर' हारिनि गेजेराव नुजाथिनाय राव-थुनलाइ जांख्रिथाइनि गोहोमाव गोग्लैनानै, बैफोरबादि माखासे जायगायाव बर' रावखौ सोलोंथाइनि बिजों महरै आजावबाय आरो बाहायबाय। थेउबाबो बेफोर जायगानि फरायसाफोरआ फरायसालियाव बर' बिजोडव फरायोबाबो फरायसालिआव गावजों-गाव रायज्जायनाय समाव बर' राव बाहायालासेनो 'असमीया' रावजोंसो गोसोनि साननाय-हनायफोरखौ फोरमायलायो। जायनि थाखायनो बेफोर जायगायाव 'असमीया' रावजोंसो गोसोनि साननाय-हनायफोरखौ फोरमायलायो। जायनि थाखायनो बेफोर जायगायाव 'असमीया' रावनि गोहोमआसो बांसिन थाजिम जानानै दंबावो। जों समाजारि

सुबुं हिसाबै थाजाबनाय हारि-माहारिनि रावखौबो सोलोंनानै एबा रॉनानै बै हारिनि रावारिफोरजों गोसोनि सान्नाय हनायखौ सोलाय-सोल' खालामनाया आरो गोरोबलायनानै थानाया समाजाव गोजोन थासारि लाबोनायाव मदद खालामो। बेयो समाजारि बिबान। नाथाय बिदि होननानै गावनि गासैखौबो ब्राब गारजोबनानै, मालायनिखौल' बजबना लायोबोला, गावनिखौ खोमानानै सिनायथि गैयि हारियाव महर सोलायनाय अनगा जेबो जाहैनाय नड। बे फार्से सांग्रां जानाया जॉनि बर' हारिखौ गोमानायनिफ्राय बोखांगोन।

जोबनायाव जॉनि बर' हारिनिनो राव-हारिमु अनसायग्रा गोरों-गोरा सानसुमै गेदेमा रेबगन दैग्रा लिरगिरि बिथांमोननिसिम गुरै आरज थाबाय, बिथांमोनआबो जाहाथे बर' राव थुनलाइनि जौगाबावहोनायनि फार्से नोजोर लाखिनानै, बर' राव थुनलाइ हारिमु जौगानायनि थाखाय सुफुंनो गोनां जानानै थाबावनाय हाल' जायगाफोरखौ सुफुंनो हाथावहै, थुनलाइनि गासैबो दिगिखौ आवग्रिनानै थुनलाइ सोरजियो, गावनि दुखु-जालाखौ सहायथारनानैबाबो, बर' हारिखौ मोनसे गेरेमसा हारि दानायनि खाथिरावनो, बे गिलिर बिबानखौ रुजुत्रो आवगायबोयो। ■

बिबुंथि

गा 36 बर' थुनलाइ आफादनि जोनोम सानाव बिहुराम बर'नि
(गाहाइ नेहाथारि, बर' थुनलाइ आफाद)

जथायदों : गहिन चन्द्र बर'
सानसुलि बसुमतारी बर'



गहिन चन्द्र बर' (1967) : अदालगुरि हालामनि सासे
गागि थुनलाइगिरि आरो दरं जिला बर' थुनलाइ आफादनि
बारग' नेहाथारि। लोगोसे बिथांआ बर' थुनलाइ आफादनि
नांजाब नेहाथारि बिबानाव थाना खामानि मावखांबाय।
मुस्रिमा सानसुलि बसुमतारी बर'आ बिथांनि अनजालि
बिसि।

1988 माइथायाव उदालगुरि जिल्ला बर' साहित्य सभानि बानजायनायाव
खुंनाय गा 36 बर' थुनलाइ आफादनि जोनोम सानाव थांखिनाय बुंथिगिरि
आलासि महरै बाहागो लाना सोरबां सुबुं मुंख्खं बिहुराम बर', बर' थुनलाइ
आफादनि गाहाइ नेहाथारि गेदेमाया बिबुंथि होनायख्रौ (केसेट) रेकर्डिं
खालामनाय जादोंमोन। गेदेमा बिथांनि बिबुंथिख्रौ केसेटआव थानाय बादियैनो
लिरख'नाय जादों।

मिजिंथियो बिथांनि बे बर' राइजोनो होलांनाय बिबुंथिया बर' माहारिनि
गेदेमा राइजो-राजानो बारग'लांनाय समनि थुनलाइनि लामा संनायाव हेफाजाब
होगोन।

मानिनां, बर' साहित्य सभानि गा 36 जोनोम साननि आफादनि
आफादगिरि आरो बेवहाय हांख्राय हरजानाय आंनि खुलुमजाथाव आलासिफोर
आरो राइजो-राजाफोर। दिनै आंख्रौ बियाव सायख'जानाय बुंथिगिरि हिसाबै
बुंनो थोन्नयाव आं बुंनो गसंदों। आं बेयावहा बारा समय बुंनो होन्ना सानाख्रै।
कारन बेवहा बुंनो गोनां आलासि गाहाइ मानाव गेदेद खुलुमजाथाव मुस्रि प्रमद
चन्द्र ब्रह्म दड। बिथाड्ड बुंगोन, गुबुन-गुबुन आलासिफोर दड, बिथांमोना
बुंगोन। आं खालि बेवहा बर' साहित्य सभानि Official activities, बर'

साहित्य सभाया मावबोनाय हाबाफोरनि मोत्रैसो सुंद' बाश्रा बुंगोन जाबाय। आरो बुंनोबो मा, आं नोंथांमोननो जैरे सोरबा नुबायब्ला नैबे बर' साहित्य सभानि During 1985-87 नि गांसे Leaf let दिहुनदों बेवहाय गासैबो बाश्राया दड। आं बेयाव थानाय बाश्राखौसो बुंगोन। नोंथांमोना मिथिगौ। आं बेयाव थानाय बाश्राखौ बुंगोन। नोंथांमोना मिथिगौ जे बर' साहित्य सभाया दिनैनिफ्राय 36 (थामजि द') बोसोर सिगाडव बासुगामियाव धरनीधर बसुमतारिनि आफाद दैदेन्नायाव जोनोम जाजेनदोंमोन। आरो गिबि आफादगिरि महरै सायख'नाय जादोंमोन मुश्री जय भद्र हागजेरखौ आरो लेडाइ आफादगिरिमोन सतिश चन्द्र बसुमतारि आरो जेनेरेल सेक्रेटारिमोन सनाराम थावसेन आरो जइन्ट सेक्रेटारिमोन दानि आफादगिरि मुश्री जगेन्द्र कुमार बसुमतारि आरो रत्नेश्वर खेरकातारी। बिथांमोननि गेजेराव दिनै सानै गैलिया सतीश चन्द्र बसुमतारि आरो जय भद्र हागजेर गैलिया। बेनि गेजेराव थानाय 36 बोसोरावहा बर' राव-थुनलाइनि अनेक धौ फैनाय नुबाय। बर' राव-थुनलाइनि अनेक धौ फैनाय नुबाय। बर' साहित्य सभानि अनेक आन्दोलन खालामबोबाय। आरो बर'नि गेजेरावहा जों बहुत मावथियानो गोश्रोदलांबाय। साफा-सानैल' बै समनि मावथिफोर नांनानै दड जाबाय। आं बर' साहित्य सभाखौ नुजेनदोंमोन 1956 सनआव टंलानि जालुकबारियावहा। अब्ला जयभद्र हागजेरआ प्रेसिडेन्टमोन। बै समाव आं क्लास फाइभआव फरायना दडमोन। बै समनिफ्राय आं दिनै बर' साहित्य सभायाव दड। Actively आं बर' साहित्य सभायाव 1967 सननिफ्राय फैदों फुरा बिस (20) बोसोर जाबाय। थानाय स्नि बोसोराव जों धुबुरीनिफ्राय ओजों जनाइसिम, दासिम जों 1500 खान फरायसालियाव एल.पि., एम.इ., एम.भि., हाइस्कुल आरो हायेर सेकेन्दारियाव बर'खौ जोडे माध्यम खालामबाय। आरो फोरोंनो बेव जोडे 3500 जनसो बर' फोरोंगिरि सोबाय। एस.आइ. सोबाय आरो बर' माध्यमनि नामावहा जइन्ट डि.पि.आइ. जाबाय आरो डि.पि.आइ. जानायनि खोथा दड। Separate Directorate जानायनि खोथा दड। एसेबां Extensive हाबा मावदों, नाथाय Intensive जायाखै होत्रा सिखार खालामो। जों बर' माध्यमखौ सेरखाय-बेरखाय माने नगाव, मरिगाव ओजों एकदम जानाइ-थानाइ जेरावबो सोदों। नोंगौ, गुवाहाटि टाउनावबो बर' मेडियाम सोदों, नोंगौ, गुवाहाटि महा नोगोरनि खाथि-खाला 15 खान फरायसालियाव बर' मेडियाम सोदों, नोंगौ, बर' साहित्य सभानि हाबाया गमामायैनो Extensive जादों। बेखौ जों Intensive खालामनो हायाखै। intensive माने एकदम खामानियाव नांनाय बादियै खालामनो हायाखै।

बेखौ आं सिखार खालामो, बर' साहित्य सभानि सासे मावथि हिसाबै। बे Intensive खालामनो हायैनि कारनानो जाबाय - बर' थुनलाइनि आंखाल। आरो बर' थुनलाइगिरिनि आंखाल। मा बादियै आंखाल, आं साधारन उधाहरन होनो लुबैयो। नै बेयावहा बनजार दिहुन्नाय जादोंमोन मानाव गेदेर प्रलय बसुमतारिआ पाब्लिसारमोन, आं इडिटरमोन। सारायतिनि हाजार (3500) ओंखारोमोन बनजारआ। माने 2500-3000 कपि, मानसिफोरा बाकि फरायोमोन। अर्थात् बर' थुनलाइखौ बाकियै सिबियोमोन आरो 500 आ नगद सिबियोमोन। ओंखायनो बियो 19000 रं बाकि लानानै बर' थुनलाइनि मोनसे माउथ पिचआ थैबाय। आं खोनादों दि दा रादाब होन्नाय मोनसे बातरि काकत ओंखारदों बियो 7000 सिम सहै दोंनो ग्राहकआ आरो Reliable source एबा बिगुमानिफ्राय खोनानो मोन्दों 4000 आनो बाकि फरायोमोन आरो 3000 आनो नगद फरायानो। बेबादिनो गोबां खबरा बिलाइ, मोखां बिलाइफोर ओंखारो। नाथाय, खनथाम-खनब्रै ओंखारनाय उनाव थैना थायो। माने जोंनियावहा Reader नि आंखाल, फरायग्रा मानसिनि आंखाल आरो लिरग्रा मानसिनि आंखाल। लिरग्राया मोजां लिरोब्ला हयत' फरायनो हागौ। ओजोंहा लिरग्रा मानसिनि अभाबखौ फुरायनोब्ला फरायग्रा मानसि नांगौ। दिनै आं मोनसे हिसाब मोनबोदों दि दैनिक आसाम खौ फरायग्रा अन्जिमाया 1.5 लाख आरो जुगान्तर खौ फरायग्राया Reader मानसि अनजिमाया 12 लाख। बे 12 लाख मानसिया फरायोब्ला निच्चय दैनिक आसाम खबरा बिलाइया थांना थागोन। किन्तु, जोंनिया 3500-7000 कपि ओंखारनानै 3000 मानसिया बाकि फरायोब्ला 500 मानसिया नगद फरायोब्ला, बे थुनलाइया थांना थानाय नडगोन। बे खबरा बिलाइया थांना थायाबा थुनलाइया थांना थाया। बिनि दिहुनगिरिया थैग्रोगोन। सिगां दिहुनगिरिया गावनि पकेटनि जाखिनि दडम्पोन दिहुन्ना साफायबाय, बाजाराव दिहुनबाय नगद फरायबाय, खायफाया बाकि लांबाय, गैलिया। नै जों दिनै बरायबाय बिथाड गांसे दिहुनदोंमोन रमान हांखोनि सनाखि बिजाब होन्नानै, रमान Script नि Movement नि सिगां-सिगां गांसेबो बिक्रि थाडखैनो, गांसेबो रावबो मानसिया बायनानै फरायाखै, रमान हांखोजों लिरनाय बिजाबखौ जों मोजां मोनो होन्नानै रावबो फरायाखिसै होनब्ला मा बायदियै जोंनि लिरगिरिया थांना थागोन? लिरगिरिया थांना थायाब्ला जोंनि थुनलाइआ बोरै थांना थागोन? थुनलाइआ थांना थायाब्ला जोंनि रावआ बोरै थांना थागोन? थांना थाया।

जोडे, आं दिनै गोग्गानानै दड, नोंथांमोननि फालि, माला गाननानै बेवहा लेकसार होनानै, आं बर' थुनलाइगिरि होत्रानै गोग्गाना बुंनो हागौ गसनानै। नाथाय, आं बाजाराव थांनानै माबा गांसे बर' बिजाब नुनानै बायना फरायाबा आं भन्द, आं हाइप'काइड सासे, आं बर' थुनलाइखौ मोजां मोनाखै। आं खोब जाखांफुनाय सासे Writer नुदोंमोन मुश्री नन्देश्वर दैमारि, बै अम्बागामिनि। आं सोंनानै मोन्दों बिक्रि थांथाराखैनो। खननै साफायबाय बेसेरा मोनसे short Story आरो मोनसे Novel बिक्रि थाडखैनो। आच्छा बि थैया, सोर थैगोन? बे Writer आ थैगोन निच्चय। बिनि थाखाय जों बर' थुनलाइखौ बर' साहित्य सभानि हाबाफोरखौ Intensive खालामनो हायाखै। दिनै बर' साहित्य सभानि सोमोन्दै मोत्रैसो अभिजग खोनानो मोन्दों- प्रथम अभिजगआ जाबाय- बर' साहित्य सभायालाइनो हारसाखौ बर' गथ'फोरनि सायावहा compulsory हिसाबै जाबना होनो नागिरदोंनो। साहित्य सभाखौ सरजन्त्रकारि होत्रानै बुंदों। आरो बिनि लिदारा, बिहुराम बर' बिब्दि बुंनाय जादों, बिब्दि होत्रानै बुंदों। आं बुंनो लुबैयो जे जिखिनि संबिधानिक खोथा बर' साहित्य सभाया फिसा मोनसे संबिधान दड। बे मथे बर' साहित्य सभानि Secretary आ जेबो नड। President आनो All in all। संबिदानखौ फरायना नायनो हागौ। President आ जि बुंदों बिनि सायाव Secretary आ जेबो बुंनो हाया। Secretary आ Mere माने केरानिल'। आं साधारन सासे बर' साहित्य सभानि केरानि। आं बेवहाय जातिनि against यै खुनु सरजन्त्र खालामाखै। बेव मोनसे खोथा जादोंमोन 1968 सनआव Secondary stage आव जेब्ला बर' मेडियाम जाबाय, हाइस्कुलाव होनबाना मोनसे Expert Committee दादोंमोन। बे Expert कमिटियाव बर' साहित्य सभानिफ्राय साथाम दडमोन बर' साहित्य सभानि President गौरि कान्त ब्रह्म, मन'रन्जन लाहारि आरो जगदिश ब्रह्म। बिथांमोनानो language policy खौ दाना होदोंमोन। 1st language बर', Second language इंग्लिस, 3rd language हिन्दी आरो आसामिसखौ बर'फोरा बाध्यता मुलक हिसाबै फरायगोन Additional subject हिसाबै। नाथाय परिक्षा होनो नाड। बेयो मोनसे decision मोन, बर' साहित्य सभाया 1971 सोनाब सालबारिनि Annual conference आव मानिना लादोंमोन। नाथाय दिनै बर' फरायसा आफादआ बिनि बागै बदनाम दिहुनदों आंनि। बै समनि बर' फरायसा आफादनि आफादगिरिया दम्बरुधर ब्रह्ममोन दानि Ex-M.L.A. दिनै बिथाड मोनसे समआव, माने बे बर' साहित्य सभाजों नांजाबफानायमोन। बुंनो थाडेब्ला बिथाड बर' फरायसा आफादनि Founder

President मोन आरो बै समआव General secretary आ कनकेश्वर नार्जारिमोन। आरो बिथांमोननि दिनावनो बे प्रस्ताबा, बर 'खौ 1st, इलिस 2nd, हिन्दी 3rd आरो Assamese खौ बाध्यतामुलक उपरन्सि हिसाबै आन्जाद होयै हिसाबै फोरोंनाया बे सालबारि conference निमोन। Conference आव जेब्ला मोनसे प्रस्ताब पास खालामो बेखौ कार्यकरी कमिटिया कार्यकारि खालामनाया बिनि बिबान। नाथाय 1985 सनआव आसाम सरकारा गावनि सिगांनि commitment खौ गारनानै मा खालामदों Assamese खौ गारनानै मा खालामदों Assamese खौ 3rd language खालामनानै प्रस्ताब लाबोबाय। 1985 सननि नभेम्बर मासआव बे प्रस्ताबखौ लाबाय हितेश्वर शइकीयाया सीफ मिनिष्टारमोन होमब्ला बे समआव खुनु गलमाल गैया। रावबो होबथायाखै। बे बिहु बर'आ जि खुनु जातीय समस्या, बर'नि समस्या नुब्ला हारसाफोरजों नांलाय-खमलाय खामनानै इंराजियावनो जा असमीयाआवनो जिखिनि बातरि दंमोन मोनफा-मोननै Protest article लिरबाय थायोमोन। आं लिरदों, बै समआव लिरदं बर' साहित्य सभानि secretary हिसाबै, जे 3rd language कुनु दिन जानो हाया, कुनु दिन मानिनो हाया होत्रानै। Record दड। बेनि उनावहा गमामायैनो 1986 सनआव कार्यकरि खालामनो ओंखारबाय होनब्लाबो जों प्रतिबाद खालामदों। जों बुंदों- 1971 सननि प्रस्ताबा थानो नांगौ होत्रानै। नाथाय, दोलोसेनिफ्राय बुंबाय, रौतायाव जादोंमोन एबसुनि conference, बेव बुंबाय जे हारसाखौ सोलोंथारा। आं बुंबाय सोलोंथाराबा Memorandum खौ लिरनानै होदो। आं निजे ड्राफ्ट खालामदों हारसाखौ सोलोंथारा होत्रानै आरो जुन मासआव प्रफुल्ल महन्तनो लिरना होदों आरो एबसुनि president उपेन ब्रह्मखौ बुंदों- हैदो नोंसोर थाबैनो। हैनायबो जादों। बिनियाव रायलायना फैनानै change जाबाय बिथांमोना। जे Additional subject हिसाबै सोलोंगोन। बेखौ लानानै 1986 सननि चम्पाबती हाइस्कुलाव थांनाय आगष्ट मासआव गुलमाल थांदों जोंहा। बेनिफ्राय मोनसे प्रस्ताब लानाय जादोंमोन दि बेखौ expert committee नो दैथाय हरनाय जाथों। आरो expert committee नि रिपर्टखौ annual conference आव थिक खालामगोन होत्रानै। जिखुनु policy matter खौ annual conference आव लानाय जायो। आरो annual conference आव थांनो नांगौ होत्रा जुक्ति होदोंमोन आं आरो बियो नोंगौ खोथा। Annual conference आव लानाय 1000/1500 डेलिगेट लानाय पलिसिफोरखौ, बै डेलिगेटफोरनो होफिन्नाया मोजां। कारन बर'नि जि Demography बियो खोब मोजां नड। जों दिनै जि-जि जायगायाव बर' मेडियाम फोरोंदों, नोंथां मोननो

बुंनो थाडे सनितपुरआव हारसाखौ बाध्यतामुलक फोरोंदों। दक्षिण गवालपारा जिलायाव हारसाखौ बाध्यतामुलक हिसाबै फोरोंदों, मरिगावआव बाध्यतामुलक हिसाबै फोरोंदों। हारसाखौ फोरोंगोन होन्ननै बुडेबोला बेव बर' मेडियामखौ सोलोड बे जिलायाव बे बादि खायदा खालामनानै जों बर' मेडियामखौ फोरोंदों। दिनै जों कालाइगाव जिलायाव थानो हाया। कालाइ गामियाव हारसाखौ फोरोंदेरगोन होन्ननै बर' मेडियामखौ सोदों जाबाय। औरैबादि जिलायावबो जों बर' मेडियामखौ सोदों जेराव बर' भाषाखौ रोड-बेबादि complexity गेजेरावहा बर' साहित्य सभाया दड। आरो बेनि गेजेराव जोंनि अनेक माबा दिहुन्नय जायो। गतिके, जों बुंदोंमोन जेरै बुंदोंमोन बेनिनो तामुलपुराव प्रस्ताब लादों जे 1971 सननि language policy खौ गारनांगौ ना गारनाड working committee नो बिबान होनाय जाथों। आरो गारोबा working committee आ गारथों। दाखालि 20 सेप्टेम्बरावहा 1971 language policy खौ गारनायनि प्रस्ताब लाबाय होनब्ला जों फरमेलि फैबाय थदों, इनफरमेलि फैनांगौबा बर' साहित्य सभाया बायनो हागौ। सोरबा राजनैतिक दोलोआ गावसोरनि पार्टिखौ सिफायना खावनै-खावथाम खालामनो हागौ, नाथाय जों बर' साहित्य सभाखौ हाया होन्ना किसुमान मानसिफोरा सानबाय थदों। बर' साहित्य सभाखौ खावनै-खावथाम खालामनो हाया होन्ननै। जाहा-थाहा decision लाबोला बर' जातिया खावनै-खावथाम जागोन होन्ननै साननाय जादों। बे apprehension आव बाथ्राफोरखौ लानो नांगौबोला जों smoothly लानो नांगोन। नाथाय बाथ्राखौ सानाब्लानो नानान बांसावलाबाय थदों। मोनसे अपबाद लाबोनाय जादों जे बर' साहित्य सभाया बर' रावखौ Associate Official Language आव substantial सोदोबखौ सोदों Official Language Act आवहा होन्ननै। थानाय 1985 सननि ब्रै एप्रिलआव Assam Associate Official Language Amendment Act खालामनाय, बे एक्टआव substantial सोदोब मोनसे दड। माने सारांस, नुनो मोन्नाय बादि सुबुं अन्जिमा जि जिलायाव बर'फोर दड, बे जिलाफोराव बर' रावखौ Associate Official Language खालामनाय जादों। substantial सोदोबखौ बर' साहित्य सभाया सोदों होन्ननै, president जों secretary जों सोदों होन्ननै बुंदों। बेवहा आं नोंथांमोननो बुंनो लुबैयो Indian constitution नि 345/347 धारायाव दड - बबेबा मोनसे जिलायाव, state आवहा official थासेयावबो दोलोसे मानसिया गावसोरनि बुंग्रा भाषाखौ official language खालामनो नाजायोबोला आरो जाय जिलायाव रावखौ बुंग्रा मानसिया Substan-

tial ब्ला होमब्लानिया राष्ट्रपतिया एबा state legislature आ by Enactment लोगो official language खालामदेरनो हागोन होत्रा बुंदों। बे Substantial सोदोबआ Indian constitution निफ्राय फैदों। जिदिना decision लाबाय बे दिनावनो मोनसे expert committee दादोंमोन, बेवहाय गासैबो सरकारि उकिलफोरा फैदोंमोन। मा खालामनो state नि जिफोर legal adviser फैबाय, constitution दिहुनबाय, Central Home Ministry निफ्राय फैनाय अडरखौ बहनबाय। Home Ministry नि order फैनाय अडरआव जाय जिलायाव बर' राव बुंनाय अनजिमाया 60% ब्ला बेफोर जायगायाव बर'खौ Associate Official Language होनो हागौ होत्रानै। जोंहा जिला हिसाबै 60% गैया। ककराझार जिलायावनो जोंनिया 33% ल'। आरो गुबुन जिलानि खोथाखौ बुंनोनो नांलिया। Central Home Affairs मथै जोंनिया official language जाया। Substantial मथैनो जागोन औरैबादि जाबाय आरो बेव substantial सोदोबआ बेव हाबबाय। Constitution निफ्राय फैनानै हाबदों, बेखौ बर' साहित्य सभाया सोनाय होत्रानै बुंदों। जों सोआखै। बर' जातिनि प्रति बर' जातिनि against यै जेबो conspiracy गैया एबा सरजन्त्रबो गैया। आरो गैयैखायनो दाखालि तामुलपुरनि conference आव जों गासिबो Central Committee नि मेम्बारआ बदनाम लानो हालिया होत्रानै आरो जिहेतु राइजोफोरनो जोंखौ नांलिया जों Mass Resignation होनो होत्रानै थांबाय। नाथाय बेवहायबो president खौ फैनो होआखिसै मिथिंआव। President आ absent थायोब्ला Executive Body खौ dissolve खालामनो हाया, बे मोनसे नियम ओंखारलायबाय बर' साहित्य सभानि constitution आव। Vice-president आ मिथिंखौ preside over खालामनो हागोन, नाथाय executive body खौ dissolve खालामनो हाया। बे कमिटियाव जों बादि मानसिफोरआनो थानांलायबाय, बे कमिटियाव आरो मोनसे खोथा बुंबावनाय जादों- बर' साहित्य सभाया सेन्ट्रल गभनिफ्राय बहुत रां लाबोनानै बर' Dictionary खौ दाबो दिहुनाखै होत्रानै बदनाम दिहुनदों जाबाय। आइफोर-आफाफोर, बर' साहित्य सभाया central Govt. आ 50,000 टका हरदों, बर' dictionary दिहुत्रो। बर' Dictionary खौ बिथां आदा प्रमद ब्रह्मनो बिबान होनाय जादों। नोंगौ द (6) बोसोर जाबाय बे स्किम दिहुत्रो लानाया। मानो द' बोसोर जाखो Central Govt. आ बुंदों Dictionary Standard जानांगोन आरो बेयो I.P.A. जों बर' सोदोबनि उच्चारणखौ होनो थिनदों। जानांगोन। International Phonetical Alphabet बर' सोदोबनि

मोनप्रोमबो सोदोबनि उच्चारणआ मा बायदि होनो थिनदों। बर' सोदोबनि उनाव I.P.A होनांगौ। बेनिफ्राय इंराजी अर्थ लिरनांगौ, हिन्दी अर्थ लिरनांगौ आरो बर'आव ओंथि लिरनांगौ। सानसेयाव माब्लाबा मोनब्रै-मोनबा बा दसता-बारता सोदोब लिरनो हायो। मोनसे Stantdard Dictionary लिरनायनि खोथा 20/25 खान Dictionary consult खालामनांगौ। जों बेलतलाआव मोनसे न'भारा लानानै मासआव 650.00 रांहै अफिसखौ बोसोरब्रै दोनबाय। 650.00 रांहै बेसेबां भारा थांगोन। मानाव गेदेर आदा ब्रह्मनो फ्राय 32000.00 हाजार टाका होबाय। रामचरण ब्रह्मनि helper नो जों 100.00 टाकायै 24 मास लाखिदों बिथांनोबो 24000.00 हाजार टाका होबाय। बे 50,000.00 हाजार टाकाया बेसेबां दिन थांगोन। दिनै थेवबो नोंथांमोना नुदों आथिं-आखाइ लरहायनो हाया। बिथांखौ डकाति बायदियै फुनिफ्राय लावथि लानानै नोंथाड बे Dictionary खौ फोजोबथारनांगोन होन्नानै अनालाबानो अन्थाइ बिखाजों लिरहोबाय थदों। दिनै 40 हाजार जाबाय Word आ। Central Govt. जों Agreement मोन Word खौ 60 हाजार खालामनाय। जों 60 हाजार हालिया राइजोआ जदि धोर्य गैयाबोला। सोरबा फुनिफ्राय लावथि लाना होसोब्लाबो जों बे Dictionary खौ 60 हाजार खालामनो हाया। जों 40,000-45,000 हाजार Word खौ जानुवारिनि last आवनो manuscript खौ दिहुत्रो हासिगोन होन्नानै आं दिनै बेवहा बर' साहित्य सभानिफ्राय declaration होदों।

जों रावखौबो थगायनो थाडखै। हाबाया जायैखाय आंनि नआवनो दिनै 7 मास जानोसै आदाखौ लाबोनानै हाबा मावहोदों। आदाया फुनि 5 बाजिनिफ्राय मोनाबिलि 5 बाजिसिम बे बोराय देहाखौ लानानै हाबा मावयो। बिथाड जि समाव आरामै थानो नांगौमोन बे समाव बिथाड आंनि नआव, रौताआव फैनानै 14 हाजार word लिरदों, बेबो हिन्दी अर्थखौ होनो हायाखै आरो हिन्दी अर्थ होनो expert नागिरनांगोन। बे dictionary आ बेदर गोदानाय बाथ्रा नड। सिखा लाबोबाय, गोदाबाय जाबाय। बेयो language नि बाथ्रा, बेव गोबां analysis खालामनो गोनां जायो। जों सम मोनलिया बे बायदि गुलाय-गुजायनि गेजेरजों, जों Dictionary खौ दिहुनगोन।

आरो मोनसे बुंबावनाय जादों बर' रावआ मानो Eight Schedule आव हाबाखै। बर' साहित्य सभाया हाबा मावआखै होन्नानै। आं दोहै बुंबाय, बर' साहित्य सभानि गासैबो demand charter आवहा बेफोरो दड। बर' भाषाखौ Eight Schedule आव सोनो नांगौ, demand खौ जेब्ला खालामबाय मिथिनो मोनबाय जे Eight Schedule आव सोनायनि सिगाडव साहित्य एकाडेमिनिफ्राय

recognition मोनग्रोनांगौ। साहित्य एकाडेमिनिफ्राय recognition मोननोबोला मोनसे भाषानिफ्राय खमसे खम जौसे (100) standard बिजाब बोसोराव ओंखारनांगौ। I.P.A. गोनां Standard Dictionary गांसे ओंखारनांगौ आरो बे language नि History of literature थानो नांगौ। इंराजीयाव लिरनाय जानांगौ। बेफोर जेबोआनो जायाखै जोंहा। Dictionary आरो History of literature नि manuscript खौ नायनो फैगौ फेब्रुवारि-मार्चआव साहित्य एकाडेमिनिफ्राय मानसिफोर फैगोन। तामुलपुर conference आवहा साहित्य एकाडेमिनि secretary खौ लिंन लामोनाय जादोंमोन। बिनि सिगाडव बिथां मोनजों खननै रायज्जायनाय जादोंमोन। बेव बिथाड स्पष्ट हिसाबै open meeting आव थानानै बुंदों जे- नोंथांमोननि Language आ जायफोर generously literature फोर नांगौ fulfil खालामबायब्ला जों फेब्रुवारि-जानुवारिआव नायनो फैगोन आरो बेनि उनाव recognition होनाय जागोन। Recognition मोन्नायाबो गोब्राब खोथा। मानोना साहित्य एकाडेमियाव गासिबो असम साहित्य सभानि मेम्बारफोर दड। ड० बिरेन्द्र कुमार भट्टाचार्य बिथाड Vice-President, नगेन शइकीया आरो ड० महेश्वर नेउग दड। बिथांमोना मेम्बार। असम साहित्य सभाजों जों मोजां नड बर' साहित्य सभाया। अनेक खेत्रआव बिथांमोनजों गोरोबनो हायाखै। आरो बे खोथाखौ लानानै बिसोर जोंखौ सापर्ट होगोन ना होआ जों मोजाडै मिथियाखै। थेवबो मा गोहोजों इन्द्रनाथ चौधुरी secretary, साहित्य एकाडेमिनि बिथाड तामुलपुर कनफेरेन्सआव डिक्लेरेचन होदों जे generous फोरखौ fulfil खालामब्ला जों recognition खालामनो तबे बिथांमोना फेब्रुवारिआव enquiry खालामगोन फैगोन बिनि थाखाय प्रस्तुति सलाइदों। बे Dictionary नि manuscript दिन्थिनांगौ आरो History of Boro literature खौ दिन्थिनांगौ आरो थानाय बोसोराव publish जानाय अन्ततः 100 (जौसे) बिजाब दिन्थिनांगौ। साहित्य एकाडेमिनि बियो criteria अन्ततः मोनफा language आव सल', novel, short story आ annually 100 खान Standard Dictionary बिजाब ओंखारनांगोन। आरो I.P.A. गोनां मोनसे standard नांगोन आरो नांगोन बिसोर बुजि मोननाय बायदियै History of Boro literature नि जारिमिनारि गांसे बिजाब। बेफोरखौ खालामजोबनो हाब जों साहित्य एकाडेमिनि recognition मोनगोन आरो recognition मोनब्लासो eight schedule आव सोजागोन। दा Eight Schedule आव direct मोना। दा Eight Schedule आव लाइन जाना दड। से नम्बराव मनिपुरी दड। मनिपुरीआ साहित्य एकाडेमि recognition जाबाय।

नै नम्बराव नेपालि दड। साहित्य एकाडेमिआव recognised। कंकानी दड 3rd आव, काश्मिरी दड, बेफोर बायदियै स्नि (7) language खौ साहित्य एकाडेमिया recognition होबाय। बे स्नि (7) आव बयबो demand खालामदों जे जॉनिया साहित्य एकाडेमिनि recognition मोनबाय। जॉखौ eight schedule आव सोनांगौ। मनिपुरावथ' आन्दोलन सालायदों। बेनि थाखाय आन्दोलन सालायनो हानायनि जॉनिया समय फैयाखै।

आं बारा बाथ्रा मा बुंनो, आं अदालगुरियाव बहुत दिन खोथा बुडाखै। बहुत दिन बुंबाय सिगाडव। आं गेजेराव खै बोसोरसो फैयाखै। नै दिनै नोंथांमोननि सिगाडव हाबफैदों। आं फैनायनि कारनाबो बेनो जे जॉनि बिरुद्दे अपप्रचार जादों। आरो अपप्रसार, बे कारणाव जानो मोनदों जे किछुमान मानसिया हाबा मावब्ला धल दामनानै आं मा मावदों फोरमायनानै मावो। जों बर' साहित्य सभाया जेरावबो धल दामनानै हाबा मावाखै। धुबुरीनिफ्राय जनाइसिम बे 2500 हजार खान एल.पि. स्कुल, हाइस्कुल, एम.इ. स्कुलावहा, एम.भि. स्कुलाव बर' मेडियाम। औरैनो हाबाखै। बर' भाषाया औरैनो Associate Official Language जायाखै। आरो दासिम NEHU (North-Eastern Hill Univerisity) आव बर' MIL औरैनो जायाखै आरो गुवाहाटि University आव औरैनो बर'आ MIL जायाखै। दा नोंथांमोना दाखालिनि तामुलपुर conference आव जायफोर थांदों बेयावहाय Vice-chancellor थांदों गुवाहाटि इउनिभारचिटिनि। बिथाड खोथा होदों- आं दिनै तामुलपुर conference आव खोथा होदों दि बर'नि Department गौहाटि इउनिभारचिटिआव खुलिसिगोन। दा जॉनियाव बिजाब बिबाय थादों, बेयाव literature नि एम.ए. फरायनाय बहुत गथ' दड, बहुत फोरोंगिरि दड, प्रफेसर दड, Language आरो literature नि। बेसेबां standard नि literature बिजाब submit खालामनो हायाखै। Main आनो जादों- History of Boro literature. बेवबो नांगौ जादों Boro Lecturer खुलिनो थाखाय बर'नि एम.ए. खुलिनो थाखाय। आरो मा नांगौ लेकसारार नांगौ 52.5% Marks Language आरो literature आव नांगौ। जॉनियाव गैया। बेनि थाखाय जों आचल-आचलखौ दाबि खालामदों। सोरबाया दाबि खालामदों बर'खौ Department खालामनांगौ। बर डिपार्टमेण्ट। किन्तु बर' डिपार्टमेण्ट बोरै खुलिनो, बर' Department नांग्रोगौ बेयाव। बर' लेकसारार जानोबा। गौहाटि इउनिभारचिटिआव जानोबा, 52.5 English, Assamese, Bengal (इलिस, एसामिस, बेंगलि) कुनु मोनसे language आवहा Mark मोन्नाय नांगौ। गैया।

बेवखाय जों दाबि खालामबाय 1979 सननिफ्राय दाबि खालामबाय University Commission नि जितु norms दड 52.5% खौ relaxation खालामना होनांगौ होत्रा। नाथाय खालामा, खालामा जेदआवबो थाबाय। दाखालिबावयै बा (5) आगष्टआव relaxation खालामना होदों। Language आरो Literature आव 47.5 जानांगौ।

नोंथांमोना मिथि मोन्दों गौहाटी इउनिभारचिटिआ advertise होबाय बे decision नि उनाव, जे बर' लेकसारार नांगौ सानै गौहाटी इउनिभारचिटिआव। गांसेबो application गोग्लैयाखै। जों खातिर खालामनायाव गौहाटि इउनिभारचिटिया खातिर खालामदों। मुश्री मंगलसिं हाजवारीनिफ्राय application बिबाय, बिबो होयाखै। होनब्ला मानसिफ्रा ओंखारथाराब्ला, बर' डिपार्टमेन्टखौ नोंसोर खुलिहैनो हायाखै होत्रा बर' साहित्य सभाखौ खर'आव बुबाय थाब्लानो जागोन ना? बेखौ फुंनिफ्राय रायबाय थाब्लानो जागोन ना? बेनि थाखाय मानसि ओंखारनांगोन। आं दिनै बर' साहित्य सभानि बिबानखौनो बेरलाव बायदि अरथाबना दडहोत्रा बुंदों खायफाया। आं अरथाबनानै गैया आइफोर-आफाफोर। आं resign होदोंमोन। आं लांहिन conference आव गाबै-गाबै resignation होदोंमोन। आं बि.टि. फरायनांगौ, आंहा संसार जाबाय। आंहा बि.टि. फरायनानै माष्टर जानो होत्रानै। आं गंसे सरकारि स्कुलाव मास्टर एपइन्टमेन्ट मोनदोंमोन। बेव आंखौ जइन्ट खालामहोयाखिसै, नोडे डिष्ट्रिक्ट बर' साहित्य सभानि secretary जाना थानांगोन होत्रानै। साखि दड देबेन बसुमतारि, प्रलय बसुमतारि, दिनैबो थैना थाडखै बिथांमोना। बिथांमोना दिनैबो जिबित, बिथांमोना आंनि गुरु। आरो 1971 आव APSC नि second class मोनबाय आंखौ जिउराम बर'मोना मौखिक Viva-voce होनो होआखै, नों सरकारि अफिसार जागोन जोंखौ गारना थांगोन होत्रानै। आं दिनै अन्ततः एस.डि.अ. जाना थाहैगौमोन। आं बिथिनिफ्रायबो बोबथाजानाय मानसि। आरो सेसावहा मोनसे बदनाम मोनदों- बियो बर' जातिखौ जाजोबबाय होत्रानै। आंनियाव जेबो चरजन्त्र गैया। आं दाखालि तामुलपुराव थप्ला-थप्लि लानानै रिजाइन होनो, बर' साहित्य सभानि जिखिनि दड रेजाइन होनो थांनाय मानसि। Technical difficulty आवहा रेजाइन होनो हायाखै। बेवखाय आं नोंथांमोनखौ बुडे जे जोडे बर' साहित्य सभाखौ जों खौसे लाखिनांगौ। बर' साहित्य सभाखौ खावनै-खावथाम खालामबोला बे जातिया थांना थानाय नड। तामुलपुराव जिखिनि घटना जादों बर' साहित्य सभायाबो थानाय नड-खावनै-खावथाम जागोन, बर' जातियाबो खावनै खावथाम जागोन। थांना थानाय

नडगोन। दिनै बेवहा आंनि गुरु बायदि दड बाहादुर बसुमतारि, प्रलय बसुमतारि। मंगलदै डिष्ट्रिक जागायजेन्नाय समाव बिथांमोनखौ गुरु लानानै आंखौ सेक्रेटारि खालामदोंमोन। बै समयनि खोथाखौ जोंहा गोसोआव दड कुनु मोनसे गामियानो बर' मेडियामखौ मोजाडै लायाखै। गंनैसो गामियाव जोंखौ बुनो होसोदों, गाज्रि-गाज्रि खोथा बुंनानै। बे होसो जानायनि गेजेराव दिनै थैनानै थांबाय मानाव गेदेर रंसारि लंकेश्वर बसुमतारि, बिथांबो दडमोन। होनब्ला जोंहा माबा मोनसे conspiracy थायोमोनब्ला एसेबांखिनि दुखु-दाहाजों बे अनुष्ठानाव जों थायामोन। आरो बर' साहित्य सभायाव थानाय मानसिफोरा बयजोंबो मुगैजायो। आंहा गेदेर-गेदेर हासा बन्धु दडमोन। आंनि जेसेबांखिनि meritorious लोगो दडमोन, बिसोरबो आंखौ नायनो हालिया दानिया। सासेबो बर' साहित्य सभायाव थानायखाय नायनो हाया। गासैबो बर' मानसिनि बादै गुबुन मानसिया हामा मोनो। बर' साहित्य सभानि वार्कारफोरखौ, अफिस बियेरारफोरखौ मुगैयो, हानायसिम मुगैयो। एसेबां मुगैजानानैबो आं दडमोन बे अनुष्ठानाव। थानायाबो मानि थाखाय सानैसो लोगोनि थिन्नायाव। दिनै गावनि आखाइजों दानायखौ, गावनि आखाइजों सिफायनो लुबैयाखै। कुनुदिन सिफायनो लुबैया आरो लुबैनायबो नड। बेयो थाना थार्थों। बिनो दिनै बर' साहित्य सभानि प्लेट फर्मआ बयनिबो। बेवहा जोडे जातिनि थांनाय-थैनायनि हारिमुखौ, रावखौ बोखांनाय खोथाल'सो रायलायो। राजनितिनि खोथाखौ बेव रायलायनो हाया, रायलायनाया मोजां नड आरो बेखौ रायलायोबा बर' साहित्य सभाया गावगोन। आंखौ राजनितिक खोथा, आंनि बे प्लेटफर्मनिफ्राय बुंजानो लुबैदों। आं बुंनो हानाय नड आंखौ सोरबा गावथारनो हागौ। किन्तु आं बे प्लेटफर्मआव जेसेबां दिन बर' साहित्य सभानि फाइलखौ फाप्लियाव बाननानै लागोन, एसेबां दिन कुनु राजनैतिक बाथ्रा बुंनो हानाय नड, कुनु राजनैतिक दोलोनि उन-उन खारनो हानाय नडगोन। आंखौ नोंथांमोना बेखौ खालामनो थोन्नाय माने बे बर' साहित्य सभाखौ सोखावनो नाजानाय। आं बेखौ लुबैनाय नडगोन। आं मा बुंबावगोन बे खिनिखौनो बुंनानै आं बर' साहित्य सभानिफ्राय बुंनो गोनांखौ फोजोबबाय। गोजोनथों। ■

नबीन मल्ल बर'नि सुंद' सल'आव बर' समाजनि सावगारि

—प्राणेश्वर बरनार्जि



प्राणेश्वर बरनार्जि (1972) : भेरगावनि सानजा-साहा आरो टंलानि सोनाब-साहा थानाय पुब-बाबरिखाट गामिया बिथानि जोनोम थावनि। बिथांडा सुंद'सल', खन्थाइ-रायथाइ बिजिरनायाव गोखों आखाइ दं।

जागायनाय :

सन्देह गैयाब्लासेनो गारांसेयै बुंनांगोन दि नबीन मल्ल बर'आ सासे सिगां सिरिनि आरो गिबि मासिनि गागि सल'गिरिनि सायाव सावरायनो थांनाइयाबो एथबां गोलै नड। बेल'नड सल' एबा सुंद' सल'नि सायाव बुंफुरनो थांनाइया आरो बेनि बेसेनथिखौ सुनो थांनाइया आरोबावसो गोब्राब खामानि। सिमानबो लाखियोदि आं माब्लाबाबो थुनलाइनि बिजिरगिरि एबा सावरायगिरि नड। थेवबो सासे नेहाद बिजाब फरायग्रा सुबुं महरैल' बे गिदिर नोगोराव हाबसन्ना लानाय बादि गोथै साहसखौ खालामनो सानबाय। बे लिरबिदाडव आं नबीन मल्ल सारनि सुंद' सल'आव नुनाय एबा मोन्दां हानाय सानसिनि सायावसो मोनसे सावगारि एरखांनो नाजाबाय।

लिरफुथि :

जों मिथिगौ दि नबीन मल्लआ सासे लिन्थियै गागि सल'मागिरि, राइथाइगिरि आरो दावबायनाय सल'गिरि महरैबो मुंदांखा जानो हाबाय। मख'जाथावदि बिथाड "हादान" मुंनि सुंद'सल' बिजाब लिरनानै थांनाय 2004 माइथायाव बड' साहित्य सभानिफ्राय मानगोनां थुनलाआरि बान्था समेश्वरी बान्थाखौ मोत्रो हाबाय। बिनि अनगाबो बिथाड 1996 माइथाइयावनो "गोसो फानजारि बिबार" मुडै गांसे सुंद' सल' बिजाब बरनदोमोन। "हादान"आ बिथां मल्लनि नैथि सुंद' सल' बिजाब।

1975 माइथायनिफ्राय सुंद' सल'गिरि महरै गावखौ सिनायथि होनो हानाय नबिन मल्ल बर'आ नैजिसे जौथाइनि सासे रोंखा राखा सल'गिरि महरै गावखौनो गायसननाय। गागि सुंद' सल'गिरि आरो सल'मागिरि नन्देश्वर दैमारिनि समरा-समरि समनि सल'गिरि नबीन मल्लनि सुंद'सल'फ्रा आंगिक आबुं आरो गोगो आखुनि। सुंद' सल'फोरनि बरनायलु आदब आरो दाथायफोरा साबजानाय जादों। जाय आदबा फरायग्राखौ सुंद'सल'नि खाथिसिनाव बोथाबना लाडे। फरायब्लाबो फरायब्लाबो अहानाय मोनै नबीन मल्लनि सुंद'सल'फोरनि दाताया गुफुं आरो बेदर बहरा।

सल'गिरिनि बरनायथि खान्थि एबा बिथा गायसन्नायनि रोंगौथियाव सल'फोरा आंगिक बहरा जानानै बेरखांदों। बिथानि सल'फोराव नोजोर लाथावना मोनसे आखुआ जाबाय बर' समाज सावगारिनि होंगो-दोंगो। बर' समाज सावगारिखौ समायनाहै बेरखां होनो हानाया बिथानि सल'फोरनि समायना मोनसे आरिमु। सुंद'सल'आ मोनसे आर्ट थामहिनबा आरिमु।

सावगारि एरनाय जेरै मोनफा आरिमु। बेबादिनो खन्थाइ लिरनानै आवरायनाय, मेथाइ लिरनानै देंखो होना रोजाबनाय, लेखायैनो आंगिक आबुं एबा खहाबगोनां सुंद'सल' लिरनो हानायाबो मोनसे समायना आरिमु। बे आरिमुथि नोजोर लानानै सोरजिनाय मल्लनि सुंद' सल'फोरा खहाबगोनां जायाखै होत्रा रावबो सिरियास सल' फरायग्राफोरा गोदान फुन्नानै बुंनो हाया।

बिथां बर'नि दोंफ्रोम सल'फोराव बर' समाजनि मोनफा नड मोनफा सावगारि बेरखांनाय नुनो मोनो। बर' सुंद' सल'नि आयदा बेसादफोरा बांसिनआनो बर' समाजनि थासारिखौ बिथा लानानैनो सोरजिजोबफ्रामनाय। मोनसेथिं नड मोनसे खनार्थिब्लाबो बर' सुंद'सल'फोरखौ बर' समाज खान्थि, रां खान्थि, गांनाय-उखैनाय, आंखाल-बिखाल, आखल-आखुखौ गायसन्नानै सोरजिनाय नुयो. बैफोर मोनफा मोनफा सुंद' सल'नि आखु। गुबुन फारसे सात्रा नाइयोब्ला मोनदांमोनोदि जाय बर' सुंद'सल'फोराव बर'नि आखल-आखु, जानाय-लोंनाय, गांनाय-उखैनाय आरि आखलखौ बेरखां होनो हायो बै सुंद' सल'गिरिनि मोनफा जाफुंसार सुंद' सल' महरै सिनायथि होनो हायो। मोनसे हारिनि राव थुनलाइआ बै हारिनि आसार खान्थि एबा हारिमुनि सावगारि बेरखां होनो हानाइया मोनफा हारिनि राव थुनलाइनि जर'खा आखु जाखायो। बिब्दियैनो बर' सुंद' सल'आबो बर'नि गुबै सावगारि बेरखांहोनो थानाइयाबो रोखोमसे आखुआनो। बे बादिनो नबिन मल्ल बर'नि बुरजा बां सुंद'सल'फोरानो बै आखुनि।

बर' सुबुं समाजनि आखल-आखु दानानै थि समाव थि थावनिआव फजनानै सल'खौ दावगालांहोनो हानाय एबा बर' हारिनि समाजारि आखल आखुखौ बेरखां होनो हानाइया नबीन मल्ल बिथानि मोनसे जरखा जाफुंसार। जाम्बा-जाथा बर' सुबुं फोरनि थानथि गैयि समाज खुंथिनायनि जायफोर सावगारि, बेखौ गुफुंहै बेरखां होनो हादों सुंद सल' नि गेजेरजों सुंद' सल'गिरिया। बर'फोरा फामो जाबायथिनो एबा हादान सिफायथिनो मौजां मोनग्रा हारि होनोब्ला बांसावनाय जायागोन। बर'फोरा हादान सिफायनो थानानै एबा फामो थाबायथिनानै आलाय-आथानि जाथिनाइया गोदान बाथ्रा नंलिया। गोदोनिफ्रायनो गोबां बर'फोरा गोजाम न'बथि नागारनानै गोदान थावनि नागिरनानै अरणबारि, हाजो-हाला थानानै हादान सिफायथिंबायनानै फामो जाथिंदों। आग्लाबो दाबो। नाथाय बिसोरो गोबां समाव दिदोमै थानो हायिआव गोजाम गामिसिम फिन गिदिंबोफिन्नानै हालाय-हाफाय जाबायथिडे। बे बादि नंगुबै आरो थार जाथायखौ सुंद' सल' महर फोरमायथिनानै बेदि बर'नि थार संसार जानायनि बिजों जानो हाया बेखौ सल'गिरिया खेंसालियाहै फोरमायदों। बर' समाजनि संसार जानायनि आदब खान्थिखौ फोरमायनो लोगोसे फोसाबनो नाजानायाबो बिथां सल'गिरि बर'नि सल'लिरनायनि थांखि।

मख'जाथावदि नबीन मल्ल बर'नि सुंद' सल'फोराव बर' गामियारि समाजारि खुगा राव बाहायनो नाजानायाबो सल'नि सानस्रिफोरमायथियाव लिरथाइ सोमजिहोदों। मानोना बर' खुगा राव बाहायनाय लौंगो लोगो सल'फोरा फरायथाव आरो खहाबगोनां गोरलै जादों। बर' खुगा राव सोदोबफोरखौ थि जायगायाव फजनानै सोरजिनाय मल्लनि सुंद' सल'फोरखौ गोगो खहाबगोनां मोन्दाडे। नखराव बाहायनाय गामियारि सोदोबखौ बाहायनो हानाइया सल' गिरिनि सल' लिरनायनि आलादा मोनसे आदब। गागि बर' सुंद' सल' लिरगिरि बिथां नन्देश्वर दैमारिनि सल'फोरावबो गामियारि खुगा रावखौ हुरा-हुरा बाहायनाय नुनो मोनो।

गुबुन मोनसे बाथ्राया जाबाय सुंद' सल'आव आखलफोरनि मुंखनाय। बिथां नबीन मल्ल बर'आ बिथानि सुंद' सल'फोराव गोबां समावनो आखलफोरखौ बर'नि गुबै मुंजों फोरमायनो नाजानायखौ नुनो मोनो। जैरै फारियै—बिरदाव, देलाइश्रि, रैमोन, अनजालि, थेख्ल', जारौ, बुदेर, सोमदोन, गोम्बोर, थबसा, दुरलाय, हंला, बिंबुंसा, दालांगा, सुबुंसा, अरगा, मेरगा थेम्फ्रा, मायनावस्रि, दादुरा, आलाइस्रि, जाम्फ्रि-आरि सोदोबफ्रा गुबै बर' सोदोब। ओंखायनो बिथानि रेबथाइ फोराव बर' समाजखौ लानानै लिरनायखौनो मोन्दांनो मोनो।

नोगोरारि एरिष्ट 'क्रेट थासारिनिफ्राय उदां सानस्रियाव लिरनाय बिथां बर 'नि सुंद' सल 'फोराव नंगुबै बर 'गामियारि नखरनि सायखं नुयो।

नबीन मल्लनि "जिउमा" या मोनसे सानस्रि गुदु बरनायथि थानाय मोनसे सुंद 'सल'। बेयाव टाउन-सहरनिखुइ दि गामिनि मिथिंगायासो साबसिन बे खोथायासो सल 'नि गेजेरजों रोखा रोखा बेरखांदों। बुदेर माहाजोना गावनि फिसाज्ला गेजेर सोमदोननि न'आव बेराम नायजानो थाहैदों। नाथाय बेराम नायजानो फैनाय बुदेर माहाजोना टाउननि दावराव दावसि थासारिखौ इसेबो मोगाबाखै। मटर गारिनि सोदोब, कारखानानि सोदोब आरो बाइदि सोदोबनि दावरावखौ बुदेरा सैथारा। बिथानि बादिब्ला गामिनि थासारियासो साबसिन। गोजोनथाव। बुदेरनि बादिब्ला टाउन सहरनि जन्थ्रफोरनि सोदोबनिखुइ गामिनि दिंखि, उवाल सौनायनि सोदोब, लावखारनि सिफुं सुनाय, गामिनि मानसिफोरनि खुगानि मेथाइ आरो हाजो गुदियाव थ'-थ' दंफां दान्नायनि सोदोबखौसो साबद्राय मोनो। ओंखायनो टाउननि थासारिखौ बुदेरा सैथारनाय मोनाखै। बियो बिनिखायनो हागौमानि टाउननिफ्राय जायखारबोनो सान्दों।

बे सुंद 'सल'आव टाउननि सोलाय गामिनि महरासो समायनायै बेरखांदों। मानसिफोरा जैरै बादि जान्त्रिक जालानो हमदों, मानसिनि गोसोफोराबो सुबुंथिखौ नागारना जन्त्र बादि बेसादारि जालानो हमदों। नाथाय बेयाव बर 'फोरादि दाबो जान्त्रिकखौ मोगाबा एबा बर' सुबुंफोरा मिथिंगायारि महरै देरबोदोंखाय मिथिंगाखौसो मोजां मोनो बिनि मिथिंगायारि सावगारिखौसो एरैनो नाजादों। बेयाव बर 'फोरादि गामियारि समाजाव थानानै मोजां मोनग्रा हारि बेखौ रोखा बेरखांनाय नुयो।

बे बादिनो बिथां नबिन मल्लनि हादान हादानाव हेड माष्टार, माइनावस्रि, आखु बादि माखासे सुंद 'सल'आव बर' समाज सावगारिखौ बेरखांनाय नुनो मोनो।

थुंगेनाय :

नबीन मल्लनि सल 'फोराव मोनसे जरखा गुण मोन्नो हायो। बे जाबाय बिथानि दोंफ्रोम सुंद'-सल 'निफ्राय फरायग्राया मोनसे नड मोनसे गोदान खराख मोन्नो हायो आरो जोंबो थियाव मोनसे समिधान एबा फोसाबथिनि गियान मोन्दांनो हायो। ओंखायनो बिथानि सल 'फोरखौ फरायनानै जरखा खहाब मोन्नो हागौ। ■

गथ 'नि सोलोंथाइआव बिमा राव : बेसे गोनांथि

—कामेश्वर बर'



कामेश्वर बर' (1974) : टंलानि सा-सानजाहा थानाय घिउनाला गामिया बिथानि जोनोम जायगा। बर' राव-थुनलाइनि खामानियाव बिथाड अराइबो नांथाबना थायो। बिथाड मुरमेला गेजेर फरायसालिनि लेडाइ फोरोंगिरि।

गुदि सोलोंथाइआ जादों खम बैसोनि सुबुंनि सोलोंथाइ। सोलोंथाइआ मानसिनो मिथियैखौ मिथिहोनानै, रोडिखौ फोरोनानै गुदि गियान होयो। बे गुदि सोलोंथाइ एबा गियानखौ सासे गथ'वा 6 बोसोर बैसोसिम गोलेँयै लानाय नुनो मोनो। बे समाव गथ'नि गोसोआरि सानखांनाय गोहोआ आबुं नड। जाय खालि बिमा-बिफानि अन्नाय आरो नखर'नि आलो आलो जोथोननि बेनदोंनिफ्राय गुदि फरायसालिसिम गोदान मोनसे आबहावायाव हाबफैयो। बिनिखायनो गथ'नि सानखांनाय गोहो आरो आबेगनि गोनांथि बिथिनिफ्राय बे समाव गथ'नि सोलोंथाइनि बिजोंआ बिमानि रावानो मोजां। मन' बिगियानि बिथांमोननि नोजोरजोंब्लाबो गथ'नि सोलोंथाइ लानाय बिजोंआ बिमानि राव जानाया मोजां होत्रा गोसोथि होदों। बे समाव गथ'नि सोलोंथाइ लानो हानाय गोहोआ सिमा गोनां जानायलाय बिमा रावनि सोलाय गुबुन रावाव सोलोंथाइ लानो गोब्राब जायो। बे समावनो गथ'वा बिमा रावनि गेजेरजों गावनि गोलेँ सान्नाय आरो हारोंथायखौ रानलायो। भारतनि संबिजिदा बिमा रावनि गोनांथिखौ नोजोर होनानै हादोरनि गुदि फराइसायलिफोराव बिमा रावनि गेजेरजों सोलोंथाइ होनो बिथोन होदों।

सरासनस्रा नुनो मोनो बिमा-बिफानि रावखौनो गथ'फोरा गोलेँयै सोलोंना लायो। सासे गथ'वा बिमानि खुगानिफ्राय जा राव सोलोडे बे रावखौनो बिमा राव होनना बुंनाय जायो। जोनोमनि उननिफ्राय देरबोनाय लोगो लोगो गथ'वा जा रावाव बाथ्रा बुंनो नाजायो बे रावानो बिनि थाखाय बिमा राव। गथ'वा

मोनसे समाजारि आबहावाजों देरबोनानै लोगो-लेवा आंगो आलासि-उलासिनिफ्राय बिमा राव सोलोंना लायो।

बिमा रावआ गथ'नि गावनि राव। सुबुंनि गोसो आरो जिंगानि रावानो जादों बिमा राव। सुबुंनि दुखु-दाहा, गाबनाय-मिनिनाय, मान-दुग्गानायफोरा बेरखाडे बिमा रावनि गेजेरजों। बिमा रावाव हारोंथाय थायोब्ला गोसोनि गोथौ सान्नायखौ गोलैंयै फोरमायनो हायो। बिमा रावानो जाबाय आजै-आजौमोननि सोदोमसिनि बिजों बियो सुबुं हारिमुनि मोनसे एंगार हायै बाहागो। राव आरो सान्नायजों एंगार हायै सोमोन्दो दं। सान्नाय नडब्ला राव ओंखारा आरो राव नडब्ला सान्नायखौ बेरखांहोनो हाया। रावआ सान्नायनि बिजों। रावआ सुबुंनि साननाय आरो सानखांथाय फोरमायनायनि मोनसे गुबै बाहागो। गथ'वा गाव बिमानि रावाव जेसेबां सोलोंथाइ लानो हायो एसेबांनो बिनि सान्नाय-हनायफोरा रोखा आरो बानबुंथि गोनां जायो। बिमा रावाव राफोदधि थायोब्ला गोसोनि गुवार सान्नाय एबा गोथौ गोसोनि सान्नाय फोरमायनायाव गोलैं जायो। बिमा रावआ समाजारि बन्धनखौ राफोद खालामो। ओंखायनो सुबुंनि समाजारि रावानो जाबाय बिमा राव। बिमा रावनि गेजेरजों गहेना दाफबना बिदै बरहा थुनलाइ सोरजिनो हायो आरो समायनानि महर मुसिखौ रोखायै बेरखांहोनो हायो। समाजारि, हारिमुवारि, माहारियारि जिउवाव बिमा रावनि गोहोमथिया बांसिन। बे बाश्राखौ दार्शनिक, पण्डित, सोलोंथाइगिरि आरो ऋषि-मुनि बिथांमोना गनायबोदों। बिमा रावनि बेलायाव गोसो होनानै सोलोंथाइगिरि राइबार्ण बिथाड औरै बुंदों—"The mother tongue is at once a tool, source of joy and happiness and knowledge a director of test and feeling."

बिमा रावनि बेलायाव 1953 माइथायाव गोजौ सोलोंथाइ आयोगआ औरै बुंदों—"Learning the mother tongue does not imply merely the capacity to read and write it anywhere and a continuous addition to the student's vocabulary. It is a most potent and comprehensive medium for the education of the student's entire personality. बिमा रावनि गोनांथिनि सायाव साडलार आयोगा औरै बुंदों—"Mother tongue out to be given a place as the medium of instruction throughout the hgh school class."

गथ'नि जिउवाव बिमा रावनि गोहोमथिखौ सावरायनो थानानै जर्ज छेम्पन (George Sampon) आ औरै मत होदों—"It is not merely one

occasion for the inculcation of knowledge, it is a part of the child's initiation into the life of man."

बिमा रावनि बेलायाव पि.बि. बालार्ड (P.B. Ballard) बिथाड्ड गाव लिरनाय 'Language and thought' बिजाबाव औरै बुंदों "Training in the eye of mother tongue in which a child thinks and dreams become the first essential of schooling and the finest instrument of human culture."

गोजौनि सावरायनायनि गेजेरजों मिथिना मोनोदि गथ'नि सोलोंथाइयाव बिमा रावनि गोनांथिखौ बयबो गनायबोदों। बिमा रावआ बिमानि गाइखेरबादि। गथ'नि देहा मोदोम थोंगोर जानो थाखाय जाबादि बिमानि गाइखेरा गोनां बिब्दिनो गोसोआरि सानस्रिनि गोहो बांहोनो थाखाय बिमा रावनि गोनां। जोनोमनि उननिफ्रायनो मोनसे गुरै आरो माहि आबहावायाव बिमानि राव सोलोडे। बिमा रावनि गेजेरजों गावनि सान्नायखौ फोरमायो। सान्नायनि होनाय-लानायनि गेजेरजों सामाजिक जिउनि खामानिफोरा जाफुडे। रोंगौथिनि बाख्रिया बाडे। बिमा रावआ मोनसे माहारिनि समाजारि सोमोन्दोखौ राफोद खालामो आरो जौगा थाखोनि माहारियारि थुनलाइ सोरजिनायाव बिहोमा होयो। राव-थुनलाइआ जादों माहारियारि जिउनि एंगार हायि सम्पद। माहारियारि, थुनलाइ, हारिमु आरो सोदोमस्रिनि सायाव बिमा रावनि गोहोमा सिमा गैयि।

थुनलाइ आरो शिल्प सोरजिनि गेजेरजों सोरजिसुला गोहो आरो रोंगौथिया नुजायो। राव थुनलाइनि गोदै बिदैयाव बिमा रावआ जेसेबां मदद होयो गुबुन रावआ बिब्दि मदद होआ। बिमा रावआ सानस्रि मुलुगनि राव हिसाबै मानसि बायदि रोखोमनि सात्राय फारिनि खामानि मावो। मन'बिगियानि बिथांमोननि बादिब्ला गुदि सान्नाय फोरमायनो थाखाय बिमा रावआ बयनिखुरै साबसिन। जाय फरायसाया गावनि राव थुनलायाव राफोद जानो हाया बे फरायसाया गुबुन बिजोंनि राव थुनलायावबो जेब्लाबो रोंखा-राखा जानो हाया। गाव बिमाराव आरो सर'नि गेजेरजों माहारियारि सान्नाय जांखिखाहो आरो हादोर एबा हारिनि फारसे बिबान लानायनि गियान बांहोनायाव मदद होयो। बिमा रावनि सोलोंथाइ आरो सर'नि अनगाय गुबुननि बिजोंआव सुबुं जिउनि आबुंथि बेरखांहोनो हाया।

आथिखाल मुगाया गोनोखो मुगा, बादाय मुगा। ओंखायनो बिगोमाफोरा गावनि गथ'खौ गियान-बिगियाननि सायाव सर' खालामनो बांसिन गोसो होदों। गथ'वा बिमा रावनि बिजोंआव गियान-बिगियान सर' खालामनानै मोजां

फिथाइ मोन्नो हायो। बिमा रावनि लोगोसे गथ'वा जेसेबां सोमोन्दो थायो, गुबुन रावनि बिजोंआव बिब्दि सोमोन्दो थाया। बिनिखायनो सोलोंथाइगिरि, पण्डित बिथांमोना गथ'नि सोलोंथाइ लानाय बेलायाव बिमा रावनि गोनांथिखौ फोरमायदों। गाहायाव बिमा रावनि गोनांथिनि सायाव सावरायनाय जाबाय—

क) **सामाजिक नोजोरजों बिमा राव** : मानसिया सुबुं समाजाव थायो। समाजाव थानो मोजां मोन्नाय हिसाबै जिउनि सान्नाय-हनाय फोरखौ बिमा रावनि गेजेरजों गुबुननो फोरमायलायो। बिब्दिनो सामाजिक थामोन्थानि दावगानाया बिमा रावनि गेजेरजों गोलैं जायो। जाहोनाव माहारियारि सोदोमस्रि आरो हारिमुनि महर मोनो। बुंनो थाडेब्ला बिमा रावआ माहारियारि सोदोमस्रि आरो हारिमुनि नेसोंन। बिनिखायनो सामाजिक नोजोरजों बिमा रावनि मोजां फिथाइ आरो गोनांथिया बेसेबां बेखौ गोलैंयै हमादां हायो।

ख) **सोलोंथाइनि नोजोरजों बिमा राव** : गुबुननि गासै रोखोमनि दावगानाया सामाजिक आबहावानि गेजेरजों गोलैं जायो। सोलोंथाइनि गुबुन मोनसे थांखियानो जादों सुखु आरो आबुथि गोनां सामाजिक आबहावा दानाय। सोलोंथाइगिरि बिथांमोना सोलोंथाइनि देरहासार आरो गोसारथिखौ बिमा रावनि गेजेरजों बांसिन गोसो होनाय नुनो मोनदों। मानोना बिमा रावजों गुबुननि हास्थायनाय, सान्नाय-हनाय, बान-बुंथिफोरखौ गालैं आरो रोखायै फोरमायनो हायो। जाय आदबनि गेजेरजों गथ'नि गोहोफोरा गोसारो बेनो सोलोंथाइ। बिब्दिनो सोलोंथाइनि नोजोरजों नायोब्ला बिमा रावनि गोनांथिखौ बयबो गनायनो गोनां जायो।

ग) **शिल्प आरो थुनलाइनि नोजोरजों बिमा राव** : बिमा रावआ मानसिनि सान्नाय-हनाय फोरमायलायनायनि राव। महरगिरिया गावनि शिल्पनि सायाव सान्नायफोरखौ बिमा रावनि गेजेरजों बेरखां होयो। बिदिनो बेरखां होयो सासे थुनलाइगिरियाबो। सरासनस्रा बुंनो थाडेब्ला शिल्प आरो थुनलाइनि देरहासारनाया बिमा रावनि गेजेरजों गोलैं जायो।

घ) **मन'बिगियाननि नोजोरजों बिमा राव** : मानसिया जिउनि लामायाव मोनबोनाय रोंगौथिफोरखौ बिमा रावनि गेजेरजों दोनथुमो। गावनि गियाननि रोंगौथिखौ लानानै समाजाव जिउखाडे। बिनिखायनो मन'बिगियानि बिथांमोना बिमानि रावानो सोलोंथाइनि बिजों जानांगौ होत्रा सानदों। फरायसाफोरा गाव बिमा रावनि गेजेरजों बिसोरनि सिमा गैयै सान्नायखौ गोसार होनो हायो।

बिमा रावनि बिजोंनि गेजेरजों फरायसाया बायदि आयदानि सायाव सोनारनानै गियाननि मन्दिर दानो हायो। बे बिथिंजों नायोब्ला गथ'नि सोलोंथाइनि बिजोंआ बिमा राव जानाया मोजां।

गाव बिमानि रावाव सोलोंथाइ लानाय सोलोंसाया मोगथां जिउनि जेंनाफोरखौ गोरलैयै सुम्रानो हायो। बिगियान आरो बाहायबिगियानाव सोलोंथाइ लानानै जिउनि मान दान्दाखौ जौगा होनो हायो। बिनि अनगायैबो बिमा रावआ माहारियारि खौसेथि लाखिनायाव जोबोर गोनां। आथिखाल समाजनि सामाजारि आरो राजखान्थियारि फारागूथिखौ बिमा रावनि गेजेरजों गोरलैयै हमदां हायो। बिमा रावनि गोनांथि आरो बिनिफ्राय मोत्रो हानाय फिथाइनि बेलायाव गाहायाव मख'नाय नोजोरनि बिथिंनिफ्राय सावरायनो हायो।

1. **बिमा रावनि बिजोंआव गावखौ दानो हायो :** बिमा रावआ जाबाय गावनि गोसोनि साननाय-हनाय फोरमायलायनायनि बिजों। बिनि गेजेरजों गसोनि बाथ्राफोरखौ गोरलैयै फोरमायलायो। मानसिनि गोसो इसुंआव एखुमाना थानाय गुना गोसारनानै माहारियारि थुनलाइ सोरजिनायाव बिहोमा होयो। सरासनम्रा बिमा रावनि गेजेरजों सुबुंनि जिउ दानायनि बांसिन फुंखा मोन्नो हायो।

2. **बिमानि रावआ सामाजिक आरो सुबुं सोमोन्दोनि रैखा कबस बादि :** खायफा हालामयाव बिमानि रावानो गुबै जायगा आवग्रिना थायो। जिउखानायनि लामायाव मानसिया बिमानि रावनि गेजेरजों सान्नाय-हनाय फोरमायलायनायनि थाखाय समाजारि दौलेड खोमथा जायो। आनखि गोलेँ गथ'खौबो बिमानि रावाव बाथ्रा बुंनो सर' खालामनाय नुनो मोनो। बिमा रावनि बिजोंआव गावनि सानखांथायखौ फोरमायलायनायनि गेजेरजों सामाजिक आरो सुबुं सोमोन्दो रैखा खालामनानै समाजनि खौसेथियाव बिहोमा होनो हायो।

3. **माहारियारि आरो आजै-आजौ सोदोमसिनि बिजों :** माहारियारि थुनलाइआ मानसे हारिनि जिउ बादि। बिमा रावनि बिजोंजों सोरजिजानाय थुनलाइआ माहारियारि सोदोमसि दानायाव हेफाजाब होयो। बिमा रावआ माहारियारि हारिमुनि रैखा कबस बादि। माहारियारि थुनलाइआ मोनसे हारिखौ दावगाहोनो हायो। बुहुमनि जारिमिनाव बिब्दि गोबां बिदिन्थि दं। जाय हारिया थुनलाइ गैया बै हारिया दावगानाय गैया। बिमा रावनि बिजोंआव बाथ्राफाव, दोहोरोमारि थुनलाइ, खुगा थुनलाइ बादि रनसायनानै माहारियारि सोदोमसिखौ

खोमथा खालामनो हायो। आजै-आजौ मोना गावनि राफोद सोरजिनायखौ लिरना दोनलानानै उन जोलैनो बिहोमा होलांनो हायो। हारिमुनि थाखाय थुनलाइआ दोहोनि जायो आरो हारिमुखौ फोथांना लाखियो।

4. **बिमा रावआ मानसिनि सानखांथायनि राव** : बिमा रावआ जाबाय गोसो आरो जिंगानि राव। मानसिनि दुखु-दाहा, सुखु-गोजोन बायदिया बिमानि रावाव बेरखाडे।

5. **गथ'नि जिउवाव बिमा रावनि गोहोम** : बिमानि रावखौ मिरु खालामनानै गथ'नि जिउखौ दानो हायो। जाय गथ'वा बिमानि रावाव सोलोंथाइ लायो बे गथ'नि साननाय-हनायफोरा राफोद जायो। रावआ जादों गियाननि गुबै खुन्थि। गथ'नि सोलोंथाइआव बिमा रावनि गोहोमा जोबोर मख'जाथाव। जोनोमनिफ्राय थैनायसिम बिमा रावआ जौनि समाजारि एबा माहारियारि जिउवाव जा गोहोम गोलैयो बे गोहोमा जोबोर गोहो गोर।

6. **बिमा रावआ सोलोंथाइनि बिजों** : बुंनाय, फरायनाय, लिरनाय आरो सोलोंनाय आदबजों बिमा रावनि सोलोंथाइ होनाय जायो। बिमा रावनि गेजेरजों सोलोथाइ लानाय आरो रोंगौथि मोन्नानै सुबुंनि जिउ दानायाव मदद खालामो। बिनिखायनो भुम फरायसालि खलबाव इंराजि रावनि सोलाय सोलोंथाइनि बिजोंखौ बिमा राव खालामनाय जादों। बिमा रावनि सर' आरो बाहायनाया जेसेबां गोसारगोन बे हारिनि राव थुनलाइआबो एसेबां गोसारगोन। बिनिखायनो सोलोंथाइ होनाय आरो सोलोंथाइ लानायनि बेलायाव बिमा रावनि 'गोनांथिखौ रावबो गनायालाबानो थानो हाया।

7. **बिमा रावआ सान्नाय फोरमायनायनि बिजों** : बिमा रावआ गोसोनि सान्नाय फोरमायनायनि आयना। रावनि महरा मोननै मोनसेया जाबाय रिसारथिनाय महर, गुबुन मोनसेया जाबाय लिरनाय महर। मानसिया मोनसे थि लामायाव' सानो। सान्नायनि रावआ जाबाय बिमा राव। मानसिनि सान्नाय दाहारा रावनि गेजेरजों बेरखाडे।

8. **बिमा रावआ समायना सोरजिनि बिजों** : सुबुडा समायना सिबिसुला। बिमा रावनि गेजेरजों समायना महरखौ बेरखां होनो हायो। थुनलाइनि गोदै सादखौ मोन्नो हायो बिमा रावनि गेजेरजों। बिमा रावाव माहारियारि राव थुनलाइ, हारिमु बादिनि समायथिखौ मोन्नो हायो। बिनिखायनो बिमा रावनि गियान थानाया जोबोर गोनां।

9. बिमा रावआ गोसोआरि आरो बौद्धिक गोसारनायनि बिजों : मानसिनि मोनदांथाइ गुन आरो आबेगा बिमा रावनि सर'नि गेजेरजों सामलाय जायो। थुनलाइआबो बिमा रावखौ सोनारना राफोद जादों। मोनदांथाय गुन आरो आबेग बादिनि जेंनाखौ बिमा रावआ सुझांदों। सुबुंनि गोसोआरि सान्नाय आरो बौद्धिक बिधिंनि गोसारनायाव बिमा रावआ मदद खालामदों। बे बेलायाव हारिनि बिफा महात्मा गान्धीआ बुंदोंमोन गथ'नि देहा मोदोम बांनों थाखाय जाबादि बिमानि गाइखेरनि गोनांथि बे बादिनो मानसिनि गोसोआरि सान्नाय बेरखांनो थाखाय बिमा रावनि गोनांथि।

आथिखालनि मुगाया बिगियाननि मुगा। गोनोखोआरि सानथौ, दर्शन, बाहायबिगियाननि मुगा। नैबे मुगायाव सोलोंथाइ बिजों हिसाबै बिमा रावनि सोलोंथाइआनो गनायथाव आरो गोहोगोरा बिजों होन्ना UNESCO नि रिपर्टआव बुंनाय जादों। समाज बिगियाननि नोजोरजों बेखेवना नायोब्ला बिमानि रावजों सोलोंथाइ होनायनि फारसे बानबुंथि होनाय नुनो मोनो। बिथां मोननि बादिब्ला गथ'खौ गावनि बिजोंआव फराय होनो नागारना गुबुन बिजोंआव फराय होनाया मोनसे सुबुं बेरेखा खामानि। बिबदिनो बिदेशी रावनि बिजोंआव सोलोंथाइ लानायनि हेंथायै राधाकृष्णन आयोगा औरै बुंदों—"It is educationally usound to make a foreign tongue the means of acquiring knowledge." बिनिखायनो गथ'नि सोलोंथाइ होनाय बेलायाव बिमा रावनि बिजों जानाया मोजां। बिमा रावनि गेजेरजों सोलोंथाइ होनाया सोलोंथाइनि समान मोनथाइखौनो फोरमायो।

आथिखाल बिगियाननि बुहुमाव सानफ्रोमबो गोदान गोदान सान्नाय, गियान बिगियान गोदान गोदान दिहुनथाइ बांबोनो हमदों। बिदियाव सुबुंनि गियान लानायनि बिबाना बांबोगासिनो दं। बिनिखायनो नैबे समाव गथ'नि सोलोंथाइ लानाय बेलायाव गोनोखोआरि आदबजों गथ'नि सोलोंथाइनि बिजोंआ बिमा राव जानाया मोजां।

दिनैनि गोनोखो मुगायाव गथ'फोरनि बिगोमानि गोसोआव साननाय फैदों। गथ'वा मोजां गियान मोन्नो थाखाय गथ'नि जिउ दानो थाखाय मोनसे जौगा थाखोनि रावनि गेजेरजों सोलोंथाइ होनाया मोजां। जेरै आथिखालाव मोनसे दोहौ फैदों, इंराजि बिजोंआव फराय होनायनि। सुबुंनि गोसोआव मोनसे सान्नाय फैदों बे बिजोंआव फराय होब्ला गियान आरो बाहायबिगियान आयदायाव गथ'वा मोजां गियान लानो हागोन। नाथाय बिब्दि साननाया

नंजोबा। बेयो बैसोगोरा सोलोंसानि बेलायावसो गोरोबो। बिब्दि सान्नानै गथ'खौ गुबुन बिजों एबा इंराजि बिजोंआव फराय होयोब्ला गथ'नि सायाव अनागार खालामनाय जागोन। गथ'नि गोसो आरो मलेमखौ साजा होनाय जागोन। ब्रा ब्रानो गुबुन रावखौ सोलोंनो गोनां जानायाव बुजिया बुजियानो गथ'वा आयदाखौ मुखास्थ खालामनो गोनां जायो। गाव रावनि बिजोंआव फरायोब्ला बेफोरखौ गोरलैयै बुजिनानै गोसोआव लाखिनो हायो।

जोबनायाव बेखौनो फोरमायनो हायोदि गावनि गथ'खौ बिमा रावनि बिजोंआव फरायहोनानै गथ'नि जिउ दानायनि बेलायाव जेबो गिनो गोनां गैया। मानोना आथिखाल मुलुगाव जाय हादोरफोरा बिगियान, बाहाय बिगियान, दर्शन बायदिफोराव दावगानाय बेफोर हादोरफोरनि सोलोंसाफोरा गावनि बिजोंआव फरायो। जापान, जार्मान आरो फ्रान्स हादोरनि गथ' एबा सोलोंसाफोरा गाव गावनि बिजोंआव फरायो. आमेरिका हादोरा मुलुगनि जौगानाय हादोर। बिब्दि जौगानाय हादोरनि फरायसाफोरा गाव रावनि बिजोंआवसो फरायो। बे बेलायाव जापानिसुफोरनि आदर्श आरो हादोर सिबिनाया गोसो खांथाव। गोजौ सोलोंथाइनि बिजों हिसाबै बिमारावनि सायाव बेसेन्थि होनानै राधाकृष्णन आयोगा बुंदोंमोन—
"For the medium of instruction for higher education, English be replaced as early as possible by an Indian language, higher education be imparted through the instrumentally of regional language with option to use the medium of instruction, either for some subjects or for all subjects." ■

मदद लानाय बिजाबफोर :

1. असमीया मातृभाषा शिक्षण पद्धति : श्रीहलिराम दास
2. भारतर शिक्षा समस्यात दृष्टिपात : जतीन बरुवा
3. आजि आरो प्रान्तिक लाइसि।

बोरैहाय सासे देरहासाद फरायसा जानो

—बुद्धेश्वर बर'



बुद्धेश्वर बर' (1970) : टंलानि साहा थांबावना बोरिगामिआ बिथानि गामि। आथिखालाव बिथाडा बेथन मोनजायि सासे फोरोंगिरिब्लाबो थुनलायारि हाबाफ्राव मुखुब थानांबाय थायो। बिथाडा लम्ब'दर चहरीया गोजौ फरायसालिनि गाहाइ फोरोंगिरि।

संस्कृत रावाव फंसे श्ल'क दड। बेनो जादों—

बिद्या नाम कुरप रुपममिकं बिद्यानि गुप्त धनं।

बिद्या साधुकरी जनप्रियकरी बिद्या गुरुनां गुरुः॥

बिद्या बन्धुजनार्त्ति नाशनकरी बिद्या परं दैवतं।

बिद्या राजसुपुजिता च धनिनां बिद्याबिहीनः पशु॥

ओंथिया बेनोदि-सोलोंथाइ एबा बिद्याया महर गात्रिनि समायना महर, बिद्याया दोनखोमानाय धोन, बिद्याया आखल गात्रिखौ आखल गोनां आरो नायनो बाजानायखौ बयजोंबो अनजानाय खालामो। बिद्याया गुरुनिबो गुरु, बिद्याया आंगोफोरनि दुखु फोजोबसांग्रा, बिद्यायानो सिबिनां इसोरबादि। बिद्याया राइजो सिबिनायनि खान्थि, बिद्याया धोननि धोन आरो जायहा बिद्या एबा सोलोंथाइ गैया बे सुबुडा जुनारजों समान। ओंखायनो सासे सुबुडा उन्दै समनिफ्रायनो बिद्या एबा सोलोंथाइ लानाया गोनांथि जाना फैयो। थामहिनबा लेखा सोलोंनाय खामानिया जागायनाय जानांगो सुबुं जिउनि उन्दै समनिफ्रायनो, जाहाथे उन्दैनिफ्रायनो रोंखा-राखा, गुनि-गियानि जानानै गावनि इयुन जिउआव देरहासाद जानो हायो। जानो हायो-सुबुं समाजनि बयजोंबो गनायजानाय, मानहोजानाय आरो मोनफ्रोमबो खामानियाव साखा--फारा राफोद लोगोसे आखलै-आखुयै रायखांजानाय सासे समायना सुबुं। बेबादि सासे सुबुं जानायनि गुदियावनो नांगोन जोंनो गिबियावनो सोलोंथाइ। फरायसालिनि गोगो सोलोंथाइ। आरो बे सोलोंथाइखौ लानायनि गोगो समा जादों फरायसा जिउ।

आथिखालाव सासे गथ'साया सरासनस्रायै जिउनि ब्रै/बा बोसोर बैसोनिफ्राय फरायसा जिउखौ जागायजेनो। फरायसा जिउ माने सासे गथ'आ एबा मानसिया थिखानाय मोनसे फरायफारि (Curriculum) नि गेजेरजों जायखि जाया गंसे सोलोंथाइ सालिआव सोलोंथाइ लानाय। सासे मानसिया जिउआव गुबुन-गुबुन बैसोआव गोबां रोखोम सोलोंथाइ लानो हायोब्लाबो फरायसा जिउखौ सरासनस्रायै गिबि थाखोनिफ्राय जागायनानै जौमा (कलेज) एबा भुम फरायसालिनि सोलोंथाइ लानाय जोबनाय सिमहालागै सानना लाथ'जायो। फरायसा जिउआनो जादों सासे सुबुंनि बइनिखुइ गोनांसिन सम। बेखिनि बैसोआवनो सोलोंथाइ लानाय, बाइदि रोंगौथि बुथुमनायनि साबसिन सम। जिउआव देरहासाद जानोब्ला फरायसा बैसोआवनो थोजासे गियान-सोलोंथाइ आरो बाइदि बिथिडव रोंगौथि बुथुमनांगौ। आरो मोनसे खोथाबाव, सोलोंथाइआ सुबुं गोसोनि सोरां, बे सोरांनि साथिफबनायाव खामानि मावना सुबुड धोन-दौलत, मान आरो मोजां मुं खामायनो हायो। बेखायनो फरायसा समाव बोरैबाफोर गावखौनो दैदेननायाव फेलें जायोब्ला बुजिना लादो बिनि जिउआ अरायनि थाखाय खोमसि। लोगोसे बेबादि फरायसाया जेब्लाबो फेलें आरो फेलेंनि मोगा-मोगि जानाडे। अब्ला उनदाहा खालामनायनि अनगा जेबो राहा थाहैया।

सुबुंनि जिउआव देरहासादनायजों लोगोसे जेननाय एबा फेलेंबो थायो। बेबादिनो सोरबा सासे फरायसानि जिउवाव देरहासादनाय, सोरनिबा जिउवाव फेलें जायो। नाथाय नैबे बाथ्रायाबो थारदि गासैबो फरायसानि फरायनाय, रोंनाय गोहो एबा साननो हानाय गोहोआ समान नड। होमब्लाबो गासैबो फरायसायानो नाजाथाबोब्ला दि गोख्रों फरायसाफोरनि सेर-सेर थांफानो हाया बेबादि जेबो जाहोन गैया।

फरायसाया सोलोंथाइजों नागारलायनो हायि सोमोन्दो थायो। फरायसा आरो सोलोंथाइ मोननैबो फैसा गरसेनि फारनै बिखुं। बेखायनोथ' फरायसाखौ सोलोंसा बुडे। सासे फरायसाया देरहासाद जानोब्ला बिनो गोगो सोलोंथाइनि गोनां। गुबुन फारसे, गोगो सोलोंथाइ लानो थाखाय फरायसाया थानांगोन सिमा गैथि नाजाथाबनाय, बानाय-मेंनाय गैथि सोलोंथाबनायनि हाबिला आरो गोसोआव थानांगोन मोनसे गोजौ थांखि। जायनि जिउवाव मोनसे थि थांखि थाया बियो देरहासादनायाव जेंनानि मोगा-मोगि जानाडे। थांखि गैथि सुबुंनि जिउवा लोरगि गैथि दिडफोर बादिनो आन्दाय नाडे। थिग बेबादिनो बाथ्राखौ जों औरैबादिबो बुंनो हायो दि जेरै—रेबगन गैयाब्ला रैबनो हाया, नांगोल गैयाब्ला हा एवनो

हाया, दो नडब्ला ओंखाम संनो हाया बिब्दिनो जिउवाव देरहासाद जानोब्ला नांगौ थोजासे सोलोंथाइ। 'शिक्षा' अदेबानि सोलोंथाइ गैयाब्ला दि जेबो आयदायाव दावगानो हाया आरो सासे सुबुंनि जिउवा नंखाय बे बाथ्राखौ साफ्रोमबो फरायसाया हमदांनो नाजानाया मोजां। बेखायनो सोलोंथाइखौ फरायसा बैसोआवनो आर्जिना लानांगौ। उन्दै बैसो थामहिनबा फरायसा बैसोआ बारलांब्ला लेखा सोलोंनाया गोब्राब जाना फैयो। जैरे गोलै औवाखौ अराव हांना फेंनो हायो नाथाय औवा बोराइखौ फेंनो थंब्ला बायलाडेसो। थिग बेबादिनो बैसो रानानै गियान सोलोंनाया गोब्राब जायो।

जों नुनो मोनोदि गोबां फरायसायानो जिउवाव देरहासाद जानो हाया। फेलें जायो। बे फेलें जानायनि जाहोनखौ बिजिर-बिजिर नायोब्ला गोबां जाहोन नुनो मोनो। बे जाहोनफोरा जादों सेथिआवनो, सासे फरायसाया गावखौ सिनाय रोडि। नैथिआव, गावनि समखौ बेसेन होनो रोडि। थामथिआव, गावनि मावनां खामानियाव गोसो-मोदोम होथाबै। ब्रैथियाव, गावनि थि बैसोजों दावगालांनो नाजायि। बाथिआव, नाडि खामानिआव नांथाबना थानाय। द'थिआव, ओरैनो मोननाय रां-रुफानि फासें लुबैनाय। स्निथिआव, बिमा-बिफा आरो गिदिरनि बाथ्राखौ बेसेन होयि। दाइनथिआव, इसोरनि सायाव फोथायना खामानि मावै। गुथिआव, जायगानि 'परिबेश' एबा आबहावा आरो बाइदि बाइदि।

देरहासाद जानो हायैनि गोबां दड'ब्लाबो, गोजौआव मखनायफोरखौनो गुबै जाहोन महरै बुंनो हायो। नुना मोनो दि गोबां फरायसायानो गावखौ सिनायनो नाजाया। गावनि नख'रनि हालोदआ मा, बिमा-बिफाया मा बेसे दुखु-जालां सहायना फरायहोदों बिखौ बुजि नांगौ। गुबुन धोन-दौलद गोनां फरायसाफोरजों रुजुना गावनि बुजिरोंनाय गोहोखौ, गुसेब खालामना लायो। बिब्दि जायोब्ला बिमा-बिफाखौ, गावखौ फोथायनाया सेब्लाडे। गावनि फरायनाय-मावनाय खामानियाव गोसो-मोदोम होथाबनो हाया जायो। सासे फरायसाया मावनो गोनां खामानिखौ समजों गोरुबफाना मावाब्ला समा बारलांबाय थायो। समा रावखौबो नेबाय थाया। समनि बेसेन होनो रोडिखायनो फरायसाफोरा नाडि खामानि मावना समखौ हगारो। जाउनाव आन्जाद सफैब्ला मा फरायगोन, मा लिरगोन आनदायो। आनजादाव फेलें जायो। बैसोआ बारलाडे। गावनि मावनां खामानि फासें बानाय फैयो। जाय फरायसानि गोसोआव बानाय, सानखांनो हायि बुडि, सुखुनिल' गोसो, बेरामि देहा, उन्दु गादुरा आरो उल्था आथोननि फासें गोसो लोर्बाथि थायो बेफोर बादि फरायसाफोरा जेब्लाबो सोलोंथाइ लानो हाया। बेखायनोथ' बुंदें—

अलसो मन्द बुद्धिश्च सुखो च व्याधिपीडितः ।
निद्रालु कामुकश्चैव षडेते विद्याबर्जिताः ॥

आरोबाव 'गरुड़पुराणम'आव बुंनाय दंबायो औरै—

ये बाल भावान्न पढन्ति विद्यां जो-जौवन स्वास्थ्य धनात्मा द्वाराः ।
ते शौचनीया इहजीवलोके मनुष्य रूपेण मृगाश्चरन्ति ॥

अदेबानि बुंनाय जादों-जाय सुबुड उन्दै समाव सोलोंथाइ लाया, लाइमोन बैसोआव हाबा जायो आरो धोन (रां-रुफा) रैखा खालामै मानसिया बाइदि रोखोम गाञ्जि हालोदआव गोग्लैयो । लोगोसे सुबुंनि महर-लाना जिब-जुनारफोर बादि गिदिंला बायनांगौ जायो ।

नाथाय जोंनि हारिनि गेजेराव बे जानाडै खामानिखौसो जाफुंनाय नुनो मोनो । गोबां फरायसायानो गावनि फरायनाय फार्से उनफिनना उन्दै बैसोआव गोसो-थोलायनाय आरो जुलि लानायनि दिगैसो दावगा लांग्रोयो । उन्दै बैसोआव हाबा लानाया बैसोजों गोरोबना खामानि मावनायनि बेरेखा । गुबुन फार्से, आथिखालनि फरायसाफोरनि औरैनो एबा गोरलैयै मोननाय रां-रुफानि फार्से थानाय गोसो लोरबांथि । बिफा-बिमानिफ्रायनो जा एबा जायखि जाया सुबुंनिफ्रायनो जा, हेंथा गैया जासे मोननाय रां रुफाया सासे फरायसानि गोसोखौ गाञ्जि लामाजों दैदेनलांनायाव हासार जगायो । बिब्दि मोनबाय थानाय रां-रुफानि लामाया उनाव बोरैबा बन्द जाब्ला गांञ्जि राहाजों जैरै—सिखाव-दाखाद, सिगि-सग खालामनाय आरो गावनि देहाखौ नेवसिनानैब्लाबो रां मोननो नाजायो । लोगो लोगो फरायसाया गावनि दावगानाय लामानिफ्राय दोरोदलाडे । जिउआव खोमसिआ साग्लोबो । बेखायनो गावनि आखल-आखुखौ जेब्लाबो मोजाडै दाफुंनो नाजा नांगौ । सासे मानसिनि मोजां आरो गोगो-गोथार आखल-आखुआ देरहासादनायनि मोनसे नागार हायि मोन्थोर । बेखायनो गोदोनि गुरुफोरा बुंलांदों—

दमः क्षमा धृति तेजः सन्तोषः सत्यबादिता ।

हीरहिंसह व्यसनित्य दाक्षां चेति सुखबहाः ॥

गोहो (दम), निमाहा सहायनाय, बोलो (थै), गोजोननाय, सैथोबादि, लाजिनाय, अहिंसा, बाउसोमनाय आरो रेंनाय बेफोरनो मानसिनि सुखुनि गुदि खामानि होनना बुंदों ।

बेखिनियावनो श्रीकृष्णआ अर्जुनखौ थांखिना बुंनाय फंसे बाथ्राखौ मख'नो हायो दि—

श्रद्धावान लभते ज्ञानं तत्परः संयतोन्द्रयः ।
ज्ञानंलब्धापरां शान्तिमचिरेनाधि गच्छतिः ॥

बेनि ओंथियानो जादों—जाय सोलोंसाया सिबिसुला, गुरुनि मोजां—गाज्रि जोथोन लायो आरो गावनि इन्द्रियखौ जैखालामो बेनो गावनि नांगौ गियानखौ मोननानै गोखै 'निर्बाण' (मुक्ति) मोनफुडे। बेखायनो फरायसाफोरा जेब्लाबो गावनि आंगो बिफा-बिमा, फोरोंगुरु, गावनिखुइ बैसोआव गिदिरखौ मानहोनाया गोनां। आरो बिसोरनि थिननायखौ खोनासंनंगौ। लोगोसे फरायसाया अरायबो इसोरनि सायाव फोथायनाय लाखिना खामानि मावग्रा फरायसानि गोसोआ गोथार जायो। गोसोआ गोथार थाब्ला गासैखौबो आंगो साननो हायो। जायखि जाया खामानि मावफुनो बोलो मोनो। बिब्दि होनना गासै समखौनो इसोर सिबिनायाव समखौ हगारना मावनां खामानिखौ उनाव मावगोन होत्रा नारश्रोदना दोनोब्ला देरहासाद नड फेलेंआसो सफैगोन बे थार। बेबादिनो जिउआव देरहासाद जानायनि थांखियाबो बेसेबा गोजानथिं जानगार लांगोन।

बेफोरनि अनगायैबो सासे फरायसाया गाहाम फरायसालिनि आंखालाव, रोंगौथि गोनां फोरोंगिरिनि आंखालाव, गाज्रि आबहावानि जाहोनाव एबा थि थांखि थायि सोलोंथाइ खान्थिनि जाहोनावनो फरायसाया देरहासादनाय लामायाव आन्दायनांगौ जायो। जायनि जाहोनाव फेलेंजोंसो मोगामोगि जानांडे। लोगोसे, सासे फरायसाया जा आयदानि सायाव सोलोंथाइ लायोब्ला दाउगानो हागोन बेखौ नोजोर होआब्लासिनो बिमा-बिफानि एबा बिगोमाफोरनि गोसो बादियैसो सोलोंसानो गोसो गैयि आयदा मोनसेखौ जाबसिनना होनाय नुनो मोनो। जोंनि समाजाव औरैबादि बिगोमाफोरबो दड'दि गावसोरनि गोसो बादियैसो गथ' फोरखौ डाक्टर, इन्जिनियार जाहोनायनि सिमां लाना आर्ट्स, कमार्स फरायहोनायनि सोलाय बिगियान आयदायाव फरायहोयो। बेबादि गोसो गैयि आयदा मोनसेखौ लाना फरायसा सासेआ देरहासाद जानायाव जेब्लाबो गोब्राब जायो। आरो अब्ला जिउआव फेलें जागोन बेयो थार। बेखायनो गाव मा फरायगोन बेखौ फरायसानो गावखौनो थिरांथा लानायनि उदांसि होनांगौ।

गोजौआव सावरायबोनाय गोरोन्थिफोरखौ सासे फरायसाया एरायना आरो मानिना गावनि मावनांगौ खामानिखौ मावलांनो नाजायोब्ला जिउवाव बांद्राय नड इसेब्लाबो देरहासाद जानो हागोन, बे थार। फरायसाफोरनि गुबुन मोनसे गोसो होनो गोनां, गोनांथार बाध्राया जादों—सासे फरायसाया गावनि जिउआव गोजौ थाखोनि अदेबानि मुलुग सोलोंसालि बादि गोजौ थाखोनि लेखा-फरा फोजोबना दिग्री गोनां जाब्लानो देरहासाद जाफुंदों होनना बुंजाया। गाव सोलोंना

आर्जिनो हानाय गियानजों साखि-बाखि मावनो हानांगोन बिमा-बिफा, बिदा-फंबाय, बिब 'बिनानाव, नख 'रनि फोलेरखौ नायनो हानांगोन। आरो गावनि हारि, धोरोम, समाजनि थाखाय मोजां खामानि मावना लामा दिन्थिगिरि जानायजों लोगोसे सासे आदर्श सुबुं जानोबो हानांगौ। गोजौ सोलोंथाइ लाना—डाक्टर, इन्जिनियार जानानै गावनि बिमा-बिफा, नख 'र, समाजनि मोजां साननो हायाब्ला थार ओंथियाव बे सुबुंखौ देरहासाद जादों होनना बुंजाया। सासे गियानि सुबुड जेब्लाबो सोलोंथाइ, धोरोमसुला ब्राह्मन, मोसौ, मैदेर, सैमा आरो गासैखौनो समान नोजोरजों नायनांगौ होनना धोरोम सास्त्रआव ओरै बुंदों—

बिद्याबिनय सम्पने ब्राह्मणे गबिहस्तिनि।

शुनिचैबश्वपाके चपण्डिताः समदर्शिनः ॥

असमीया सानसुमै मानावगेदेर ह 'मेन बरग 'हाजि बिथाड गांसे बिजाबाव बुंनाय बादिब्ला सासे मानसिया गोसो जाब्लानो सासे गिदिर लिरगिरि, बिगियानगिरि एबा शिल्पबिगोमा जानो हायाबो जानो हागौ। मानोना बेयो सोनारो मानसिनि जोनोमजों फैंफानाय गुन, मावनाय-गोहो आरो सुबिदानि सायाव। जिउनि गोबां मावथिलियाव देरहासाद जानो थाखाय गोलाउ सम सोलोंनाय आरो रोंगौथिनिबो गोनांथि जायो। नाथाय साफ्रोमबो मानसियानो जिउयाव मोनसे मावथिलि थायो— जाय मावथिलियाव देरहासाद जानो थाखाय मोनसेबल' गोसो एबा थि थांखिनि अनगा मानसिनो गुबुन जेबो गुन एबा हेफाजाबनि गोनांथि जाया। बे मावखुलिआ जादों गुवार ओंथियाव आखुथाइखौ साबसिन महराव फोसाबनायनि थिलि। रोंगौथि थायाब्ला एबा सुबिदा मोनाब्ला रावनिबो फार्से सासे जाफुंसार डाक्टर एबा आइनजिबि (उकिल) एबा राजखान्थिगिरि जानाया गोलै जायाबो जानो हागौ; नाथाय सासे थार सैथोबादि आरो आदर्श सुबुं जानो थाखाय हास्थायनाय आरो नाजाथाबनायबल'नि अनगा मानसिनो जेबो नाड। बेखायनो रोंगौथि आरो सुबिदानि आंखालाव जाय मानसिया जिउनि गुबुन जेबो थांखि थि खालामनो हाया, मोनसे सरासनमा आरो मुदांखा नडि जिउ खुंनो गोनां जायो, बेबादि मानसियाबो आखुआरि फोसाबनायनि थांखि थि खालामना लाना मोनसे आदर्श गोनां आरो गोजोन जिउ खुंनो हायो।

अदेबानि, जों बेखौनो बुंनो हायो दि गोदो-गोदायनिफ्राय दिनैसिम जेसेबां सुबुड मुलुगाव मुदांखा एबा गावनि मोजां मुं खामायनो हादों बै सुबुंफोरा गावनि आंगोआरि सुखु-गोजोन, धोन-दौलद खामायनायनि गेजेरजों जेब्लाबो जानो हायाखै। बिसोरो गावनि हादरनि थाखाय नडबा हारिनि थाखाय नडबा

सुबुं समाजनि थाखाय —समाजखान्थि, रांखान्थि, राजखान्थि, बिगियान, राव-थुनलाइखौ जोगाहोनायजों लोगोसे जौगानायनि थार आरो गेबें लामा दिन्थिगिरिनि बिबान रुजुनलांदों। आरो बेबेदि बिबाना रुजुननो थांनायाव गोबां दुखु-जाला सहायलांनांदों, बबेबा समाव गावसोरनि हादर सासनगिरिनि राजखान्थिनि खैसारि सहायलांनो गोनां जादों, बांद्रायै जिउनि साजासिमबो सहायनांदों। बैबादि बिदिनथिनि अराय गोसो खांजाथाव सुबुंफोर जैरै—सक्रेटिस, गेलिलिउ, हेमिंवे, महात्मा गान्धी, मादार तेरेसा, उपेन्द्र नाथ ब्रह्म आरो गोबां सानध्रहायै, मिथि मोनै सुबुंफोर दड। नाथाय नैबेयाव बड'फा उपेन्द्र नाथ ब्रह्मनि खोथाखौ बेखायनो गुबैयै मख'फादों बेनो जादों—बुहुमनि रावजोंबो सिनाय जायै मोनसे फिसा हारिनि जानोगैयि गोरिब गुन्द्रानि नख'राव जोनोम जानानैब्लाबो गोबां दुखु-जाला, हेंथा-हेंसि सहायनानै गावनि गोसोनि बोलो आरो नारा-नाथा नाजाथाबनायनि गेजेरजों गोजौ सोलोंथाइ लानो हादोंमोन आरो साखि मोन्दोंमोनब्लाबो नागारना बर' हारिखौ जौगा होनो आरो मुलुगाव सिनायथि होनो नाजाना गावनि जिउखौ बाउसोमदोंमोन। बिथानि बेबाइदि नाजानायनि जुनैनो दिनै बिथाड गैलाब्लाबो 'बड'फा' बिमुं होदों बर' फिसाफोरा।

उनथाराव, सासे फरायसा एबा सासे सुबुड गावनि जिउ मोनसेआवदि गावनि गोगो मावनाय-दांनाय, साननाय-हनाय आरो लामा दिन्थिनायनि गेजेरजों देरहासाद जानो हायो बेखौ रोखायै बुंनो हायो। बेफोरनि अनगा जिउआव देरहासाद जानो एबा मुंदांखा जानायनि गुबुन जेबो सोमोनांथाव राहा लामा बुहुमाव गैया होनना गोखोंयै बुंनो हायो। नाथाय, सोरबाफोर गाज्जि राहायै सुबुंखौ सोमोनांहोनो नाजाना मुं खामायनो नाजायोब्ला एबा मुंदांखा जाब्लाबो बेयो जागोन दान्दिसेनिल' बेयो अराय जोर जानो हाया। बेखायनो प्लाटिनासनि रावै सासे देरहासाद फरायसा एबा सुबुंनि जिउ दानायनि थांखियै बुंनो सानबाय—'आं सायख'ना लागोन बै मानसिनि जिउखौ जायआ गासै जिउनाडै सैथो लामायाव सोलिना फिन-फिथाइ महरै मोनोबल' मुगैनाय, सोंखारिजानाय आरो दुखु-दाहा गोनां थैनाय। जाय मानसिआ सैथोनि थाखायल' थार जिउखौ सायख'ना लाया, अदेबानि माबा मोनसे मुंबान्थानि आसायावसो थार जिउखौ हास्थायो, बेबादि मानसिआ थारैनोब्ला जेब्लाबो थार जिउखौ हास्थायफेरा।'



बर' थुनलाइ आफाद

गाहाइ मावख' : रूपनाथ ब्रह्म भवन, क'कराझार-783370, बड'लेण्ड (आसाम)
दालाइ मावख' : जे. बि. हागजेर भवन, नयनपुर र'ड, गणेशगुरि, गुवाहाटी-781006
फोन आरो फेक्स : 03661-276528, 0361-2203522, 2204798